

ანთიმოზ

ივერიელი

დიდაქეები

და

სხვა თხზულებები

(რიდერი)

რიდერი მომზადდა სსიპ-შოთა რუსთაველის ეროვნული სამეცნიერო ფონდის  
ფინანსური მხარდაჭერით, ფუნდამენტური კვლევებისათვის სახელმწიფო  
სამეცნიერო გრანტის (№ FR/454/2-170/13) ფარგლებში.



## შ ი ნ ა ა რ ს ი

- დიდაქეები და ანთიმოზ ივერიელის სხვა თხზულებები
- კომენტარები
- ანთიმოზ ივერიელის ცხოვრებისა და შრომების ქრონოლოგია
- ანთიმოზ ივერიელი ტექსტების თარგმანისა და კომენტარებისას გამოყენებული ლიტერატურა



# DIDAHII

SĂC

## CUVINTE DE INVEȚATURA

LA DUMINICILE  
SFINTEI PARASIME ȘI LA SĂRBĂTORI ÎMPĂRĂTESCI  
ALE LĂI

**ILIE MIHAI**

Episcopul Cernicilor și al Calavritelor

TIPĂRIȚE DE

P. S. VENIAMIN MITROPOLITUL MOLDAVIEI

după ediția corectată de profesorul G. SMOLESCU, la 1837.

REȚIPĂRIȚE ACUM

ÎN DILELE PREA ÎNALȚĂȚULUI NOSTRU DOMN

**CAROL I**

REGELE ROMÂNIEI

CU APROBAREA ȘI BINE-CUVÎNTAREA SF. SINOUD AL SFINTEI  
BISERICI AUTOCEFALE ORTODOXE ROMÂNE.



BUCHUREȘCI

TIPO-LITOGRAFIA „CĂRȚILOR BISERICESCĂ”

1897.

ନିଉନିଆ ପିପିରି

## ქადაგება №1 ეს ვთქვი, როდესაც გავხდი მიტროპოლიტი

“მოვედით და შემომიდექით მე, და გყვნე თქვენ მესათხევლე კაცთა”.

სრულყოფილნი და ბრძენნი მკურნალნი თავისი ხელობის სიდიადეს მაშინ უფრო ავლენენ, როდესაც არა რკინითა და ცეცხლით იბრძვიან ვნების დასამორჩილებლად, როგორც ამას ომის წესი მოთხოვს, არამედ როდესაც ვნებულ ადამიანს ნაზი შეხებით და ტკბილი წამლებით უწესებენ მკურნალობას. ასევე როდესაც საექიმო ხელობის საშიშ ხერხებზე უარს ამბობენ და ამის სანაცვლოდ, რამდენიმე დღის განმავლობაში, სამკურნალო და ჯანსაღი საკვების დანიშვნით, ავადმყოფს ტკივილსაც უყუჩებენ და სნეულებისაგანაც კურნავენ.

ასევე სულისა და ხორცის ყოვლად ბრძენმა მკურნალმა, მეუფეთა მეუფემან [მაცხოვარმან იესო] ქრისტემან, ღმერთმან ჩვენმან იხილა რა, რომ სამყარო დასნეულებულია ურწმუნოების ვნებით, შეპყრობილია კერპთაყვანისმცემლობის წყლულით და ჭრილობასავით სივდება ამა სოფლის ცდუნებებით, განიზრახა, მრავალი წესითა და საშუალებით ეზრუნა ადამიანთა და სრულიად კაცთა მოდგმის ცხოვნებისთვის. ეს არის მისი სიკეთის უპირველესი საქმე, რომ იხსნას ადამიანი ბოროტის ხელებიდან და აიყვანოს თავდაპირველი მშვენიერებისა და ღირსების მდგომარეობამდე, საიდანაც დაეცა წინაპარი ადამის ურჩობის შეცოდებით. [ყოვლისა მპყრობელ ღმერთს] არ მოჰყავს ცეცხლის წვიმა სამყაროს თავზარდასაცემად, არც ზღვას აღადგენს მტრის სპასავით ქვეყნის მოსასპობად, არც სტიქიათა ძალებს აიარალებს ურწმუნოების წინააღმდეგ, არამედ მხოლოდ კაცთმოყვარებითა და სასწაულებით უხმობს ადამიანებს, სიკეთის ქმედებით და ღვთაებრივი სიტყვებით გარდაქმნის კაცობრიობას და უშუშებს მას სულიერ ვნებებს, რომლებიც მოწამლული ჭრილობებივით ყარს და სივდება.

ჯერ კიდევ განკაცებამდე ინება რა ღმერთმა-სიტყვად განცხადებოდა კაცობრიობას, ადამიანებს მოუვლინა წინასწარმეტყველები, რომ ექადაგათ ამქვეყნად ძე ღვთისას მოსვლის თაობაზე. ამისთვის არ გამოარჩია მეფენი და მთავარნი, არც ფილოსოფოსნი და რიტორნი, არც ზეციდან მოავლინა ანგელოზთა სიმრავლე, რომლებიც არიან უთვალავი რაოდენობით და ემსახურებიან ღმერთს, არამედ გამოგზავნა უბრალო ადამიანები, ცხვრების მწყემსები, როგორებიც იყვნენ მოსე, დავითი, სამოელი და წინასწარმეტყველთა მთელი სიმრავლე, რომელთა მეშვეობითაც დაითესა ჭეშმარიტი სარწმუნოება არა მთელ სამყაროში, არამედ ერთ ერში, ჰებრეებში, რომლებიც ცხოვრობდნენ დედამიწის ერთ-ერთ მხარეს – იუდეაში.

ღმერთს უნდოდა, რომ ყველა ადამიანი მოეყვანა ჭეშმარიტ სარწმუნოებაზე და დაეყენებინა ცხონების გზაზე, რადგან ამაშია ღვთის კაცთმოყვარების დიდი სურვილი, რომ ყველა ადამიანი ცხონდეს, რომ მხოლოდ ჰებრეებს არ ჰქონოდათ ჭეშმარიტი სარწმუნოება, ხოლო დანარჩენი ერები მოკლებულნი ყოფილიყვნენ მის მაძლს. ამიტომ მოისურვა, რომ მთელ სამყაროში გამოჩენილიყო ღვთაების ნათელი: და როგორც იტყვის ნეტარი მოციქული პავლე, ჟამის აღსრულებისას ინება ღმერთმა, მოსულიყო სოფლად მისი ძე, დაბადებულიყო ქალწულისაგან, დამორჩილებულიყო სჯულს, რომ სჯულის ქვეშ მყოფნი გამოესყიდა. განკაცნა ღვთისმშობლისაგან, მარადის ქალწულისა მარიამისაგან, ურთიერთობდა ადამიანებთან და უნდოდა, რომ ყველა ერი მოეყვანა მისი ღვთაებრიობის შეცნობაზე, ესწავლებინა ყოვლად დიდებული საქმეები, ახალი ცნება და ზეციური ცხოვრება, შეუდგა ამ ახალი ცნებების მსახურების ძიებას. არ უძებნია დიდ ქალაქებში, სადაც ხალხთა სიმრავლეა, არც მეფეთა სასახლეებში, რადგან შეიძულა სიმდიდრე და მისი ძალაუფლება, არც რიტორთა დიდებას მიხედა და არც ფილოსოფოსთა სიბრძნეს, არც მეომართა იარაღისა და აბჯრის ძალას მოუხმო და არც სხვა რომელიმე მსგავს ხერხს, რათა არ ეთქვა რომელიმე ურწმუნოს, რომ მსგავსი

საშუალებებით მიიზიდა ქრისტემ ხალხთა სიმრავლე. არამედ, ჩვენ ვიცით, მაცხოვარმა აირჩია მოწაფეები იმავე პრინციპით, როგორც თავის დროზე წინასწარმეტყველნი იყვნენ არჩეულები. რა ქნა? სახარების მქადაგებლებად აირჩია არა მწყემსები, როგორც ეს წინასწარმეტყველების შემთხვევაში იყო, არამედ მეთევზეები და თევზთა<sup>1</sup> მონადირეები და მათ ხელეხსა და ბაგეებს ანდო ცათა სასუფევლის ქადაგება და კაცობრიობის სამკურნალო სულიერი წამლების დარიგება, მოუწოდა რა მათ, უთხრა: “მოვედით და შემომიდექით მე, და გყვნე თქვენ მესათხევლე კაცთა. / შეწყვიტეთ უსულო ზღვაზე შრომა. ჩემი სიყვარულისთვის მიატოვეთ ამქვეყნად მეთევზეობის ხელობა. სულ სხვა მხარეს ისროლეთ თქვენი ბადეები! სულიერი ნადირი მონადირეთ ჩემთვის! მოვედით ჩემდა! შემომიდექით, ჩემო მოწაფეებო და სამყაროს მასწავლებლნო! ჩემი სიყვარულისთვის და ცათა სასუფევლისთვის გამოიყენეთ მეთევზეობის თქვენი ცოდნა!

ზღვასავით ფართოა მსოფლიოში კერპთაყვანისცემა. სამყარო დაფარულია მრავალმერტიანობის ღრუბლით. ურწმუნოების სიღრმე შთანთქავს მთელ მსოფლიოს; ადამიანები იხრჩობიან ეშმაკების ტალღებში. სამყარო ყარს დაღვრილი ბინძური სისხლით და იშლება გახრწნილი მსხვერპლებით. თქვენ, მეთევზეებს, დაგაყენებთ სამყაროს ექიმებად და მკურნალებად. მსოფლიოს თქვენი ხელობა სჭირდება ვნების გამოსასწორებლად. განსაკუთრებული მოშურნეობით ვემსახუროთ განსაცდელში მყოფ ღვთის ქმნილებას; შემომიდექით მე!”

ხოლო მათ მიატოვეს ბადეები და გაყვნენ მას. უფლის ნებისაებრ იყო მოწოდებული მოწაფეთა უმრავლესობა; როგორც უბრალო და მართალ ადამიანებს, მოციქულებს, არ გაუფიქრიათ მზაკვრობა და მათ გულებში ამ მოწოდების მიმართ არ შეპარულა ეჭვი; არამედ, როგორც კეთილი და უბოროტო ადამიანები, გაყვნენ მას ისე, როგორც რკინა მიჰყვება მაგნიტს და როგორც თმა - სუფთა ქარვას. მაცხოვარი იესო ქრისტეს ძალით მოციქულებმა



შეარცხვინეს ურწმუნო წარმართნი და ღვთისმეტყველების ბადეებით, როგორც თევზები, დაიჭირეს ხალხთა დიდი რაოდენობა, მოინადირეს სხვადასხვა ერი, დაიყოლიეს ტირანთა გულები და დაიმორჩილეს იმპერატორთა სულები; მოიპოვეს იმდენად დიდი და მშვენიერი გამარჯვება, რომ მსგავსისთვის არ მიუღწევიათ მთელი მსოფლიოს იმპერატორთ. უიარაღობმა და სამხედრო ხელობის არმცოდნეობმა, უპოვრებმა, უწიგნურებმა, მარხვებისგან დასუსტებულებმა, კეთილებმა და უმზაკვროებმა, მოციქულებმა, აღმართეს არა ჯარის დროშები, არამედ მხოლოდ მშვიდობის ნიშანი – ჯვარი. იქადაგეს ქრისტეზე არა დოლის ან ბუკის ხმით, არამედ სუსტი და უწიგნური ენებით, განავრცეს ჭეშმარიტი სარწმუნოება გაელვების სინათლის მსგავსად, მაგრამ არა გალესილი მახვილების ელვარებით, არამედ მხოლოდ ღვთისმოსავი ცხოვრების ნათელით. არ გაუვსიათ მიწა უთვალავი სპათი და არც ზღვა - აფრებიანი საბრძოლო ნავეებით, არამედ სისხლის, ჭრილობების, დასახიჩრებისა და ძალადობის გარეშე მოციქულებმა მოიარეს მსოფლიო, დაიმორჩილეს მთელი წარმართული სამყარო, სძლიეს ჯოჯობეთს, დაამარცხეს თაღლითობა, გაამევეს ტყუილი და გაავრცელეს მთელ დედამიწაზე და სამყაროში ქრისტეს სახელი და ჭეშმარიტი სარწმუნოება.

ამიტომ, საყვარელნო ჩემო მსმენელებო და პატიოსანნო და კეთილშობილნო თავადნო, მეც, კაცი მცირე და მდაბალი ღმერთმა დამაყენა თქვენს, მცირე სამწყსოს, მწყემსად, რომელსაც მე არ მივიჩნევ მცირედ, არამედ – დიდად და მაღლად; დიდად, რადგან აღიარებთ ჭეშმარიტ სარწმუნოებას და იცავთ მას წმიდად და შეუბილწავად, მიუხედავად იმისა, რომ უცხო ტომელებით გარშემორტყმულები ხართ, მუდმივად იჩაგრებით, იჭირვებთ და იდევენებით იმათგან, ვისაც ეს მიწა-წყალი დაპყრობილი აქვს; მაღლად, რადგან ყოველთვის სამაგალითო თავმდაბლობასა და მორჩილებას ავლენთ ეკლესიისა და მღვდელმთავრის მიმართ.

ღვთის რწმენა და ეკლესიის მორჩილება- ამ ორზე არის დაფუძნებული და გამყარებული ეკლესია. მიუხედავად იმისა, რომ მე ყველაზე უღირსი და მდაბალი ვიყავი, ისევე როგორც დავით მეფსალმუნე იყო ყველაზე მცირე ძმებს შორის მამამისის სახლში, ღმერთმა არ შეხედა ჩემს სიმდაბლესა და უღირსობას, არ შეხედა ჩემს სიღარებასა და უცხოობას, არც ჩემს უვიცობასა და უცოდინრობას, არამედ თავისი უსაზღვრო და უდიდესი სიკეთით დაფარა ხალხისგან ჩემი ყველა სიბილწე და უსჯულოება, რომლებიც სიმრავლით აღემატებიან ჩემს თავზე არსებულ თმას და ზღვაში არსებულ ქვიშას. მე, უღირსი, ამიყვანა მღვდელმთავრობის ამ უდიდეს პატივსა და ხარისხში. და აი, ღმერთმა დამადგინა თქვენს მწყემსად და სულიერ მამად, მლოცველად თქვენი და თქვენი უპატიოსნესი ოჯახების ჯანმრთელობისთვის და ცხოვნებისთვის, მზრუნველად თქვენი სულების სასიკეთოდ, რომ ვიყო თქვენთვის ნუგეშად ამა სოფლის ბაბილონური ტყვეობის ტანჯვის ჟამს ისევე, როგორც ერთ დროს იერემია იყო ღვთის რჩეული ერისთვის და როგორც პატრიარქ იაკობის მეთერთმეტე ვაჟი იოსები იყო ეგვიპტელებისთვის; ამ ცხოვრების განსაცდელების გამო, თქვენთან ერთად უნდა ვიტანჯო და ვითმინო. ჩემი ვალია, ვიყო მღვიძარე, მომურნე, დაუზარავი დღე და ღამე და ყოველ ჟამს თქვენი სულების სასიკეთოდ და ყველას საცხოვნებლად. ღვთის შიშით გასწავლიდეთ და გმოდღვრავდეთ ჭეშმარიტების გზაზე.

ამავდროულად, თქვენც გაქვთ ვალდებულება, რასაც ისწავლით ჩემგან, თვალთმაქცობისა და მზაკვრობის გარეშე მიიღოთ და შეასრულოთ თქვენივე სულების სასარგებლოდ. ასევე გამოიჩინოთ მორჩილება, რადგან ჩემ მიმართ მორჩილებით თქვენ ქრისტეს დაემორჩილებით. რადგან ნათქვამია ლუკას სახარების მე-10 თავში: “რომელმან თქუენი ისმინოს, ჩემი ისმინა; და რომელმან თქუენ შეურაცხ-გვყნეს, მე შეურაცხ-მყოფს; და რომელმან მე შეურაცხ-მყოს, შეურაცხ-ჰყოფს მომავლინებელსა ჩემსა”. ასევე ნეტარი პავლეც ებრაელთა მიმართ ეპისტოლეს მე-13 თავში ამბობს: “დაემორჩილენით

წინამძღუართა თქუენტა და ერჳდით მათ, რამეთუ იგინი იღვიძებენ სულთა თქუენტათვის, ვითარცა-იგი სიტყუაი მისცენ; რაითა სიხარულით ამას ჰყოფდნენ და არა სულთ ითქუმიდენ, რამეთუ არა ადვილ არს ესე თქუენდა”.

და მე ვევედრები მის სახიერებას და კაცთმოყვარეობას, გამინათოს გონება, რომ შევძლო ჭეშმარიტების სიტყვის ქადაგება; გამიმტკიცოს გული ღვთის შიშით, რომ დავმწყემსო მისი რჩეული პირმეტყველი სამწყსო, რომელიც ბოროტის ხელებიდან გამოსყიდულია მისი უპვირფასესი სისხლით, როგორც ბრძანებს მოციქული პეტრე: “უწყოდეთ, რამეთუ არა განხრწნადითა ვეცხლითა გინა ოქროითა იხსნენით თქუენ ამაოისა მისგან მამათა მოცემულისა სვლისა, არამედ ჰატიოსნითა სისხლითა, ვითარცა ტარიგისა უბიწოისა და უმანკოისა ქრისტესითა”.

ხოლო მაღალმან და დიდმან ღმერთმან, რომელიც თაყვანისცემულია ყოველი ქმნილების მიერ, უზენაესი სიბრძნის წყარომ, მიუღწევადი ჭეშმარიტი სიკეთის სიღრმემ, შემოუსაზღვრელი წყალობის უფსკრულმა, ვითარცა უფალმან და კაცთოყვარემან, გარდამოავლინოს მაღლი სულისა წმიდისა ღვთის გვირგვინოსანს, უბრწყინვალეს და კეთილისმყოფელ მთავარ კონსტანტინე ბასარაბზე და დალოცოს ის თავისი მაღალი სამყოფელიდან, ამრავლოს ვითარცა აბრაამი თესლითი თესლამდე, დაიცვას სამეუფო ტახტზე ჯანმრთელობითა და მშვიდობით ღრმა სიბერემდე მთელ თავის ბრწყინვალე ოჯახთან ერთად. მაღალი ღმრთის ძლიერმა ხელმა და უძლეველმა მკლავმა დაგიმორჩილოს ყველა ხილული და უხილავი მტერი შენი ფეხების კვარხცლბეკთან; ასევე თქვენც, მცირედნო და დიდნო, თქვენთან ერთად გაგაძლიეროთ ღმერთმა კეთილ და მართალ სარწმუნოებაში, ჭეშმარიტების შეცნობასა და მარადიული ცხოვრების სასოებაში, რომელიც სამყაროს დასაბამითგან აღთქმულია ყოვლად მართალი უფლის მიერ. ღვთის რჩეულნო, ხელი მოგემართოთ თქვენს ყოველ კეთილ და სასარგებლო საქმეში, დაცული იყავით ყოველ დროსა და ჟამს ბოროტის მზაკვრობებისაგან, გვარავდეთ

ღმერთი თავისი წმიდა ანგელოზებით, შეგჭურვოთ სიმართლის იარაღით, გიბოძოთ მშვიდობა, რომელიც აღემატება ყოველგვარ გონებას, რომ ჯანმრთელობით და მშვიდობით, წმინდად და პატიოსნად გაგეტარებინოთ ცხოვრება; თქვენი გონება და გულები დაიმარხეთ მაცხოვარ იესო ქრისტეში, როგორც ბრძანებს პავლე მოციქული: “რაოდენი არს ჭეშმარიტ, რაოდენი პატიოსანი, რაოდენი მართალი, რაოდენ წმიდა, რაოდენ საყუარელ, რაოდენ საქებელ, რაოდენი სათნო და რაოდენი ქებულ, მას ზრახევდით,,<sup>2</sup> თანამწირველი და ქრისტეს მიერი მღვდელმთავრების ლოცვა-კურთხევით. და ამ ცხოვრების განვლის შემდეგ, ღირს ყვნეს ყოვლადმოწყალებანი ღმერთმან ცათა სასუფეველს და მოვისმინოთ მისი ხმა: “მონაო სახიერო და სარწმუნო! მცირედსა ზედა სარწმუნო იქმენ, მრავალსა ზედა დაგადგინო შენ. შევედ სიხარულსა უფლისა შენისასა”.

---

## ქადაგება №2

### ქადაგება უფლის ფერისცვალებაზე, აგვისტოს თვის, 6

“და წარიყვანა იესო პეტრე და იაკობ და იოვანე, მმა მისი მთასა მაღალსა და ფერი იცვალა მათ წინაშე”.

წმიდა სახარების ეს სიტყვები მოგვითხრობს მაცხოვრის იესო ქრისტეს დიდებულ ფერისცვალებაზე, რომელიც მოხდა თაბორის მთაზე. უნდოდა რა ეჩვენებინა მოწაფეებისა და ჩვენთვის თავისი დიდება, ამ მოვლენამდე ცოტა ადრე, ნათქვამია სახარებაში, როდესაც დადიოდა ფილიპეს კესარიას მხარეებში, მან მოუწოდა თავის მოწაფეებს და ჰკითხა: “ვინ ვჰგონიე მე ერსა ამას და რაი თქვიან ჩემთვის ყოფად?” ხოლო პეტრე მოციქულმა მამა ზეციერის შთაგონებით, მას შემდგომ, რაც დანარჩენმა მოციქულებმა სხვადასხვა

---

მიუგეს, აღიარა, რომ ქრისტე არის ძე ღვთისა ცხოველისა. მაცხოვარმა ამგვარად გამოუცხადა ყველას თავისი დიდება, რწმენაში გაძლიერებულ მოწაფეებს უამბობო თავის მომავალ ვნებებზე, რომ უნდა წავიდეს იერუსალიმში და ეწამოს ერის უხუცესთა, მღვდემთავრთა და მწიგნობრებთაგან, უნდა მოკვდეს და მესამე დღეს აღსდგეს.

ამ სიტყვების გაგონების შემდეგ პეტრე მოციქული, რომელიც ჯერ კიდევ ხორციელი ცნობიერებით იყო, არ იცოდა, რა დიდება უნდა მოჰყოლოდა უფლის ვნებებს. შეეცადა, ეს განზრახვა გადაეფიქრებინა მაცხოვრისთვის და ამ სიტყვებით მიმართა: “შორს შენგან, უფალო, ნუ გიყოფინ მსგავსი რამ”. რაზეც მაცხოვარმა უპასუხა: “ გამშორდი, სატანა! ჩემი საცთური ხარ! რადგან ღმერთისას კი არ ფიქრობ, არამედ კაცისას“<sup>1</sup> ამ სიტყვებით მან უსაყვედურა ხორციელ ფიქრს, რომელიც ყველა ადამიანში თავისი ფესვებით ადამის ცოდვამდე ჩადის. ამბობს, რომ ეს სიტყვები, იმიტომ კი არაა, რომ დაბრკოლებად იქნებოდა მისთვის, არამედ, იმიტომ, რომ ამ სიტყვებით პეტრე აფერხებდა ქრისტეს კაცობრიობის ცხონების საქმესაგან. ამ სიტყვებში ჩანს ღმერთის მხურვალე სიყვარული მთელი კაცობრიობისადმი, ამ მხურვალე სიყვარულით იცვალა ფერი მაცხოვარმა მოწაფეების წინაშე, რათა ისინი რწმენაში გაძლიერებულიყვნენ და არ დაბრკოლებულიყვნენ, როდესაც ნახავდნენ თავის მოძღვარს ჯვარზე ვნებულს.

ამიტომ, დაე ინათოს დღეს მასში დიდების ნათელმა, ნათელმა, რომელიც გაბრწყინდება წმინდანების სხეულებში, როდესაც მიიღებენ მათი სიხარულის სრულყოფილ გვირგვინს. ნათელი, რომელმაც მოიცვა მაცხოვრის სრული სხეული იმდენად, რომ მისი სახე განათდა როგორც მზე, ხოლო სამოსელი გათეთრდა როგორც თოვლი. ხოლო ეს შედარება: სახის ნათელის მზესთან და სამოსლის-თოვლთან მოხდა იმიტომ კი არა, რომ მზეზე ან თოვლზე უფრო ნათელი იყო, არამედ იმიტომ, რომ ჩვენს სამყაროში არ გაგვაჩნია არაფერი, რაც იქნება მზეზე უფრო ნათელი და თოვლზე უფრო

---

თეთრი. ხოლო წმიდანების სხეულებზე თავად მაცხოვარმა ბრძანა მათეს სახარების მე-13 თავში, რომ ისინი გაბრწყინდებიან, ვითარცა მზე მათი ზეციერი მამის სასუფეველში. წმინდანები, რომლებიც ქრისტეს გარშემო არიან როგორც ვარსკვლავები და ამ ნათელს სწორედ სიმართლის მზისგან იღებენ. თუ მაცხოვარი იესო ქრისტე წმიდანებთან ერთად შედარებულნი არიან მზეს და ვარსკვლავებს და თუ ნათქვამია, რომ წმიდანებაც გაბრწყინდებიან როგორც მზე, მაშინ რამდენად უფრო ძლიერად გაბრწყინდება თავად მზე სიმართლისა. და ეს ნათელი კი არ აბრკოლებდა მოწაფეების სუსტ თვალებს, არამედ რაღაცა ღვთაებრივი სიხარულით აღავსებდა და მხოლოდ ეს ნათელი კი არ ბრწყინავდა ქრისტეს სახეზე, არამედ რაღაც ენით აუწერელი სილამაზე და მშვენიერება ჩანდა მასში. რომ შეკრებილიყო ერთ ადგილას მთელი მიწიერი და ზეციური სილამაზე, ვერ შეძლებდა გაეხარებინა მოციქულების თვალები და გულები ისე, როგორც გაახარა მოწაფეების თვალები ქრისტეს თაბორის ნათელმა.

და ქრისტეს მოწაფეების ეს აღმატებული სიხარული მოდიოდა არა ნათელის ბრწყინვალეებიდან, არამედ მაცხოვრის მშვენიერების ბრწყინვალეებიდან იქმნებოდა. ამაში ვხედავთ მაცხოვრის უსაზღვო სიყვარულსა და სათნოებას, რადგან შეეძლო სულ მუდმივად ჰქონოდა ხილულად ეს ნათელი, მაგრამ ჩვენთვის სასიკეთოდ, მან დაფარა თავისი ნათელის სხივები, რომ ეთმინა უსაზღვრო ტკივილები ჩვენთვის, ჩვენი ცოდვებისათვის და გამოვესყიდეთ ღვთაებრივ დიდებას.

მაშასადამე, ვინ იქნება ის, ვინც დაინახავს ამ ყველაფერს და არ აღინთება სრულად მაცხოვრის სიყვარულით? და ვინ არ გაოცდება მისი უსაზღვრო ძალით, რადგან მას შეეძლო სულ მუდმივად ებრწყინა ამ დიდებით? და ვინ არ შეიყვარებს ჩვენს მიმართ გამოჩენილ ასეთ სიკეთეს, რადგან (ჰოი, სასწაული!) იმისთვის, რომ მოეხდინა ჩვენი ცხოვნება, დაფარა თავისი დიდება? რადგან უფრო დიდი სასწაულია ასეთი ბრწყინვალე

---

დიდების დაფარვა, ვიდრე მუდმივად მისი ნათება. და არა მხოლოდ ქრისტეს დიდება ახარებდა მოწაფეების თვალებს, არამედ მოსესი და ილიასი, რომლებიც გამოცხადნენ უფალთან ერთად და ამ ნათელით და დიდებით გარემოცულები იყვნენ. როგორც იმპერატორ არტაქსერქსთან არავის ჰქონდა უფლება შესულიყო უხეში და უშნო ტანსაცმლით, ასევე მარადიული მეუფის წინაშე მის მსახურებს მართებთ იყვნენ შემოსილნი ნათელში და ბრწყინვალებაში. ეს ორი დიდი წინასწარმეტყველი წარმოადგენდა ძველი აღთქმის მამებს: ერთი მათგანი იყო ნომოთეტისი, ანუ სჯულის დამდები, ხოლო მეორე ზილოტისი, ანუ ამ სჯულის განმამტკიცებელი. ღმერთმა ინება ამ ორის თავის თავთან გამოჩენა, რათა სჯულისა და წინასწარმეტყველებისაგან კაცობრიობას მიეღო მოწმობა.

ვის შეუძლია აღწეროს ის სიხარული და მხიარულება, რითაც აღივსო ეს ორი წინასწარმეტყველი, როდესაც მათი უფალი და მაცხოვარი, რომელზეც თავის დროზე ბევრი უწინასწარმეტყველიათ, იხილეს არა მხოლოდ ხორცშესხმული, არამედ ნათელში დიდებაშემოსილი? როდესაც ისინი უფალის იესო ქრისტეს ხილვისა და მოსმენის ღირსი გახდნენ, რისი უდიდესი სურვილიც ჰქონდათ არა მხოლოდ მათ, არამედ სამყაროს ყველა ერს, ვის შეუძლია, მათი სიხარულის აღწერა, მით უმეტეს, რომ ძველი აღთქმის იმდენ მამასა და წინასწარმეტყველს შორის მხოლოდ ესენი ეღირსნენ ასეთი დიდების ხილვას? მართალი მოხუცი სვიმეონი, როდესაც ნახა მაცხოვარი იესო ქრისტე მხოლოდ სახვევებში გახვეული, იმდენად გაიხარა, რომ ყველაზე საშინელ მოვლენას – სიკვდილს, სიხარულის თვალებით შეხედა. ხოლო მოსე და ილია წინასწარმეტყველებმა, როდესაც ნახეს იესო, უკვე დიდებაში შემოსილი, რაოდენ დიდი სიხარულით გაიხარეს და რაოდენ დიდი მხიარულებით გამხიარულდნენ. ადამიანთა ის სულებიც, რომლებიც ჩაკეტილნი იყვნენ აბრაამის წიაღში, როდესაც მოსე წინასწარმეტყველი დაბრუნდებოდა და მოუყვებოდა მათ რაც ნახა და გაიგებდნენ, რომ მათი ხსნა

---

და ცხონება უკვე მოახლოებულია, რა სიხარულითა და სიყვარულით აღივსებოდა მათი მოლოდინი?

მაგრამ, ყველაფერი ეს რადგან აღმატება ჩვენს გონებასა და გაგებას, ამიტომ გარკვეული ფრთხილი დუმილით, სიყვარულით და რწმენით უნდა მივაგოთ პატივი და თაყვანისცემა. პატიოსან და საჭირო საქმედ მიმაჩნია ვიცოდეთ ამ დიდებული ფერისცვალების ჟამს, რა სიტყვებს ეტყოდნენ წინასწარმეტყველები საუბრისას მაცხოვარს იესო ქრისტეს? იქ ,სადაც დიდებული ადამიანები ხვდებიან ერთმანეთს და დიდებული სასიხარულო საქმე სრულდება, გულისხმობს, რომ იქ მშვენიერი და სასიხარულო რამ ხდება. რადგან ვხედავთ, რომ დიდებული ადამიანების სუფრებსა და წვეულებებზე ასე ხდება, ყველაფერი – საჭმელი, სასმელი, საუბრები, ცეკვები და სიმღერები არის სასიხარულო და სამხიარულო: არაფერია ხოლმე სამწუხარო და სამგლოვიარო, არამედ ყველაფერი სასიხარულო და სასიამოვნო.

ვინ არის ის, ვისაც შეუძლია სრულყოფილად აღწეროს დღევანდელი დღის სიდიდე? რადგან ყველაფერი, რაც იყო ყველაზე დიდებული ძველ და ახალ აღთქმაში, ზეცაში და დედამიწაზე დღეს გამოცხადდა, რადგან აქ მოევლინა ძველი აღთქმის ყველაზე დიდი წინასწარმეტყველი და აქვე იყვნენ ახალი აღთქმის ყველაზე დიდი წინასწარმეტყველები; ზეციდან წმინდა სამება განცხადდა, ხოლო დედამიწაზე ქრისტეს წმინდა კაცობრიობა გამოჩნდა. და ამ დიდ და ყოვლად ქებულ სიხარულზე სამი მოციქულის გარდა, რომლებიც ყველაზე მეტად უყვარდა იესოს, სხვა არავინ იყო.

ვნახოთ, რა სასიხარულო საუბრებია. ლუკას სახარების მე-9 თავში ნათქვამია, რომ საუბრობდნენ უფლის ვნებებზე, რომლებიც უნდა მომხდარიყო იერუსალიმში; ესე იგი, საუბრობდნენ ვნებებზე, სიკვდილზე, დაფლვაზე, ჯვარზე, საკვრელებზე, ფურთხებებზე, ყურიმლისცემებზე, შეურაცხყოფებზე და ცემებზე, რომლებიც უნდა მომხდარიყო იერუსალიმში.



---

მაგრამ არის ეს ის დიდებული და სასიხარულო სიტყვები, რომლებიც შეეფერებოდა სათქმელად ასეთ სასიხარულო მოვლენას? ასეთი შინაარსის საუბრები უნდა მომხდარიყო ასეთი დიდი სიხარულის დროს?

მოვლენის არსი სწორედ ეს არის, რომ ეს საუბრები არ უნდა შეფასდეს მიწიერად, როგორც იმ დროს აზროვნებდა პეტრე, არამედ ქრისტეს აზროვნების შესაბამისად, რომელმაც შეიძულა ყოველი მიწიერი და რომლისთვისაც არ იყო არაფერი მეტად ღირსეული, რომ დიდებისთვის აეტანა ვნებებიც და შეურაცხყოფები; რადგან სამყაროს უზენაესმა მოსამართლემ ღმერთმა, იმისთვის, რომ გაეთავისუფლებინა ბოროტის მონობისაგან, კაცობრიობის გამომსყიდველისაგან გამოსყიდვის ეს დიდი ფასი მოითხოვა, რომ ადამიანებისთვის შეეწირა წამებით და დამცირებებით სავსე სიკვდილი, ხოლო, თავად შეწირული მსხვერპლი იმდენად საყვარელი იყო მამა ღმერთისთვის, რამდენადაც ამისთვის კაცობრიობას შეუნდო ყველა ჩადენილი ცოდვა საუკუნეების განმავლობაში და ზეციური ბჭენი, რომლებიც მანამდე დახშული იყო, გახსნა და გამოსყიდულები შეიყვანა თავის მარადიულ წყალობაში. რადგან ამ ერთმა მსხვერპლმა იმხელა წყალობა გამოიწვია, რომ მან გადაფარა ყველა ადამიანის ყველა ცოდვა და უსჯულოება. აქედან უნდა გავიგოთ, რომ ამ თემაზე საუბარი იყო ყველაზე შესაფერისი ასეთი დიდებული მოვლენის დროს. მონისთვის გათავისუფლებაზე მეტად სასიხარულო რა არის? და რა არის უცხოეთიდან სამშობლოში დაბრუნებაზე უფრო დიდი ბედნიერება?

ამიტომ, მოსე და ილია, რომლებიც ამდენი ხნის განმავლობაში დაცილებული იყვნენ თავის სულიერ სამშობლოს, რომელიც ძალიან ენატრებოდათ, რაზე ისაუბრებდნენ უფრო მეტი სიხარულითა და ბედნიერებით, თუ არა იმაზე, რომ მიიღეს უფლება უცხოეთიდან დაბრუნებულიყვნენ თავის სამშობლოში დიდი მღვდლის სიკვდილის გამო? ასევე, მაცხოვარ იესო ქრისტესაც, რა საუბარი ექნებოდა მეტად საყვარელი,

---

ვიდრე სამყაროს გამოსყიდვა? იმდენად ძლიერად უნდოდა მაცხოვარს შეესვა სასუმელი ესე, რომ ის მცირედი დრო, რომელიც დარჩენილი იყო მის შესამადე, ათასწლეულებად ეჩვენებოდა. რადგან ამ სასმისის წყურვილით იქმნებოდა ადამიანთა სულების ცხოვნება, სამყაროს გამოსყიდვა, ეშმაკის ძალის დამარცხება, რწმენის გამრავლება, ცოდვების შენდობა და სულების ხსნა. და იმდენად უხაროდა ამ ყველაფრის გამო, რომ სიხარულის სანაცვლოდ ითმენდა ჯვარზე წამებას, შოლტებით ცემას, ეკლიან გვირგვინს, ჭრილობებს, სულის ტკივილებს და ამ ტანჯვებზე არ ფიქრობდა, როგორც რამე სასირცხვილოზე. როგორც ძველი აღთქმის იაკობს მცირედ მოეჩვენა თავისი სასძლო რაქილისთვის მსახურების 7 წელი, რადგან ძალიან უყვარდა ის. მითუმეტეს, მაცხოვარს, რომელმაც ისე ძლიერად შეიყვარა თავისი სარძლო, რომ მცირედ ეჩვენება ის წამება და ტანჯვა, რომლითაც თავის საყვარელ სარძლოს გამოისყიდის, განწმენდს თავისი უძვირფასესი სისხლით და ხდის მას ულამაზესს, უმწიკვლოს და უნაკლოს.

ამიტომ, ყველაზე საყვარელი და სასიხარულო საუბრები მისთვის იქნებოდა სწორედ ის, რასაც ძალიან ნატრულობდა. იცოდეს ყოველა ჩვენგანმა კაცთმოყვარე ღმერთის ენით აღუწერელი სიკეთე, უდიდესი წყალობა და სრულყოფილი სიყვარული, რომელმაც (არა თავისი თავისთვის, არამედ ჩვენთვის - საზიზღარი მატლებისთვის) დაითმინა ამდენი ტანჯვა, ტკივილი, ვნება და სიკვდილი.

ხოლო ჩვენ, იმ სიკეთისთვის და სიყვარულისთვის, რომელიც ჩვენთვის არის ნაბოძები, განა არ უნდა დავითმინოთ მცირედი გაჭირვება მაინც? ამ თემებზე საუბრისას მოსე და ილია ეშაადებოდნენ უკვე წასასვლელად პეტრე მოციქულმა, რომ არ მოკლებულიყო ამ მშვენიერებასა და ბრყინვალე ნეტარებას, თქვა: “მომღვარ, კეთილ არს ჩუენდა აქა ყოფაი, და ვქმნეთ აქა სამ ტალავარ: ერთი შენდა და ერთი მოსესა და ერთი ელიაისა”, რადგან არ იცოდა რას ამბობდა; რადგან ამ დროს არცერთი ხორციელი საქმე

---

არ ახსოვდა, არც საჭმელი, არც სასმელი, არც სიცოცხლე, არც სიკვდილი, არამედ ყველა საგანი, საკუთარი თავიც დაავიწყდა და როგორც მთვრალი ამ ღვთაებრივი მშვენების სიყვარულით, მხოლოდ იმას ნატრობდა და იმისკენ მიისწრაფოდა, რომ მარადიულად ამ ნეტარებაში დარჩენილიყო. მაგრამ, პეტრე მოციქული გამოთქვამს რა თავის სურვილს, მაინც ემორჩილება ღვთის ნებას, რადგან თქვა: უკეთუ გნებავს, ვქმნათ აქ სამი ტალავარი, ანუ არის შენი ნება.

ამის შემდეგ, სახარება მოგვითხრობს, რომ: “ვითარცა ამას იტყოდა, აჰა ღრუბელი აგრილობდა მათ და ხმაი იყო ღრუბლით გამო: ესე არს ძე ჩემი საყუარელი, ამისი ისმინეთ. და ყველა, ვისაც უნდა იყოს ჩემთვის მოსაწონი, რწმენით და სიყვარულით მასთან ერთად იყავით; რადგან ის გაგიხსნით ცხონების გზას და ჯვრის მეშვეობით აღგიმართავთ ცათა სასუფეველში აღმავალ კიბეს. მას უსმინეთ, რადგან ის არის გზა, ცხოვრება და ჭეშმარიტება, ის არის ჩემი სიტყვა და სიბრძნე; ამიტომ, მას უსმინეთ და არა ამ სოფელს, არც საუკუნეების წინანდელ გველს, არც ხორცის მოთხოვნილებებს, არც ფარისევლების სიტყვებს. არამედ თაბორის ნათელი, მოსე და ილია და სხვა სასწაულები, რომლებიც იხილეთ, მიიღეთ ჭეშმარიტების მოწმობად”.

ასევე, ნათქვამია სახარებაში, მოწაფეებმა გაიგონეს თუ არა მამა ღმერთის ხმა, შიშისაგან დაეცნენ პირქვე კანკალით. თუ ღმერთის ასეთმა ტკბილმა და მანუგეშებელმა ხმამ გამოიწვია ამხელა შიში, რაოდენ დიდ შიშს გამოიწვევს უკანასკნელი სამსჯავრო? თუ ასეთ დიდ შიშს იწვევს სჯულის დაცვის შთაგონება, რაღა იქნება იმ შემთხვევაში, როდესაც ვინმე აღმოჩნდება ცნებების მიმართ ზარმაცი და დაუდევარი? ნეტავ რატომ? ასეთი დიდი და სასიხარულო მოვლენის დროს, როდესაც ღმერთმა ინება თავისი დიდებისა და მშვენიერების განცხადება, ამავე დროს, ინება თავისი მოწაფეების ესოდენ შეშინება? რა თქმა უნდა, იმისთვის რომ ვისწავლოთ მეორე ფსალმუნის შინაარსი, სადაც წერია: “ჰმონეთ უფალსა შიშით, და უგალობდით მას

---

ძრწოლით”. რადგან შვენის ადამიანს დიდ სიკეთეზე გახარება და დიდ დიდებულებაზე შიში და ძრწოლა.

რადგან ეს ორივე გრძნობა შვენის ღმერთს, ამიტომ მარადიულად უნდა ვადიდოთ და ვაქოთ იგი და ვთხოვოთ მის დიდი შეწევნა და წყალობა. რადგან მისი წყალობის გარეშე ვერაფერს ვერ ვიზამთ ჩვენი სულების ცხონებისთვის; რადგან თვითონვე თავისი უტყუარი პირით ამბობს: “უჩემოდ ვერაფრის შემძლებელ ხართ.” და თუ მის გარეშე ვერაფრის შემძლებელნი ვართ, ისევ, გულის სიღრმიდან და მხურვალეებით მას უნდა მივმართოთ ლოცვით – შეგვიწყალოს დიდითა წყალობითა თვისითა და მრავლითა მოწყალებითა აღხოცოს უსჯულოებნი ჩვენნი, აგვიხილოს თვალნი სულისა და ხორცისა ჩვენისა, რათა შევიცნოთ განგებანი მისნი; ჩვენი სხეულებიდან მოკვეთოს ყველაფერი ხორციელი, ჩვენი ქვის გულების სანაცვლოდ მოგვცეს ცოცხალი გულები, რომ ვიქონიოთ ღვთის შიში და აღვასრულოთ მისი ცნებები. ასევე, როგორც მოციქულებს, ჩვენც გაგვინათოს გულები, რომ მარადის გავძლიერდეთ ხილულ და უხილავ მტრებზე, წარმართოს სვლანი ჩვენნი ცნებების კვალზე და გვიბოძოს კეთილი აღსასრული, რომ მარადის ქებულ და დიდებულ იყოს სახელი მისი უკუნითი უკუნისამდე. ამინ.

### **ქადაგება № 3**

#### **ქადაგება ყოვლაწმინდა ღვთისმშობლის მიძინებაზე**

ის მოშურნეობა და სიყვარული, რომელსაც ვხედავ მე ამ პატიოსან და წმინდა შეკრებაზე, ჩემში აღძრავს საუბრის სურვილს, თუმცა ჩემი ქადაგება არასდროს არ არის იმ ღირსების, რომ ის მსმენელებს მოეწონოთ. მაგრამ როგორც უფალმა იესო ქრისტემ

---

განადლო ხუთი ათასი და ამით გამოასწორა თავისი მოწაფეების სულიერი უძლურება და სიღარიბე, ასევე მეც, მოგმართავთ სიყვარულით, რათა ჩემი არარიტორიკული სიტყვით, მოგართვათ სულიერი ტაბლა.

ბევრჯერ მიფიქრია, რომ რამე ახალი მეთქვა ყოვლადწმინდა ღვთისმშობლის მარიამის საქებად და სადიდებლად, მაგრამ ვერაფერი მოვიფიქრე. იმიტომ კი არა, რომ არ არსებობს მრავალფეროვანი სიტყვები მისი ღირსების საქებად, არამედ იმიტომ, რომ ჩემი გონება არის უმეცრების ღრუბლით დაბინდული და ვერ ვწვდები ღვთაებრივ სიმაღლეებს.<sup>2</sup> ამიტომ მიხდება ჩემს უმეცრებასა და უღირსებასთან შეჭიდება. იმ დროს, როდესაც მცოდნენი და სულიერ სიკეთეებში წარმატებული ადამიანები ღუმილით დგანან<sup>2</sup> და ამგვარად ადიდებენ ღვთისმშობლის სიღიადეს, მე, უმეცარმა და ყველანაირი სიკეთისგან დაცლილმა, რა უნდა ვთქვა?

ამიტომ ვცდილობ, გონებით მივწვდე მისი ქალწულების სიმაღლეს, რისკენაც მიისწრაფვის ყოველი ადამიანის გონება, თუმცა ეს სიმაღლე თვით ანგელოზთა მზერისთვისაც მიუღწევადია. ღვთისმშობელს შეიძლება მივმართოთ მხოლოდ იმ სიტყვებით, რომლებიც საუკუნეების წინ განისაზღვრა მისთვის უფლისაგან და რომლითაც მას მიმართა გაბრიელ მთავარანგელოზმა. ამიტომ მის საქებად, დიდი შიშით, მეც გავიმეორებ იმავე სიტყვებს: „გიხაროდენ მიმადლებულო, უფალი შენთანაა“. ამაზე დიდი ქების და პატივის გამოსახატავი სიტყვები სამყაროს დასაბამიდან ჯერ არ თქმულა არავის მიმართ, არამედ მხოლოდ მისთვის გამოითქვა. რამეთუ მან ღვთისგან მიიღო მადლი, რომელიც ანგელოზის სიტყვისაებრ, ჯერ არავის სხვას არ მიუღია. თუმცა წმინდა წერილში სხვა

---

ადამიანთათვის სხვაგვარადაც ყოფილა გამოთქმული ქების სიტყვები. მაგალითად, შესაქმის მეოთხე თავში აბელის მიმართ ნათქვამია: „მოიხილა ღმერთმან აბელს ზედა და ძღუენთა მისთა ზედა“; ენუქის შესახებ კვითხულობთ: “ნათქვამია, სათნო უყო ღვთისთვის, მაგრამ აღარ იყო, რადგან ამაღლებული იყო მასთან“; ნოეს შესახებ ნათქვამია: „რადგან მხოლოდ ნოეს ეპოვა მაღლი უფლის თვალში და დაიცვა წარღვნისაგან“;<sup>2</sup> აბრაამის შესახებ: „იწამა ღმერთი და ეს შეერაცხა მას სიმართლედ და გახდა მამა მრავალთა“;<sup>2</sup> იოსების შესახებ: „იყო უფალი მასთან და გადმოაფრქვია მასზე წყალობა და უბოძა მას მაღლი“; მოსესთან დაკავშირებით წერია: „ეს სიტყვა, რომელიც თქვი, აღვისრულებ, რადგან მოიპოვე მაღლი ჩემ წინაშე და შენ გიცნობ უფროს ყოველთა“; დავითის მიმართ ნათქვამია: „ვნახე კაცი ჩემი გულის სულვისამებრ ისეს ძე, რომელიც შეასრულებს ყველა ჩემს სიტყვას“.

და რომ არ გამიგრძელდეს სათქმელი, ძველი თუ ახალი აღთქმის ყველა წინასწარმეტყველისა და ყველა წმინდანისათვის ანგელოზებს ნათქვამი ჰქონდათ ხარების სიტყვები და ღმრთისგან მათაც ჰქონდათ მინიჭებული მაღლი და წყალობა, თუმცა დაფარულად.

ხოლო წმინდა ქალწულს მიეცა ჭეშმარიტი ხარების სიტყვები, რომლებიც ყველანაირ გონებაზე აღმატებულია; სიტყვები დიდების, პატივისა და სიხარულის, რომელიც აღმატება ყველა ნიჭსა და წყალობას: „გიხაროდენ მიმაღლებულო, უფალი შენთანაა“, და არა მხოლოდ ამ სახარებო სიტყვების გამო არის ის დიდებული ყოველ ერში, არამედ იმ ყოვლადპატიოსანი სახელისთვისაც, რომელიც მას ჰქონდა - მარიამი. რადგან მისი ძის სახელი არის ყველა სახელზე აღმატებული, პავლე მოციქულის სიტყვების მიხედვით: „და მიეცა

---

მას სახელი აღმატებული ყველა სახელზე აღმატებული“. ასევე ღვთისმშობლის სახელიც იესოს სახელის შემდეგ არის ყველაზე აღმატებული.

და როგორც სახელი იესოს წინაშე მუხლს იყრის ყოველი ზეციერი, მიწიერი და ქვესკნელის ბინადარი, ასევე დედა ღვთისმშობელი ზეცაში არის უპატიოსნესა ქერუბიმთასა და აღმატებით უზესთაესსა სერაფიმთასა და სამყაროში მორწმუნეთათვის არის ყოვლად თაყვანისსაცემელი და ნეტარი, როგორც დედამიწის დედოფალი. ხოლო ქვესკნელში მყოფი ბოროტი სულებისთვის არის ყველა წმინდანზე საშინელი. ჩემი მდაბიო გონებისათვის სახელი მარიამი მიგვანიშნებს სამ რამეზე: 1) რადგან ეს სახელი სამი მარცვლისაგან შედგება, ამითი ვიგებთ რომ მან შვა წმ. სამების ერთ-ერთი პირი, ძე და სიტყვა ღვთისა; 2) თითოეული მარცვალი შედგება ორი ასო-ბგერისაგან, ამაში ჩანს მაცხოვრის ორი ბუნება, ღვთაებრივი და კაცობრივი და 3) მთელ სახელში ექვსი ასო-ბგერაა, რომელშიც ვხედავთ ექვს საუფლო დღესასწაულს: ხარება, შობა, ნათლისღება, ჯვარცმა, აღდგომა, ამაღლება. ხარებით განცხადდა საუკუნეებში დაფარული საიდუმლო;<sup>2</sup> შობით შერიგდა ზეცა და დედამიწა, ღმერთი და ადამიანი; ნათლისღებით ჩვენ შევიმოსეთ უხრწნელობის სამოსით, სიკვდილით ჩვენ მოგვეცა სიცოცხლე; აღდგომით მოგვეცა სიხარული და ზეცაში ამაღლებით მამა ღმრთის მარჯვნივ დაჯდომა.

ასევე ანგელოზის მიერ ნათქვამ ხარების სიტყვებში „გიხაროდენ, მიმადლებულო, უფალი შენთანაა“ ისევ ვხედავთ ყოვლადწმინდა სამების სახელს. რადგან სიტყვაში *გიხაროდენ* იგულისხმება ძე ღმერთი, რადგან ის არის სამყაროს სიხარული. ხოლო სიტყვაში *მიმადლებულო* იგულისხმება სული წმინდა,

---

რადგან ის ანიჭებს ყოველივეს მადლს, ხოლო სიტყვებში უფალი მენტანაა, იგულისხმება მამა ღმერთი, რადგან ისაა ყოველი ხილულისა და უხილავის უფალი.<sup>2</sup>

ხოლო უფალ ღმერთს, რომელმაც მხოლოდ სიტყვით შექმნა და ააღორძინა ყოველი ხილული და უხილავი, თავისი ყოვლადძლიერებით შეუძლია შექმნილ ვარსკვლავთა უკაშკაშესნი შექმნას; ღამის მანათობელ მთვარეზე უფრო ნათელი შექმნას; მზე შექმნას უფრო დიდი და მზურვალე, ვიდრე გვაქვს; არსებულზე ვრცელი ცა; მგალობელ ფრინველებზე უფრო ხმატკბილნი; არსებულ ყვავილებზე მეტად კეთილსურნელნი; ხეები უფრო ნაყოფიერნი; ქარები და ჰაერი უფრო ჯანსაღი და სასარგებლო; ცხოველები უფრო მრავალფეროვანი და მრავალრიცხოვანი; სამყარო უფრო დიდი და საკვირველი, რომელშიც ჩვენ ვარსებობთ. მაგრამ არსებას, რომელიც თავის ღირსებით აღმატებოდეს დედა ღვთისმშობელს, ღმერთი ვერ შექმნის, მისი ყოვლადძლიერების მიუხედავად.<sup>2</sup> ისევე როგორც შეუძლებელია წარმოვიდგინოთ რაიმე არსება მეტად აღმატებული, ვიდრე ღმერთი; ასევე ვერ წარმოვიდგენთ ქმნილებას მეტად აღმატებულს ვიდრე ის, რომელმაც იტვირთა განკაცებული ღმრთის დაბადება. და ეს იმიტომ, რომ ის აირჩია თავად ღმერთმა, რომ იყოს მისი მარადიული სამყოფელი, როგორც ამას ამბობს წინასწარმეტყველი დავითი: „ესე არის განსასუენებელი ჩემი უკუნითი უკუნისამდე, ამას დავემკვიდრო, რამეთუ მთნავს ესე“.<sup>2</sup>

გამორჩეულია ჭეშმარიტად, როგორც მზე, რადგან ღვთის ნიჭიერებითაა გვირგვინოსანი და უფრო მეტად ანათებს, ვიდრე ცის ყველა მნათობი.



---

გამორჩეული და მშვენიერია, როგორც მთვარე, რადგან თავისი სიწმინდის ნათელით ჩრდილავს ყველა სხვა ვარსკვლავს და ყველა ვარსკვლავი თაყვანს სცემს მას, როგორც დედოფალს.

გამორჩეულია, როგორც ცისკრის ნათება, რადგან მან განდევნა ცოდვის სიბნელე და ღამე და მოიტანა სამყაროში სიცოცხლის მომნიჭებელი დღე.

გამორჩეულია, რადგან არის წყარო, რომელიც თავისი ღვთაებრივი სიკეთეების დინებით დაარწყლულვებს წმ. ეკლესიას და ყველა ქრისტიანის სულს.

გამორჩეულია, როგორც კიპაროსი, რომელიც თავისი სიმაღლით აღემატება ზეცას და თავისი კეთილსურნელებით გააქრობს ყოველგვარ გახრწნილებას.

გამორჩეულია, როგორც შროშანი, მიუხედავად იმისა, რომ ცოდვაში დაცემული კაცობრივი ბუნებით იშვა, არ დაუკარგავს უბიწოების სიქათქათე და მაღლი.

გამორჩეულია, როგორც ღრუბელი, რადგან არ განუცდია ცოდვის სიმძიმე.

გამორჩეულია, რადგან ქალწული იყო შობამდე, შობისას და ქალწულად დარჩა შობის შემდეგ. არის სათნოების სიღრმე და ზეციური მშვენიერების ღვთის სულიერი ხატი. არის ბაღი, რომლიდანაც აღმოცენდა დაუჭკნობელი ყვავილი და დაბეჭდილი წყარო, საიდანაც სათავეს იღებს ცხოვრების წყარო, მაცხოვარი იესო ქრისტე.

ის იხილა მოსემ სინას მთაზე, როგორც დაუწველი მაყვალი.

ის იხილა აარონმა, როგორც აყვავებული და ნაყოფით სავსე კვერთხი.

---

ის იხილა იაკობმა, როგორც კიდე დედამიწიდან ზეცამდე, რომელზეც ადიოდნენ და ჩამოდოდნენ ღვთის ანგელოზები.

ის იხილა ეზეკიელმა, როგორც დახშული კარი, რომელშიც არავის გაუვლია.

ის იხილა გედეონმა, როგორც საწმისი, აბაკუმმა, როგორც ჩრდილოვანი ხეივანი, დანიელმა, როგორც მთა და სოლომონმა, როგორც სარეცელი.

დედა ღვთისმშობელი დღეს გადადის დედამიწიდან ზეცაში; ტოვებს მწუხარებას და მიდის სიხარულში, ტოვებს მიწიერს და ღებულობს ზეციურს; ტოვებს ხრწნადს და იხვეჭს მარადიულობას და უკვდავებას. დღეს ის აბარებს თავის უწმიდეს სულს თავის ძის ხელში და ანგელოზებისა და მოციქულების გალობით მiasვენებენ მის უპატოსნეს სხეულს გეთსიმანიის ბაღში დასასაფლავებად.

დღეს ზეცა შლის თავის მკლავებს და ღებულობს მას, ვინც დაბადა ის, ვისაც ვერ იტევს მთელი ქმნილი სამყარო.

დღეს გაოცებულია ანგელოზთა მთელი დასი და ეკითხებიან ერთმანეთს: ვინ არის ეს, რომელიც მალღდება უდაბნოდან, ანუ დედამიწიდან ზეცაში? ვინ არის ეს, რომელიც გვევლინება, როგორც ცისკარი, მშვენიერი, როგორც მთვარე და გამორჩეული, როგორც მზე? ვინ არის ეს, რომელიც მალღდება დედამიწიდან ზეცაში, სპეტაკი, აყვავებული, რომელშიც არ არსებობს ნაკლი? აღიხვენით ბჭენნი თქვენნი, ეუბნებიან ანგელოზთა დასნი ერთიმეორეს, აღიხვენით ბჭენნი და გალობით და დიდებით მიიღეთ ზეცისა და ქვეყნის დედოფალი, რომელიც მოდის ზეცათა მეუფე ღმრთის მარჯვენით დასაბრძანებლად, შემოსილი ოქროს სამოსლით და შემკულ-მორთული, როგორც ამას ამბობს დავით წინასწარმეტყველი. რადგან დედა მარიამმა შეარიგა ზეცა და

---

დედამიწა, ღმერთი და კაცი. ის არის მართალთა სიხარული და ცოდვილთა სასოება.

ასევე ჩვენც, სიყვარულით და ღირსებით, სუფთა გულით, გალობით და დიდებით, ვაქებდეთ და ვადიდებდეთ დედა ღვთისმშობელს და სულიერი სიხარულით ვიდღესასწაულოთ მისი მიძინება. ჰოი, დედაო მარიამ! ეს ხალხი, რომელიც დგას შენი დიდებულების წინაშე, ხედავს რა შენი სიწმინდის სიმართლეს და ამავდროულად თავის უღირსობასა და სიმდაბლეს, ვერ ბედავს შუამდგომლის გარეშე თაყვანი გცეს და გმადლობდეს შენგან მიღებული სათნოებისათვის და შეავდრონ შენს წყალობას თავიანთი სულები. ამიტომ, დედაო ღვთისავ! მე უღირსი და დიდად ცოდვილი შენი მონა, შენი ძის მიერ ვარ დადგენილი ამ სამწყსოს სულიერ მამად და ჩემი მეშვეობით ისინი გულის სიღრმიდან და მხურვალეებით ლოცულობენ: „ყოვლადწმიდაო ღვთისმშობელო, ზეცისა და ქვეყნის დედოფალო, ქრისტიანეთა დიდებაო და პატივო, უმაღლესო ცათაო და მზეზე უსპეტაკესო, ყოვლადქებულო ქალწულო, ცოდვილთა სასოებაო, სიმშვიდეო მათთვის, ვისაც ეკვეთება ცოდვების ტალღები, მოხედე ერსა შენსა და იხილე სამკვიდრებელი შენი, ნუ მიგვატოვებ ცოდვილთა, არამედ შეგვეწიე და დაგვიცავ მზაკვრებათა ბოროტისათა, რამეთუ შეგვაჭირვეს მწუხარებანი, ბოროტებანი, ჭირვეულობანი და ვნებანი. მოგვეც ხელი დახმარებისა, ყოვლადწმიდაო ქალწულო, რამეთუ წარვწყდებით. ნუ მიგვატოვებ, რამეთუ შენ ხარ ჩვენი შემწე და ჩვენ შენ გესავთ, რათა შენი ძლიერი დაუძლეველი ოხითა ევედრე მესა შენესა, რათა წყალობა ჰყოს ჩვენზედა და დაგვიფაროს ჩვენ; მერმეცა ევედრე მხურვალედ, რათა ჩვენი ღვთისრჩეული მთავარი, რომელიც უფლის განგებით დადგენილია ერის მმართველად, შეძლოს ჯანმრთელობით

---

და დღეგრძელობით, მთელი თავისი სამწყსოს სიბრძნით მართვა და დაცვა ხილული და უხილავი მგლებისაგან; მერმეცა ევედრე, რათა დაიცვას ეს უპატოსნესი თავადებიც ყოველი განსაცდელისაგან და ბოროტთა მზაკვრებათაგან და მისცეს მათ სიყვარული, ერთობა, შეწევნა და დახმარება ყველა კეთილ საქმეში; მერმეცა ევედრე, რათა ჩვენ ყოველთა წარვმართოთ ცხოვრებაი ჩვენი სიწმიდით, პატოსნებით, უბიწოდ, რათა ერთითა პირითა და გულითა მარადის გაკურთხევდეთ და გადიდებდეთ მლაღადებელნი: „გიხაროდენ, მიმადლებულო, უფალი შენთანაა!“

## ქადაგება № 4

### ქადაგება მეზვერისა და ფარისევლის კვირიაკეს

დიდმა სურვილმა და წმინდა სიყვარულმა და განსაკუთრებით თქვენს მიმართ ჩემმა სულიერ-მამობრივმა მოვალეობამ მაიძულა მოვსულიყავი დღეს თქვენთან დასამოდვრად, რადგან მე უღირსი დამადგინა ღმერთმა თქვენს მოძღვრად, სულიერ მამად და მაცხოვრებელი ცხოვრების მასწავლებლად. ამიტომ თქვენი ყველასი, დიდისა და პატარის მოვალეობაა მომისმინოთ და შეასრულოთ, რასაც გასწავლით, რადგან ესაა მორჩილება ქრისტესი და არა ჩემი. ლუკას სახარების მე-10 თავში ნათქვამია: „რომელმან თქუენი ისმინოს, ჩემი ისმინა; და რომელმან თქუენ შეურაცხ-გვეყნეს, მე შეურაცხ-მყოფს“.<sup>2</sup> ასევე ნეტარი პავლე მოციქულიც ებრაელთა მიმართ ეპისტოლეში ამბობს: „ მმანო, დაემორჩილენით წინამძღუართა თქუენთა და ერიდეთ მათ, რამეთუ იგინი იღვიძებენ სულთა თქუენთათვის, ვითარცა-იგი სიტყუაი მისცენ; რაითა სიხარულით ამას ჰყოფდნენ და არა სულთითქუმიდენ, რამეთუ არა ადვილ არს ესე თქუენდა.“<sup>2</sup>

---

ამიტომ მაცხოვარ იესო ქრისტეს ცნების თანახმად, მე ვევედრები მას, მომცეს ძალა და მადლი, შევძლო გითხრათ სულისთვის სასარგებლო სიტყვები. თქვენი დამოდღვრება არასდროს არც გადამიღია და არც დამზარებია. ამიტომ გთხოვთ, მომისმინეთ.

როგორც სახლის პატრონი, სანამ დათესავს სუფთა ხორბალს თავის მამულში, ჯერ დიდად შრომობს, რომ გაწმინდოს ხორბალი ღვარძლისაგან და სხვა უსუფთაობებისაგან, ასევე ჩვენმა წმინდა მამებმაც დიდად იღვაწეს და გამოარჩიეს კეთილგონიერების საცრით მთელი წმინდა წერილი და როგორც სუფთა ხორბალი, ყველა არსებული სათნოებიდან გამოარჩიეს სამი დიდი სათნოება: რწმენა, სასოება და სიყვარული და დათესეს ისინი წმინდა ეკლესიის მიწაში, ანუ მორწმუნეთა გულებში. და ყველა ქრისტიანის მოვალეობაა, შეასრულოს ისინი. რადგან, ვინც რა არ უნდა თქვას, ამ სამი სათნოების გარეშე არცერთი სხვა საშუალებით არაა შესაძლებელი ქრისტიანის ცხონება, რადგან ისინი ქრისტიანობის საფუძველს წარმოადგენენ. რადგან შეუძლებელია ვინმემ იცხოვროს დედამიწაზე ხორციელი საკვებისა და ჩასაცმლის გარეშე და არც ძილის გარეშე, ასევე ამ სამი სათნოების - რწმენის, სასოებისა და სიყვარულის გარეშე შეუძლებელია არსებობა. დასაწყისში ვიტყვი რამდენიმე სიტყვას სასოებისთვის და სიყვარულისთვის, ხოლო ბოლოს უფრო ვრცლად სარწმუნოებისთვის.

სასოება არის ჭეშმარიტი კადნიერება ღვთის მიმართ, რომელიც ღვთის წყალობით მოცემული აქვს ადამიანის გულს, რომ ის არ ჩავარდეს სასოწარკვეთილებაში და არასდროს არ დაკარგოს იმედი, არამედ იყოს დარწმუნებული, რომ სინანულით ყოველთვის მიიღებს ცოდვების მიტევებას ან სხვა თხოვნებს დროებითა, თუ მარადიულს. ხოლო, არსებობს ორი სახის სასოება: ერთი კეთილი და მეორე ბოროტი. კეთილი არის ის, როდესაც ვინმეს აქვს ღვთის იმედი, რომ ცხონდება, ან რომ აღსრულდება რამე სხვა სიკეთე, შესაბამისად, არც წუხს და არც კარგავს არაფერს. როგორც დავით

---

წინასწარმეტყველი ამბობს, უკეთესია დაყრდნობა უფალზე, ვიდრე დაიმედება მთავრებზე,<sup>2</sup> ხოლო ბოროტი არის ის, როდესაც ვინმეს ისევ ადამიანის იმედი აქვს, რომ ის გაუწევს დახმარებას ან თანადგომას რომელიმე ამქვეყნიური წარმავალი საქმის გაკეთებაში, ასეთი სასოება არის მატყუარა და ამაო. ამ შემთხვევაში დავით წინასწარმეტყველი ამბობს: „ნუ ესავთ მთავართა, ძეთა კაცთასა, რომელთა თანა არს არა ცხორებაჲ“, ასევე ბრძენი სოლომონიც ამბობს: „წყეულ იყოს, ვინც ესავც კაცს“.

ხოლო სიყვარული გულისხმობს ადამიანთა ერთობას, გზას უფლისაკენ და ყველა სათნოების მწვერვალს, როგორც ამბობს პავლე მოციქული კორინთელთა მიმართ ეპისტოლეს მე-13 თავში: „ხოლო აწ ესერა ჰგიეს სარწმუნოებაი, სასოებაი, და სიყვარული, სამი ესე; ხოლო უფროის ამათსა სიყვარული არს“.<sup>2</sup> ეს სათნოებაც სამი სახის არსებობს: ერთი ღვთაებრივი, მეორე ბუნებრივი, ხოლო მესამე ვნებიანი და ბოროტი. ღვთაებრივი სიყვარული არის ის, რომელზეც ნათქვამია მეორე სჯულთა წიგნის მე-6 თავში: „გიყვარდეს უფალი ღმერთი შენი“; ხოლო ბუნებრივი სიყვარული არის ის, რომლითაც გიყვარს მშობლები, შვილები, შვილიშვილები, ზოგადად ნათესავები და მეგობრები შენი. რაც შეეხება ვნებიან და ბოროტ სიყვარულს, მის თაობაზე არაფერს ვიტყვით, რადგან ნებისმიერი ჭკვიანი და ღვთის მოშიში ადამიანი იცნობს და ერიდება მას, ამიტომ მის შესახებ არაფერს ვიტყვით, რომ არ დავიბინძუროთ ჩვენი სმენა.

სარწმუნოება თავისი არსებით არის ის, რითაც ჩვენ გვაქვს სასოება და რწმენა საგნების, რომლების დამტკიცებაც შეუძლებელია, როგორც პავლე მოციქული ამბობს: „სარწმუნოების გარეშე შეუძლებელია ესათნოვო ღმერთს“<sup>2</sup> და ამ სიტყვებში ვრწმუნდებით, როდესაც ვუყურებთ ძველი თუ ახალი აღთქმის წმინდანებს და მართლებს. ვხედავთ, რომ მათი ჭკმდარიტი სარწმუნოებისთვის მათ მოიპოვეს ღვთის მადლი და მოახდინეს დიდი და ბუნებაზე აღმატებული სასწაულები და ამით მოუტანეს სიკეთე როგორც

---

საკუთარ თავს, ასევე სხვებსაც; და როგორც ამბობს დავით წინასწარმეტყველი, ღვთის თვალში მარადის იყო მათ ზედა და ყურნი მისნი ლოცვასა მათსა ზედა.

ასევე წმინდა სახარების მრავალ ადგილას ვხედავთ, რომ ისინი ვინც მიდიოდნენ მაცხოვარ იესო ქრისტესთან, ესმოდათ მისი ბაგეებიდან: „თქვენი რწმენისაებრ მოგეგოთ თქვენ“ და ნებისმიერი ავადმყოფობისაგან იკურნებოდნენ იმ წამშივე. ასევე, მაგალითად, შეიძლება გამოვიყენოთ სახარების დღევანდელი იგავი მეზვერესა და ფარისეველზე, რადგან ნათქვამია, მეზვერე იცემდა მკერდში მუშტებს და რწმენით ამბობდა: „ღმერთო, მილხინე მე ცოდვილსა ამას და შემიწყალე მე“, რის შემდეგაც გამართლებული წამოვიდა ტაძრიდან.

ხოლო ჩვენ, ქრისტიანები რომ გვქვია, რა კეთილი საქმეებით შეგვიძლია ვაჩვენოთ ჩვენი ქრისტიანობა და კეთილმორწმუნეობა და ამავდროულად გამორჩეულობა იმ ტომებისგან, რომლებსაც ჩვენ წარმართებს ვეძახით? შეიძლება ვთქვათ, რომ ჩვენ ვიტყუებთ თავს და რეალურად სარწმუნოება არ გვაქვს: რადგან, რომ გვქონოდა სარწმუნოება, ღმერთიც გვეყვარებოდა და შეძლებისდაგვარად დავიცავდით მის სიტყვებსა და მცნებებს. რადგან ნათქვამია იოანეს სახარების მე-14 თავში: „ უკეთუ გიყუარ მე, მცნებანი ჩემნი დაიმარხენით“. ხოლო ჩვენ, იმის მაგივრად, რომ გვიყვარდეს ის და დავიცვათ მისი მცნებები, ჩვენ მას ვაგინებთ და დავცინით და მასხრად ვიგდებთ. მისი სიტყვები თითქოსდა ზღაპარი იყოს. ხოლო თუ მკითხავთ, როგორ ვაგინებთ, გიჰასუხებთ, როდესაც სჯულით ვაგინებთ ვინმეს, ღმერთს ვაგინებთ. უკვე გითხარით, რომ სარწმუნოება არის მხოლოდ ერთი სახის და ყველა ადამიანს სწამს ღმერთის, რომ ღმერთი არის სჯული და სჯულის შემქმნელი; ამიტომ, როდესაც ვაგინებთ სჯულს, ვაგინებთ ღმერთსაც, ამიტომ ვამბობთ, რომ არ გვაქვს სარწმუნოება.

---

მაგრამ თუ ვიტყვით, რომ სასოებით გამოვირჩევით წარმართებისაგან, ვერც ამით დავიკვებნით. თუ გვაქვს სარწმუნოება, შეიძლება გვექონდეს სასოებაც, როგორც უკვე გითხარით, ჯერ აუცილებელია კაცს ჰქონდეს ღვთის რწმენა და მხოლოდ ამის შემდეგ მოდის სასოება.

თუ იმას ვიტყვით, რომ სიყვარულით გამოვირჩევით წარმართებისაგან, ვერც ამას დავამტკიცებთ, რადგან ნათქვამი აქვს იოანე მოციქულს: „უკეთუ ვინმე თქუას, ვითარმედ მიყვარს ღმერთი და ძმაი თვისი სძულდეს, მტყუარ არს, რამეთუ რომელსა არა უყუარდეს ძმაი თვისი, რომელი იხილა, ღმერთი, რომელი არა უხილავს, ვითარ ძალ-უც შეყუარებად?“<sup>2</sup> თუ ჩვენ შორის არ არის სიყვარული და ღვთის მცნების თანახმად, არ ვუსურვებთ ხოლმე სიკეთეს ერთმანეთს, მაშინ არ გვაქვს არც სარწმუნოება, არც სასოება, არც სიყვარული და შემინდეთ რომ ვამბობ, ვართ წარმართებზე უარესები. რადგან ამბობს პავლე მოციქული: „წარმართ ერებს არ აქვთ სჯული და ასრულებენ სჯულისას“. ხოლო ჩვენ გვაქვს სჯული და ვაკეთებთ ყველაფერს სჯულის საწინაამდგომად, ამიტომ ყველა წარმართზე და ტომზე მეტად ცოდვილნი ვართ. დაფიქრდით და მიხედვით, რომ ზუსტად ასეა, როგორც მე გეუბნებით, რომელი ერი აგინებს ჩვენსავით სჯულს, ჯვარს, ზიარებას, მკვდრებს, ქელებს, სანთელს, სულს, საფლავს, წანდილს, სეფისკვერს, აღსარებას, ნათლობას, ჯვრისწერას, ეკლესიის ყველა წმინდა საიდუმლოს და ამ ყველაფერს ჩვენსავით მასხრად იგდებს და არცხვენს ქრისტიანულ სჯულს?! რომელი წარმართაგანი აკეთებს მსგავს რამეს ჩვენსავით და იგინებს სჯულს? განა ამ ყველაფრით არ ვაგინებთ თავად ღმერთს? განა ამ ყველაფრით არ ვარცხვენთ მის მცნებებს? რადგან მან, სწორედ მან, გვასწავლა ყველა ეს საიდუმლო, რომ მათი მეშვეობით განვიწმინდოთ ცოდვებისაგან და გაჭირვების და მწუხარების ჟამს მივიღოთ მისგან დიდი წყალობა.

ხოლო ჩვენ თუ გვესმის რომ ვინმე [ფიცის დადებისას] აგინებს იმას, რაც ჩამოვთვალე, იმის ნაცვლად, რომ მივცეთ შენიშვნა და საყვედური, როგორც



---

უგუნურ ადამიანს, ჩვენ გვსიამოვნებს და ვიცინით. თუ ღმერთი გწამთ, თქვით, განა ეს ყველაფერი ქრისტიანული საქციელია?!

ასევე ამ ყველაფერთან ერთად იმასაც ვამატებთ, რომ ჩვენს მშობლებს ბოროტად ვეპყრობით, შეურაცხყოფას ვაყენებთ და ვცემთ კიდევ; მოხუცებს პატივს არ ვცემთ, მთავრებს და თავადებს ვწყევლით, მღვდელმთავრებს არაფრად ვაგდებთ, ბერებს ცილს ვწამებთ, მღვდლებს დავცინით, ეკლესიებს არ ვუვლით როდესაც დავდივართ იქ, თითქოსდა ბოსელი იყოს. იმის მაგივრად, რომ მოვუსმინოთ წირვა-ლოცვას, ვილოცოთ და ვთხოვოთ ღმერთს ცოდვების შენდობა, ჩვენ ვლაპარაკობთ, ვიცინით, თვალებს ვუპაჭუნებთ ერთიმეორეს იმაზე უარესად, ვიდრე დუქნებში, ვითომც არაფერია. საეკლესიო დღესასწაულებს არ ვიცავთ, უფრო მეტიც, ზუსტად ამ დღეებში ჩავდივართ ხოლმე ყველაზე ბოროტ საქმეებს ისე, რომ ეშმაკს ვახარებთ და ზუსტად ამ დღეებში გვინდა ხოლმე სავაჭროდ წასვლა.

მოკლედ რომ ვთქვათ, ჩვენ ყველანი გადავედით სიმართლის გზიდან, გავბოროტდით და როგორც ამბობს დავით წინასწარმეტყველი, აღარავინაა ჩვენ შორის, ვინც ეძიებს ღმერთსო. ამქვეყნიური ამოო საგნებით ვართ დაბრმავებულები, სხვა არაფერი გვახარებს, გარდა ბნელი საქმეებისა; როგორც მთიდან დაგორებული ბორბალი, ყველანი ისე მივექანებით ბოროტებისკენ და არც შეგვიძლია გაჩერება. და როგორც პირუტყვი, ვგორაობთ ამა სოფლის ბინძურ სიამეებში.

ამ ყველაფრის მიზეზი სხვა არაფერია, თუ არა ჩვენი ურწმუნოება; რადგან ძველი აღთქმისეული ფარაონივით გაგვიქვავდა გულები და დავდივართ უსირცხვილოდ, როგორც ულაგამო და გაუხედნავი ცხენები, სანამ არ გადავიჩხვებით რომელიმე უფსკრულში და არ დავილუპებით. ასეთი ქმედებებით ვიქებთ თავს, რომ ვართ ქრისტიანები?! ჰოი, ვაი ჩვენს თავს! რა გვაქვს საერთო ქრისტიანობასთან. თუ ვთვლით, რომ მარტო იმით ვცხოვნდებით, რომ ქრისტიანები გვქვია! ვერცერთ შემთხვევაში! პირიქით,

---

უფრო დიდ სასჯელს მივიღებთ, თუ არ შევინანებთ და არ გამოვსწორდებით. მაცხოვარი იესო ქრისტე გვეუბნება: „ცათა სასუფეველში არ შევლენ ისინი, ვინც მეუბნებიან უფალო, უფალო, არამედ ვინც ასრულებს ჩემს ნებას“. გთხოვთ, მითხარით, იქნებ მე შევიშაღე ჭკუიდან, ქრისტეს რომელ ნებას მივყვებით ან რომელ მცნებას ვასრულებთ?! მე, პირადად, არ მეგულება ჩვენთვის სხვა სახელი, გარდა რაღაცა გამხმარის, გაცივებულის და ყველანაირი სიკეთეგამოცლილის აღმნიშვნელი. მერე ვდგავართ და გვიკვირს, ჩვენ რადგან ქრისტიანები ვართ, რატომ არ გვისრულებს ღმერთი სურვილებს! კიდევ კარგი, რომ საერთოდ არ გვანადგურებს, როგორც სოდომელებს, რადგან ცხადად ვხედავთ, როგორ გვშორდება ღმერთი, ჩვენი ბოროტების გამო გვემართება ამდენი ავადმყოფობა, სიკვდილი, ტანჯვა და გაჭირვება და ვერც კი მოვდივართ გონზე და არ ვტოვებთ ჩვენს ბოროტებებს.

ამიტომ, ჩემო საყვარელნო კრავნო, როგორც თქვენი სულიერი მწყემსი და მამა, ღვთის შიშით გასწავლით: მოდით გონზე და შეინანეთ თქვენი უღირსი საქციელები, რადგან ღმერთი მოწყალეა და თუ ნახავს ჩვენს მოქცევასა და სინანულს, აუცილებლად შეგვინდობს. ნახეთ, როგორ მოგვიწოდებს ღმერთი ისაია წინასწარმეტყველის მიერ: „მოიქცეით ჩემსკენ და მეც მოვიქცევი თქვენსკენ“.

ახლა, ვინც რა საქმისა ხართ, ხელოსნები თუ ვაჭრები, ყველას გაძლევთ ლოცვა-კურთხევას, აწი, კვირაობით, დიდ დღესასწაულებზე, რომლებსაც საუფლოებს და დედა ღვთისმშობლიანებს ვეძახით და ასევე დიდი წმიდანების ხსენების დღეებზე დახურეთ ყველაფერი და არც გაყიდოთ და არც იყოდოთ, არც ქრისტიანებისგან, არც თურქებისგან და არც სხვებისგან, არც სხვა რაიმე სახით იშრომოთ. როგორც გეტყვით, ისე მოიქცით. თუ არა, დაგსჯით ეკლესიური წესითა და სჯულის-კანონით ყველანაირი სამართლობის დაცვით. და თუ ვინმე აღმოჩნდება ამპარტავანი და ურჩი, არ

---

დაემორჩილება სამართალს და საეკლესიო ლოცვა-კურთხევას, მათ მთავრის ძალაუფლებითაც დავსჯით.

და არავინ იფიქროს გულში: რა საქმე აქვს მეუფეს ჩვენს პირად ცხოვრებასთან და რატომ უნდა ერეოდეს ჩვენს საქმეში? გპასუხობთ, თუ აქამდე არ იცოდით და არავის უსწავლებია, აჰა, აწი იცოდეთ: თუკი ვინმე ცხოვრობს უნგრო-ვლახეთში, ყველას საქმე მე მეხება, დიდია ის თუ პატარაა, ქრისტიანია თუ წარმართი; რადგან ჩემს ხელში ჩაგაბარათ მაცხოვარმა იესო ქრისტემ, რათა, როგორც პირმეტყველი ცხოვარნი, დაგმწყემსოთ სულიერად. სანამ მე ვარ თქვენი მოძღვარი, ჩემს კისერზეა ჩამოკიდებული თქვენი სულები, ჩემგან მოითხოვს ღმერთი თქვენზე პასუხს და არა სხვისგან.

ვცდილობ გასწავლოთ, მოკლედ, თუ გინდათ იყოთ იესო ქრისტეს შვილები და ქრისტიანები გერქვათ. რადგან, როგორც ცხოვარნი არ შეიძლება იყონ მწყემსის გარეშე, ასევე არც ერთი შეიძლება იყოს მღვდელმთავრის გარეშე. თუ ვინმეს აწუხებს თავისი სულიერი ცხოვრება, იჩქარეთ ჩემსკენ, როგორც მამასთან და მაცხოვარ იესო ქრისტეს დახმარებით განგკურნავთ თქვენ.

ასევე შეიძლება თითოეულმა თქვენგანმა იფიქროს, ჩვენ ისედაც გვიჭირს და არ შეგვიძლია შევასრულოთ, რასაც გვიბრძანებო; მაგრამ მე კიდევ ერთხელ გეტყვით, რომ ჭეშმარიტება ისეა, როგორც მე გეუბნებით და მე მრწამს ამისი. იცოდეთ, თქვენი გაჭირვების მეც თანაზიარი ვარ და მეც თქვენთან ერთად, იმავე უღელს ვატარებ; მაგრამ არ მაქვს უფლება, არ გითხრათ სიმართლე: როგორც მეფე ითხოვს ხოლმე ჩვენგან ხარკს, ასევე ღმერთიც ითხოვს რწმენასა და კეთილ საქმეებს. ამბობს მაცხოვარი იესო ქრისტე სახარებაში: „მიაგეთ კეისარს კეისრისა და ღმერთს -ღმერთისა“.<sup>2</sup> არ იფიქროთ, რომ ღმერთს შევეცოდებით და შეგვინდობს მარტო იმიტომ, რომ გვიჭირს და შეძლებისდაგვარად არ შევასრულებთ მის მცნებებსაც. იცოდეთ, თუ რამეა, ჩაგვაგდებს იქ, საიდანაც ვერასდროს ვერ გამოვალთ. მაშასადამე, უარი ვთქვათ ჩვენს მანკიერ ჩვეულებებზე და უწესო ქცევებზე, რომ

---

შეგვიწყალოს უფალმა ღმერთმა, შეგვინდოს ცოდვები და განაგოს ჩვენი ცხოვრება თავისი დიდი წყალობით. ღმერთს ვევედრები, რაც გესაუბრეთ, აღიბეჭდოს ეს სიტყვები თქვენს გულეში, რომ არ დაივიწყოთ და შეძლებისდაგვარად შეასრულოთ. როგორც უხელს თვალებს ბრძმებს და აღმართავს მკელობლებს, ასევე ჩვენც აღგვიხილოს სულიერი თვალი და წარმართოს ჩვენი ცხოვრება ცხონების სწორ გზაზე, რომ მარადის ვაქებდეთ და ვადიდებდეთ მის ყოვლად წმინდა და ყოვლად დიდებულ სახელს. ამინ.

## ქადაგება № 5

### ქადაგება მაცხოვარ იესო ქრისტეს მირქმაზე

საკვირველი ამბების მოყოლის უნარი აქვთ განათლებულ ადამიანებს. ხალხის სმენის დატკობა შეუძლიათ რიტორებს. დიდი და ზებუნებრივი საიდუმლოებების განმარტება მოცემული აქვთ სათნოებებში სრულყოფილებს. მაგრამ ჩემგან, რომელშიც არ მოიპოვება არცერთი მსგავსი ღირსება, ვერავინ ვერ მოისმენს რამეს სასარგებლოს.

ამიტომ ვხედავ რა ჩემს უღირსობას, ვცდილობ დუმილს, არ ვიღებ ხმას, მაგრამ მახსენდება რა ჩემი მოვალეობა, ვშიშობ, არ ჩავვარდე ბოროტი მონის სასჯელში და შეძლებისდაგვარად მუდმივად გიყვებით ღვთის საქმეებს. დიდი თავმდაბლობით ვევედრები ჩვენს მაცხოვარს მომიხსნას ენის სიუხეზე და განმინათოს გონება, რომ ღვთის გამოუთქმელი დიდებისთვის მოგმართოთ მცირე სიტყვებით. გთხოვთ, მომიახლოვდეთ მოსასმენად.

იცით, ქალწულობა არის დიდი, მაღალი და საკვირველი სათნოება, რაც ცხადი და დამტკიცებული ფაქტია ბრძენი ადამიანებისთვის; ხოლო ამ დიდებული სათნოების შესახებაც რომ ვისაუბრო, არ ვარ ღირსი. მაგრამ

---

დღევანდელი დღესასწაული გვაიძულებს, გავიხსენოთ და მცირე სიტყვებით ვისაუბროთ ქალწულობაზე, როგორც დიდებულ, უხრწნელ და სრულყოფილ გვირგვინზე, რომელიც პატივით დაბრძანებულია სულიერი საზრდოთი გამოზრდილი ადამიანების წინაშე. დღეს იხსნება წინასწარმეტყველების სიტყვების და ამ დღის დაფარული ნიშნების შინაარსი, რომლებიც ცხადად და განმარტებებით იქადაგება ეკლესიაში. დღეს რეალურად ქმედებით აღსრულდა და განცხადდა პირვანდელი წინასწარმეტყველება. დღეს უფლის იესო ქრისტეს და დედა ღვთისმშობლის დიდებას ცხადად ვუყურებთ. დღეს ზეციური სიხარული, რომელსაც მთელი კაცობრიობა სიყვარულით ელოდა, ეძლევა ხალხს. დასრულდა ძველი და აყვავდა ახალი, რომელიც არასდროს აღარ დაჭკნება. აწი აღარ ბატონობს ძველი აღთქმის უხეში სჯული, არამედ ღვთის წყალობა მეფობს, რომელიც ყველას უხმობს ცხონებისაკენ, დიდი მოთმინებით და არა სასჯელით, როგორც ძველი აღთქმის ოზიას შემთხვევაში, რომელიც გაკადნიერდა და შეეხო იმას, რაც აკრძალული იყო.

ღმერთი ყველას ელის და შიში ვერ გაგვაჩერებს. უფალი გვიხმობს: „მოვედით ჩემდა ყოველნო მწუხარენო და თვითმძიმენო!“ და ვინ ისწრაფის? მოდის თავის ქმნილ სამყაროში არა ჩრდილით, არამედ ცხადად, როგორც სამსხვერპლო ტარიგი დაბრძანებული კიოტში, ანუ დედა ღვთისმშობლის მკლავებში; ტარიგი, რომელზე შეხებითაც გამოსწორდა მეზვერე, განიწმინდა მემავი და განიკურნა კეთროვანი. ამ ტარიგს არავინ სძულს, არავის აგდებს, არავინ ეზიზღება, უფრო მეტიც, არავის სწირავს გასახრწნელად, არამედ ზრუნავს, რომ ყველა მიიყვანოს ცხონებამდე, და განისვენოს თავის საყვარელ შვილებთან ერთად ისე, როგორც კაცთმოყვარე ღმერთი. ესაა ახალი წყალობის მადლი. ესენი შეიქმნა (ახალი) მზის ქვეშ, რომელიც ჯერ არ შექმნილა და აღარც შეიქმნება. რადგან იმის აღსასრულებლად, რაც თავად ღმერთმა განაგო მისი დიდი წყალობითა და მოწყალებით, თავად მოვიდა ამქვეყნად მისი ზებუნებრივი განკაცებით. ამის აღსანიშნავად, პავლე მოციქულმა გაახმოვანა

---

ღვთაებრივი საყვირი, როდესაც თქვა: „ძველი დასრულდა და აჰა, ყველაფერი შეიქმნა ახალი“

ამიტომ განა რა შეუძლია ჩემს გონებას, რომ ღირსეულად ვისაუბრო დღევანდელ დღესთან დაკავშირებით? არ შემიძლია მივწვდე იქ, სადაც ვერ ვწვდები და არ შემიძლია ვისაუბრო მასზე, რაც არ ვიცი. ვაღიარებ ჩემს უღირსობას და უძლურობას. არ მაქვს კადნიერება, ამაზე მეტი ვთქვა, რადგან დედა ღვთისმშობლის ქალწულება და სიწმინდე აღმატება კაცობრიობის გონებისა და მეტყველების ნებისმიერ შესაძლებლობას. რამდენადაც შეუძლებელია ვინმემ ღმერთზე უფრო დიდებული რამ ნახოს, ასევე, შეუძლებელია, წმინდა ქალწულის პატიოსნებაზე აღმატებული რამის ხილვა. ღვთისმშობელს, რომელსაც მკლავებში უკავია თავისი ძე - ზეცისა და ქვეყნის შემქმნელი ძე, რომელიც შობილია უწინარეს ყოველთა საუკუნეთა და რომელსაც დღეს ტაძარში მოჰყავს როგორც თავი ეკლესიისა. მამა ღმერთთან თაყვანისაცემად მოჰყავს ძე, რომელსაც თაყვანს სცემს მთელი სამყარო. მისი უსაზღვრო სათნოებიდან გამომდინარე, ემორჩილება სჯულს ის, ვინც მოსეს მისცა სჯული, ემორჩილება ცნების ბრძანებას ის, ვინც ბრძანებით შექმნა ყოველი ხილული და უხილავი. მოდის თავმდაბლობით ის, ვინც აზანზარებს მთელ ქმნილებას. დებულობს როგორც მოწყალე და მიეცემა მართალი სვიმეონის<sup>2</sup> მკლავებში ის, ვინც თვითონაა მხოლოდ ჭემმარიტად მართალი. მიდის ტაძარში შესაწირავად ის, ვისაც ეკუთვნის მთელი სამყარო, მიაქვს შესაწირავად ორი გვრიტი მას, ვინც მხოლოდ ერთი სიტყვით შექმნა ყველა ფრინველი; მიაქვს შესაწირავად ორი მტრედი, რომ აჩვენოს თავისი ორი ნება - ღვთაებრივი და კაცობრივი. მიაქვს წმინდა ბარტყების წყვილი, რომ დაახლოვოს ღმერთი და კაცი, რომ გააერთიანოს ძველი და ახალი, ზეციური და მიწიერი. მიაქვს შესაწირავად წმინდა საგანი მას, ვინც მხოლოდ თვითონაა წმინდა იმისთვის, რომ აჩვენოს, შობილია ყოვლადწმიდა დედისაგან, აჩვენოს ეკლესიისა და სარწმუნოების სიწმინდე. მიჰყავს ორი ფრინველი, რომ

---

მღვდლებმა შესწირონ მსხვერპლად და ამით აჩვენოს, რას უპირებს საკუთარ თავს ჩვენი ცხოვნებისთვის. დედა ღვთისმშობელი ეუბნება მართალ სვიმეონს: „ღირსო და ნეტარო მოხუცო, მიიღე ეს ყრმა, რომელიც თავისივე ნებით მოევლინა დატაკად, ხოლო მისი რეალური სიმდიდრე ენით აუწერელია: მიიღე ეს ყრმა, რომელიც უფრო მეტად ხნიერია, ვიდრე თავად დრო; მიიღე ეს ყრმა და იხილე ის, ვის სახესაც მზერას ვერ უსწორებენ თავად ანგელოზებიც; მიიღე მკლავებში ის, ვისაც ვერ იტევს მთელი კოსმოსი. ჭეშმარიტად, ასაკით არის ახალშობილი, მაგრამ მისი ნამდვილი ასაკი უსასრულობაა. პატარაა, მაგრამ ნებისმიერ სიდიდეს აღემატება. პატარაა შეხედულებით, მაგრამ ცოდნითა და ცნობიერებით შემოუსაზღვრელია.

ტადარშია ახლა ჩვენთან ერთად, მაგრამ ამავედროულად ზეცაშიცაა დაბრძანებული დიდების ტახტზე და ქერუბიმების ეტლში. მონის სახით ვხედავთ, მაგრამ მთელი სამყაროს მბრძანებელია“.

და მართალმა სვიმეონმა მიირქვა თუ არა თავის მკლავებში<sup>2</sup> ყრმა იესო, აღივსო სულითა წმიდითა და თქვა: „ჭეშმარიტად, შენ ხარ ყოველი ქმნილების მბრძანებელი, შენ ხარ სოფლის მაცხოვარი, შენ ხარ ღმერთი ჩვენი, შენ გელოდით დიდი მოუთმენლობით, შენ გნატრობდით, შენ გვწყუროდი, შენ გვშოიდი მაგდენი ხანი. შენ თაყვანსა გცემ, შენ გვედრები, რომელიც ხარ ცხოვრებისა სიკვდილის მბრძანებელი, შენ ამ ხრწნადი სოფლისაგან და უძლური სხეულისაგან აწ განუტევე მონა შენი, მეუფეო, მშვიდობით, რამეთუ იხილეს თვალთა ჩემთა მაცხოვარება<sup>2</sup> შენი განმიტევე ამ ცხოვრებისაგან, რომ ჩავიდე ჯოჯოხეთში და ვახარო იქ მყოფთ შენი მოსვლა ამ სამყაროში და ვანუგეშო ისინი, ვინც მაგდენი ხანი ჩაკეტილნი არიან საპყრობილეში. ვუთხრა დიდი სიხარული იქ მწუხარებაში მყოფთ, რომ გიხილე ჩემივე თვალებით, შეგეხე ჩემივე ხელებით, ჩაგიხუტე ჩემივე მკლავებში და რომ აღასრულე სჯულის ყოველი წესი, რომ უნდა ივნო და მოკვდე ყოველთა ცხოვნებისათვის, რომ შთახვალ ჯოჯოხეთში და გვიხსნი საუკუნო ტანჯვისაგან და შენთან

---

ერთად აღგვამალვებ ზეცაში და დაგვაბრძანებ მარჯვენით მამისა. ჰოი, უფალო, ნუგეშინისმცემელო და დიდებაო ერისა შენისა ისრაელისაო, ნათელო, განცხადებულო წარმართთა, რომელთა იყვნეს ბნელსა, გვედრები, განმიტევე მონაი შენი მშვიდობით, რომ აღვიარო სახელი შენი ყოვლად დიდებული!“

ჩემო საყვარელნო, ესაა ჩვენი ეკლესიის დღევანდელი დღესასწაული. ესაა ძველი საიდუმლოებების აღსასრული და ახლების დასაწყისი.<sup>2</sup> დღეს აღსრულდა ყოველივე ძველი სჯულის და იწყება ახალი. და რადგან მაცხოვარი იესო ქრისტე, ჭეშმარიტი ღმერთი ჩვენი, რომელიც თავად არის სჯული და სჯულმდებელი, დაემორჩილა სჯულს, რათა გვიჩვენოს, რომ ყველაფერი სრულდება წესით და სიმართლით. შესაბამისად, ჩვენც უნდა ვემორჩილებოდეთ სჯულს. ხოლო ჩვენ რას ვაკეთებთ კი არ ვემორჩილებით, არამედ ვეწინააღმდეგებით ღმერთს, თითქოსდა ჩვენი მოსისხლე მტერი იყოს. ათი მცნება განა არ წერია სჯულში და ჩვენ არცერთს არ ვასრულებთ.

პირველი მცნება გვიბრძანებს, რომ არ ვიყოლიოთ უცხო ღმერთები, ხოლო ჩვენ უსამართლობის მომონა<sup>2</sup> გვყავს ღმერთად.

მეორე მცნებაში ნათქვამია: არა მოილო სახელი უფლისა შენისა ამასა ზედა, ხოლო ჩვენ ვატრიალებთ მას ჩვენს ენებზე, როგორც არაფერი.

მესამე მცნებაში წერია, რომ წმიდა ვყოთ დღე იგი შაბათი, ანუ პატივი ვცეთ და დავიცვათ საეკლესიო დღესასწაულები, ხოლო ჩვენ ზუსტად ამ დღეებში ვაკეთებთ ხოლმე ყველაზე მეტ და უღირს საქმეს.

მეოთხე მცნება გვიბრძანებს: პატივი ვცეთ ჩვენს მშობლებს, ხოლო ჩვენ მათ ვაგინებთ და ვცემთ ხოლმე კიდევაც.

მეხუთე მცნება გვეუბნება: არა კაც ჰკლა, ხოლო ჩვენ, თუ არ შეგვიძლია მოკვლათ ხმლით და იარაღით, ვკლავთ ენით, და თუ ვერ ვკლავთ სხვებს, საკუთარ თავებს ვიკლავთ ჩვენი ბოროტი ქმედებებით.

მექვსე მცნებაში წერია: არა იმრუშო, ხოლო ჩვენ სხვა უარეს ბილწ უწმინდურობებს ჩავდივართ, რომლის შესახებ არც შემიძლია საუბარი.



---

მეშვიდე მცნება გვიბრძანებს: არა იპარო, ხოლო ჩვენ სხვისას ვიღებთ დაუფარავად და ძალადობით.

მერვე მცნებაში წერია: არა ცილი სწამო მოყვასსა შენსა, ხოლო ჩვენ იმისთვის, რომ ხალხის თვალში ვითომ არ დავკარგოთ პატივი, სახარებაზე ხელების დადებით, სიცრუეზე ვიფიცებით და ამით ღმერთს ვკარგავთ.

მეცხე მცნებაში წერია: არა გული გითქმიდეს ცოლისათვის მოყვასისა შენისა, ხოლო ჩვენ ვცდილობთ, მოყვასმაც გაიგოს ამის შესახებ, ოღონდ ისე, რომ არც არაფერი თქვას, თუ არა, მასვე დაუშავდება.

მეათე მცნებაში ნათქვამია: არა გული გვითქმიდეს მოყვასის საკუთრებაზე, ხოლო ჩვენ უკანასკნელადაც ვართმევთ ისე, რომ საკვებსაც არ ვუტოვებთ.

აჰა, ათიდან არცერთ მცნებას არ ვასრულებთ, მაგრამ თუ ვინმე თვლის, რომ ჩვენი სიტყვები სიმართლეს არ შეესაბამება, მაშინ ამ კაცს დავტოვებ საკუთარ ფიქრებთან და თუ ვერ დაინახავს ამ რეალობას, მაშინ ეს ადამიანი ან ღვთის წინაშე ძალიან დიდი წმინდანია, ან პირიქით – უსინდისო.

ჰოი, უფალო, რომელმან შენი უსაზღვრო სათნოებით და დიდი მოწყალებით იწებე და მიიღე ჩვენი სუსტი ბუნების სხეული<sup>2</sup> და აღასრულე ყოველივე სჯული, მოგვხედე ჩვენ და გაგვინათლე გონება და გული, რომ ჩვენც აღმოვჩნდეთ შენი სჯულისა და მცნებების აღმსრულებლები და მრავლითა მოწყალებითა შენითა შეგვიწყალე ჩვენ, რომ მარადის ვადიდოთ შენი ყოვლად დიდებული სახელი. ამინ.

## ქადაგება № 6

ქადაგება ყველიერის კვირიაკეს

---

საყვარელნო, სულიერ საზრდოდ დღეს მხოლოდ მცირე სიტყვებით მოგმართავთ, რომლებსაც გთხოვთ, უსმინოთ სიყვარულით და არ შეხედოთ ჩემს არ ცოდნასა და ქადაგების მოუხერხებლობას, არამედ შეხედეთ ჩემს სიყვარულს, რომლითაც ყოველთვის გმომღვრავდით თქვენ. ვიცი, ძნელია ჩემი სიტყვების გამოყენება, მაგრამ ღვთის დახმარებით, მაინც არ დარჩებით სულიერი სარგებლის გარეშე.

წმინდა წერილში, შექმნათა წიგნის მეორე თავში წერია, ღმერთმა როგორ უბრძანა ადამს, ეჭამა ედემის ბაღში არსებული ყველა ხის ნაყოფი, ხოლო სიკეთისა და ბოროტების ცნობის ხის ნაყოფი არ მიეღო და თუ შეჭამდა, იმ დღესვე მოკვდებოდა. ამ სიტყვების აზრი დიდია და ღრმა. მხოლოდ განათლებულ მოძღვრებს აქვთ მოცემული მათი სწორი განმარტება; ხოლო მე, შეძლებისდაგვარად, ვიტყვი მოკლედ მხოლოდ იმას, რაც ვიცი და მესმის, რომ სწორია.

ეს სიტყვები: „ყველა ხის ნაყოფისგან, რაც ბაღშია, სჭამე“ - მგონი არ შევცდები, თუ ვიტყვი, ნიშნავს იმას, რომ ჭეშმარიტი სწავლება და ღვთის სიტყვები, რომლებიც ინახება აღმოსავლეთის წმინდა ეკლესიის ბაღში, ყველა ქრისტიანმა სიტკბოებით მიიღოს, როგორც სულიერი საზრდო. ამ სიტყვების სისწორეში შეიძლება დავრწმუნდეთ მათეს სახარების მეოთხე თავში გამოთქმული მაცხოვარ იესო ქრისტეს სიტყვებიდან: „არა პურითა ხოლო ცხოვნდების კაცი, არამედ ყოვლითა სიტყვითა, რომელი გამოვალს პირისაგან ღმრთისა“. „ხოლო სიკეთისა და ბოროტების ცნობის ხის ნაყოფი არ მიიღო და იმ დღეს, როდესაც შეჭამ, მოკვდები“;<sup>2</sup> ამ სიტყვებში იგულისხმება, რომ ცოდვებს, რომლებსაც ჩვენ შეგნებულად ჩავდივართ, უნდა განვეშოროთ, რადგან იმ დღეს, როდესაც ჩავიდნეთ, მოკვდებით, რადგან არ არსებობს იმაზე დიდი სიკვდილი, როდესაც ვინმე ცოდვით შორდება ღმერთს. იოანეს

---

სახარების მესამე თავში ნათქვამია: „რომელმან ქმნეს ცოდვაი, იგი ეშმაკისაგან არს, რამეთუ დასაბამითგან ეშმაკი ცოდავს.“<sup>2</sup>

ეს სიტყვები შეგვიძლია სხვაგვარადაც განვმარტოთ: ყოველდღე, როდესაც ვიმყოფებით წელიწადის ბაღში, ყოველი საკვები, რომელიც სასარგებლოა ჩვენი სხეულის გამოსაკვებად, ყოველმა კაცმა მიიღოს, ხოლო მარხვა, რომელიც დადგენილია ჩვენი სულის სასარგებლოდ, არავინ დაარღვიოს. მარხვისგან ადამიანმა შეიძლება მიიღოს კეთილიც და თუ არ დაიცავს - ბოროტიც და სიკვდილით მოკვდეს. ღვთის მცნების დარღვევა იწვევს ადამიანის სულიერ სიკვდილს და ცოდვილი განგდებულ იქნება ეკლესიის ბაღიდან ისევე, როგორც ადამი ედემიდან.

ამ მცირე სიტყვებიდან ჩვენ ვიგებთ, რომ გარკვეული ხის ნაყოფის მიღების აკრძალვის მცნებაში, რომელიც ღვთისგან მიეცა ადამს, იგულისხმება მარხვის მცნება, რომ ამ მცნების დაცვით, ადამს უნდა შეეცნო ღვთის უპირატესობა და დარღვევის შემთხვევაში მოკვდებოდა. ამიტომ თავად ადამის შემქმნელმა და მისთვის მცნების მიმცემმა საუკუნეების შემდეგ, როდესაც თავად განხორციელდა და მოვიდა დედამიწაზე და ცხოვრობდა ადამიანებთან ერთად იმისთვის, რომ ეჩვენებინა ჩვენთვის, რამდენად აუცილებელია ღვთის მცნებების დაცვა და მარხვის შენახვა. თავდაპირველად თვითონაც იმარხულა 40 დღე და 40 ღამე, როგორც ეს ნათქვამია ლუკას სახარების მეოთხე თავში,<sup>2</sup> ეს მარხვა ჩვენთვის იყოს ერთგვარი სარკე, რომელშიც დავინახავთ მთელ ჩვენს ცხოვრებას და გავიხსენებთ იმ დაცემას, რომელიც შეემთხვა ადამს ჭამასთან დაკავშირებული მცნების დარღვევით.

ამიტომ იმ დროს, როდესაც ღმერთმა გვადირსა და ხვალიდან ვიწყებთ მოგზაურობას დიდ და წმინდა მარხვაში, აუცილებელია, ჩვენც სიყვარულით და მოშურნეობით მივიღოთ უფლის მცნება და შეძლებისდაგვარად შევასრულოთ ის. ახლა ჩვენ ჩვენი სულების მტრის წინააღმდეგ ომს ვიწყებთ, ამიტომ პავლე მოციქულის სიტყვების მიხედვით: *მოირტყენით წელნი*

---

თქვენნი ჭეშმარიტებითა და შეიმოსეთ ჯაჭვი იგი სიმართლისაი, და შეიხსენით ფერხთა თქვენთა განმზადებულებაი იგი სახარებისა მის მშვიდობისაი, ყოველსა შინა აღიღეთ ფარი იგი სარწმუნოებისაი, რომლითა შეუძლოთ ყოველთა მათ ისართა ბოროტისათა განხურვებულთა დაშრეტად და ჩაფხუტი იგი ცხორებისაი დაიდგით და მახვილი იგი სულისაი, რომელ არს სიტყვაი ღმრთისაი; რამეთუ არა არს ბრძოლაი ჩუენი სისხლთა მიმართ და ხორცთა, არამედ მთავრობათა მიმართ და ხელმწიფებათა, სოფლის მპყრობელთა მიმართ ბნელისა მის ამის საწუთროისათა, სულთა მიმართ უკეთურებისათა, რომელნი არიან ცასა ქუეშე.<sup>2</sup>

ამიტომ ვემზადებით რა ჩვენი სულების მტრის წინამღებ სალაშქროდ, თან უნდა ავიღოთ 5 რამ, როგორც ერთგვარი სულიერი მარაგი, რომელიც გამოგვადგება გაჭირვების ჟამს. ესენია: აღსარება, ლოცვა, მარხვა, მოწყალება და სიყვარული.<sup>2</sup>

აღსარებისას ჩვენ ვიწმინდებით ცოდვებისგან, როდესაც ღვთის შიშით, შემუსვრილი გულით ჩვენი მოძღვრების წინაშე, როგორც უშუალოდ ღმერთთან, ვაღიარებთ ჩვენ ცოდვებს ისე, რომ ვიდანაშაულებთ და ვამხელთ საკუთარ თავს და სხვაზე არ გადაგვაქვს ბრალი. მაგრამ თუ ვიმართლებთ თავს, თითქოსდა იძულებით ან უძლურებით ჩავიდინეთ ის ქმედება, ასეთი აღსარება არაფერს გვარგებს, როგორც არ არგო ადამს მაშინ, როდესაც ღმერთი შეეცადა მოეყვანა ის სინანულში. ნაცვლად იმისა, რომ ადამს შეეცნო თავისი შეცდომა და ეღიარებინა ცოდვა, მოინდომა ღმრთისთვის დაებრალეზინა ყოველივე იმით, რომ მისმა მოცემულმა ქალმა აჭამა აკრძალული ხილი, ევამ კი გველს დაუწყო დანაშაულის გადაბრალება! ამრიგად, ჩვენი აღსარება უნდა იყოს კეთილი სასოებით და მაშინ მართლა შეგვინდობს ღმერთი; და არა სასოწარკვეთით, როგორც ეს კაენის შემთხვევაში მოხდა, როდესაც მან თქვა: „უფრო დიდია ჩემი დანაშაული, ვიდრე სასჯელი“.<sup>2</sup> ასევე იუდასაც, მღვდელმთავრების წინაშე უდანაშაულო სისხლის გაყიდვის შესახებ თავისი

---

შეცდომის აღიარების მიუხედავად, ეს აღსარება არაფერში გამოადგა, რადგან სასოწარკვეთილი იყო.

უნდა აღვნიშნო ისიც, რომ აღსარება უნდა ითქვას იმ ფიქრით, რომ აღარ შევცოდავთ. ასე მაგალითად, ფარაონმა კი აღიარა: „შევცოდე უფალსა!“, მაგრამ არაფერში არ არგო, რადგან არც უფიქრია უარი ეთქვა ბოროტებაზე და ამიტომაც დაიღუპა. არც სასოწარკვეთით უნდა იყოს ჩვენი აღსარება, როგორც იუდასი, როგორც უკვე აღვნიშნე. ჩვენ ვიქონიით კეთილი იმედი, რომ თუ სუფთა გულით ვაღიარებთ ჩვენს ცოდვებს და იმ შინაგანი გადაწყვეტილებით, რომ აღარ შევცოდავთ, ღმერთი შეგვინდობს და დავით წინასწარმეტყველივით გავიგებთ: „უფალმა აიღო შენი ცოდვა; აღარ მოკვდები“.

ლოცვით ვთხოვთ ღმერთს ჩვენი სულების ცხოვნება და ის აუცილებლად გვიბოძებს მას, რადგან თავად იესო ქრისტემ ბრძანა: „ითხოვეთ და მოგეცემათო!“ გვახსოვდეს, გულის სიღრმიდან ნათქვამი მხურვალე ლოცვა ცას ხსნის და შედის ღვთის სასმენლებში. როგორც ამბობს წმინდა იოანე ოქროპირი, იქ, სადაც ლოცვა აღევლინება მაღლიერებით, მოდის სული წმინდის მაღლი, ხოლო ეშმაკები განიდევენებან და ბოროტის მთელი ძალა შორდება ადამიანს. ასევე სხვაგანაც აღნიშნავს, რომ ლოცვით ხდება სიწმინდის დაცვა, ქალწულობის დაბეჭდვა, მრისხანების გაჩერება, ამპარტავნების მოთოკვა, შურის მოსპობა, გაჭირვების მოგვარება და მშვიდობის დაფუძნება; მოკლედ რომ ვთქვათ, ვინც ლოცულობს, ის ესაუბრება ღმერთს.

მარხვით შევიმსუბუქოთ სხეული, გავინათლოთ გონება და გავიხაროთ სულიერად და მივიღოთ მაღლი სულისა წმიდისა. ამავდროულად, მარხვა უნდა გავატაროთ ლოცვებით. როგორს საკვები უგემურია მარილის გარეშე, ასევე მარხვაც ლოცვის გარეშე.

წმინდა გრიგოლი თავის მეორე წიგნში მარხვის დაწყებაზე წერს, რომ მარხვა არის სულისა და ხორცის სიმშვიდე, ცხოვრება არეულობის გარეშე, კეთილი დაგეგმარებით, რომელიც ახარებს ღმერთს და ამწუხრებს ეშმაკს;

---

რადგან, როგორც მმარხველების მფარველები არიან წმინდა ანგელოზები და იცავენ მათ ყოველი განსაცდელისგან, ასევე არამმარხველების მცველები არიან ეშმაკები, რომლებიც შთააგონებენ ბევრ ცოდვას.

ამიტომ უნდა ვიღვაწოთ, რომ არ ვიყოთ ეშმაკის თანაზიარნი, რადგან არ გამხდარა არავინ სათნოების მოწაფე, ვინც მათი გემოვნების მიხედვით ჭამდა, სვამდა და განცხრომაში იყო. არც მათგან, ვისაც უყვარდა დროს ტარება, ვინც ცხოვრება გაატარა ხორციელად, არავინ გამხდარა წმინდანი და ცათა სასუფეველის მოზიარე. ვიცი, რომ ჩვენი ბოროტი ცხოვრების წესი ხელს შეგვიშლის, რომ სრულფასოვნად ვიმარხულოთ საკვებით. მაგრამ რაც მთავარია, ვიმარხულოთ ბოროტი საქციელებისაგან, რადგან საკვებისაკენ გვიზიდავს ეს წყეული ხორცი, მაგრამ ბოროტი საქციელის ჩასადენად არ გვიბიძგებს არავინ (არც ვიცი, როგორ ვთქვა სხვაგვარად, უფრო გასაგებად)! სხეულს სჭირდება საკვები, მაგრამ სულს არ სჭირდება ბოროტება. საჭმლისგან ვღებულობთ გარკვეულ სიამოვნებას, მაგრამ ბოროტებისგან არ ვღებულობთ არაფერს, გარდა სულისათვის ზიანისა და სჯულის დარღვევისა.

ჩვენი პატიოსანი შემოსავლებიდან სიყვარულით გავცეთ ხოლმე მოწყალება გაჭირვებულებს, ღარიბებს, მგზავრებს, ავადმყოფებს და საპატიმროებში მყოფთ და ამით მოვიგოთ ღვთის გული. ასეთნაირად ჩვენც შეგვიწყალებს ღმერთი, როგორცაა ეს ნათქვამი ცხრა ნეტარებაში, ხოლო თუ მოპარულისგან გავცემთ, ასეთ შემთხვევაში უარეს სასჯელს მივიღებთ. ახლა თუ ვინმე ფიქრობს, რომ არ ვარ მართალი იმაში, რასაც ვამბობ და დაიმოწმებს იოანე მახარობლის სიტყვებს, რომელიც ამბობს: „უსამართლობის მამონასგან გაეცით მოწყალება“, ასეთი კაცი უნდა წავიდეს და შეისწავლოს წმიდა წერილი იმათგან, ვინც კარგად და სწორად იცის მისი განმარტება და ნახოს, რა შინაარსით თქვა იოანე მოციქულმა ეს სიტყვები და შემდეგ იფიქროს ბოროტი ჩემზე.

---

იოანე მოციქულის აზრი მდგომარეობს შემდეგში: “უსამართლობის მამონასგან გაეცით მოწყალეობა“. რანაირად? ცრემლებით და შემუსვრილი გულით და იმაზე ფიქრით, რომ აღარ მოექცევი უსამართლოდ არავის, აღარ მოიპარავ და აღარც იყაჩაღებ, მხოლოდ ამის შემდეგ ის მოწყალეობა იქნება შეწირული ღვთის მიერ. ამაში ვრწმუნდებით მეზვერე ზაქეს ქმედებიდანაც, რომელმაც სთქვა: „აჰა, უფალო, ზოგი ნაყოფთა ჩემთაი მივცე გლახაკთა; და უკეთუ ვისმე ცილი დავსდევ, მივაგო ოთხი წილი“.<sup>2</sup> გაიგეთ რა თქვა ზაქემ, რომელსაც მაცხოვარმა იესო ქრისტემ უპასუხა: „დღეს იქნა ცხოვრებაი სახლისაი ამისა, რამეთუ ესეცა შვილი აბრაამისი არს“;<sup>2</sup> ანუ ეს მოწყალეობა ზაქემ გაიღო აბრაამის გულითა და გონებით და არა ისე, როგორც ზოგიერთი ჩვენგანი, რომელიც ქურდობს, დედამიწაზე არსებულ ყველანაირ ბოროტებას სჩადის, ხოლო შემდეგ მიდის რომელიმე მღვდელთან და სთხოვს წირვებში მოხსენიებას ცოდვების მისატყვევლად, მაგრამ თვითონ ისევ ბოროტ ცხოვრებას აგრძელებს. ასე არ გამოვა, ვაი ჩვენს საცოდავ თავს, ასე არ გამოვა, რადგან ღმერთს ხომ ვერ მოვატყუებთ!

საყვარელნო, მერწმუნეთ, უფლის მცნებისამებრ, თუ გვეყვარება მოყვასნი ჩვენნი, როგორც ჩვენი საკუთარი თავი და სიკეთეს გავუკეთებთ, ამ შემთხვევაში, დავით წინასწარმეტყველის სიტყვებიდან გამომდინარე, ჩვენც გავხდებით მაღალი ღმრთის შვილები. რადგან სიყვარული ნამდვილად არის ღმერთი და ვინც რჩება ღვთის სიყვარულში, ღმერთიც მასში რჩება, როგორც ამბობს იოანე მოციქული სახარებაში: „და თუ ჩვენ შევუნდობთ შეცდომებს ყველას, ვისაც ჩვენთან აქვს დაშავებული, ღმერთი ჩვენც შეგვინდობს ჩვენს ცოდვებს“.<sup>2</sup> რა სარგებელი იქნება, თუ სხეული დაიცლება არასამარხვო საკვებისაგან, ხოლო სული აღივსება ცოდვებით; რა სარგებელი იქნება, თუ სახე გაყვითლებული და დამჭკნარი იქნება მარხვისაგან და ამავედროულად შენი გონება შურითა და საზიზღრობით ანთებული გექნება; რა სარგებელი აქვს არ სვა ღვინო და ამავედროულად მრისხანების შხამით მთვრალი იყო; რა

---

სარგებელი აქვს არ ჭამო ხორცი და ამ დროს გინებით და შეურაცხყოფებით გლიჯო ჩვენი მოყვასების გულები; რა აზრი აქვს თავშეკავებას ისეთი ქმედებებისგან, რომლებიც ხანდახან ხსნილში დაშვებულია და ამ დროს ისეთი ქმედებების ჩადენა, რომლებიც არასდროსაა დაშვებული. ღმერთს ისინი უყვარს, ვინც ყოველთვის ერიდება აკრძალულს.<sup>2</sup> მაშასადამე, ამ მცირე სიტყვებიდან, რაც გითხარით, თქვენ გაიგეთ ვისთან, რა საშუალებით და იარაღით მოგვიწევს ბრძოლა და როგორ უნდა გავიმარჯვოთ.

ამიტომ თითოეულმა ჩვენგანმა, შეძლებისდაგვარად, სიზარმაცის გარეშე და დიდი მოშურნეობით უნდა შეუდგეს მარხვას. გავიგე, რომ აქ თქვენთან არსებობს ჩვეულება: დიდი მარხვის დაწყების წინა საღამოს იკრიბებით სასახლეში და თითოეული თქვენგანი მოკლე სიტყვით მიმართავს ქვეყნის მთავარს, რის შემდეგაც ითხოვთ ხოლმე შენდობას. აქამდე არ მქონია შემთხვევა, ჩემი თვალით მეყურებინა ამ შეკრებებისთვის, მაგრამ, როდესაც მიაბხეს, ძალიან გამიხარდა და მომეწონა ეს ჩვეულება, რადგან ძალზედ პატიოსანი და ღირსეული საქმეა შენდობის თხოვნა ჩვენი მთავარ-ბატონებისაგან, ხოლო ამას უნდა ვაკეთებდეთ არა მხოლოდ მაშინ, როდესაც იწყება დიდი მარხვა, არამედ სხვა დროსაც. როგორც ღვთის წინაშე ყოველთვის ვცოდავთ ხოლმე, ასევე ვცოდავთ ჩვენი მთავარ-ბატონების წინაშეც: იქნება ეს სიტყვით, საქმით, ნებსით, თუ უნებლიეთ, მეცნიერებით თუ უმეცრებით, ცხადად, თუ ფარულად.

თუმცა, როდესაც ყურადღებით ვფიქრობ ამ ჩვეულების თაობაზე, მე პირადად მიპყრობს დიდი მწუხარება. ეს ჩვეულება კი არის თავისთავად მშვენიერი პირველი შეხედვით, მაგრამ თუ დავუკვირდებით, ძალზედ ცუდია, რადგან შენდობებს ერთი მეორისგან ითხოვთ და გასცემთ არა გულწრფელობითა და სუფთა გულით, არამედ სავსე შურით, ბოღმით, ბოროტებით და ბილწი გონებით.



---

ჩემო საყვარელნო კრავნო, გთხოვთ, გაფიცებთ მაცხოვარ იესო ქრისტეს სისხლს, რომელიც დაინთხა ჩვენთვის, ცოდვილთათვის, შეეშვით ამ ყველაფერს, თუ არა, დაისჯებით. ხოლო მე უღირსი და დიდად ცოდვილი ვევედრები მოწყალე და კაცთმოყვარე ღმერთს, გვაცხოვნოს და გვიხსნას სასჯელისაგან და რომ ეს დიდი მარხვა გავატაროთ მშვიდობით, ჯანმრთელობით, სიწმინდით და ცხონების გზაზე სიარულით, რომ ბოლოს აღდგომის ნათელის ხილვის ღირსები გაგვხადოს ღმერთმა. ამინ!

## ქადაგება № 7

### ქადაგება ღვთისმშობლის ტაძრად მიყვანაზე ნოემბრის თვის 21

როგორც მდიდარი ადამიანი ვერ მიიღებს ღარიბისგან ვერანაირ მატერიალურ დახმარებას, ასევე ქების ღირსი პატიოსანი ადამიანი უმეცრისგან ვერ მიიღებს შესაფერის ხოტბას! ასევე მეც, რომ ვიცი ჩემი სათნოებების სიღარიბე და განათლების სიმწირე, ვდგავარ, ვფიქრობ და ჩემი თავის მიკვირს – რა უნდა ვქნა?! რადგან, ერთის მხრივ, ვუყურებ ყოვლად წმიდა ღვთისმშობლის დიდებულ ტაძრად მიყვანას, რომელსაც აღვნიშნავთ ჩვენ დღეს, მეორეს მხრივ, ჩემ წინ ვხედავ სათნოებისა და სიბრძნის ყვავილებით მორთულ ამდენ პატიოსან სახეს, ამიტომ მიპყრობს შიში და ვერ ვხედავ საუბარს. რა ძალა აქვს ჩემს საძაგელ ენას, რომ ღირსეულად აქოს და ადიდოს დედა მარიამი, რომელიც მთელ ქმნილ სამყაროზე უფრო მეტად აღმატებული, გამორჩეული და მიმადლებულია, როგორცაა ეს ნათქვამი “*ქებათა ქებაში?*” ან რა ძალა აქვს ჩემს წყაროს, რომელშიც მხოლოდ ერთი წვეთია, რომ მორწყოს ასეთი დიდი სულიერი ბაღი.

---

მაგრამ მაღლი სულისა წმიდისა, უძლურთა მკურნალი და ნაკლულებათა აღმავსებელი,<sup>2</sup> მომცემს მე ძალას და დამეხმარება, რომ შევძლო რამდენიმე სიტყვით გამოვთქვა ღმრთის დიდება და დედა ღვთისმშობლის პატივი და თაყვანისცემა.

წმინდა წერილში, კერძოდ მეფეთა მესამე წიგნის მე-6 თავში ვკითხულობთ, რომ მეფე სოლომონმა ააშენა სამი ნაწილისგან შემდგარი ღვთის სახლი: პირველ ნაწილში იდგა ხალხის სიმრავლე, მეორე ნაწილში იდგნენ მღვდელმთავრები და მღვდლები, ხოლო მესამე ნაწილს ერქვა წმიდათა წმიდა, რომელშიც არავინ არ შედიოდა, გარდა მღვდელმთავრისა, და ისიც წელიწადში ერთხელ. წმიდათა წმიდაში შესვლისას მღვდელმთავარი აკმევდა და ლოცულობდა თავისი თავისა და ერის ცხონებისთვის. ყოველივე ეს აღწერილია წმიდა პავლე მოციქულის ებრაელთა მიმართ ეპისტოლეს მე-9 თავში: „პირველსა მას კარავსა მარადის შევლენ მღვდელნი და მსახურებასა მას აღასრულებენ. ხოლო შინაგანსა მას ერთგვის წელიწადსა მღვდელმომღუარო იგი ხოლო შევიდის და არა თვინიერ სისხლისა, რომელი-იგი შეწირის თავისა თვისისათვის და ერისა უმეცრებისათვის“.<sup>2</sup> ტაძრის პირველი ნაწილი, სადაც იდგა მორწმუნე ერი, სიმბოლურად აღნიშნავდა ჩვენს თავებზე არსებულ ხილულ ცას, სადაც ჰაერია და სადაც ფრინველები დაფრინავენ. მეორე ნაწილი, სადაც იდგნენ მღვდელმთავრები და მღვდლები, სიმბოლურად წარმოადგენდა მეორე ცას, რომელიც პირველზე მაღალია და სადაც ბინადრობენ ზეციური ძალები, ანუ ანგელოზები და წმინდანების დასი. ხოლო მესამე ნაწილი - წმიდათა წმიდა, სადაც მხოლოდ მღვდელმთავარი წელიწადში ერთხელ შედიოდა, სიმბოლურად წარმოადგენდა მესამე ცას, რომელიც მეორეზეც მაღალია და რომელშიც არავინ შედის ჭეშმარიტი მღვდელმთავრის - ჩვენი ღმრთის, მაცხოვარ იესო ქრისტეს გარდა.

რომ დარწმუნდეთ, ის ტაძარი ნამდვილად სიმბოლურად წარმოსახავდა ზეცას, მოისმინეთ და ნახეთ, რას ამბობს ნეტარი პავლე იქვე ებრაელთა

---

მიმართ ეპისტოლეს მე-9 თავში: „რამეთუ არა ხელით ქმნულთა სიწმიდეთა შევიდა ქრისტე სახედ ჭეშმარიტთა მათ, არამედ თვით მათ ცათა, აწვე ჩუენებად პირსა ღმრთისასა ჩუენტვის“.<sup>2</sup>

და რატომ ერქვა წმიდა წმიდათა? იმიტომ, რომ იქ ინახებოდა სჯულის ორი ფიცარი, რომლებიც ღმერთმა მოსეს მისცა სინას მთაზე, ასევე აარონის განედლებული და აყვავებული კვერთხი, მანანათი სავსე ტაკუკი, ოქროს სასაკმევლე და სჯულის კიდობანი. მაგრამ მე შემიძლია ვთქვა, რომ წმიდა წმიდათა ერქვა მხოლოდ იმიტომ კი არა, რომ იქ წარმავალი საგნები ინახებოდა, რომლებიც განასახიერებდნენ ძალიან ბევრ და არსებით საეკლესიო საიდუმლოს, არამედ იმიტომ, რომ მასში 12 წლის განმავლობაში ცხოვრობდა ჭეშმარიტი წმიდათა წმიდა, ანუ ყოვლადწმიდა ქალწული მარიამი, რომელმაც შვა აღთქმული მესია.

როგორც ამტკიცებენ, ტაძრის მესამე ნაწილი განასახიერებდა მესამე ცას, სადაც განათდა ჭეშმარიტი მზე სიმართლისა, ასევე დედა მარიამის საშოც გახდა უმაღლესი ცა, რომელმაც დაიტია წმიდა სამების მეორე პირი - ძე და სიტყვა ღვთისა, მაცხოვარი იესო ქრისტე, ჭეშმარიტი მღვდელმთავარი, რომელმაც მეორედ მისცა სიცოცხლე კაცობრიობას და ევედრებოდა მამა ღმერთს ადამის ცხოვნებისთვის და მისი უმეცრების შენდობისთვის. რაც შეეხება მიზეზს, რატომ შევიდა წმიდა ქალწული იმ წმიდა ადგილას და ცხოვრობდა იქ იმდენი წლის განმავლობაში, საყოველთაოდ ცნობილია და ჩვენ საჭიროდ ვთვლით, აქ ვთქვათ ამის შესახებ.

შორეულ წარსულში ჰურიებს ჰქონდათ ჩვეულება, თუ ადამიანს არ უჩნდებოდა შვილები, ასეთი ადამიანი შეძლებული და გარიყული იყო საზოგადოებისაგან როგორი დიდი და მდიდარი გვარისაც არ უნდა ყოფილიყო ის. და როდესაც ასეთ ადამიანს მიჰქონდა ხოლმე ძღვენი ტაძარში, მღვდელი სულ ბოლოს იღებდა მისგან შესაწირს, ღვთისმსახურების დროს იდგა ყველაზე უკან და ყველაზე დაბალ საფეხურზე, საჭმელს არავინ არ

---

იყოფდა მასთან ერთად და საერთოდ ითვლებოდა, რომ ეს ადამიანი დასჯილი და დაწყევლილია ღვთისგან.

მაშასადამე, იოაკიმე და ანა იყვნენ რა ბერწები, ერთხელ ისე მოხდა, რომ ერთ-ერთ დღესასწაულზე შემთხვევით, ყველანაირი ბოროტი ფიქრის გარეშე, როგორც მდიდარი და სამეფო გვარის ადამიანებმა, პირველებმა მიიტანეს ძღვენი ტაძარში. ამის გამო მღვდელმა ისე მკაცრად და უხეშად მისცა მათ შენიშვნა, რომ დიდი შერცხვენით ტაძრიდანაც გააძევა ისინი ისე, რომ ძღვენიც არ გამოართვა. (წარმოვიდგინოთ, რამხელა ტკივილი და მწუხარება შეიპყრობდა ასეთი დიდებული და უმანკო ადამიანების გულს). ხოლო მათ დიდი ღირსებით მიიღეს მღვდლის შენიშვნა და სიფიცხე, დახარეს თავები და მწარე ტირილით, არავისთვის არაფრის თქმით ისე წავიდნენ შინ.

ხოლო ახლა არ გაბედოს რომელიმე მღვდელმა ან მღვდელმთავარმა უსაყვედუროს ვინმეს იმის გამო, რომ არ ჰყავს შვილები, რადგან მხოლოდ იმ შემთხვევაში არის ადამიანი ცოდვილი, თუ ის უსჯულოებებს და ცოდვებს ჩადის. იოაკიმესა და ანას, იმისდა მიუხედავად, რომ დიდი ტკივილი და მწუხარება ჰქონდათ სიბერწისა და ხალხის სიძულვილის გამო, ისინი მუდმივად ცრემლებით და გულის სიღრმიდან ლოცულობდნენ, რომ ღმერთს ებოძა მათთვის წყალობა, მოეხსნა მათი სიბერწე და ეჩუქებინა მათთვის მუცლის ნაყოფი. უნდა ვიცოდეთ, ამას ლოცულობდნენ იმის გამო კი არა, რომ გარდაცვალების შემდეგ შვილებს ელოცათ მათთვის, ან მემკვიდრეობაში მიეღოთ მშობლების მთელი მონაგარი, მამულები და ქონება, როგორც ჩვენს დროში ფიქრობს ხოლმე ხალხი. იოაკიმე და ანა ნატრულობდნენ შვილს ალექსის გამო, რომ თუ ეყოლებოდათ გინდ ვაჟი, გინდ ქალი, მას აუცილებლად შესწირავდნენ ღმერთს.

ხედავთ ახლა ჭეშმარიტ ქრისტიანულ სიყვარულს და სურვილს, ხედავთ გულის სითბოს, ხედავთ მოშურნეობას? ვინ არის ახლა ჩვენს დროში გინდ მდიდარი, გინდ ღარიბი, რომელსაც რომც ჰყავდეს 100 შვილი, ერთი

---

მანც შესწიროს ღმერთს? [შვილის მონასტერში გაშვებას] ხალხი უღირს და უაზრო საქმედ თვლის და ამის თაობაზე ბევრ ცუდს ლაპარაკობენ, რისი გამეორება მრცხვენია კიდევაც!

ხოლო ღმერთი, როგორც ამბობს დავით წინასწარმეტყველი: „ღვთის მოშიშთა ნებას ადასრულებს ღმერთი და მათ ლოცვას შეისმენს“. როდესაც დადგა ღვთის განგებისა და აღთქმის აღსრულების ჟამი, როდესაც უფალს ჭურჭელნიც უკვე გამორჩეული ჰყავდა, სათნო ინება ღმერთმა და გახსნა ანას სიბერწე და მან შვა აღთქმის შვილი ისევე, როგორც სარამ ისააკი, რებეკამ იაკობი, რაქილმა იოსები, მანოეს ცოლმა სამსონი, ელკანას ცოლმა ანამ სამოელი და ელისაბედმა იოანე ნათლისმცემელი. ასევე იოაკიმეს ცოლმა ანამაც შვა ღვთის წმიდა ტახტი - ქალწული მარიამი, რათა განისვენოს მასზე მან, ვინც განისვენებს ანგელოზებრივ ტახტებზე. მაღალმა ღმერთმა, რომელმაც სიბრძნით გაამყარა ცანი და ქვეყანა დააფუძნა წყალზე, რომლის წინაშეც ძრწიან უფსკრულნი და ჯოჯოხეთის სიღრმენი, მან ყოვლადწმიდა მარიამის სახით გაიმზადა ცოცხალი ზეცა.

ჭემმარიტად დიდი ღირსება ჰქონდათ იოაკიმესა და ანას, რომ ეშვათ წმიდა ქალწული მარიამი, რადგან: პირველი - ორივენი იყვნენ სამეფო შტოს წარმომადგენლები და დავით მეფის შთამომავლები. ასევე ორივენი იყვნენ სათნო და მართალნი ღვთის წინაშე; მეორე - მათ მიიღეს ეს კურთხევა და წყალობა დიდი გულისტკივილის, მრავალი ლოცვის, გულუხვი მოწყალებისა და ბევრი ცრემლის შედეგად, როგორც ამბობს დავით წინასწარმეტყველი: „ვინც თესავს ცრემლებით, სიხარულს მოიმკის“. ჭემმარიტად მოიხვეჭეს ისეთი დიდი სიხარული, როგორც არ ჰქონიათ სხვა წმინდანებს არც მანამდე და არც მათ შემდეგ და არც ღვთის მშობელთა სახელი რგებია წილად სხვა არავის.<sup>2</sup>

ამიტომ წმინდა ქალწულის დაბადებიდან 3 წლის გასვლის შემდეგ დიდი ზეიმით, სხვა ქალწულთა თანხლებით, დანთებული ჩირაღდნებით,

---

დავით მეფსალმუნის წინასწარმეტყველების მიხედვით მშობლებმა, მათი აღთქმისამებრ, წმინდა მარიამი ტაძარში მიიყვანეს. მივიდნენ რა ტაძრის კარებთან, ნეტარმა ანამ დიდი რწმენითა და ღირსებით უთხრა მღვდელს: „ჰოი, მაღალო ღვთის მსახურო, მიიღე ეს ქალწული, რომელიც ჩემი საშოს ნაყოფია, რომელიც მოვიგე დიდი გულისტკივილით, ცრემლებთან შერეული ლოცვებით და დააბრძანე იგი ღვთის სახლში, რადგან მას აღვუთქვით და ღმერთმა დიდი წყალობა მოიღო ჩემზე და მომიხსნა ერის ყვედრება; მიიღე ის ყველანაირი ეჭვის გარეშე და შეიყვანე ყოველგვარი დაყოვნების გარეშე ტაძარში, რამეთუ ღმერთსაა შეწირული“.

მღვდელმა ზაქარიამ მოისმინა რა ეს სიტყვები და დაინახა რა ყოვლადწმინდა ქალწული, გაიკვირვა და დიდი სიხარულით წინასწარმეტყველური სიტყვებით მიმართა მას: „შენ ხარ ჭემმარიტად სიცოცხლის დახშული კარი, რომელიც ნახა წინასწარმეტყველმა იეზუკიელმა. ამიტომ გეხსნება ტაძრის კარი, რომ შეხვიდე და დაემკვიდრო მასში, რადგან ჭემმარიტად შენთვის ააშენა ის სოლომონმა, განჭვრიტა რა წინასწარმეტყველური ხედვით შენი სიწმიდე. შენ ღირსი ხარ, დაემკვიდრო მასში, რადგან ყველაფერი, რაც მასშია, შენ განგასახიერებს. ამიტომ თუ განცხადდა ჭემმარიტება, ჩრდილიც უნდა აეხადოს მას.

შემოდი, ღვთის ასულო, ტაძარში სიხარულით და მხიარულ იყავ მასში, რადგან ჭემმარიტად დავინახე ისრაელის მაცხოვრების სიახლოვე, რომელიც ამ სოფლად შენგან უნდა მოივლინოს!

შემოდი, ყოვლადწმიდაო, თამამად და სიხარულით, რომელიც ხარ სამყაროს მაცხოვარ იესოს ქრისტეს სავანე!

შემოდი, უწინარეს ყოველთა საუკუნეთა გამორჩეულო ასულო, შენთვის გამორჩეულ ადგილას, რომ ისაზრდოო ზეციური პურით, რომელსაც ანგელოზების მიერ მაღალი ღმერთი – მამა საუკუნეთა გამოგიგზავნის!

---

შემოდი წმიდათა წმიდაში, რამეთუ ღირს ხარ ჭემმარიტად, რათა მიიღო დაფარული ზეციური საიდუმლო, რომ შენგან იშვება სამყაროს შემოქმედი!

შემოდი და გახდი ღმერთისა და კაცის შემრიგებელი!“

მერე მღვდელი ზაქარია შეტრიალდა მშობლებისკენ და უთხრა: „გიხაროდენ თქვენ, წმიდანო მეუღლენო, კურთხეულო წყვილო, იოაკიმე და ანა, რადგან თქვენ ღირსნი გახდით იყოთ ასეთი წმიდა ყრმის მშობლები. სავსენი ხართ ნეტარებით, რადგან ამ პატარა ქალწულში წინასწარმეტყველური თვალთ ვხედავ, რომ ჭემმარიტად ის არს ჩვენი წინაპრების [ადამისა და ევას] სიშიშვლის დამფარველი, წინასწარმეტყველთა სარკე და ხსნა სოფლისა!“

მამასადამე, ამ მცირე სიტყვებით, რომელიც ვთქვი, უნდა გავიგოთ, რომ წმიდა ქალწული ორი მიზეზით შევიდა წმიდათა წმიდაში: პირველი- მთავარანგელოზი გაბრიელის ხარების სიტყვებით განწმენდილიყო პირვანდელი ცოდვისგან და მეორე - როგორც გამორჩეულ ჭურჭელს, სულიწმიდის მადლით, მიეღო საშოში ღვთის სიტყვა და ძე.

ამიტომ ჩვენც, როდესაც შევდივართ წმინდა ეკლესიაში, აუცილებელია, უპირველეს ყოვლისა, განვიწმიდოთ ჩვენი ცოდვებისა და ბოროტი ფიქრებისგან და ამის შემდეგ უკვე განწმენდილი ცნობიერებით გავხდეთ გამორჩეული ჭურჭლები და ჩვენს გულებში მივიღოთ მადლი სულისა წმიდისა და სიტყვა ღვთისა; მხოლოდ ასე გავხდებით ამ დღის ჭემმარიტი მედლესასწაულენი, მიუხედავად იმისა, რომ ყოველი სიხარულის მიზეზს, დედა ღვთისმშობელს, მაინც ვერ შევასხავთ მისთვის შესაფერის ქებასა და დიდებას. მისი სიწმინდე აღემატება რა ნებისმიერ ენასა და ადამიანის გონებას, ერთი მხრივ, ცოდვის მიმართ შიშითა და, მეორე მხრივ, ცხოვნების იმედის სიხარულის გრძნობით. ყველამ ერთი სულითა და ერთი გონებითა ვთქვათ: „გიხაროდენ, მიმადლებულო, ანგელოზთა მიერ ქებულო, უფალი შენთანაა!“ მისი გამოუთქმელი წყალობა და მადლი, იყავნ მარადის ჩვენ ყოველთა თანა. ამინ!

---

## ქადაგება № 8

### ქადაგება წმინდა ნიკოლოზის ხსენების დღესთან დაკავშირებით დეკემბრის თვის 6

ღვთის მიერ შექმნილი ადამიანი, რაკი იგი ორი ნაწილისაგან: პირმეტყველი სულისა და მგრძნობიარე სხეულისაგან შედგება, შესაბამისად, სათნოებებიც ორმაგი: სულიერი და ხორციელი აქვს. სულიერი სათნოებები არის ოთხი: სიმამაცე, სიბრძნე, სამართლიანობა და სიწმინდე. სხეულის სათნოებებიც არის ოთხი: სიმღიერე, სიმრთელე, მშვენიერება და ჯანმრთელობა. სულისა და ხორცის ჩამოთვლილი სათნოებებიდან იშვება სხვა ოთხი საერთო სათნოებაც: სარწმუნოება, სასოება, სიყვარული და თავმდაბლობა.

ღვთის წყალობით ამ ოთხ უძრავ სათნოებაზე, როგორც ურყევ სამირკველზე, მსურს დღეს ავაგო ჩემი მეტყველება. უპირველეს ყოვლისა, მოკლედ გეტყვით თითოეული სათნოების შესახებ, რა არის მათი ძალა და ქმედება, რომ მერე უფრო ნათლად გაიგოთ ქადაგების შინაარსი. ღვთის წყალობითა და კურთხევით, სანამ გექნებათ ამისი მოსმენის დრო და



---

მოთმინება. მაშასადამე, გიხმობთ, მისმინოთ სიყვარულით, რომ ღვთისგანაც მიიღოთ საზღაური.

როგორც პავლე მოციქული ებრაელთა მიმართ ეპისტოლეს მეთერთმეტე თავში ამბობს: „ვერ შესაძლებელ არს სათნოყოფაი [ღმერთსა]; რამეთუ სარწმუნოებაი უღირს რომელი მოუხდების ღმერთსა, რამეთუ არს, და მაძიებელთა მისთა სასყიდლის მიმცემელ ექმნების“, და რომ დარწმუნდეთ ამ სიტყვების ჭეშმარიტებაში, მოისმინეთ და ნახეთ, რას ამბობს მაცხოვარი იესო ქრისტე მარკოზის სახარების მეთექვსმეტე თავში: „წარვედით ყოველსა სოფელსა და უქადაგეთ სახარებაი ესე ყოველსა დაბადებულსა. რომელსა ჰრწმენეს და ნათელილოს, ცხოვნდეს; და რომელსა არ ჰრწმენეს, დაისაჯოს“.<sup>2</sup>

აჰა, როგორც ვნახეთ, სარწმუნოების გარეშე შეუძლებელია ცხოვნება და იცოდეთ, რომ მისი ადგილი არის ადამიანის გული და სათნოებებით გამდიდრებული ცხოვრება, როგორც ამაზე მეტყველებს წმინდა მოციქული იაკობი: „რამეთუ ვითარცა ხორცი თვინიერ სულისა მკუდარ არიან, ეგრეთვე სარწმუნოებაი თვინიერ საქმეთასა მკუდარ არს“. და არავინ გაივლოს თავის გონებაში, რომ სათნოებების გარეშე მხოლოდ რწმენით ცხოვდება. ეს დიდი შეცდომაა. აჰა, მოკლე სიტყვებით გითხარით სარწმუნოების ძალის შესახებ. ახლა მოისმინეთ სასოების შესახებაც.

სასოება არის ჭეშმარიტი კადნიერება ღვთის წინაშე მოცემული ადამიანის გულში ღვთაებრივი ნათელით, რომ არასდროს წარეკვეთოს იმედი ღვთის წყალობაში, არამედ დარწმუნებული იყოს, რომ სინანულით მიიღებს ცოდვების შენდობასაც და სხვა სათხოვართა აღსრულებასაც, დროებითისა თუ მარადიულის. ადამიანის გულში სასოება მტკიცდება და მყარდება, უპირველეს ყოვლისა, მაცხოვარ იესო ქრისტეს მაღლითა და შეწევნით, რადგან ის არის ჩვენი ჭეშმარიტი და სრული სასოება. როგორც კორინთელთა მიმართ ეპისტოლეში პავლე მოციქული ამბობს: „ჩვენი სასოების უფალი იესო ქრისტეა მაცხოვრის და ღმრთის ჩვენის ბრძანებით, რამეთუ მისგან

---

ვლებულობთ ყველაფერს“. ასევე, თავად მაცხოვარი იესო ქრისტე გვასწავლის: „და რაიცა ითხოვოთ სახელითა ჩემითა, იგი ვყო, რაითა იდიდოს მამაი ძისა თანა“. ქრისტეს ამ მაღლზე დაფუძნებულია მთელი ჩვენი სასოება.

აჰა, თქვენ გაიგეთ სასოების ძალის შესახებ და ახლა მოგიტხოვრებთ სიყვარულის შესახებაც:

სიყვარული, როგორც პავლე მოციქული ამბობს, არის უმეტესი, ვიდრე სარწმუნოება და სასოება, არის ყველა სათნოების მწვერვალი, აერთიანებს ყველას და გზას უკვალავს ღმრთისკენ. მათეს სახარების 22-ე თავში, თავად მაცხოვარი იესო ქრისტე სიყვარულის შესახებ ამბობს: „ამ ორთა მცნებათა ყოველი სჯული და წინასწარმეტყველნი დამოკიდებულ არიან“.<sup>2</sup>

თქვენ უკვე გაიგეთ სიყვარულის ძალის თაობაზეც. ახლა გეტყვით თავმდაბლობის შესახებაც. თავმდაბლობა არის სისრულე, კავშირი და ბეჭედი ყველა სათნოებისა, რადგან თუ ვინმე ასრულებს სამყაროს ყველა სათნოებას, მაგრამ არ აქვს თავმდაბლობა, ყველაფერი იკარგება, ყველაფერი ამაოა, სიცარიელეა და მათი შესრულების ღვაწლი უაზროა, რადგან თავმდაბლობა არის ყველა სათნოების დედა. და როგორც დედა თავისი ბუნებრივი სიყვარულით დიდ ღვაწლს დებს რომ ასაზრდოოს, გაზარდოს და დაიცვას თავისი შვილები, რომ რაიმე ბოროტება ან განსაცდელი არ შეემთხვათ, ასევე თავმდაბლობაც ასაზრდოებს დანარჩენ სათნოებებს და იცავს მათ განსაცდელებისაგან, რათა არ დაიღუპონ. თავდაპირველი და ყველაზე დიდი ცოდვა არის ამპარტავნება, რომელიც თავად სატანამ გააჩინა და ეს სატანა ღმერთთან ყველაზე ახლოს მდგომი ანგელოზი იყო და ერქვა *ლუციფერი*, რაც ითარგმნება, როგორც *დიდი ნათელის მატარებელი*. ესოდენ დიდი ანგელოზი ამპარტავნებამ დასცა მასთან აყოლილ სხვა მრავალ ანგელოზთან ერთად და ყველანი ჯოჯოხეთის უფსკრულში შთააგდო. იმ უდიდესი ნათელის შემდეგ, რომლის მატარებელიც იყო იგი, ყველანაირ სიმუქეზე და სიშავეზე საშინელ უკუნით სიბნელედ გადაიქცა და განკუთვნილი აქვს მარადიული და

---

დაუსრულებელი სასჯელი, რამეთუ არის სული და მის ჭრილობას არ აქვს უნარი არც განკურნების, არც მოშუშების და არც სინანულის.

ამპარტავნების ცოდვამ, მისი უდიდესი შურიანობის თვისებიდან გამომდინარე, შეაცდინა საწყალი ადამიც, დააკარგვინა პატივი, მიიყვანა სიკვდილამდე და შთაიყვანა ჯოჯოხეთში. მიუხედავად იმისა, რომ ამპარტავნების ცოდვას დიდი ძალა აქვს და *ლუციფერიც* შთააგდო ჯოჯოხეთის უფსკრულში, თავმდაბლობის სათნოება კი გაცილებით მეტი ძალის მქონეა; რადგან თავმდაბლობამ თავად ღმერთი, რომელიც ანგელოზ *ლუციფერის* შემქმნელია, დაატოვებინა ზეცა, დიდება და ქება, რომელსაც ანგელოზები შეასხავდნენ, ჩამოიყვანა დედამიწაზე, გახადა კაცი და როგორც ამბობს პავლე მოციქული, იქამდე დაიმდაბლა თავი, რომ ჯვარს ეცვა, მიიღო სიკვდილი, შთავიდა ჯოჯოხეთში და გამოიყვანა ადამი მთელ მის ნათესაობასთან ერთად და აიყვანა ზეცად. ხოლო *ლუციფერის* ამოყვანა შეუძლებელი იყო, რადგან მას დაბლა სწევდა ცოდვა.

ცოდვა ემსგავსება ქვას, რომელსაც იზიდავს მისი გამჩენი – დედამიწა. სათნოება კი ემსგავსება ცისკენ ანუ ჰაერისკენ მიმართულ ცეცხლს, რომელიც ჰაერში ჩნდება და მისით იკვებება კიდევაც. ასევე ღმერთიც არის გამანადგურებელი ცეცხლიც და ამავდროულად მოლივლივე პაწია ალიც, როგორც ის წინასწარმეტყველმა ილიამ დაინახა. როგორც ადამიანს, რომელსაც სახლში აქვს ოქრო, ვერცხლი, იარაღი და ძვირფასი ტანსაცმელი და სახლიდან გასვლისას კლიტეს ადებს, რომ ქურდი არ შემოვიდეს, არ გამარცვოს და არ დააზარალოს, ასევე თავმდაბლობაც, ბოქლომით რაზავს ყველა სათნოებას, რომ არ მოვიდეს მთავარი ქურდი - ეშმაკი და არ დაგვაცარიელოს ყველაფრისგან, რაც დიდი სულიერი შრომითა და ღვაწლით მოგვიპოვებია.

აჰა, შეძლებისდაგვარად, მოკლედ აგიხსენით ოთხი სათნოების ძალა და ქმედება, რომლებიც აუცილებლად უნდა დათესოთ თქვენს გულებში, დაიცვათ და შეასრულოთ: მხოლოდ ამ შეთხვევაში იქნებით კიდევაც

---

ბედნიერები, ანუ ნეტარები, როგორც ამას გვეუბნება თავად მაცხოვარი იესო ქრისტე: „ყველას, ვინც ისმენს ჩემს სიტყვებს და ასრულებს მათ, მე ვამსგავსებ გონიერ კაცსო“<sup>2</sup>.

როგორც უკვე გითხარით, ამ ოთხი სათნოების ძალასა და ქმედებაზე, როგორც უძრავ ოთხწახნაგიან ქვაზე, ყველა წმინდანმა, მართალმა და ბრძენმა ადამიანმა ააგო თავისი სათნოების სახლი, როგორც ეს ნათქვამია სახარებაში: „და გარდამოხდა წვიმაი, მოვიდეს მდინარენი, ქროდეს ქარნი და ეკუთნეს სახლსა მას, და არა დაეცა, რამეთუ დაფუძნებულ იყო კლდესა ზედა“, ხოლო ეს ქვა, როგორც ამბობს პავლე მოციქული, არის თავად მაცხოვარი იესო ქრისტე.

ერთ-ერთი ასეთი ბრძენთაგანი, წმიდა, მართალი და ნეტარი ადამიანი არის სასწაულთმოქმედი დიდი ნიკოლოზი, მრონ-ლიკიის მთავარეპისკოპოსი, რომლის ხსენებასაც აღვასრულებთ ჩვენ დღეს ამ წმინდა სალოცავში და რომელიც ეკლესიის კლდის მწვერვალზე დგას, როგორც ღვთის მიერ დაცული ციხე-სიმაგრე ყველა მხრიდან გამაგრებული ოთხი სულიერი ქვემეხით: სარწმუნოებით, სასოებით, სიყვარულითა და თავმდაბლობით. სარწმუნოების ქვემეხით უკუაგდება ეკლესიის მტრებს - მწვალებლებს; სასოების ქვემეხით სასოწარკვეთილები მოჰყავს ღმერთთან; სიყვარულის ქვემეხით ეხმარება ღარიბებსა და გაჭირვებულებს; თავმდაბლობის ქვემეხით ცოდვილები აჰყავს ზეცაში.

უძრავად დგას სარწმუნოებისა და სასოების მთაზე და ვერაფერი დაფარავს მას; მყარად დგას სიყვარულისა და თავმდაბლობის კლდეზე და ვერაფერი დაამსხვრევს მას! შორიდან ჩანს, რომ მწვერვალზეა დაფუძნებული; ანათებს, რადგან უფლის ეზოსა და ღმრთის სახლში დანთებული ჩირაღდანია. ასე ბრწყინავს ნათელი მისი წინაშე კაცთა და ვერცერთი ჭურჭელი ვერ დაფარავს მისი კეთილი საქმეების ბრწყინვალეობას! ანათებს მთელ სამყაროში მისი სასწაულებით, როგორც მზის სხივი. ცნობილია ყველა მისი კეთილი საქმე და მოწყალება, ყველას აქვს მიღებული მისი სიყვარული და ყველას უხარია

---

მისი ხსენება, როგორც დიდ სოლომონს აქვს ნათქვამი: „მართალი ადამიანის ქებით ხარობენ ერნი“. *კანონად სარწმუნოებისა და ხატად სიმშვიდისა და მოძღვრად მარხვისა* – უგალობს მას ეკლესია – *ამიტომაც მოიგო მან სიმდაბლითა სიმაღლე და სიგლახაკითა სიმდიდრე*. ის ბოლომდე გაჰყვა თავის მოძღვარსა და მასწავლებელს, მაცხოვარ იესო ქრისტეს, კეთილ და ჭემმარიტ მწყემსს, რომელმაც თავი დასდო სამწყსოისა თვისისათვის. წმინდა ნიკოლოზმა სრულად დაიცვა ღვთის მცნება და შეიყვარა ღმერთიც და მოყვასიც, როგორც საკუთარი თავი.

მის სრულყოფილ სიყვარულს ამტკიცებს ის დახმარება, რომელიც მან გაუწია სამ ქალიშვილს, როდესაც ისინი განსაცდელის წინაშე იდგნენ და შეეძლოთ დაეკარგათ თავისი სიწმინდე და ქალწულობა. გაიგო წმინდა ნიკოლოზმა მათი უღირსი მამის შესახებ, რომელმაც სიღარიბის სახლიდან განდევნისათვის განიზრახა საკუთარი შვილების ქალწულობის გაყიდვა და ამ მიზნით გადაწყვიტა მოეყვანა აფროდიტე, ანუ მრუშობა და მცირეოდენი ოქრო-ვერცხლი ეშოვა. გულის სიღრმიდან სიმწრით, ოხვრითა და მხურვალე ცრემლებით გოდებდა წმიდა ნიკოლოზი და ფიქრობდა: „სამი ქალწულის სახეებს ვხედავ, როგორც სამოთხის სამ სათნოებას, ხოლო ამ ცოდვის ჩადენის შემდეგ შეიცვლებიან და გარდაიქცევიან ჯოჯოხეთის სამ ბოროტებად. მცირედი მოგების გულისთვის დაკარგავენ ისეთ ქონებას, რომელიც მთების გულებში დამალული ან მთელ მსოფლიოში გაფანტული განძე მეტად უძვირფასესია; ეს მზისებური ნათელი მშვენიერება მზადაა, დაკარგოს საკუთარი ნათელიცა და სამკაულიც და გარდაიქცეს ბნელი ეშმაკების ბუდედ.“

ამ ფიქრების შემდეგ წმინდანმა თავის გულში თქვა: „არა, ბოროტო სულო, არ დავუშვებ, რომ ზეცას დააკლდეს ამგვარი სამი ულამაზესი ვარსკვლავი, არ დავუშვებ, რომ ჯოჯოხეთმა შთანთქოს ასეთი წმიდა სულები და ასეთი უმშვენიერესი ყვავილები. ჰოი, ცრუო სიყვარულო, მე გადაგიტეხავ

---

ისრებს, რომლებიც ჭრილობის გარეშე კლავენ; ლუციფერო, მე გაგირღვევ ყველა შენს ბადეს და გაგიქარწყლებ მთელ შენს მზაკვრობას.“

ასე თქვა წმიდანმა და მყისვე დამალა მზემ ყველა სხივი და დღის სინათლე სრულად ჩაქრა. ღამის სიბნელეში, როდესაც, დაღლილობის გამო, ცამ ყველა თვალი დახუჭა დასაძინებლად ისე, რომ არც მთვარეს ეღვიძა და არც ყველაზე მცირე ზომის ვარსკვლავებს ჰქონდათ გახსნილი თავისი ვერცხლისფერი სახეები, ისე სწრაფად გაიქცა წმინდა ნიკოლოზი ღარიბი სახლისკენ თითქოსდა არ ყოფილიყო კეთილის განმზრახველი, არამედ ბოროტმოქმედი, და ერთხელ და ორჯერ კი არა, არამედ სამჯერ შიგ შეუყარა უამრავი ოქრო. ამით გააგდო სიღარიბე და მასთან ერთად ბოროტი და ბილწი განზრახვა და იხსნა სამი ქალწულის სიწმინდე ეშმაკის მახისგან.

ნახეთ, რა ქნა წმიდანმა?! დაინახეთ, სიკეთის კეთებისთვის გულის რაოდენი სიმბურვალე ჰქონდა?! მიხვდით, მოყვასის მიმართ რა დიდი სიყვარული ჰქონდა?! ისწავლოს ახლა ყველა მდიდარმა თუ ღარიბმა! როდესაც გაიგებთ ძმის, მოყვასი ქრისტიანის გაჭირვებას, სუფთა სიყვარულით და პირფერობის გარეშე დაეხმარეთ, თუ გაქვთ საშუალება ფულით ან სხვა რაიმე მატერიალური საშუალებით, თუ არა და თუნდაც კეთილი რჩევით ან ნუგეშის სიტყვით. ამ შემთხვევაში არა მარტო მე, არამედ ყველა ღვთის მოშიში ქრისტიანი ასეთ მორწმუნეს ჩათვლის წმიდა ნიკოლოზის და სხვა წმინდანების თანასწორად. მოწყალების მიმართ ღმერთიც იმდენად მადლიერი და მიმღებია, რომ სარწმუნოებით და სიყვარულით შეწირულს ერთნაირად იღებს, ბევრსა თუ მცირედს, ანუ ნებისმიერ მოწყალებას, თუ ის სუფთა გულით შესაძლებლობების შესაბამისადაა გაღებული.

ამის მაგალითს ვხედავთ ქვრივის მიერ ორი ლეპტის შეწირვაში, რაც მაცხოვარ იესო ქრისტეს მიერ ყველაზე დიდ შესაწირად იყო მიღებული და ასევე იმ იგავში, სადაც მე-11 ჟამს მისულებისათვის იგივე საზღაური გადაუხადა ვენახის პატრონმა, რაც პირველივე ჟამიდან მომუშავეებს. თუ

---

მოწყალების გაღებით ჩვენს მეზობლებს გავუკეთებთ ხოლმე სიკეთეს, როგორც ამას გვასწავლის წმინდა წერილი და უშუალოდ მაცხოვარი იესო ქრისტე, რომელიც ყველაფრის საწყისი და დასასრულია, რას ფიქრობთ, რა სიკეთე აგვინაზღაურდება ამით? ნეტავ, როგორ შეგვეწევა ღმერთი ყველაფერში? რადგან დავით წინასწარმეტყველი ამბობს: „წყალობა უფლისა საუკუნითგან და ვიდრე უკუნისამდე მოშიშთა მისთა ზედა“. განა არ ვიქნებით ჩვენც მართლები, განა არ ვიქნებით ჩვენც წმიდანები? რადგან ასე გვიბრძანებს ჩვენ მაცხოვარი იესო ქრისტე: “წმიდები იყავით, რადგან წმიდა ვარ მე, უფალი, თქვენი ღმერთი“.

კეთილი საქმეებით ხდება ადამიანი წმიდა და ქებული და არა ბოროტი საქმეებით. არც განთქმულ სახელს დატოვებს ადამიანი გარდაცვალების შემდეგ, თუ ბოროტი საქმეები ექნება ჩადენილი ან თუ ვუკეთებთ ვინმეს მცირეოდენ სიკეთეს და ამას ვაკეთებთ პირფერობით, რომ ხალხმა გვაქოს. თანაც თუ ვინმეს პატარა სიკეთეს გავუკეთებთ, მერე გვინდა, რომ ის ადამიანი ყველაფერში ჩვენი მონა–მორჩილი გახდეს და თუ ეს ასე არ ხდება, ცხვირიდან გამოვადენთ ხოლმე მთელ ჩვენს სიკეთეს: ვლანძრავთ, ვაგინებთ და ვწყევლით კიდევაც, რომ ღმერთმა დასაჯოს და ხალხშიც ვლაპარაკობთ ამის შესახებ. თავს ვიქებთ, რა დიდი სიკეთე გავუკეთე იმ ადამიანს, ის კი ასეთი უმადურია.

მაგრამ ჩვენი მასწავლებელი მაცხოვარი იესო ქრისტე ასე კი არ გვასწავლის, არამედ გვეუბნება: როდესაც ვაკეთებთ სიკეთეს ან ვიღებთ მოწყალებას, მარცხენამ არ უნდა იცოდეს, რას აკეთებს მარჯვენა. მაშასადამე, თუ ვინმეს აქვს სურვილი გამოასწოროს თავისი ცხოვრება ისე, როგორც მე გელაპარაკებით, იმან მიწის მაგივრად ნიადაგად სიყვარული აიღოს, რათა სარწმუნოებამ იქ გაიდგას ფესვები, გაიზარდოს დიდ ხედ და თავის დროზე გამოიღოს მდიდარი ნაყოფი, როგორც ამას ამბობს დავით წინასწარმეტყველი: ყველა ხე და ყველა მცენარე მიწიდან აღმოცენდება და იზრდება, ხოლო თუ მიწა არ აქვს, ის ხმება და კვდება. ასევეა სარწმუნოებაც. თუ აღმოცენდება

---

სიყვარულიდან, ის იზრდება, ძლიერდება და სათნოებების ყველა ნაყოფს იღებს, რადგან სარწმუნოების ნიადაგი სიყვარულია.

სინას მთაზე ღმრთის მიერ მოხესთვის მიცემულ ათ მცნებაში პირველი და ყველაზე დიდი არის სიყვარულის მცნება; რადგან არ უთქვამს, გწამდეს უფალი ღმერთი შენო, არამედ: „შეიყვარე უფალი ღმერთი შენი ყოვლითა გულითა შენითა და ყოვლითა სულითა შენითა და ყოვლითა გონებითა შენითა და მოყუასი შენი, ვითარცა თავი თვისი!“

ნეტავ რატომ თქვა, „შეიყვარე მოყუასი შენი, ვითარცა თავი თვისი“? ორი მიზეზით: პირველი- იმისთვის რომ შენც უნდა ამჟღავნებდე სიყვარულს ისე, როგორც ყოველთვის ამჟღავნებდა და ამჟღავნებს სიყვარულს ღმერთი შენ მიმართ და მეორე- ყველა ადამიანს საკუთარი თავი უყვარს ყველაზე მეტად და თავისთვის უნდა პატივიც და სიკეთეც. შესაბამისად, ამ მაგალითით ღმერთმა გვითხრა, როგორ უნდა გვიყვარდეს ჩვენი მოყვასი. ღმერთმა დაგიფაროს, მაგრამ თუ შეგემთხვევა ისეთი რამ, რომ შენს სახლს მოეკიდება ცეცხლი, ან თავს დაგესხმებიან ქურდები, პირველი, ვინც დაგეხმარება- იქნება შენი ახლო მეზობელი და არა შენი ღვიძლი ძმა, რადგან ის შორსაა. ვისაც სიმართლით უყვარს, ისაა ნამდვილი მორწმუნე. წმიდა მოციქული იოანე ღვთისმეტყველი ამბობს: „უკეთუ ვინმემ თქუას, ვითარმედ მიყვარს ღმერთი და ძმაი თვისი სძულდეს, მტყუარ არს, რამეთუ, რომელსა არა უყუარდეს ძმაი თვისი, რომელი იხილა, ღმერთი, რომელი არა უხილავს, ვითარ ძალ-უც შეყუარებად?“<sup>2</sup> ამის თაობაზე მაცხოვარ იესო ქრისტესაც უთქვამს თავისი მოწაფეებისთვის: „ამით ცნან ყოველთა, ვითარმედ ჩემნი მოწაფენი ხართ, უკუეთუ იყუარებოდით ურთიერთას“.<sup>2</sup>

ახლა შენ, საცოდავო ადამიანო, შენ გქვია ქრისტიანი და ქრისტეს მოწაფე? სადაა შენი სიყვარული მოყვასის მიმართ? სადაა შენი მორჩილება შენი მოძღვრისა და მასწავლებლის მიმართ? რამდენ დღესაც არ იცხოვრებ ქრისტიანულად, მით უფრო დიდ სასჯელს დაიმსახურებ. არ გქონდეს იმედი,



---

რომ მხოლოდ ქრისტიანის სახელის ტარებით ცხონდები, რადგან ამბობს მაცხოვარი იესო ქრისტე: “არა ყოველმან რომელმან მრქუას მე: უფალო, უფალო, და შევიდეს იგი სასუფეველსა ცათასა, არამედ რომელმან ყოს ნებაი ჩემი“<sup>2</sup>. ქრისტეს ნება კი სხვა არაფერია, გარდა სიყვარულისა, და ვისაც გააჩნია მოყვასის სიყვარული და სიკეთეს უკეთებს მას, ეს ის ადამიანია, რომელიც ღვთის ყველა მცნებას ასრულებს. ის, ვინც რჩება სიყვარულში, ის ღმერთში რჩება და ღმერთი მასში, როგორც ამას ამბობს წმიდა მოციქული იოანე.

ამჟამად კი ჩვენი ქრისტიანები იმდენად განუდგნენ ღმერთს, რომ იგი მატყუარადაც გამოყავთ და ამბობენ, ვითომ წმიდა წერილი ზღაპარია და ადამიანების გამოგონილიაო. ამბობენ ხოლმე: როგორ შეიძლება, რომ მიყვარდეს ჩემი მეზობელი, თუ იგი ჩემი მტერიაო? ვიდრე იმას იფიქრებ, რომ შენი მეზობელი შენი მტერია, შენ ვერ იქნები ქრისტიანი; არამედ უნდა თქვა, რომ ხარ წარმართი, ურჯულო და უნამუსო კაცი. შენი უფალი მაცხოვარი იესო ქრისტე გიბრძანებს, გიყვარდეს შენი მტრებიც და სიკეთესაც უკეთებდე მათ, ხოლო შენ ეწინააღმდეგები და არ ემორჩილები მას. ვერ აცნობიერებ, რომ შენ კაცი ხარ, ხვალ ან ზუგ მოკვდები და მიწა და ჭიები შეგჭამენ. თუ ისე მოხდა, რომ შენი მოსამსახურე ან მოჯამაგირე შეგეწინააღმდეგა, განა არ გაუჯავრდები და არ დასჯი? ხოლო მაცხოვარი იესო ქრისტე, რომელიც ჩვენი ჭემმარიტი ღმერთი და მთელი მსოფლიოს მსაჯულია, როგორ ფიქრობ, არ გაგასამართლებს და არ დაგსჯის საუკუნო ტანჯვით? დააკვირდი, იმას, ვისაც შენ მტერს ეძახი, სინამდვილეში შენი მტერი არ არის, არამედ მეგობარია, თუ მოიქცევი ისე, როგორც შენ გასწავლის ქრისტე; ხოლო თუ არ მოიქცევი ღვთის ბრძანების შესაბამისად, შენ თვითონ შენივე თავის მტერი და სულის წარმწყმედელი იქნები. ადამს თავის დროზე რომ დაეჯერებინა ღვთის მცნებისთვის, არ დაისჯებოდა არც თვითონ და მასთან ერთად არც მთელი

---

კაცობრიობა; ჩვენც ახლა რომ ვიყოთ ქრისტეს ნამდვილი მორჩილები, არ ვიქნებოდით ასეთ გაჭირვებასა და მწუხარებაში.

პავლე მოციქული კორინთელთა მიმართ ეპისტოლეს მე-13 თავში წერს: „ენასა ღათუ კაცთასა და ანგელოზთასა ვიტყვი, ხოლო სიყუარული არა მაქუნდეს, ვიქმენ მე, ვითარცა რვალი, რომელი ოხრინ, გინა წინწილანი, რომელნი ხმობედ. და მაქუნდეს ღათუ წინაისწარმეტყუელებაი და უწყოდი ყოველი საიდუმლოისა ყოველი მეცნიერებაი, და მაქუნდეს ღათუ ყოველი სარწმუნოებაი ვიდრე მთათაცა ცვალებადმდე, და სიყუარული თუ არა მაქუნდეს, არა-ვე-რაი ვარ. და შე-ღათუ-ვაჭამო ყოველი მონაგები ჩემი და მივსცნე ხორცნი ჩემნი დასაწუველად, და სიყუარული არ მაქუნდეს, არარაივე სარგებელ არს ჩემდა“<sup>2</sup>.

გაიგე, რას ამბობს?! ხოლო შენ რომ გძულს შენი ძმა იმდენად, რომ თვალით დანახვაც არ გინდა მისი, გშურს მისი, ყველასთან ცუდს ლაპარაკობ მასზე, ყველგან და ყოველთვის ცდილობ გაუკეთო ბოროტება და ზარალი მიაყენო, ასეთი ქმედებებით ნამდვილად არ ხარ ქრისტიანი, ადამიანიც კი არ ხარ, არამედ სატანა, რომელმაც დააშორა ადამი ღმერთს. და რომელია ის მღვდელი, რომელიც შენ, ცილისმწამებელს, ქრისტეს სისხლსა და ხორცს გაზიარებს?! ის ნამდვილად არ იქნება მღვდელი, არამედ იუდა და ქრისტეს გამყიდველია. ასეთ მღვდელს ღმერთი არ შეუნდობს, რამდენი სიკეთეც არ უნდა გააკეთოს, რამეთუ გვასწავლის ქრისტე: „წყალობაი მნებავს და არა მსხუერპლი“.

ამიტომ, ჩემო საყვარელნო ქრისტეს მიერნო ძმანო და კურთხეულნო ქრისტიანენო, რომლებიც შეიკრიბეთ დღეს აქ, რომ იდღესასწაულოთ და გაიხაროთ წმიდა ნიკოლოზის ხსენებით, თითოეულმა, შეძლებისდაგვარად, მაგალითი უნდა ავიღოთ წმიდანისაგან. დავემსგავსოთ მას და, უპირველეს ყოვლისა, შევიყვაროთ ღმერთიც და როგორც წერია თავდაპირველ მცნებაში – ჩვენი მოყვასიც; გვიყვარდეს ჩვენი მტრები და სიკეთით მივაგოთ მათ, პატივი

---

ვცეთ ჩვენს მშობლებს, როგორც ხორციელებს, ვინც გაგვაჩინეს, ასევე სულიერებსაც, ანუ ღირსეულ ბერებსა და პატიოსან მღვდლებს. რაც შეგვიძლია მოვერიდოთ მრუმობას, ლოთობას, შურს, ღალატს, ცუდ ჩვევებს, ბოროტ საქმეებს, სხვა მრავალ მსგავს ქმედებებს, რადგან ყველაფერი ეს ეშმაკის მოგონილია, რომ დაგვაშოროს მაცხოვარს იესო ქრისტეს და აბუჩად აგვიგდოს, როგორც მოისურვებს. და თუ დავიცავთ ყველაფერს, რაზედაც გესაუბრეთ ახლა მე თქვენ, ამ შემთხვევაში ვიქნებით კარგი ქრისტიანები და ჭეშმარიტი ღვთის, მაცხოვარ იესო ქრისტეს, ნამდვილი მოწაფეები. შესაბამისად, ყველანაირი ექვის გარეშე ვიქონიოთ რწმენა, რომ ამ ქვეყნად გვექნება მშვიდი და უშფოთველი ცხოვრება, ასევე იმ ქვეყნადაც ვიქნებით ნეტარებაში და მარადიულ სიხარულში წმიდა ნიკოლოზთან და სხვა წმიდანებთან ერთად ცათა სასუფეველში, რომელსაც ყველანი მოვიპოვებთ უფალი იესო ქრისტეს მადლით, რომლის წყალობაც ყოფილიყოს თქვენ თანა აწ და მარადის და უკუნითი უკუნისამდე. ამინ!

## ქადაგება № 9

**ქადაგება წმიდა მოციქულების, პეტრეს და პავლეს, ხსენების დღეზე,  
ივნისის თვის 29**

იმდენად დიდია წმიდა მოციქულების პეტრესი და პავლეს ღირსებები, რომელთა ხსენებასაც აღვასრულებთ ჩვენ დღეს, რომ ვერ ძალუძს კაცთა ენას მათი აღწერა.

იმდენად მდიდარი და მრავალრიცხოვანია მათი ღვთითშთაგონებული სწავლებები, რომ აღემატება ზღვის ქვიშისა და ცის ვარსკვლავების რიცხვს.

---

იმდენად დიდია მათი ღვაწლი, რომ ადამიანის გონება ამას ბოლომდე ვერასდროს ვერ ჩასწვდება და ვერცერთი ამქვეყნიური ენა ამას ვერ აღწერს. იმდენად დიდებულია მათი საქმეები, რომ ვერცერთ ბაგეს ვერ ძალუძს აღავლინოს მათთვის ღირსეული ქება.<sup>2</sup>

მაშასადამე, წარმოდგენა არ მაქვს, რა უნდა ვქნა ახლა, რომ ასეთი დიდი წმინდანებისთვის შესაფერისი ქება აღვავლინო. ვილაპარაკო? მაგრამ ჩემმა უმეცარმა და სულელმა გონებამ რა უნდა ილაპარაკოს, რომ ღირსეულად ადიდოს ეს ორი წმიდანი? გავჩუმდე? მეშინის არ დავისაჯო, როგორც უმადური, რომელიც მალავს წმიდა პეტრეს და პავლეს დამსახურებას მართლმადიდებელი ეკლესიისა და მთელი მსოფლიოს წინაშე ღვთაებრივი განგებულების, ანუ ქრისტიანული სარწმუნოების გავრცელების საქმეში, რაც გულისხმობდა წარმართი ერების, გზააბნეული პირმეტყველი სამწყსოს, ქრისტეს ნათელში, ჭეშმარიტ სარწმუნოებაში მოყვანას და ცხონების გზაზე დაყენებას.

ამიტომ რომ გადავლახო ჩემი გონების უმეცრება, წმიდა პეტრესა და პავლეს შევადარებ ორ დიდ მნათობს,<sup>2</sup> ანუ მზესა და მთვარეს და ამგვარად ოდნავ მაინც მივუახლოვდები მათი დიდებული საქმეების ღირსეულ დახასიათებას და თანაც არ დავისჯები, როგორც უმადური და დაუდევარი ღვთისმსახური.

შექმნათა წიგნის პირველ თავში მოსე წინასწარმეტყველი წერს, რომ ღმერთმა შექმნა ორი დიდი მნათობი: ერთი – მეტად დიდი, მეორე – შედარებით მცირე; დიდი მნათობი, ანუ მზე - დღის მბრძანებლად, ხოლო შედარებით მცირე მნათობი, ანუ მთვარე - ღამის მბრძანებლად. ცხადია, მათი შექმნა აუცილებელი იყო სამყაროს კეთილი მართვისა და გამგეობისათვის. იგივე ღმერთი როდესაც განკაცდა უკვე ეკლესიის დაფუძნებისა და გამტკიცებისათვის, ისევ შექმნა სხვა ორი დიდი მნათობი: ერთი დიდი, ანუ პეტრე, რათა იგი ყოფილიყო ჰურიათა შორის ღვთაებრივი შემეცნების დღის

---

ბრძანებელი და მეორე მცირე, ანუ პავლე, როგორც წარმართთა შორის კერპთაყვანისმცემლობის ღამის მბრძანებელი, რომ სასწაულების და ჭეშმარიტი სწავლების ნათელით გაეგდო სიცრუის ბნელი ღრუბლები.

დავიწყით საუბარი დიდი მნათობით, მზით, და ვამბობთ, რომ ის არის ყველა სხვა ვარსკვლავის გვირგვინი და ყველას აღემატება თავისი ნათელით, რომ მთელ მსოფლიოს აღმოსავლეთიდან დასავლეთამდე, ყველა კუთხე-კუნჭულს ანათებს, ათბობს და ეფერება თავისი სხივებით. ვინ არ აღიარებს, რომ ყველა ეს თვისება შეესაბამება წმიდა პეტრეს ღირსებებს, რადგან ის იყო მოციქულთა თავი და პირველი მოწაფეთა შორის, რომელმაც, როგორც სხვა საიდუმლო მზემ, მთელ მსოფლიოში განავრცო მადლისა და სათნოებების სხივები. მან მოიარა მთელი ჰურთასტანი, ანტიოქია, პონტო, გალატია, კაპადოკია, ასია და ბითვინია და ღვთაებრივი სიტყვების ნათელით განავრცო ურწმუნოების სიბნელე და ყველა ავადმყოფს, გაჭირვებულსა და ეშმაკეულს ანიჭებდა განკურნების მადლს. ამ მზეს იმხელა დიდი ძალა და მადლი ჰქონდა, რომ თავისი ჩრდილითაც ახდენდა სასწაულებს, როგორცაა ეს მოთხრობილი მოციქულთა საქმის მე-5 თავში: „ვითარმედ უბანთაცა ზედა გამოაქუნდეს უძლურნი და დასდგმიდეს ცხედრებითა და საკაცებითა, რაითა მოსვლასა მას პეტრესა აჩრდილი ოდენ ვისმე მისი შეადგეს მათგანსა“.<sup>2</sup>

მზის სითბოს აქვს ხეებისთვის, ბალახებისთვის, ძვირფასი ქვებისთვის და მიწის ნაყოფისთვის სიცოცხლის, ზრდის და ნაყოფის გამოღების ძალის მიცემის ბუნებრივი თვისება. ასევე პეტრე მოციქულის საიდუმლო მზის სიცოცხლის მომცემ სითბოს ასეთივე თვისებები აქვს; რადგან იმ მცირე სხივმაც კი, რომელიც მან გაუგზავნა იერუსალიმის ტაძრის „მშვენიერის“ სახელით ცნობილ კარიბჭესთან მჯდომარე დაბადებიდანვე მკელობელს, იმ წუთშივე განკურნა ის, უთხრა რა ეს სიტყვები: „მოიხილე ჩუენდა“, იმ წამსვე გაუმაგრდა ფეხის ტერფები და წვივები.

---

ამავე ცხოველსმყოფელი ძალით პეტრე მოციქულმა განკურნა და საწოლიდან ააყენა ვინმე კაცი, რომელსაც ერქვა ენეა, რომელიც რვა წლის განმავლობაში დავრდომილი იყო და ფეხზე ვერ დგებოდა. ასევე ქალაქ იოპეში მოახდინა სასწაული და მკვდრეთით აღადგინა მორწმუნე ქალი სახელით – ტაბითა.

მზეს აქვს სხვა თვისებაც. კერძოდ, ის აღწევს კარების ღრიჭოებში და კედლების ნაპრალებში, აღწევს სახლების სიბნელეში და ანათებს მათ. ასევე, პეტრე მოციქულსაც არ აკლდა ეს თვისება, როგორც ეს ნათქვამია იერემია წინასწარმეტყველის წიგნის მე-17 თავში: „ღრმაა ადამიანის გული და ვინ შეიცნობს მას“. მოციქულმა თავისი სხივებით გამოიძია და გამოამჟღავნა ანანიას და საფირას მატყუარა გონება და განზრახვა, რის შედეგადაც ისინი სიკვდილით დაისაჯნენ.

ასევე პეტრე მოციქულმა გამოამჟღავნა სვიმონ მოგვის გულის დაფარული განზრახვები, რის გამოც პირდაპირ ამხილა და უთხრა: „სიმწარედ ნაღვლისა და თანა შეკრულ ცოდვისა გხედავ შენ, შეინანე უკუე უკეთურებისა ამისგან შენისა და ევედრე უფალსა, მი-ხოლო თუ-გეტეოს შენ უსჯულოებაი ეგე გულისა შენისაი“.

თუმცა ასტრონომებისა და მეცნიერი ადამიანების მიერ დამტკიცდა ის, რომ მზესაც ჰქონია გარკვეული ლაქები (ეს ძველი ადამიანებისთვის უცნობი იყო). მაშასადამე, ჩვენც ვაღიაროთ, რომ პეტრე მოციქულის საიდუმლო მზესაც აღმოაჩნდა გარკვეული ლაქები. განა რა იყო იმ ლაქაზე უფრო დიდი, როდესაც მღვდელმთავრის ეზოში სამჯერ უარი თქვა თავის მოძღვარზე? არ იყო დიდი ლაქა ის, რომ გეთსამანიის ბაღიდან გაიქცა და მიატოვა მაცხოვარი იესო ქრისტე? მაგრამ ეს ლაქები მან ჩამოირეცხა სინანულის ცრემლებით, რომლებსაც ხშირად ღვრიდა გულის სიღრმიდან, ჩამოირეცხა და გახდა სრულად წმიდა, როგორც განახლებული და კაშკაშა მზე.

---

წმიდა იოანე ოქროპირი 48-ე ფსალმუნის განმარტებაში წერს, რომ მრავალმა იმპერატორმა აღაშენა ციხე-სიმაგრეები და სასწაული შენობები, რომლებსაც დაარქვეს თავისი სახელები, მაგრამ ამით არავითარი სარგებელი არ მიუღიათ, რადგან წავიდნენ ამქვეყნიდან და ხშირ შემთხვევაში მათი სახელი არც არავის ახსოვს; ხოლო მეთევზე პეტრეს შემთხვევაში, რომელსაც არ გაუკეთებია არაფერი მსგავსი რამ, გარდაცვალების შემდეგაც იგი ანათებს უფრო მეტად, ვიდრე მზე.

ახლა გადავიდეთ დიდი მნათობისგან მცირე მნათობზე, მზიდან - მთვარეზე, ნათელი ჭურჭლისგან - გამორჩეულ ჭურჭელზე, ანუ პეტრე მოციქულიდან - პავლე მოციქულზე.

ფილოსოფოსები დიდ ძალასა და ღირსებას ანიჭებენ მთვარეს. უპირველეს ყოვლისა, ამბობენ, რომ ის არის ღამის სამკაული, მზის მსგავსი და ზღვის მბრძანებელი: ეს ღირსებები ნამდვილად შეესაბამება რჩეულ ჭურჭელსაც, ანუ პავლე მოციქულს, რომელიც არის ღამის სამკაული, რომელიც ღმერთმა გააგზავნა წარმართებში კერპთაყვანისმცემლობის სიბნელის გასანადგურებლად, ისევე, როგორც ამას ამბობს ისაია წინასწარმეტყველი: „დაგაყენე წარმართთა ნათლად სამყაროს კიდებამდე, ცხონების გზის საჩვენებლად“.

ღამის წყვდიადი მაშინ იყო გავრცელებული მთელ სამყაროში, როდესაც ვერცხლს და ოქროს, ძვირფას ქვებსა და ხეებს თაყვანს სცემდნენ, როგორც ღვთაებებს და ადამიანები მთელი თავიანთი სულიერი ძალებით ემსახურებოდნენ იმას, რაც უყვარდა ლუციფერს და ეშმაკებს. ადამიანებს, როგორც ჯოჯოხეთის ნაშობებსა და ბოროტების შვილებს, სხვა არაფერი სურდათ, გარდა ბოროტების, წარმართობის, ხორციელი ტრფიალის, უსირცხვილო წეს-ჩვეულებების, სიწმიდეების სრული დავიწყების, ვერცხლისმოყვარეობისა და ამპარტავნობის სიყვარულის გარდა; მაშინ

---

უარყოფილი იყო ღვთის სჯული და ჭეშმარიტი სარწმუნოება და ადამიანები ემსახურებოდნენ მხოლოდ და მხოლოდ თავიანთ ხორციელ ვნებებს.

მაშასადამე, რომ განეგდო ღამის ეს სიბნელე და რომ გაენათებინა ეს მყრალი წყვილი, გამოარჩია ღმერთმა პავლე, რომ მთვარესავით გაენათებინა სამყარო და მოესპო კერპთაყვანისმცემლობის სიბნელე, როგორც ეს ნათქვამია წმიდა წერილში: „ერმა, რომელიც იჯდა ბნელსა შინა, იხილა დიდი ნათელი“.

პავლე მოციქულს შეესაბამება სამყაროს მეორე მბრძანებლობაც, რადგან იგი მზის მსგავსია და პეტრესავით ყველაფერში სრულყოფილი აღმოჩნდა. მთელი ღირსებით შეგვიძლია გავიმეოროთ ისაია წინასწარმეტყველის სიტყვები: „და გაანათებს მთვარე, როგორც მზის ნათელი“. და ვინ არ აღიარებს, რომ ჭეშმარიტად, პავლე მოციქული აღმოჩნდა პეტრე მოციქულის მსგავსი? ნამდვილად, პეტრე იყო თავმდაბალი ადამიანი, რადგან იმ სასწაულებრივ თევზებზე ნადირობის შემდეგ მან მაცხოვარ იესო ქრისტეს უთხრა: „განვედ ჩემგან უფალო, რამეთუ კაცი ცოდვილ ვარ მე“. და უფრო მეტად თავმდაბალი გამოჩნდა ფერხთბანვის დროს, როდესაც მაცხოვარს უთხრა: „არასადა დამბანო ფერხნი ჩემნი“. ასევე, უფრო თავმდაბალი აღმოჩნდა სიკვდილის ჟამს, როდესაც ისურვა ჯვარზე თავდაყირა დაკიდულიყო.

განა პავლე მოციქულიც არ მიემსგავსა პეტრეს თავმდაბლობით, როდესაც საკუთარ თავს თვლიდა ყველა მოციქულზე მდაბლად და მიიჩნევდა, რომ საერთოდ არც იყო ღირსი მოციქულად წოდებულიყო? საკუთარ თავს მიიჩნევდა ყველაზე უდიდეს და უპირველეს ცოდვილად და ამბობდა: „იესო ქრისტე მოვიდა ამ სოფლად, რომ აცხოვნოს ცოდვილები, რომელთაგან პირველი მე ვარ“.

მომთმენი იყო პეტრე და მომთმენი იყო პავლეც. ორივემ სიხარულით დაითმინა საკრეველები, გვემა, საპყრობილე, დევნა და ასევე სიხარულითვე მიიღეს მაცხოვარ იესოს სახელისთვის შეურაცხყოფები. სიმწრით დაიტირა



---

პეტრემ თავისი შეცდომა. ასევე პავლემაც რამდენი ცრემლი დაღვარა, როდესაც, უმეცრების გამო, იყო ღვთის ეკლესიის მგმობელი და მდევნელი. როდესაც მაცხოვარმა იესო ქრისტემ სამჯერ ჰკითხა პეტრეს: „სიმონ იონაისო, გიყუარ მუა?“ - პეტრე მოციქულისთვის არ იყო იოლი მწუხარებით პასუხის გაცემა: „ჰე, უფალო, შენ იცი, რამეთუ მიყუარ შენ“. პავლე მოციქულიც იმდენად მხურვალე იყო ქრისტეს სიყვარულში, რომ არაფრად მიიჩნევდა მთელი სამყაროს არცერთ სიმდიდრესა და სიამეს და ამბობდა: „ვინ განმაშორნეს ჩუენ სიყუარულსა მას ქრისტესსა: ჭირმან ანუ იწროებამან, დევნამ ანუ ურვამან ანუ მახვილმან? რამეთუ მრწამს მე, ვითარმედ არცა სიკუდილმან, არცა ცხორებამან, არცა ანგელოზთა, არცა მთავრობათა, არცა ძალთა, არცა ამან სოფელმან, არცა სიმაღლეთა, არცა სიღრმეთა, არცა სხუამან დაბადებულმან შემიძლოს ჩუენ განყენებად სიყუარულსა ღმრთისასა“.

პეტრე მოციქულის ჩრდილითაც კი ბევრი ავადმყოფი და არა წმიდა სულით შეპყრობილი ადამიანი იკურნებოდა; ასევე პავლე მოციქულის სარტყლითა და სამოსლით განიდევნებოდა ყველა უძლურება და ბოროტი სული. პეტრემ აღადგინა შობითგან დავრდომილი ადამიანი, რომელიც იწვა ტაძრის კარებთან. იგივე გააკეთა პავლე მოციქულმაც ქალაქ ლისტრაში. პეტრემ მკვდრეთით აღადგინა ტაბითა, პავლემ კი მკვდრეთით აღადგინა ჭაბუკი ევტიხი, რომელიც სარკმლიდან გადმოვარდა. ორივენი იყვნენ ქრისტესთვის ღვაწლში, ტანჯვაში, ადამიანების სულების ცხონებისთვის მზრუნველობაში, სასწაულების აღსრულებაში, სიკვდილსა და დაფლვაში, რადგან ორივემ აღიარა ჭემმარიტი სარწმუნოება რომში, ეწამა და დაიფლა.

როგორც უკვე ითქვა, მთვარის ერთ-ერთი ღირსება არის ზღვის მბრძანებლობა, რაც პავლესაც შეესაბამება, რადგან სამჯერ დაიმსხვრა ზღვაში ნავი, რომელშიც თვითონ იმყოფებოდა; მთელი ღამე და დღე გაატარა ზღვის სიღრმეში და მაინც დაამარცხა საშინელი ტალღები და მუდამ უვნებელი გამოდიოდა ზღვის განსაცდელეებიდან.

---

ყველა სხვა თვისებასთან ერთად, მთვარეს აქვს ეს თვისებაც: როდესაც ის სავსეა ცის კამარაზე, ძაღლები, როგორც მტრები, თითქოსდა ბრძოლით, განუწყვეტლივ უყევენ მას, რადგან ვერ იტანენ მის სინათლეს; მიუხედავად ამისა, ის მაინც რჩება წმიდად, სპეტაკად და დაუბრკოლებლად ანათებს და აგრძელებს თავის გზას ცის კამარაზე.

რამდენი ველური და ცოფიანი ძაღლი არ აღმდგარა პავლე მოციქულზე საყევად. უყევა მას მთელმა ეფესომ, რადგან გაცხადებულად ქადაგებდა, რომ ადამიანთა ხელებით ნაკეთი კერპები ღმერთები არ იყვნენ. უყევეს იკონიაშიც, როდესაც წარმართებმა და ჰურიებმა განიზრახეს მისი ჩაქოლვა. უყევა ელიმა მოგვმაც, რომელიც პავლე მოციქულის საიდუმლო მთვარის ნათელის გამო დაბრმავდა. ბოლოს რამდენიმე ჰურიამაც დაუყევა, როდესაც თავისივე თავი დაიწყევლეს და დაიფიცეს, რომ მანამდე არაფერს შეჭამდნენ და დალევდნენ, სანამ არ მოკლავდნენ პავლეს.

მაგრამ ამ დევნის, გაჭირვებისა და მწუხარების მიუხედავად, მოციქულმა უშიშრად გააგრძელა თავისი გზა და სულ ამბობდა: „ვინ დამაშორებს ქრისტეს სიყვარულს? გაუშვი, იბრაზონ ჰურიებმა, ბოროტს განიზრახვიდნენ ტირანები, იყეფონ ცოფიანმა ძაღლებმა; მე მაინც გავივლი ჩემს გზას, ვიქადაგებ და დავიცავ ჭეშმარიტ სარწმუნოებას“. ვინ არ აღიარებს, რომ პავლე მოციქული ანათებდა წარმართებში ისე, როგორც სავსე მთვარე თავის დღეებში?

ექვგარეშეა, რომ წმიდა პეტრე ეკლესიაში იდგა, როგორც დიდი მნათობი, რადგან ანათებდა როგორც მაღალი ღმრთის მზე, ხოლო წმიდა პავლე იდგა როგორც მცირე მნათობი, მაგრამ ნათელით, სათნოებით, ღირსებითა და დიდებით თანასწორი მზისა.

ახლა მოვაბრუნებ ჩემს სიტყვას შენსკენ, ჰოი, ქრისტიანო ქვეყანავ და შენთან ერთად გავიხარებ, რადგან მფარველებად გყავს ორი მოციქულთა თავი - პეტრე და პავლე და შენს გვირგვინში აღბეჭდილია ჯვრის სახე იმისათვის,

---

რომ მარადის ცხოველსმყოფელი ძელის შეწევნისა და მფარველობის სასოება გქონდეს. ოდითგან ყორანი არ დაბრუნებულა ნოეს კიდობანში, რადგან წინასწარმეტყველი უფრო დიდი სიხარულის მოლოდინში იყო. ხოლო ახლა, ქრისტიანო ქვეყანავ, შენთან მოსულია სიხარული და მშვიდობა არა [მტრედით] ზეთისხილის ტოტით, არამედ - [არწივით] ნისკარტში ჯვრით.<sup>2</sup> მოფრინდა შენს მკლავებში, პატიოსანო ქვეყანავ, დიდებული ფრინველი და აქებს და უგალობს, ერთი მხრივ, მზეს და, მეორე მხრივ, მთვარეს. როგორც მზე - მარჯვნივ, ხოლო მთვარე - მარცხნივ, ასევე არიან დიდებული მოციქულები პეტრე და პავლე, რაც იმის ნიშანია, რომ ისინი ზრუნავენ და იცავენ შენს ერს ერთნაირად როგორც კეთილმორწმუნეებს, ასევე ცოდვილებსაც; მართლებს მარჯვნივ, რადგან მზე ანათებს დღეს და არის სიმბოლო მადლისა, ხოლო ცოდვილებს მარცხნივ, რადგან მთვარე ღამე ანათებს და ღამე არის ცოდვის სიმბოლო.

გიხაროდენ და მხიარულ იყავ, რამეთუ ასეთი ორი დიდი მფარველი და მხურვალე მეოხი გყავს.

ხოლო თქვენ, დიდნო მოძღვარნო ამა სოფლისა, მეტრე და პავლე, მოხედეთ ამ ერისა და მთელი საქრისტიანოს მოშურნეობას, რომელიც თქვენ წინაშე დგას და ქებას აღავლენს და დაიცავით ისინი თქვენი შემწეობით და მხურვალე მეოხებით, დაიფარეთ თქვენი საფარველის ქვეშ და ორი დიდი მნათობის მსგავსად, გადმოგვხედეთ მათ, რომლებიც ვიმყოფებით სიკვდილის ჩრდილსა და წყვდიადში. გვანუგეშეთ ჩვენ, უღირსნი, რომლებიც გოდების უფსკრულში ვიმყოფებით. მეოხ იყავით ღვთივდაცული ერისთვის, მართლმადიდებელი ეკლესიისთვის, სამეუფო მღვდლობისთვის და განსაკუთრებით ევედრეთ ჯვარცმულ მაცხოვარ იესო ქრისტეს, რომლის სახარებაც მაგდენი შრომით, დევნით, ტანჯვით, წამებით, საპყრობილით, ჯვრითა და სიკვდილით იქადაგეთ მთელ მსოფლიოში.

---

მრავალსა წელსა დაიცავით ჩვენი ქრისტიანი, კეთილმორწმუნე და თქვენი ღირსეული თაყვანისმცემელი, მთავარი [კონსტანტინე],<sup>2</sup> რომ მიეცეს მმართველობის სიბრძნე და ჩვენც, მასთან ერთად, გვქონდეს სულიერი და ხორციელი მშვიდობა, დაცულნი ვიყოთ ქრისტიანობის ყველა მტრისგან და ვიქადაგოთ მრავალი წელი თქვენი სახელი, აღვნიშნავდეთ თქვენს ღვაწლს და ვიზიემოთ თქვენი დიდებული და ნათელი ხსენება. ამინ.

## ქადაგება № 10

### ქადაგება წმინდა მოციქულთასწორ მეფეთა კონსტანტინე და ელენეს ხსენების დღესასწაულზე

„დიდებითა და პატივითა გვირგვინოსანჰყავ იგი“

მდიდარ კაცს მეფისათვის ძვირფასი საჩუქრის მირთმევა შეუძლია, მცოდნეს - ღირსეული ხოტბის შესხმა, მე კი, უმწეოსა და გლახაკს, კეთილ საქმეებსა და ცოდნაში არ ძალმიძს უკეთესი ძღვენისა და ქების მიცემა ღვთის მიერ რჩეულისა, დიდებული მეფისა და მოციქულთასწორისა კონსტანტინესთვის, გარდა ჩემი მოდრეკილი თავისა და სულიერი თავმდაბლობისა, ამიტომაც მის სადიდებლად მსურს ვთქვა რამოდენიმე სიტყვა არა ამპარტავნებით, არამედ თავმდაბლობით, არა მაღალფარდოვანი და რიტორიკული გამონათქვამებით, არამედ უბრალო და მოკრძალებული სიტყვებით, არა ისე, როგორც შეჰფერის წმინდანს, არამედ როგორც ძალმიძს. ხოლო თქვენ, გთხოვთ, მომისმინოთ სიყვარულითა და ღმობიერებით.

---

მოკრძალებით მინდა ვკითხო წმინდა წერილისა და კერძოდ, სამოციქულოს მცოდნეთ: ღვთის იმ მრავალ ნიჭთაგან, რომლებითაც დაჯილდოვებული იყო წმინდა პავლე მოციქული, რომელი ნიჭი იყო ყველაზე დიდი და განსაკუთრებული, რომლის წყალობითაც გახდა იგი მთელ მსოფლიოში ყველაზე ცნობილი და გამორჩეული?

ზოგი ასახელებს ზეციურ მეცნიერებას, რომლის მეშვეობითაც მოციქულმა ისწავლა მრავალი ენა, სამირკვლიდან აღმოფხვრა წარმართობა და ქრისტეს სახელი და რწმენა იქადაგა სოფლის კიდემდე; ზოგი - ღვთაებრივ გამოცხადებებს, რამეთუ ჯერ კიდევ ხორცში ყოფნისას იყო აღტაცებული მესამე ცამდე, სადაც იხილა ზეციური მშვენება, მოისმინა ადამიანის მიერ გამოუთქმელი სიტყვები; ზოგი კი - სასწაულებს, რომლებიც შეუდარებლად სრულდებოდა მისი ხელით და ხალხს რწმენის ნათელს ჰგენდა; მაგრამ ყველა აღიარებს, რომ არცერთ ნიჭს ისე არ განუდიდება პავლე მოციქული, როგორც მის მოწოდებას და ეს მართლაც ასეა, რამეთუ პავლეს მოქცევაში არც სხვა მოციქულთა ქადაგებას შეუტანია წვლილი და არც მათ სასწაულებს, არამედ ეს მოახდინა თავად ღვთის სიტყვამ. თანაც, აღსანიშნავია, რომ ძე ღვთისამ უშუალოდ პავლესათვის გააკეთა ის, რაც სხვა დროს მთელი კაცობრიობისთვის ჰქონდა გაკეთებული, კერძოდ, პირველად თუ ყველა ადამიანისთვის მოხდა მაცხოვრის განკაცება, მერე უკვე მხოლოდ პავლეს მოსაქცევად გადმოვიდა იესო ქრისტე ზეციით და მთელი თავისი ღვთაებრივი დიდებით ხორციელად გამოეცხადა.

ღვთის მოწოდებას ისე განუდიდება ნეტარი პავლე, რომ სხვა მოციქულნი და მოწამენი ვერ მოდიან მასთან ახლოს. მის მსგავსად დიდი კონსტანტინეც ასევე მოწოდებით მოექცა ჭეშმარიტ სარწმუნოებაზე და მასავით უშუალოდ ზეციდან მიიღო ეს მოწოდება!

---

როგორც ლუკა მოციქული მოგვითხრობს, დამასკოს გზაზე პავლეს ნათელი მოეხვია და მოწოდების ხმაც მოესმა. ასევე მემატიანის აღწერით, წმინდა კონსტანტინემაც იხილა ვარსკვლავების ნათელით ზეცაში დაწერილი სიტყვები და გაიგონა ხმაც, რომელმაც უთხრა: „ამით სძლებ!“<sup>42</sup> პავლესაც და კონსტანტინესაც გამოცხადება შუადღეზე ჰქონდათ; პავლეს ჯვარცმული ქრისტე გამოეცხადა, კონსტანტინეს კი - ჯვარი ქრისტესი.

იმ დროს, როდესაც წმინდა იოანე ოქროპირი ამბობს: „სიტყვები არ მყოფნის, რომ აღვწერო პავლეს სიდიდეო“, მე, რომელსაც არ მაქვს წმინდა იოანეს ოქროს პირი, გული და მჭერმეტყველების ნიჭი, რა სიტყვები მოვძებნო დიდი კონსტანტინეს საქებლად, რომელმაც მოწოდებით მიიღო პავლე მოციქულის მადლი?! ამიტომაც ვუწყი რა ჩემი ცოდნის სიმწირეს, არ აღვწერ წმინდა მეფის ყველა დიდებულ საქმეს, არამედ მხოლოდ მცირედი სიტყვებით შემოვისაზღვრები.

წმინდა კონსტანტინეს ეკლესია სამი ტიტულით მოიხსენიებს: ღვთივგვირგვინოსანი, დიდი მეფე და მოციქულთასწორი. დავიწყოთ თავიდან: რატომ იწოდება იგი ღვთივგვირგვინოსნად?

პირველი - სხვა მეფეებს ადამიანები ირჩევენ მეფეებად და ძვირფასი ქვებით მორთულ ოქროს გვირგვინებს ადგამენ თავზე. ხოლო დიდი კონსტანტინეს შემთხვევაში, მისი კეთილი და სუფთა გულის გამო, თავად ღმერთმა გამოარჩია წარმართთაგან, ვითარცა პავლე ჰურიათაგან. ზეციური ხმით მოუწოდა მეფობისაკენ და როგორც დავით წინასწარმეტყველი წერს: „დაადგა თავსა მისსა გვირგვინი ქვისა მისგან პატიოსნისა და ხმალი სათნოებისა შეარტყა მას. ჟამთააღმწერელიც მოგვითხრობს, რომ განთიადისას გამოეცხადა სიზმრად კონსტანტინეს თავად უფალი იესო ქრისტე და აუწყა: „ნიშანი, რომელიც ზეცაში გიჩვენე, არის იარაღი, რომლითაც კაცთა მოდგმა ვიხსენი ბოროტისაგან,

---

ატარე იგი შენს წინაშე, ვითარცა იარაღი მალლა აღმართული და ამით სძლო ყოველთა მტერთა ერისათა, რომელიც მოგეცა ჩემგან სამწყსოდ და მარადის იქნები მძლე და მხსნელი!“

მეორე - მეფობა არის სრულყოფილი ნიჭი, რომელიც მამისაგან ნათლისათა გადმოდის ზეცით რჩეულთა და სათნოებით შემოსილთა ზედა. წმინდა კონსტანტინე სულიერი ღირსებებისათვის გამოარჩია ღმერთმა, რათა გამხდარიყო ქრისტიანთა პირველი მეფე, რათა გაემწარებინა სატანა, დაეცვა ქრისტეს სამწყსო გონიერ მგელთაგან და სულიწმიდის იარაღით განებნია იგინი, კვლავ აელორძინებინა ეკლესია, რომელიც მანამდე საუკუნეების განმავლობაში ტირანთა მიერ ტანჯული მათ ფეხქვეშ კვნესოდა! მეფის გვირგვინი გაყოფილია მღვდელმთავრის მიტრისაგან, მაგრამ მიუხედავად იმისა, რომ მეფეს არ გააჩნია [ეპისკოპოსის] სასულიერო ხარისხი, ის მაინც იღვწის ერის სიკეთისა და კეთილდღეობისთვის<sup>2</sup> როგორც ხორციელ და წარმავალ, ასევე სულიერ და მარადიულ საკითხებშიც. შესაბამისად, ეპისკოპოსებთან ერთად მეფეები მოციქულთასწორის საზღაურს იღებენ. მოციქულები კი ეკლესიის მეუფენი და მღვდელმსახურნი არიან, რამეთუ ღმერთთან ერთად იღწვიან სოფლის ცხოვნებისათვის.

ამიტომ სრულიად მართებულად უთხრა დიდმა კონსტანტინემ პირველ მსოფლიო საეკლესიო კრებაზე შეკრებილ წმინდა მამებს: „თქვენ ეკლესიასა შინა ხართ დადგენილი ეპისკოპოსებად, ხოლო მე კი ეკლესიის გარეთ არსებულ საქმეთათვის დამადგინა ღმერთმა ეპისკოპოსადო!“

აქედან გამომდინარე, მსოფლიოს მეფეებმა და ხელმწიფეებმა არ უნდა იფიქრონ, თითქოს მხოლოდ იმისთვის დაადგინა ისინი ღმერთმა სახელმწიფოთა სათავეში, რომ მშვენიერ ტახტებზე, ძვირფას სამოსელში, ოქროს გვირგვინითა და სკიპტრით ხელში ისხდნენ ხალხის

---

თვალის მოსაჭრელად, რადგან მხოლოდ სამართლიანობით იძენს მეფე პატივისცემას ადამიანთა თვალში. ასევე ბრძენი ისიოდე ბრძანებს,<sup>2</sup> რომ ორი რამისთვის დაიდგინეს ადამიანებმა მეფენი: პირველი – აღასრულონ სამართალი და მეორე – გამოასწორონ ყველანაირი სიმრუდე. ამიტომაც დავით წინასწარმეტყველი ერის სახელით ამბობს: „ღმერთო, სასჯელი შენი მეფესა მიეც და სიმართლე შენი ძესა მეფისასა, განსჯად ერისა შენისა სიმართლით და გლახაკთა შენთა განკითხვით.“ ნეტარია ის ერი, რომელიც ცხოვრობს ისეთ ქვეყანაში, სადაც სამართალი სუფევს. ასევე ერთ ფილოსოფოსსაც უთქვამს, რომ ნაყოფიერ წელს არ მოაქვს იმდენი სიმდიდრე ქვეყნისათვის, როგორც სამართლიანი ხელმწიფის მმართველობას. ასევე სხვა ფილოსოფოსსაც ჰკითხეს: „რა არის ყველაზე მნიშვნელოვანი ხელმწიფისათვის, რომ მისმა ქვეშევრდომებმა იცხოვრონ კეთილად და ყველაფრით უზრუნველყოფილებმა?“ ბრძენმა ფილოსოფოსმა უპასუხა: „უნდა იყოს განურჩევლად ყველასათვის თანაბრად სამართლიანობა!“

რაც შეეხება მეორე ტიტულს, რატომ მოვიხსენიებთ წმინდა კონსტანტინეს დიდ მეფედ? შეიძლება ბევრმა თქვას, იმიტომ რომ ღვთივგვირგვინოსანი იყო, ანუ როგორ არ იქნებოდა დიდი მეფე, თუ ის თავად ღმერთმა გამოარჩია და აკურთხაო. მართალია, მე არ ვიტყვი, რომ ასეთი განმარტება არასწორია მეთქი, მაგრამ ნახეთ, რას წერს ევსევი კესარიელი: „მეფე კონსტანტინეს ხალხმა უწოდა “დიდი” არა მხოლოდ მისი მნიშვნელოვანი სამხედრო გამარჯვებებისათვის, არამედ იმ მრავალრიცხოვანი კეთილი საქმეებისთვის, რაც მან თავისი ქვეშევრდომებისათვის გააკეთა. მეფე ვერ იყო ხოლმე მშვიდად, თუ ერთ ადამიანს მაინც ხედავდა მწუხარეს. ტანსაცმელსა და საკვებს გაჭირვებულები მხოლოდ მისგან იღებდნენ.<sup>2</sup> ძალიან ბევრი ადამიანი მიდიოდა მასთან დახმარების მისაღებად და არავინ ბრუნდებოდა



---

ხელცარიელი და ნუგეშის გარეშე.“ ჟამთააღმწერლის ეს სიტყვებიც, რა თქმა უნდა, სწორია. თუმცა არც მხოლოდ დიდი ქველმოქმედებისათვის ვეძახით წმინდა კონსტანტინეს „დიდს“ და აქ მინდა გავიხსენო დავით მეფის წინასწარმეტყველება, რომელიც 70-ე ფსალმუნშია ნათქვამი: „და თაყვანი სცენ მას ყოველთა მეფეთა ქუეყნისათა და ყოველნი ერნი ჰმსახურებდნენ მას“. მე ვთვლი, რომ ეს წინასწარმეტყველება მხოლოდ დიდი კონსტანტინე მეფის დროს აღსრულდა, რადგან მხოლოდ მას ემორჩილებოდა იმხანად მსოფლიოს ყველა მეფე და რადგან იგი თაყვანს სცემდა ქრისტეს და ჭეშმარიტი სარწმუნოების მიმდევარი იყო, ყველა მეფემ მიბაძა მას და თაყვანი სცა წმინდა სამებას. სწორედ ამის გამო ვეძახით წმინდა კონსტანტინეს „დიდს“, რომ იმდროინდელ სამყაროში ის ყველა მეფეს წინამძღოლობდა. იგი იყო დიდი, რადგან ქრისტეს ეკლესიის დამცველად მოევლინა და მისი კეთილმორწმუნეობის საზღაურად დაუმორჩილა ღმერთმა მთელი სამყარო იმდენად, რომ კონსტანტინე მეფესთან ინდოეთიდანაც კი მივიდნენ ელჩები ძღვენით და თაყვანი სცეს მას, როგორც უძლეველ მეფესა და სამართლიან მბრძანებელს, რამეთუ მისი სამხედრო სიძლიერე და ქრისტიანული სიმტკიცე მთელმა მსოფლიომ შეიტყო და აღიარა.

რაც შეეხება მესამე ტიტულს, რატომ ვუწოდებთ მას მოციქულთასწორს? მას არც ქალაქებსა და სოფლებში უვლია და უქადაგია ქრისტეს ჭეშმარიტი სარწმუნოება, არც სიციხესა და უამინდობაში უვლია მშვიერ-მწყურვალს ფეხით, პეტრესავით ციხეში ყელზე ჯაჭვით დაბმული არ დაუმწყვდევიან, პავლეს მსგავსად არ უცემიათ ჯოხებით, ანდრიასავით ძელზე არავის უცვამს და სხვა მოციქულთა მსგავსად არ უწამებიათ და მოუკლავთ. მაშ, რატომ იწოდება მოციქულთასწორად?! იმიტომ რომ, რაც მოციქულებმა

---

ქადაგებებითა და მოღვაწეობით გააკეთეს, წმინდა კონსტანტინემ ის პირადი მაგალითით შეძლო, რადგან მეფეთა და ქვეყნის მმართველთა სიძლიერე გამოიხატება ხალხის დაყოლიებაში, მაგრამ ამას ვერ მიაღწევენ, თუ თავდაპირველად თვითონვე არ მოიქცევიან ისე, როგორ ქცევასაც სხვებისაგან ელოდებიან. მაგალითად, ასე მოიქცა ჩინეთის მეფე ტუმჩიუნი, როდესაც ჯერ თვითონ ჩაჰკიდა ხელები გუთანს და მიწის ხვნა დაიწყო, რის შემდეგაც უკვე მთელმა ერმა მიჰბაძა მას და შრომას შეუდგა. ალექსანდრე მაკედონელმაც ტირის კუნძულის შემოვლისას ჯერ თვითონ აიკიდა ბეჭებზე ხის მორი, რის მერეც მთელმა მისმა ჯარმა დაიწყო ხეებისა და ქვების ზიდვა, ააგეს ხიდი და განაგრძეს გზა გამარჯვებისკენ. ასევე წმინდა კონსტანტინემაც საკუთარი მაგალითით მოუწოდა ყველა ქვეშევრდომს და ქრისტეს მორწმუნედ აქცია. იგი სრულიად სამართლიანად იწოდება მოციქულთასწორად, რადგან თავისი კანონებითა და ბრძანებებით დაასრულა მოციქულთა მიერ ქადაგებებით დაწყებული საქმე და ქრისტეს სახელი და ჭეშმარიტი სარწმუნოება მთელ მსოფლიოში გაავრცელა.

იმდენად, რამდენადაც წმინდა კონსტანტინემ თავისი თავმდაბლობით, კეთილი საქმეებითა და სრულყოფილი ქრისტიანული რწმენით ეს სამი ტიტული მოიპოვა, ვისდა შეეპარება ეჭვი იმაში, რომ მას დიდი კადნიერება გააჩნია ღვთის წინაშე.

სწორედ ამიტომ, ჩემი უღირსობისდა მიუხედავად, შევთხოვ წმინდა კონსტანტინეს, თავის მხურვალე ლოცვებში მოიხსენიოს შენი პატიოსანი და ბრწყინვალე უდიდებულესობა და ევედროს მრავალმოწყალე ღმერთს, რომ მრავალს ბედნიერად, კეთილდღეობითა და ჯანმრთელობით დაგასწროს შენ, ამინ!

---

## ქადაგება №11

### სწავლება მაცხოვარ იესო ქრისტეს წინადაცვეთაზე

„და როცა გასრულდა რვა დღე ყრმის წინადასაცვეთად, უწოდეს მას სახელად იესო, ჩასახვამდე დარქმეული ანგელოზის მიერ“.<sup>2</sup>

შექმნათა წიგნის მე-17 თავში ნათქვამია, როგორ დადო ღმერთმა აბრაამთან აღთქმა და ჭეშმარიტების ნიშნად უბრძანა: “ეს არის აღთქმა, რომელსაც დაიცავ, ჩემსა და თქვენ შორის და შენ შემდეგ შენს თესლს შორის მათს მოდგმაში: წინადაცვეთს თქვენგან ყოველი წული და იქნება ჩემი აღთქმა თქვენს ხორცზე საუკუნო აღთქმად. და დაუცვეთელი მამაკაცი, რომელიც არ დაიცვეთს ხორცს თავისი დაცვეთილობისას მერვე დღეს, მოიკვეთება ის სული თავისი მოდგმიდან, რადგან ჩემი აღთქმა დაარღვია”.<sup>2</sup> ამ წინადაცვეთილობის დაწესებით ღმერთმა ინება ოთხი რამის ჩვენება: პირველი - ის რომ ღვთის მორწმუნენი გარეგნული ნიშნითაც უნდა ყოფილიყვნენ გამორჩეულნი; მეორე - ის რომ აბრაამის მოდგმა პირვანდელი ცოდვისგან უნდა გათავისუფლებულიყო; მესამე - ის რომ აბრაამი უნდა გამხდარიყო მრავალრიცხოვანი მორწმუნე ერის მამა, მატარებელი იმ სარწმუნოებისა, რომლის ერთგულიც იყო თავად აბრაამი; და მეოთხე - ის რომ აბრაამის შთამომავლებიდან უნდა დაბადებულიყო მაცხოვარი იესო ქრისტე.

მამასადამე, ამ აღთქმის ნიშნად, რომელიც დაიდო ჩვენთან, ქრისტემაც მიიღო წინადაცვეთა, როგორც ეს არის მოთხრობილი ლუკას სახარებაში: „და ვითარცა აღესრულნეს დღენი იგი რვანი წინადაცვეთისა მისისანი, და უწოდეს სახელი მისი იესუ“,<sup>2</sup> და ეს სახელი ჭეშმარიტად არის ყველა სხვა

---

სახელზე უზენაესად დიდებული, რადგან, როგორც განმარტავს თავად ნეტარი პავლე, ეს სახელი „ითარგმანება, როგორც მაცხოვარი“. სხვა მრავალი სახელწოდებებითაც შესაძლებელია დამტკიცდეს, რომ იესო ჭეშმარიტად არის კაცობრიობის მაცხოვარი, მაგრამ, განსაკუთრებით, ეს ცხადი ხდება შემდეგი რვა ეპიტეტ სახელწოდებიდან, რომლებსაც მიაკუთვნებენ მას:

უპირველეს ყოვლისა, მას ვეძახით „საუკუნო ცხოვრებას“, როგორც ეს ნათქვამია იოანეს სახარების მე-17 თავში: „და ესე არს ცხოვრებაი საუკუნოი. რაითა გიცოდიან შენ მხოლოი ჭეშმარიტი ღმერთი და რომელი მოავლინე იესუ ქრისტე“.

მეორე მისი სახელწოდება არის „დიდება“, როგორც ამას ბრძანებს დავით წინასწარმეტყველი: „განვძღე გამოჩინებასა დიდებისა შენისასა“.

მესამე, რაც მას ეწოდება არის „განსუენება“, რადგან თავად იესო ქრისტე ბრძანებს: „აღიღეთ უღელი ჩემი თქუენ ზედა და ისწავეთ ჩემგან, რამეთუ მშუღ ვარ და მდაბალ გულითა, და ჰპოოთ განსუენებაჲ სულთა თქუენთაჲ“.

მეოთხე, მას ეწოდება „სიხარული“, რადგან ნათქვამია იოანეს გამოცხადების მე-19 თავში: „ვიხარებდეთ და ვიშუებდეთ და მივსცეთ მას დიდებაი, რამეთუ მოვიდა ქორწილი კრავისაი (ანუ ქრისტესი), და ცოლმან მისმან განმზადა თავი თვისი“, (ანუ ეკლესია).

მეხუთე, მას ეწოდება „სასუფეველი“, რადგან ასე მიმართავს მაცხოვარი იესო ქრისტე მართალ ადამიანებს საშინელ სამსჯავროზე: „მოვედით კურთხეულნო მამისა ჩემისანო და დაიმკვდრეთ დასაბამითგან სოფლისაჲთ განმზადებული თქუენთჳს სასუფეველი“.

მექვსე ეპიტეტი მას ეწოდება „გვირგვინი“, რადგან ასე ბრძანებს იოანე მოციქული გამოცხადებაში: „გეპყრას, რაც გაგაჩნია, რათა არავინ წარგტაცოს შენი გვირგვინი“.

მეშვიდე, რაც მას ეწოდება არის „ტალანტი“, რადგან ნათქვამია მათეს სახარების მე-20 თავში: „და ვითარცა შემწუხრდა, ჰრქუა უფალმან

---

სავენახისამან ეზოის-მოძღვარსა თვისსა: მოუწოდე მუშაკთა მათ და მიეც მათ სასყიდელი: იწყე უკანასკნელთაგან, ვიდრე პირველთამდე. მოვიდეს მეთერთმეტისა ჟამისანი იგი და მიიღეს თითოი დრაჰკანი“

მერვე, მას ეწოდება „სერობა“, რადგან ასეა ნათქვამი ლუკას სახარების მე-14 თავში: „კაცმან ვინმე ყო პური დიდი და მოუწოდა მრავალთა. და იწყო თითოეულმან ყოველმან ჯმნად. პირველმან მან ჰრქუა მას: აგარაკი ვიყიდე და უნებელი ზედა-მაც მისვლად და ხილვად იგი.<sup>2</sup> და სხვამან თქუა: უღლეული ხართაი ვიყიდე ხუთი და მივალ გამოცდად მათა.<sup>2</sup> და მერმე სხუამან ჰრქუა: „ცოლი შევირთე და მის გამო ვერ ხელ-მეწიფების მოსვლად“,<sup>2</sup> ამ ადამიანებში იგულისხმებიან ცოდვილნი და ამა სოფლის სიამის მოყვარულნი, რომლებიც არ ეღირსებიან სერობის ტრაპეზს და ვერ იხილავენ ღვთის სახეს.

მაშასადამე, ამ სახელწოდება-ეპითეტებში, რომლებიც დავასახელებ, მოიაზრება იესო მაცხოვარი, რადგან მან აცხოვნა კაცობრიობა ეშმაკის ბატონობისგან და გვიჩვენა მარადიული ცხოვრების გზა.

და მიიღო წინადაცვეთა, რომ განცხადებულიყო ორი რამ: პირველი - რომ უნდა აღსრულებულიყო ყოველი რჯული, მით უმეტეს, რომ თავად იყო სჯულმდებელი ღმერთი და ამით სჯულის მიმართ მორჩილების მაგალითი მოგვცა; და მეორე - უნდა დახშულიყო მწვალებელთა, მგმობელთა და ცილისმწამებელთა პირნი, რომელნიც ამბობდნენ, რომ ვითომ ძე ღვთისა არ განკაცებულა და მხოლოდ მოჩვენებით დაბადებულაო.

ხოლო მაცხოვარმა იესო ქრისტემ წინადაცვეთა ზუსტად მერვე დღეს იმიტომ, რომ ეს უნდა გამხდარიყო მისი მეორე მოსვლისას საშინელი სამსჯავროთი მერვე საუკუნის წინადაცვეთის წინასახე.<sup>2</sup> რადგან, როგორც ორპირი მახვილით, იგი სამყაროსგან მოკვეთს ყველა ბოროტებას და ყოველგვარ უსამართლობას და ცოდვილებს შთააგდებს ჩაუქრობელი ცეცხლის გულში, ისევე შეკრებს მართლებს ცათა სასუფეველში, რომელიც, დაე, გვებოდოს ჩვენ ყოველთა. ამინ!

---

## ქადაგება №12

### ქადაგება მიცვალებულ ადამიანზე

„ნუ სტირთ, რამეთუ ყრმაი ეგე არა მომკუდარ არს, არამედ სძინავს“<sup>2</sup>. ეს სიტყვები თქვა ძე ღვთისამ, როდესაც საწოლზე მწოლიარე სინაგოგის მთავრის იაიროსის მიცვალებული ქალიშვილი ნახა. იმავე სიტყვებით მივმართავ თქვენს სიბრძნესაც კურთხეულნო მსმენელებო, შენ, ჩემო სულიერო შვილო *[სახელი]*, და თქვენ, ყველა დანარჩენ მოსიყვარულე ნათესავს, რომლებიც ერთად დიდი მწუხარებითა და ცრემლებით გლოვობთ ამ მიცვალებულ კეთილშობილ და პატიოსან ქალიშვილს.

„ნუ სტირთ, რამეთუ ყრმაი ეგე არა მომკუდარ არს, არამედ სძინავს“. მისი ნეტარი აღსასრული არის მიძინება და არა სიკვდილი. ამიტომ ის ახლა არ ითხოვს თქვენგან ცრემლებს, არ სჭირდება თქვენი ოხვრები, არ ღებულობს არც მწუხარებას და არც ტირილს. სატირალნი არიან წარმართები, რადგან არ აქვთ ჭეშმარიტი სარწმუნოება, ჰურიები, რადგან არ აქვთ წმინდა ნათლობა და მწვალებლები, რადგან დაშორებულნი არიან ეკლესიის მკლავებს; რადგან ისინი ნამდვილად კვდებიან, ისინი მარადიულ სიკვდილს ღებულობენ, როგორც რომაელთა მიმართ ეპისტოლეს მეექვსე თავში ნათქვამია: „რამეთუ რომელი-იგი მოკუდა, ცოდვითა მოკუდა ერთ-გზის“.<sup>2</sup>

ხოლო ქრისტიანი ქალიშვილი, როგორც ეს, რომელიც წმიდა ნათლისღების საიდუმლოთი ნაშობია სულიერად, რომელსაც სარწმუნოების რძე უწოვია, რომელიც ღვთაებრივი სიბრძნის სახლშია გამოკვებილი, რომელიც წმიდა საიდუმლოებების მადლითაა გაძლიერებული, რომელიც სიკეთით, სათნოებებით, ღვთისთვის მოსაწონი საქმეებით იყო დაცული, ასეთი შვილი ნამდვილად არ მომკვდარა, არამედ მიძინა. ამასვე გვიმტკიცებს

---

წმინდა სახარებაში მაცხოვარ იესო ქრისტეს უტყუარი ბაგე: „რომელსა ჰრწმენეს ჩემი, მო-ღათუ-კუდეს, ცხოვნდესვე. და ყოველი, რომელი ცოცხალ არს და ჰრწმენეს ჩემი, არა მოკუდეს იგი უკუნისამდე“. მაშასადამე, ფაქტი მორწმუნე ქრისტიანი არ კვდება. არამედ მისი აღსასრული არის მიძინება, დამტკიცებულია. ამას მოწმობს წმიდა ბასილი დიდის სიტყვებიც გარდაცვალების შესახებ: „მართალთა სიკვდილი არის მიძინებაო“. ამავს ამბობს სულთმოფენობის ლოცვებში: „უფალო, სიკვდილი არ ჰქვია იმას, როდესაც შენი მონები სხეულიდან გამოვდივართ და შენთან მოვდივართ, არამედ გარდაცვალებაა მწუხარებიდან და ტანჯვიდან ნეტარებაში, სიხარულში, განსვენებაში და მხიარულებაში“.

ჭეშმარიტად, რა ტკბილია ასეთი მიძინება და რამდენად უფრო სასურველია, ვიდრე ყოველდღიური ბუნებრივი დაძინება. ბუნებრივი დაძინების დროს ადამიანი რჩება გრძნობების გარეშე: ვერ ხედავს, არ ესმის, ვერ აცნობიერებს, საკუთარ თავსაც ივიწყებს, ივიწყებს თავის შვილებს, ნათესავებსა და მეგობრებს, რჩება ყველანაირი ამ ცხოვრებისეული სიამის და ამქვეყნიური ნათელის გარეშე.

ხოლო ამ ბოლო მიძინების ჟამს კი, ჰოი, რამხელა სიხარულს, შვებასა და თავისუფლებას განიცდის და ეს იმის სანაცვლოდ, რომ კარგავს მატერიალური სინათლის აღქმის უნარს. უფრო მეტიც, მას ზეცის კარიბჭე და ჭეშმარიტი ხელთუქმნელი ნათელის ხედვის უნარი ეხსნება. ჰოი, ნახეთ, რას ამბობს ისაია წინასწარმეტყველი თავისი წიგნის მეცხრე თავში: „ხალხმა, ბნელში მოარულმა, იხილა ნათელი დიდი, წყვიადის ქვეყანაში მაცხოვრებლებს ნათელი გამოუბრწყინდა“. საყვარელნო, მის მაგიერ, რომ თქვენ გაიფანტოთ თავი დროს ტარებასა და სიმდიდრის მოხვეჭაში, მოიგეთ ის ერთადერთი მშვენიერება, რომელიც სათნოა ღმრთისათვის. ამას მოწმობს დავით წინასწარმეტყველიც მე-16 ფსალმუნში: „ხოლო მე სიმართლითა ვეჩვენო პირსა შენსა, განვძღე გამოჩინებასა დიდებისა შენისასა“. როგორც უკვე ვთქვი,

---

ხორცში მყოფი დაძინებული ადამიანი ვერ ხედავს თავის ნათესავებსა და მეგობრებს, მიცვალებულის სული კი ღვთაებრივ მიუწვდომელ ნათელში მარადის ხედავს თავის მშობლებსაც, შვილებსაც და ნებისმიერს, ვისი დანახვის სურვილიც აქვს. ამაზე ლაპარაკობს პავლე მოციქულიც კორინთელთა მიმართ ეპისტოლეს მე-13 თავში: „აწ ვიცი მცირედ, ხოლო მერმე ვიცნა, ვითარცა შევემეცნე“.<sup>2</sup>

იმ დროს, როდესაც ყოველდღიური ბუნებრივი დაძინების შემდეგ ადამიანი ისევ უბრუნდება შრომას, ტანჯვას, მწუხარებასა და ვნებებს, იქ, საბოლოო მიძინების შემდეგ, რომელსაც ჩვენ ადამიანები სიკვდილს ვეძახით, მიცვალებული ტანჯვიდან გადადის სიხარულში, ხრწნადობიდან - უხრწნელობაში, ცრემლების ქალაქიდან - სიხარულის სოფელში, შფოთიანი ცხოვრებიდან - ცხონების მშვიდ ნავთსადგურში, ეგვიპტის მწუხარებიდან - ალექსანდრიის მიწის ბედნიერებაში, ამა სოფლის მონობიდან - ზეციურ აზნაურობაში, კაცობრივი ცხოვრებიდან - ანგელოზებრივ ცხოვრებაში. რა შეიძლება იყოს ამაზე მეტი ბედნიერება?! რომელი დაძინება შეიძლება იყოს უფრო სანატრელი, ვიდრე გარდაცვალების მიძინება?!

ამიტომ ამბობს სული წმიდა ეკლესიასტეს მე-7 თავში: „უკეთესია სიკვდილის დღე გაჩენის დღეზე, რადგან დაბადება არის ტკივილის, ხოლო სიკვდილი ნეტარი ცხოვრების დასაწყისის დასაწყისი“.

ამიტომ კიდევ ერთხელ ვამბობ: „ნუ სტირთ, რამეთუ ყრმაი ეგე არა მომკუდარ არს, არამედ სძინავს“. ჩემთან ერთად წმიდა იოანე ოქროპირიც ამბობს: „ადამიანის გარდაცვალება საჭიროა გვიხაროდეს და არ ვტიროდეთ“ და რა მიზეზით, ამასაც განმარტავს წმიდანი: „თუ ახალგაზრდა წავიდა ამქვეყნიდან, ე.ი. ამა სოფლის ბოროტებებისგან დროულად ცხონდა, ხოლო თუ მოხუცი იყო, ე.ი. აიღო ამ ცხოვრებიდან ყველაფერი, რაც სურდა და ისე წავიდა“.



---

ჩვენ ხომ არასდროს ვტირით მაშინ, როდესაც ჩვენს ნათესავს ან მეგობარს სძინავს, არამედ ვართ უფრო მშვიდად, ჩუმიად, რომ არ შევაწუხოთ, თუმცა კი ვიცით, რომ ძილი არის „დღის დასასრულის“ ერთგვარი დროებითი გარდაცვალება, როგორც ამას ამბობს წმინდა იოანე ოქროპირი. მაშ, რატომ უნდა მივტიროდეთ მიცვალებულებს? რატომ უნდა ვწუხდეთ ჩვენი ძმებისა და მეგობრების აღსასრულის გამო, რომლებმაც განისვენეს უფალში, რომლებიც ზეციურ დიდებაში განიხარებენ და წმიდანების სამყოფელში განისვენებენ? ჭეშმარიტად, უმოწყალო სიკვდილმა უდროოდ მოკვეთა ეს გამორჩეული ყვავილი და ძალზე ადრე წაიყვანა ამქვეყნიდან ქალთა მოდგმის სამკაული.

მაგრამ ცრემლებიცა და მწუხარებაც ამაოა, რადგან უფრო მეტად იღბლიანია ის მეზღვაური, რომელიც ძლიერი ქარით სწრაფად მიემგზავრება წყნარ ნავსადგურში, ვიდრე ის, რომელიც ქარის გარეშე, ზედმეტად მდორედ მოგზაურობს. ასევე უფრო ნეტარია ის ადამიანი, რომელიც ახალგაზრდა უდროოდ მიიცვალა და მიაღწია ღვთაებრივ სიმშვიდესა და მხიარულებას. ბრძენი სოლომონი ამბობს: „მცირე წლებით წასულმა რეალურად მრავალი წელი აღასრულა, რადგან მოსაწონი იყო ღვთის წინაშე მისი სული“. ასევეა ამ უპატიოსნესი ქალიშვილის სულიც: მისი ღრმა რწმენით, ქრისტიანული სათნოებებით, შეუდარებელი სიწმიდითა და სულიერი ღირსებებით მოსაწონი იყო ღმრთისათვის.

ამიტომაც მცირედი წლებით გარდაიცვალა, რომ მოიმკას ღვთისთვის სათნო საქმეების ნაყოფი, ანუ უკეთ რომ ვთქვა, მცირე წლებით აღესრულა, რომ მოიხვეჭოს მარადიული ცხოვრება.

ფრინველი, რომელსაც ჰქვია ფენიქსი, რაც უფრო ადრე კვდება, მით უფრო მეტი დღე ემატება მის შემდეგ ცხოვრებას, რადგან სიკვდილი მას უახლებს სიცოცხლეს და ჩუქნის მრავალ ნაყოფიერ წელს. ასევე ეს ქალიშვილიც რომ აღსრულებულიყო სასიკუდინოდ, მაშინ იქნებოდა

---

დასატირიც, რადგან გაქრებოდა ასეთი კეთილი და მადლმოსილი მშვენიერი სახე; მაგრამ რადგანაც აღსრულდა, რომ იცოცხლოს მარადიულობაში, სიხარულით, ანგელოზებთან ერთად, რომ იშვას მეორედ ზეცაში, როგორც ფენიქსი, რიდასთვისაა საჭირო ცრემლები? როგორც მოციქული პავლე ამბობს, საჭიროა, რომ ამ ხრწნადმა სხეულმა შეიმოსოს უხრწნელება და მოკვდავმა შეიმოსოს უკვდავება. ამიტომ შეწყვიტეთ გლოვა და მწუხარება, რადგან არ მოკვდა, არამედ დაიძინა!

და როგორც მოციქულებმა უთხრეს მაცხოვარ იესო ქრისტეს ლაზარეზე, იმავეს მეც გაგიმეორებთ: „უკეთუ დაიძინა, ცხონდეს“. ყველანაირ ეჭვგარეშეა, რომ მაღალი ღმერთი დაასვენებს მის ქრისტიანულ სულს აბრაამის, ისაკისა და იაკობის სამყოფელში, ცოცხლებისა და მართლების სავანეში, სადაც მარადის ანათებს ღვთაებრივი და ხელთუქმნელი ნათელი.

რადგან ყველა სხვა სათნოებასთან ერთად, მიცვალებულის სულისთვის ძალზე სასარგებლოა წმიდა ეკლესიის მეოხება და მორწმუნე ქრისტიანეთა ლოცვები, ამიტომ თითოეულმა ქრისტიანმა რომ მოიხვეჭოს მარადიული ნეტარება, მოგიწოდებთ, ჰოი, ყოვლადუსამღვდელოესნო მეუფენო, ღირსნო მღვდელმონაზონნო, პატიოსანნო მღვდელნო, პატივცემულნო თავადნო და თქვენ ყველას, მთელ ერს, რომელნიც იმყოფებით აქ, ერთიანი გულითა და ხმით ვსთქუათ ერთად: ღმერთმა შეუნდოს და აცხოვნოს, რომ ღირს იქმნას ეს ქალიშვილიც და ჩვენც (როდესაც ღვთის ნება იქნება), რათა ყველამ ერთად განვიხაროთ ცათა სასუფეველში, სადაც მარადიული ცხოვრება და დაუსრულებელი სიხარულია. ამინ!

**ქადაგება № 13**

**ქადაგება პანაშვიდზე**

---

წმიდა წერილში, კერძოდ, მეფეთა მეორე წიგნის მე-12 თავში, ზებუნებრივ რამეს ვკითხულობ და ამიტომ ძალზედ მიკვირს. მეფე დავითს ავად გაუხდა მისი პირველი შვილი, რომელიც ჰყავდა ბარსაბასგან. ბავშვის ძალიან მძიმე მდგომარეობის გამო, მეფე მუდმივად დამწუხრებული იყო: ვერც ჭამდა, ვერც სვამდა და ვერავის შეეძლო მისთვის ნუგეშის მიცემა. ხოლო მას მერე, რაც გარდაიცვალა, ნათქვამია წმიდა წერილში, მაშინვე დაიბანა, იცხო სურნელოვანი ზეთები, შეიმოსა ნათელი სამოსელი, წავიდა ღვთის სახლში და მადლობა შესწირა ღმერთს. გამოვიდა რა გარეთ, სუფრა გააშლევინა და დრო გაატარა. ამის გამო ვდგავარ და მიკვირს: როგორ შეეძლო ამის გაკეთება? ბავშვი სანამ ცოცხალი და ავადმყოფი იყო, ტიროდა და წუხდა, ხოლო მას მერე, რაც გარდაიცვალა, განიხარა!

პასუხს ამაზე გვაძლევს თავად დავით მეფე: „ და ჰრქუეს დავითს: რად არს ესე, რომელ შენ ჰყავ? რამეთუ ვიდრე იყო ყრმად იგი, იმარხევდ, იღვპებდ და სტიროდე და ვითარცა მოკუდა, აღსდეგ და განმხიარულდი და სჭამე და ჰსუ? მიუგო დავით: ვიდრე ცოცხალ იყო, ვწუხდი, რათამცა წყალობა ეყო ღმერთსა და ეცხოვნა ყრმად იგი. ხოლო აწ რად მოკუდა, აქა არღარა მოიწიოს, არამედ მე მისა მისლვად ვარ, და რადსაღა ვწუხ? “.2

ამიტომ მოგმართავ შენ, ჩემო საყვარელო სულიერო შვილო *[სახელი]* და ყველას, მოსიყვარულო ნათესავებო, მორჩით მწუხარებას და დაუტევეთ ცრემლები, რადგან განისვენა უფალში ამ უპატიოსნესმა ქალიშვილმა, რომელსაც ვიხსენებთ ჩვენ დღეს. ცრემლები და გლოვა არაფერს არგებს მიცვალებულებს, ვერც დააბრუნებს ამ ცხოვრებაში და ვერც გამოიყვანს საფლავებიდან. წმიდა მოციქულებმა კანონი დააწესეს, რომ არ მივსტიროდეთ მიცვალებულებს, არამედ მოვიხსენიოთ ლოცვებსა და წმინდა საიდუმლოებებში, გავილოთ მოწყალებები და სხვა სიკეთეები გავაკეთოთ მათ

---

სახელზე, რადგან სათნოა ეს ყველაფერი ღვთის წინაშე და დიდ სარგებელსა და მადლს იძლევა მიცვალებულთა სულების საცხოვნებლად. ამას ამტკიცებს წმიდა დიონისე არეოპაგელის სიკვდილის შესახებ სიტყვებიც: „ლოცვები, რომლებიც სრულდება წმინდა სამკვეთლოზე შეეწევა არა მარტო ცოცხლებს, არამედ, განსაკუთრებით, მიცვალებულთაცო“.

ამიტომ წმიდა ეკლესიაც მუდმივად ევედრება ღმერთს მოწყალებას, რომ მიცვალებულს შეუნდოს მისი კაცობრივი უძლურებითა და სისუსტით ჩადენილი ცოდვები და განუსვენოს აბრაამის, ისააკისა და იაკობის სამყოფელში, სადა იგი არა არს ჭირი, მწუხარება, არა ურვა, არცა სულთქმა, არამედ სიხარული და ცხოვრება იგი დაუსრულებელი. ასევე ეკლესია ლოცულობს, რომ ღმერთმა შეუნდოს მიცვალებულს ადამიანური სისუსტით ჩადენილი ყველა სიბინძურე, რადგან, როგორც ნათქვამია, არავინ არის წმიდა ღვთის წინაშე.

და რადგან ეს ყოვლადპატიოსანი ქალიშვილი, რომელსაც ვიხსენიებთ დღეს ამ საეკლესიო ღვთისმსახურებაზე, ამქვეყნად ცხოვრობდა, როგორც მლოცველი, ახლა ყველამ, ვინც ჩემთან ერთად ხართ აქ, ერთი გულითა და ხმით შევთხოვოთ მაღალ ღმერთს, მიეტევოს, რაც შეუცოდავს ღვთისა და კაცთა წინაშე. და როდესაც ჩვენი დრო დადგება, ჩვენც შეგვინდოს უფალმა. ამინ!

## ქადაგება №14

ქადაგება ღვთის განცხადების დღესასწაულზე

---

კურთხეულნო ძმანო და დანო, ნათელი და ბრწყინვალე იყო მაცხოვარ იესო ქრისტეს შობის განვლილი დღესასწაული; მაგრამ მეტად ბრწყინვალე და დიდებულია დღევანდელი დღესასწაული; რადგან იქ ქრისტეს შობის ნიშნად ვარსკვლავი გამოჩნდა ცის კამარაზე, ხოლო აქ თავად მამა ღმერთი მოწმობს ზეციდან ნათელღებულისთვის სიტყვებით: *„ესე არს ძე ჩემი საყუარელი, რომელი მე სათნო-ვიყავ“*. იქ მოგვებმა მათი ძღვენით თაყვანი სცეს, როგორც ღმერთს და მეფეს, ხოლო აქ თავად ზეციური ანგელოზები ემსახურებიან მას, როგორც ჭეშმარიტ ღმერთს და სრულ კაცს. იქ იყო, როგორც სახვევლებში გახვეული და ბაგაში დასვენებული უმწეო ჩვილი ბავშვი, ხოლო აქ, როგორც სრული ღმერთი და სრული კაცი ნათელს იღებს იორდანეს წყალში იმისთვის, რომ განწმიდოს მთელი კაცობრიობა პირველქმნილი ცოდვის ხრწნილებისაგან. იქ მთავარანგელოზი გაბრიელი ემსახურებოდა მორჩილებით, ხოლო აქ ანგელოზი და წინამორბედი იოანე აღასრულებს საიდუმლოს.

მაშასადამე, თუ დღევანდელი დღესასწაულის მოვლენები უფრო ნათელია, ვიდრე განვლილი დღესასწაულისა, ე.ი. მით უფრო მეტად დიდებულიცაა. რადგანაც თავად მაცხოვარი ქრისტე ინათლება, ჩვენც მოვინათლოთ არა იმიტომ, რომ უკვე არ ვართ მონათლულნი წმინდა ნათლისღებით, ანუ წყლითა და სულით, არამედ იმიტომ, რომ წავბილწეთ ჩვენი ცოდვებით წმინდა ნათელი. სინანულის ცრემლებით უნდა განვიბანოთ და განვიწმინდოთ, როგორც ისაია წინასწარმეტყველი ამბობს: *„განიბანეთ, განიწმიდეთ, ავი საქმეები თვალთაგან განმარიდეთ, შეწყვიტეთ ბოროტის ქმნა“*<sup>2</sup> რომლითაც ხარობს ჩვენი მტერი ეშმაკი და ამის შემდეგ შევიმოსოთ ახალი ადამი, უფალი ჩვენი იესო ქრისტე, როგორც ამას ამბობს პავლე მოციქული, რომ ჩვენც ავმალდეთ ზეცაში, როგორც ქრისტე, განწმენდილები და განათლებულები და ვისაც მიღებული გვაქვს მისი ქადაგება, მაშინ,

---

როდესაც ვცოდავთ, სწრაფად გავიქცეთ მისკენ, რადგან იგი მიგვიღებს, როგორც კეთილი და კაცთმოყვარე ღმერთი.

ნათელს იღებს ქრისტე იმისთვის, რომ აკურთხოს წყლები. ნათელს იღებს ქრისტე იმისთვის, რომ გამოგვიცხადოს საიდუმლო. წინასწარმეტყველის ხელი აღასრულებს მსახურებას იმისათვის, რომ ნათელი სცეს მამის „ხელს“, ანუ ძეს და სიტყვას ღვთისას. კაცი აღასრულებს მსახურებას და კაცი ინათლება; თავად იოანე, როგორც მონა, მსახურობს და ქრისტე, როგორც კაცი, ნათელს იღებს.

ამიტომ ჩვენც, დავით წინასწარმეტყველის სიტყვის მსგავსად, როგორც ჭეშმარიტნი და ბრძენნი მონანი, წმინდა გულებით ჩავერთოთ ამ საიდუმლოში. კეთილი და მორწმუნე გონება ვიქონიოთ, რომ სწორად ჩავწვდეთ ამ საიდუმლოს; რომელნიც ხართ მორწმუნენი და მართალნი მოდით და მოისმინეთ დავითის სიტყვები: „*მოვედით მისა და განათლდით, და პირსა თქუნესა არა ჰრცხუნეს*“;<sup>2</sup> და როგორც ამბობს ისაია წინასწარმეტყველი, ცოდვანი ჩვენნი უფროს თოვლისა განსპეტაკნეს. და რომელნიც ხართ მორწმუნენი და ღვთის მოშიშნი აქეთ და ადიდეთ ეს საიდუმლო, რადგან მსგავსი ქება წარემართება ღვთის წინაშე, ვითარცა საკმეველი კეთილსურნელოვანი. ხოლო ვინც წარმართია და ჩვენს საიდუმლოებებს დასცინის, წავიდეს და არ გაეკაროს ეკლესიას, რომ არ მოვიდეს მასზე ღვთის რისხვა და არ დაისაჯოს მსგავსად მოსესი, რომელმაც, როდესაც სინას მთაზე ღვთისგან სჯულის ფიცრების მისაღებად ავიდა, დატოვა მცნება, რომ არცერთი ცხოველი, არც პირუტყვი არ მიახლოებოდა მთას და, თუ ამგვარი რამ მოხდებოდა, ჰურიათა ბრბოს უნდა ჩაექოლა ის მცნების დამრღვევი.

ასევე ახლაც საიდუმლოს აღვნიშნავთ და ვდღესასწაულობთ და ამით ვმალდებით არა ხორციელად მთაზე ასვლით, როგორც მოსე, არამედ გონებით აღვიტაცებით დიდ და მაღალ ფიქრებში; და მხოლოდ რაოდენიც

---

მორწმუნენი ვართ, მოვედით, რათა, დაე, ჩავწდეთ გონებით დღევანდელი დღესასწაულის საიდუმლოს!

უფალი იესო ქრისტეს შობის შემდგომ მოგვების მიერ მოტყუებული და დამცირებული ჰეროდე ძალზედ განრისხდა და ბრძანა ბეთლემსა და მის შემოგარენში ორი წლისა და მის ქვემოთ ასაკის ყველა ყრმის მოწყვეტა. იმ თოთხმეტ ათას ყრმას შორის იყო თავისი დედის, ელისაბედის, მკლავებში მყოფი ჩვილი - წმინდა იოანეც. როდესაც ჯალათები მას მოსაკლავად მიუახლოვდნენ, ღვთის განგებით, გაიხსნა მთა და იოანემ დედამისთან ერთად გაიარეს მთა და მეორე მხარეზე აღმოჩნდნენ. ხოლო უფლის ანგელოზმა წარიყვანა ის უდაბნოში და ზრდიდა, ვიდრე არ შეიქმნა ასაკით 33 წლისა და 3 თვის, ხოლო მისი საკვები იყო ხეების ფოთლები და ველური თაფლი.

და მოვიდა მასთან ღვთის სიტყვა და უთხრა, დაეტოვებინა უდაბნო, წასულიყო ჰურიასტანის მხარეს და ექადაგა ხალხისთვის სინანული. და მიდიოდა მასთან მრავალი ჰურია, აღიარებდნენ საკუთარ ცოდვებს, ინათლებოდნენ იორდანეს წყალში და ეკითხებოდნენ: *„წინასწარმეტყველი იგი ხარი შენ? და მიუგო: არა“*.<sup>2</sup> ამგვარად პასუხობდა იგი არა იმიტომ, რომ არ იყო წინასწარმეტყველი, არამედ იმიტომ, რომ მას არ ეკითხებოდნენ, არის იგი ჩვეულებრივი წინასწარმეტყველი, არამედ სურდათ, შეეტყოთ, არის თუ არა იგი ის წინასწარმეტყველი, რომელზეც მოსეს ჰქონდა ნათქვამი:

*„წინასწარმეტყველს, როგორც მე ვარ, შენი წიაღიდან, შენი მოძმეებიდან, დაგიდგენს უფალი“*, ანუ ჰურიებმა იცოდნენ, რომ მათ შთამომავლობაში დიდი წინასწარმეტყველი უნდა გაჩენილიყო და ფიქრობდნენ, რომ იოანეა ის წინასწარმეტყველი და ამისთვის ეკითხებოდნენ. ამიტომ ის პასუხობდა: *“ არ ვარ მე ის, არამედ „ესერა მოვალს უძლიერესი ჩემსა შემდგომად ჩემსა, რომლისა ვერ ღირს ვარ განხსნად საბელსა ხამლოთა მისთასა“*, ანუ არ ძალმიძს ჩავწვდე მის შობასო, რადგან, როგორც კაცი, ჩემ შემდეგ დაიბადა, მაგრამ, როგორც ღმერთი, ჩემზე უადრეს შობილია ღვთაებრივ უჟამო წლებშიო. *„მე*

---

უკუე ნათელ-გცემ თქუნე წყლითა, ხოლო რომელი შემდგომად ჩემსა მოვალს, მან ნათელ-გცეს თქუნე სულითა წმიდითა და ცეცხლითა. რომლისა ნიჩაბი ხელთა მისთა, განწმიდოს კალოი თვისი და შეკრიბოს იფქლი საუნჯესა;“<sup>2</sup> ანუ გულთამხილველია როგორც ჭეშმარიტი ღმერთი და სცნობს ცოდვილებსა და მართლებს, ანუ ცოდვილებს დასჯის მარადიულ ცეცხლში, ხოლო მართლებს შეკრებს ცათა სასუფეველშიო.

იოანე ესაუბრება რა ჰურიათა დიდ ჯგუფს, განმეორებით ეუბნება: „არ ვარ მე ის, ვინც გგონიათ, არამედ, აჰა, ის მოდის“ ამ დროს ხალხთა სიმრავლიდან მოვიდა კიდევაც ქრისტე მოსანათლად. ხოლო იოანემ დაინახა რა ის, უთხრა ჰურიებს: „აჰა ტარიგი ღმრთისაი, რომელმან აიხუნეს ცოდვანი სოფლისანი. ესე არს, ძე ღვთისა ჭეშმარიტისა, რომლისთვის-იგი ვთქუ“.<sup>2</sup> მაშინ მაცხოვარი იესო ქრისტე მიუახლოვდა იოანეს და უთხრა: “მოვედ და ნათელმეც, რამეთუ ამისთვის მოვსულვარ“. ხოლო იოანემ უპასუხა: „მე მჭირდება შენგან ნათლისღება იმისთვის, რომ დავამოწმო სხვა ნათლისღება, რომელიც შენი სახელით იქნება და შენ როგორ გინდა, რომ მოინათლო ჩემგან? იოარდენას წყალმა გიხილა რა შიშისაგან უკუნ იქცა მართლუკუნ, ხოლო მე როგორ გავკადნიერდე და როგორ მოგნათლო იმ დროს, როდესაც დიდი წინასწარმეტყველი და ღვთის მხილველი მოსე ვერ გავკადნიერდა, რომ შეეხედა შენი სახისთვის, ხოლო მე, როგორ გავბედო და ჩემი ცოდვილი ხელებით, როგორ შევეხო შენს თხემს? თივა მიწისა ვარ და როგორ მივუახლოვდე აუტანელ ცეცხლს? უფალო, შენ განმწიდე, შენ ნათელმეც, უფალო, ხოლო მე არ ვარ ღირს და ვერც ვბედავ ნათელი გცე!“<sup>2</sup>

ნათლისმცემლის ასეთ სიტყვებზე მაცხოვარმა იესო ქრისტემ პასუხად უთხრა: „იოანე, ზედმეტია ახლა ეს სიტყვები, რადგან ლაპარაკის დრო არ არის: ღვაწლის დროა ახლა. ამისთვის განვკაცდი, ამისთვის შევიმოსე სხეული, ამისთვის მოვედ ლატაკად და თავმდაბლად, რამეთუ ესრეთ შუენის ჩუენდა



---

*აღსრულებად ყოველი სიმართლე. მოვედ და ნათელ მეც მე, რათა აღესრულოს ყოველი ჩემი განგება და თავის დამდაბლება“.<sup>2</sup>*

მაშინ მიუშვა წმინდა იოანემ ნათელი სცა და გარდამოვიდა სული წმინდა მტრედის სახით ქრისტეს თავზე და ხმა გაისმა ზეციდან: „ესე არს ძე ჩემი საყუარელი, რომელი მე სათნო-ვიყავ ცხოვნებისათვის სოფლისა“.<sup>2</sup> და გამოვიდა იესო მდინარიდან ნათელღებული.

ასე მოხდა მაცხოვარ იესო ქრისტეს ნათლისღება, როგორც ამას ჩვენ წმინდა მოციქულები გვიამბობენ. დღევანდელ დღესასწაულთან დაკავშირებით ჩვენ გვიჩნდება რამოდენიმე შეკითხვა, რომელზეც პასუხები აუცილებელია, რომ ვიცოდეთ. პირველი შეკითხვა არის: რატომ მოინათლა მაცხოვარი იესო ქრისტე იმ დროს, როდესაც მას ცოდვა არ ჰქონდა? მეორე: რატომ მოინათლა იორდანეში და არა სხვა მდინარეში? მესამე: რატომ გარდამოვიდა სული წმინდა მაცხოვრის თავზე და რატომ მტრედის სახით? მეოთხე: რამდენი ნათლობა არსებობს? მეხუთე: რატომ არის ნათლობა წყლითა და სულით?

აი, ეს ის ხუთი შეკითხვაა, რომლებზეც პასუხების ცოდნა ძალზედ მნიშვნელოვანია; სხვა შეკითხვებიც არსებობს, მაგრამ საუბარი რომ არ გაგვიგრძელდეს, ახლა მოკლედ, მხოლოდ ამ ხუთს, შევეხებით. მამასადამე, რაოდენიც შეიკრიბენით დღეს ეკლესიაში ამ დღესასწაულზე, აღიხილნეთ თვალნი თქვენნი არა მხოლოდ ხორცისანი, არამედ სულისანიც რომ ჩასწვდეთ იმას, რასაც ვიტყვით, რადგან ეს არ არის ამქვეყნიური საკითხები, არამედ ეს ყოველივე დიდი და საოცარი საიდუმლოა, რომელიც კაცობრიობის ცხოვნებისათვის აღსრულდა.

პირველი შეკითხვა არის: რატომ მოინათლა ქრისტე იმ დროს, როდესაც მას ცოდვა არ ჩაუდენია? ჩვენ ვამბობთ, რომ ნათლობით ადამიანს მიეტევება პირადი ცოდვები და იგი ასევე იწმინდება პირვანდელი ცოდვისაგან, მაგრამ ქრისტე იყო უცოდველი, როგორც ამას გვეუბნება წინასწარმეტყველი ესაია

---

„რადგან სიკვამლე არ ჩაუდენია და მის ზაგეშე სიცრუე არ ყოფილა“, <sup>2</sup> მაშასადამე, რისთვის მოინათლა იგი? ჩვენ ვიცით, რომ არსებობს ოთხი სტიქია, რომლებსგანაც შექმნილია ადამიანიცა და მთელი სამყაროც და ამ სტიქიონებში გაიხრწნება ადამიანის სხეული მაცხოვარ იესო ქრისტეს მეორედ მოსვლამდე და ამათგანვე კვლავ აღსდგება ყოველივე.

პირველი და ყველაზე სასარგებლო სტიქიონია ჰაერი, რომლის გარეშეც ადამიანს ერთი საათითაც არ შეუძლია არსებობა. მეორე უფრო მაღალი სტიქიონია - ცეცხლი, არა მხოლოდ ის, რომელსაც ვხედავთ საკუთარი თვალებითა და რომელსაც გამოვიყენებთ ყოველ დღე, არამედ ზეციური ცეცხლიც. მესამე სტიქიონია – წყალი და მეოთხე - მიწა. მაშასადამე, ამ ოთხი სტიქიონიდან არის შექმნილი ადამიანი, ანუ მათგან არის შექმნილი მისი სხეული. და ეს ოთხივე სტიქიონი იკურთხა უფლის ამქვეყნად მოსვლით. ჰაერი და ცეცხლი იკურთხა ღვთის სიტყვის გარდამოსვლით, ხოლო მიწა იკურთხა, როდესაც მაცხოვარი იშვა ხორციელად გამოქვაბულში. საჭირო იყო მეოთხე სტიქიონის, ანუ წყლის კურთხევაც და ეს სხვაგვარად ვერ მოხდებოდა, თუ არა უფალი იესო ქრისტეს ხორციელად იორდანეში მონათვლით. ამით გაცხადდა ჩვენი სარწმუნოების უდიდესი საიდუმლო! მდინარეში ნათლისღებით შეიმუხრა აგრეთვე გველების, ანუ ეშმაკების თავები, რომლებიც იმყოფებოდნენ წყალში, როგორც ამას ამბობს დავით წინასწარმეტყველი: „შენ შეჰმუსრე თავები ვეშაპთა წყალთა ზედა“.<sup>2</sup>

მეორე შეკითხვა იყო: რატომ მოინათლა მაცხოვარი იესო ქრისტე მაინცა-დამაინც იორდანეში, და არა სხვა მდინარეში. ვპასუხობთ - ეს მდინარე უფრო მეტად ნაკურთხია, ვიდრე სხვა მდინარეები, რადგანაც მასში ბევრი სასწაული აღესრულა. სწორედ ამის გამო მივიდა მაცხოვარი იესო ქრისტე ამ მდინარეზე. პირველი სასწაული ისუ ნავესის დროს მოხდა, როდესაც მან მთელ ერთან ერთად გაიარა შუა წყალში ისე, რომ არავინ დასველებულა. მანამდე თორმეტი მღვდელი კიდობანთან ერთად შევიდა მდინარეში და ღვთის

---

ბრძანებით წყალი უკუიქცა, მანამ ვიდრე მთელმა ერმა არ გაიარა. მეორე სასწაული მოხდა მაშინ, როდესაც ილია წინასწარმეტყველმა თავისი ხალენით გააპო წყალი და თვითონ და მისმა მოწაფემ გაიარეს მშრალზე. მესამე სასწაული მოხდა, როდესაც ელისე წინასწარმეტყველის მოწოდებით ასურეთის მთავარსარდალმა, მეფის ვეზირმა, ნემანმა, შვიდჯერ განიბანა იორდანეში და განიკურნა კეთრისაგან. მეოთხე სასწაული აღსრულდა ელისე წინასწარმეტყველის დროს. ერთხელ, როდესაც რამდენიმე ადამიანი წინასწარმეტყველთან ერთად მიდიოდა მდინარის პირას, ერთ-ერთს ნაჯახის თავი წყალში ჩაუვარდა. ელისემ აიღო ნაჯახის ტარი, გაიწოდა მდინარისაკენ და ხმამაღლა წარმოთქვა: *უფალო გამოგვიცხადე შენი სასწაულო<sup>2</sup>* და იმწამსვე ნაჯახის თავი ამოხტა წყლიდან და თვითონვე დაესვა ტარზე. როგორც წმინდა იოანე დამასკელი წერს ჯვართამაღლების კანონის მეოთხე გალობის ერთ-ერთ ტროპარში, ეს სასწაული წმინდა ნათლისღების წინასახის გამოხატულებაა. მაშასადამე, ამ სასწაულების გამო, მაცხოვარმა იესო ქრისტემაც ნათელი იღო იორდანეში.

მესამე შეკითხვაა: რატომ გარდამოვიდა სული წმინდა ნათლისღებისას მაცხოვარზე და ამავედროულად გაიხსნა ცა და გაისმა მამა ღმერთის ხმა: *„ესე არს ძე ჩემი საყუარელი, რომელი მე სათნო-ვიყავ“?* მაშასადამე, როდესაც მამა ღმერთმა ამ სიტყვებით დაამოწმა მაცხოვარზე, ჰურიებს შეიძლება ეფიქრათ, რომ ეს ხმა და სიტყვები „ესე არს ძე ჩემი საყუარელი“ იოანესთვის იყო განკუთვნილი, რადგან მას იცნობდნენ, როგორც წინასწარმეტყველს, წმინდანს და წინასწარმეტყველის ძეს.

სულიწმინდა იესო ქრისტეს თავზე იმიტომ გარდამოვიდა, რათა ყველას დაენახა, თუ ვისთვის დაამოწმა მამა ღმერთმა.

მაგრამ რატომ გარდამოვიდა სულიწმინდა მტრედის სახით? აქ უნდა მოგიყვებთ ერთი ამბავი ძველი აღთქმიდან, თუმცა კი ეს ყველას გეცოდინებათ. როდესაც ღმერთმა მოავლინა წარღვნა და ადამიანთა ცოდვების გამო

---

წარიწყმიდა ყველა ცოცხალი არსება პირისაგან მიწისა ადამიანიდან დაწყებული ცხოველამდე. კიდობანში, რომელიც იყო აშენებული ღვთის ბრძანებით, გადარჩა მხოლოდ ნოე და მისი ოჯახი; მასთან ერთად კიდობანში იმყოფებოდნენ ქვეყნის ცხოველები და ცის ფრინველები, ასევეა ეს მოთხრობილი შექმნათა წიგნში. როდესაც დასრულდა წარღვნა, ნოემ გამოუშვა ყორანი, რომ ენახა, დაშრა თუ არა წყალი. მაგრამ ყორანმა იპოვა რაღაც, ზედ დაჯდა და აღარ დაბრუნებულა. ნოემ ნახა, რომ ყორანი არ ბრუნდება, მაშინ კიდობნიდან უკვე წმინდა ფრინველი - მტრედი გამოუშვა, რომელმაც არ ისურვა დამჯდარიყო უწმინდურობაზე, არამედ ნისკარტით ზეთისხილის ტოტი დაიჭირა და ასე დაბრუნდა კიდობანში. და მიხვდა ნოე, რომ წყალი დამშრალიყო.

ამიტომაც სული წმინდა გარდამოვიდა მაცხოვარ იესო ქრისტეს თავზე მტრედის სახით, რომ ამით ეჩვენებინა ხალხისათვის - აწ დამშრალია კაცობრიობის ცოდვების წარღვნა. მეორე მიზეზი არის ის, რომ მტრედი არის კეთილი, ანუ ფრინველი, რომელსაც არ აქვს ბოროტება; როგორც მაცხოვარი იესო ქრისტე ამბობს სახარებაში „იყავით გონიერნი, როგორც გველები, და უმანკონი, როგორც მტრედები“<sup>2</sup>

მეოთხე შეკითხვაა: რამდენი ნათლობა არსებობს? შეგვიძლია ვთქვათ, რომ სულ არის რვა, როგორც ამას წმინდა იოანე დამასკელი მისი *ღვთისმეტყველების* მეოთხე თავში წერს. პირველი ნათლობა არის წარღვნისა, კაცთა ცოდვის მოსასპობად. მეორე არის მოსე წინასწარმეტყველის, როდესაც მან ჰურიებთან ერთად გაიარა მეწამური ზღვა. მესამე ნათლობაა შჯულის, როდესაც ვინმე გაუწმინდურდებოდა, იგი ვერ მიდიოდა ხალხთან, სანამ ტანს და სამოსს არ გაიბანდა წყლით. მეოთხე ნათლობა იოანესია, რომელიც იყო მხოლოდ სინანულისა. მეხუთე ნათლობა არის ქრისტესი, რომლითაც მოვინათლეთ ჩვენც ქრისტიანები. მეექვსე ნათლობა არის სინანულის და ცრემლების, რომლითაც ვიწმინდებით მის მერე, რაც ჩვენი ცოდვებით

---

ვბილწავთ ჩვენს თავდაპირველ ნათლობას. მეშვიდე ნათლობა არის მოწამეობის, რომელიც არის უფრო დიდი და პატიოსანი, რადგან მას აღარ ემუქრება ცოდვებით წაბილწვა. ამ ნათლობის პირველი მაგალითი გვიჩვენა თავად მაცხოვარმა იესო ქრისტემ, როდესაც დასთხია თავისი წმინდა სისხლი ჯვარზე, ხოლო შემდეგ იმავე ნათლობით მოინათლნენ მოწამეები და ღირსი გახდნენ ცათა სასუფევლისა. მერვე ნათლობა არის უკანასკნელი ჟამის - ჩაუქრობელი ცეცხლისა, რომელიც დაწვავს ცოდვილებს, როგორც ეს არის ნათქვამი დღევანდელი დღის კანონის მეექვსე გალობის ერთ-ერთ ტროპარში: „უკანასკნელი ჟამის ჩაუქრობელი ცეცხლით, ქრისტე ნათლავს მისი ღვთაებრიობის ურწმუნოებს“.<sup>2</sup>

მეხუთე შეკითხვაა: რატომაა ნათლობა სულითა და წყლით? უნდა ითქვას, რომ ადამიანი არის შედგენილი ორი ნაწილისაგან - სხეულისა და სულისგან. სხეული, რადგანაც მატერიალური და მგრძნობიარეა, როდესაც იბილწება, მას სჭირდება წყლით განბანვა, რადგანაც წყალიც მატერიალურია. ხოლო სულის შემთხვევაში, რადგანაც იგი არამატერიალურია, მას უკვე სულიწმინდა წმენდს, განანათლებს და აცხოვნებს ცოდვებისაგან.

როგორც მოისმინეთ, ეს შეკითხვები გვექონდა ჩვენ დღევანდელ დღესთან დაკავშირებით, ამიტომაც კურთხეულნო ქრისტიანენო, საჭიროა, რომ ჩვენ, ვინც ნათლისდება წმინდა სამების სახელით მივიღეთ, თავი უნდა დავიცვათ ეშმაკის ყველა საქმისა და მანქანებისაგან, რათა არ წავბილწოთ ჩვენი ცოდვებით წმინდა ნათლობის მადლი და არ დავარღვიოთ ჩვენი აღთქმა, რომელიც მივეცით ქრისტეს; ღმერთმა რომ ჩვენი ლოცვა და დღესასწაულები შეიწიროს, მაქსიმალურად უნდა დავიცვათ ღვთის მცნებები და ვიზრუნოთ ჩვენი ცხოვნებისა და ცათა სასუფევლის დამკვიდრებისთვის, რადგან იქ არის ჩვენი ადგილი, როგორც ამას პავლე მოციქული ამბობს: „ხოლო ჩვენი მოქალაქეობა ცაშია“.<sup>2</sup> ჩვენი ბუნება და სული არ უნდა მოიხიბლოს ამა სოფლის სიამით, რადგან ყოველივე არის წარმავალი და ცრუ. გავექცეთ

---

მკვლევლობებს, მრუშობას, სიძვას, ლოთობას და სხვა ბოროტ საქმეებს. არ ვიყოთ ერთიმეორის მიმართ შურით განწყობილნი, ნურც ცილს დავწამებთ ერთიმეორეს უმოწყალო და ბოროტი გულით, იმისათვის რომ დავლუპოთ ერთმანეთი, როგორც ამას ხშირად ვხედავთ, ამას ბევრი ადამიანი აკეთებს ისე, რომ არც ღმერთის ემინიათ, არც ცოდვის; არ ფიქრობენ არც სიკვდილზე და არც სამსჯავროზე. ასეთ ადამიანებს მხოლოდ ქრისტიანების სახელი ჰქვიათ, ხოლო გულით ქრისტესაგან შორს არიან, როგორც ამას ესაია წინასწარმეტყველი ამბობს და მათი საქმეები არამც თუ წარმართული, არამედ უფრო მეტად ეშმაკეულიც კი არის, რადგან მხოლოდ ეშმაკს არ სურს სიკეთე ადამიანისათვის. როგორც ამბობს თავად მაცხოვარი იესო ქრისტე, ის არის ბოროტი და ცრუ.

ნუ დავიდებთ ჩვენს გულებში ამპარტავნებას, რა კეთილი საქმეც არ უნდა ვაკეთოთ, რადგან იმთავითვე დაკვარგავთ ჩვენი მთელი ღვაწლის საზღაურს. მოკლედ რომ ვთქვათ, განვეშოროთ ყველა ბოროტ და უღირს საქმეს, რომელიც ჭრილობას აყენებს ჩვენს სულს და რომლის გამოც ხარობს ეშმაკი. ვიღვაწოთ, რომ მხოლოდ კეთილი და ღვთისთვის სათნო საქმეები ვაკეთოთ, რადგან ასე დავიმკვიდრებთ უკვდავებას და მივიღებთ საზღაურს ცათა სასუფეველში.

მივესწრაფებოდეთ ეკლესიაში მისვლას და თუ ამას ყოველ დღე ვერ შევძლებთ, ჩვენი უძღურებებისა და გაჭირვებების გამო, რომლებიც ყოველთვის თან გვახლავს ამასოფლის ტალღებში მოქცეულთ, კვირაობით და დღესასწაულებზე მაინც მოვახერხოთ სიარული, რადგანაც სწორედ ამისთვის დაწესდა ეს წმინდა დღეები. პირველი - იმისათვის, რომ ჩვენ და ჩვენმა საყოლმა დავისვენოთ ყოველდღიური საქმეებისგან. მეორე- რომ მრავალი სიკეთის და წყალობისათვის, რაც გვეძლევა მრავალმოწყალე და კაცთმოყვარე ღმერთისაგან, აღვაკლინოთ დიდება და მადლიერება. მესამე- რომ მოვისმინოთ ჩვენი სულისათვის სასარგებლო გალობა და ლოცვა, რადგან

---

როგორც ადამიანის ხორცს არ ძალუძს არსებობა მატერიალური საკვების გარეშე, ასევე არც სულს ძალუძს არსებობა სულიერი საზრდოს გარეშე, რომელიც არის ღვთის სიტყვა. ასე გვეუბნება მაცხოვარი ქრისტე სახარებაში: „არა მხოლოდ პურით ცოცხლობს კაცი, არამედ ყოველი სიტყვით, რომელიც გამოდის ღმერთის პირიდან“.<sup>2</sup> ნუ ვივლით საცეკვაოდ და გასართობად დუქნებში, როგორც გვჩვევია ხოლმე, რადგან სარგებლის სანაცვლოდ ჩვენ წარვწყმდებით სულიერად და ხორციელად, მაგრამ თუ მაინც ერთად შეკრება გვსურს, იმისათვის რომ ერთმანეთს სიხარული გავუზიაროთ, ეკლესიაზე უკეთესი და მშვენიერი ადგილი არ მოიძებნება. რადგან აქ, ჩვენივე თვალთ ვხედავთ არა მხოლოდ ხალხის სიმრავლეს, არამედ თავად უფალ იესო ქრისტეს, როგორც მარადიულ მეუფეს, ყოვლადწმინდა ღვთისმშობელს, წმინდა ანგელოზებს, მოციქულებს, მოწამეებს და ყველა წმინდანს. ჩვენი ყურით ვისმენთ მათ მიერ აღსრულებულ სასწაულებსა და დიდებულ საქმეებს. აქ, ეკლესიაში, ჩვენ ვხარობთ სულიერადაც და ხორციელადაც, არ ვკარგავთ არაფერს, არამედ პირიქით, ვღებულობთ მადლს, სიწმინდეს და ღვთის წყალობას.

და როდესაც ეკლესიიდან გამოვდივართ, ნუ წავალთ აქედან ცარიელები, არამედ მოვიქცეთ ისე, როგორც ზღარბი იქცევა ხოლმე. რადგან როდესაც ის მიდის ვენახში, თავდაპირველად თავად ძღება ყურძნით, ხოლო შემდეგ არყევს ვაზს და თავისი ნემსებით აგროვებს ჩამოცვენილ მარცვლებს და მიაქვს თავისი შვილების გამოსაკვებად. ასევე თითოეულმა ჩვენგანმა საკუთარ სახლებში წავუღოთ ჩვენს შვილებსა და სხვებს, ვინც ეკლესიაში ვერ მოვიდა ის სიტყვები, რომელნიც მოვისმინეთ წმინდა სახარებიდან და სხვა წიგნებიდან, რომ ისინიც გამოვკვებოთ სულიერი საზრდოთი. ამის შემდეგ დავიცვათ ჩვენი გონება ბოროტი ფიქრებისგან და ჩვენი სხეულები ყოველი უწმინდურობისაგან. ვიქონიოთ სიყვარული ყველას მიმართ, გავიღოთ მოწყალება გაჭირვებულთათვის, ვიყოთ სტუმართმოყვარენი, მოვიკითხოთ

---

ავადმყოფები და პატიმრები. სიკეთე გავუკეთოთ ჩვენს მტრებს, როგორც ამას გვასწავლის მაცხოვარი ქრისტე. გაჭირვებისა და განსაცდელის ჟამს ვიქონიოთ მორჩილება ჩვენი ბატონების და უფროსების მიმართ. დავუჯეროთ და პატივი ვცეთ ჩვენს მშობლებს. ღირსებით და პატივით მოვეპყრათ ჩვენს მოძღვრებს, მღვდლებსა და ბერებს, რადგან ასეა ღვთისათვის სათნო.

და თუ ასეთი ცხოვრებით ვიცხოვრებთ, ვიქონიოთ სასოება ღვთისადმი, ამქვეყნიურ ცხოვრებაშიც გვექნება სიკეთე და სიხარული, ხოლო მომავალ ცხოვრებაში უფალი განგვაწესებს მართალთა დასში და მივიღებთ მარადიულ ნეტარებას და მარად ვიქნებით მამისა და ძისა და სულისა წმინდისა ქებასა და დიდებაში. ამინ!

## ქადაგება №15

### ქადაგება უფალი ჩვენი იესო ქრისტეს

#### ფერისცვალებაზე

”წარიყვანა იესო პეტრე და იაკობ და იოვანე, ძმაი მისი, და აღიყვანა იგინი მთასა მაღალსა თვისაგან. და იცვალა მათ წინაშე სხუად ფერად და გაბრწყინდა პირი მისი, ვითარცა მზე. ხოლო სამოსელი მისი იქნა სპეტაკ, ვითარცა ნათელი“.

როდესაც ხილული მზე ამოდის ცისკარზე და დედამიწაზე მაღლდება, ის ჰფენს თავის სხივებს და ანათებს მთელ სამყაროს: ხმელეთს, ზღვებს, ჰვანტავს სიბნელეს, ბურუსს, ათბობს და ასაზრდოებს ყველა ცოცხალ არსებას, რითაც დიდ სიკეთეს აკეთებს. მოკლედ რომ ვთქვათ, ყველას და ყველაფერს ასულიერებს, აცოცხლებს, ახარებს და ამხიარულებს. ხოლო რაოდენ უმეტეს ამისა არს მზე სიმართლისა, ანუ ძე და სიტყვა მამა ღმერთისა, უფალი ჩვენი



---

იესო ქრისტე (რომლის შესახებაც თქვა მალაქია წინასწარმეტყველმა მე-4 თავში: „ამოგიბრწყინდებათ, ჩემი სახლის მოშიშნო, მზე სიმართლისა“<sup>2</sup>), რომელიც აღვიდა და განათდა დღეს თაბორის მთაზე და გაბრწყინდა თავისი ღვთაებრივობის სხივებით.

რომ არ ყოფილიყო ჭეშმარიტად მე ღვთისა, ვერ მისცემდა მიცვალებულებს სიცოცხლეს, როგორც მოსეს; ვერ განანათლებდა ცოცხლებს, როგორც ილიას; ვერ გააქრობდა ეჭვისა და წინააღმდეგობის ფიქრს მოციქულთა გონებიდან, ვერ ჩანერგავდა და განამტკიცებდა უფრო მეტ რწმენას მათ გულებში და ვერ ეჩვენებოდა მათ გაბრწყინებული, როგორც ჭეშმარიტი მესია. ქრისტეს, უცოდველსა და უდანაშაულოს, თავისივე ნებით სურს სიკვდილზე წასვლა, რომ ადამიანებს მხოლოდ უყვარდეთ ის მთელი გონებით, გულითა და სულით, ხოლო სხვა ყველაფერი არარაობად ჩათვალონ. ამიტომ მივმართავ თქვენს გულისხმიერებას, რომ მცირე ხნით სიყვარულით მომისმინოთ, რათა გავიგოთ, რომ ჩვენც გვმართებს ისეთივე სიყვარული ქრისტეს მიმართ, როგორიც ჰქონდათ მოციქულებს.

ყოვლადბრძენი ზირაქის წიგნის მეორე თავში ჩვენ ვსწავლობთ როგორ უნდა განვეწყოთ, როდესაც ვემზადებით ღვთისმსახურებისათვის: „შვილო, თუ უფალს მიეახლები სამსახურად, განსაცდელებისთვისაც გაამზადე თავი“<sup>2</sup>. ამიტომ ის, ვინც ემზადება ემსახუროს ღმერთს, განსაცდელებსა და ბრძოლებს უნდა ელოდოს ბოროტი ეშმაკისაგან, მაგრამ ამ დროს სასოწარკვეთილებაში კი არ უნდა ჩავარდეს, არამედ პირიქით, ღვთისგან უნდა ელოდოს უფრო მეტ ძალასა და დახმარებას (ოღონდაც ამ დროს ადამიანი უნდა იყოს ჭეშმარიტი რწმენით და მტკიცე სასოებით აღვსილი, იყოს მართალი და სთესოს კეთილი საქმეები); ამ შემთხვევაში ღმერთი არ დაუშვებს, რომ განსაცდელის სიმძიმე მის ძალებს აღემატებოდეს, არამედ ამ დროს ღმერთი განაშორებს მისგან მწუხარებასა და განსაცდელს. ბევრი მაგალითია ამის დამადასტურებელი: პირველ რიგში უნდა ვახსენოთ აბრაამი, რომელსაც ღმერთმა მთაზე ასვლა და

---

თავისი მხოლოდშობილი საყვარელი ძის - ისააკის საკუთარი ხელით მსხვერპლად შეწირვა უბრძანა.

განა მძიმე არ იყო ეს ღმრთის ბრძანება აბრაამისთვის? განა მის გულში არ იყო დიდი და აუტანელი ტკივილი? მაგრამ ღმერთმა დაინახა მისი რწმენა. აბრაამი არ შეყოვნებულა, რათა შეესრულებინა ღვთის ბრძანება და უფალმა მაშინვე გაუქრო მწუხარება და ტკივილი ანგელოზის გამოცხადებით, რომელმაც გამოუცხადა აბრაამს: „ნუ აღმართავ ხელს ამ ყმაწვილზე, ნურაფერს დაუშავებ მას“.<sup>2</sup>

ასევე რამდენი გაჭირვება განიცადა ჰურიების ერმა ეგვიპტეში ფარაონის მონობის დროს; მაგრამ მოსეს მეშვეობით ათი სასჯელი მოევლინა ფარაონს. ღმერთმა ყველაფერი გააკეთა, რათა ეხსნა თავისი ერი მწუხარებებისგან. ასევე მართალმა და მრავალტანჯულმა იობმა ერთ წამში დაკარგა არა მხოლოდ მრავალრიცხოვანი პირუტყვი, სახლები, ძენი და ასულნი, მთელი ქონება, არამედ მთელი სხეული დაეფარა კეთრის წყლულებითა და მატლებით; და საერთოდაც ნაგავსაყრელზე აღმოჩნდა. მაგრამ ვინაიდან დიდი ვაჟკაცობითა და მოთმინებით აიტანა ყველა განსაცდელი, ღმერთმა დაუყონებლივ ორმაგად აღუდგინა ყოველივე, რაც დაკარგა.

ეს ყველაფერი მოვყევი იმისათვის, რომ განვმარტოთ და ვისწავლოთ დღევანდელი დღესასწაულის, ქრისტეს ფერისცვალების დღესასწაულის, საიდუმლო, რომელიც დაეხმარა მოციქულებს, რომ არ ჩავარდნილიყვნენ ურწმუნოებაში. მოციქულები, ხედავდნენ ქრისტეს უდიდესი თავმდაბლობით ცხოვრებას, უზომო გაჭირვებასა და სიღარიბეს, იმდენად მძიმეს, რომ ხშირად თავის მოსადრევი ადგილიც კი არც ჰქონდა ჰურიებისაგან დევნილს. მათი ფიქრები, როგორც უბრალო და გაუნათლებელი ადამიანებისა, აიბნა, მათში დაიწყო ეჭვისა და ურწმუნოების შეპარვა, რომ იესო არ არის ჭეშმარიტი მესია, მით უმეტეს, რომ რამდენიმე დღეში იგი უნდა მომკვდარიყო უღირსი სიკვდილით.

---

ამ ურწმუნოების ჟამს მხოლოდ ქრისტეს, ძე ღვთისას, უშუალო დახმარება თუ უშველიდა მათ. ამიტომაც აიყვანა ისინი მთაზე და მათ წინაშე ფერი იცვალა და უჩვენა მათ თავისი ღვთაებრივი ნათელი (რამდენადაც ამის დანახვა შესაძლებელია ხორციელი თვალით). მაცხოვარმა გაანათლა და განადიდა კაცობრივი ბუნება, რომლითაც იყო შემოსილი. ამ ნათელით გაბრწყინდა მისი სამოსელიც, მიუხედავად იმისა, რომ ის იყო თავმდაბალი, გარეგნულად ღატაკი, რომელსაც დევნიდნენ და რამდენიმე დღის შემდეგ ჰურიების მიერ იქნებოდა შეურაცხყოფილი, დამცირებული, ნაცემი, ნაწამები, დაწყლულებული და ბოლოს ჯვარცმული, ვითარცა ბოროტმოქმედი. სწორედ ამ დროს მოციქულები უნდა მდგარიყვნენ მტკიცედ თავის რწმენაში, არ უნდა ეფიქრათ, რომ იესო მხოლოდ კაცია, არამედ უნდა სცოდნოდნათ, რომ ის არის ჭეშმარიტი სრული ღმერთი. სწორედ ამიტომ იცვალა ფერი იესომ მათ წინაშე.

იმისათვის რომ ურწმუნოების განსაცდელისაგან გადარჩენილიყვნენ, მოციქულებს მაცხოვრის დახმარება სამ რამეში სჭირდებოდათ. პირველი, საჭირო იყო ერწმუნათ, რომ ქრისტე არის ჭეშმარიტი მესია; მეორე, როდესაც დაინახავდნენ ჯვარცმულსა და მკვდარს, მათ არ უნდა დაეკარგათ რწმენა, რომ ის არის ჭეშმარიტი ღმერთი; მესამე, უნდა მიეცა მათთვის მიზეზი, რომ შეეყვარებოდნათ ის მხურვალე სიყვარულით.

ამიტომ ვხედავთ, თუ რაოდენ დიდი დახმარება გაუწია საკუთარი ფერისცვალებით ქრისტემ მოციქულებს, რათა შეეცნოთ იგი, როგორც ჭეშმარიტი მესია. ამ მიზნით გახდა საჭირო სამი მოწმის: მოსეს, ილიასა და ზეციერი მამის დამოწმება. „და აჰა ესერა - მოგვითხრობს მახარობელი - ორნი კაცნი მის თანა ზრახვიდეს, რომელნი იყვნეს მოსე და ელია. რომელნი გამოჩნდეს დიდებითა და იტყოდეს განსვლასა მას მისსა, რომელი ეგულებოდა აღსრულებად იერუსალემს“.<sup>2</sup> და მამა ღმერთმა ხმით ღრუბლიდან დაამოწმა: „და ხმაი იყო ღრუბლით გამო: ესე არს ძე ჩემი საყუარელი, ამისი ისმინეთ“.<sup>2</sup> რათა მოციქულები არ შესუსტებულიყვნენ საკუთარ რწმენაში, როდესაც მას

---

ჯვარცმულს დაინახავდნენ. თავიდან იესო ქრისტე ჯერ მოსეს და ილიას ესაუბრება მომავალ ჯვარცმაზე და სიკვდილზე, უცხადებს მათ თავის ღვთაებრიობას, რომლითაც განადიდა კაცობრივი ბუნება და რომლითაც განადიდებს წმინდანებს მეორედ მოსვლის ჟამს.

სახარებაში ნათქვამია, „და აჰა ეჩუენნეს მათ მოსე და ელია მის თანა, და თანა-ზრახვიდეს“,<sup>2</sup> დიდებული საუბარი და მოსაუბრები ჰყავს დღეს ქრისტეს, რადგან ქრისტე არის მესია, მოსე არის სჯულმდებელი, ხოლო ილია არის დიდი წინასწარმეტყველი; ქრისტე არის სოფლის მაცხოვარი, მოსე არის ჰურიათა გადამრჩენელი, ხოლო ილია იქნება მეორედ მოსვლამდე მართალთა მხსნელი. ქრისტე არის სჯულის მომცემი, მოსე არის სჯულის მასწავლებელი, ხოლო ილია არის სჯულის აღმსრულებელი.

ხედავთ, რა დიდებული თანამოსაუბრენი ჰყავს მაცხოვარს?! საინტერესოა ისიც, რომ მოსე მოკვდა, ხოლო ილია ცოცხალია. ნეტავ, რას უნდა ნიშნავდეს ის, რომ ქრისტეს გამოეცხადა ერთი წმინდანი მკვდრებიდან და ერთი წმინდანი ცოცხლებიდან? ეს იმიტომ, რომ მომავალი სამსჯავროს დროს განისჯებიან და ცათა სასუფეველში ერთად იქნებიან ნეტარებაში ის მართლები, რომლებიც მეორედ მოსვლის ჟამს იქნებიან ცოცხალნი, თუ მკვდარნი. რადგან ქრისტეს დღევანდელი ფერიცვალების საიდუმლო წარმოადგენს ცათა სასუფეველის დიდების ერთგვარ წინასახეს. ამიტომაც იქნა გამოცხადებული ერთ-ერთი მიცვალებულთაგანი - მოსე და ერთ-ერთი ცოცხალთაგანი - ილია. ის, რომ ცათა სასუფეველში ერთად იქნებიან ცოცხლებიცა და მიცვალებულებიც, გვიმოწმებს პავლე მოციქული კორინთელთა მიმართ ეპისტოლეს მე-15 თავში: „ყოველთავე უკუე არა შევისუენოთ, ხოლო ყოველნივე განვახლდეთ. რამეთუ ჯერ-არს ხრწნილისა ამის შემოსად უხრწნელებაი, და მოკუდავისა ამის შემოსად უკუდავებაი“.<sup>2</sup>

„და ეჩუენნეს მათ მოსე და ელია“,<sup>2</sup> ნეტავ რისთვის? ოთხი რამისთვის: პირველი მიზეზი: ხალხში რომ გამქრალიყო ის ცრუ წარმოდგენა ქრისტეზე,

---

თითქოს ის იყო ილია, იერემია, ან სხვა რომელიმე წინასწარმეტყველთაგანი. მეორე მიზეზი: ენახათ ჰურიებს, რომ ქრისტე არ არის მოსეს სჯულის წინააღმდეგი და ამიტომაც სიყვარულით ესაუბრება თავად სჯულმდებელ მოსეს და სჯულის აღმსრულებელ ილიას. მესამე მიზეზი: ეჩვენებინა, რომ თავად არის სიცოცხლისა და სიკვდილის მბრძანებელი, ცოცხლებისა და მიცვალებულების უფალი; და როდესაც მათ უხმობს, ისინი მოდიან კიდევაც, როგორც ეს არის ნათქვამი დღევანდელი მერვე გალობის ერთ-ერთ ტროპარში: „რომელიც ჰბრძანებ ცასა და სუფევ ქვეყანასა და უფლებ ქუესკნელსა, დადგენ წინაშე შენსა, ქრისტე ღმერთო, ქუეყანისაგან მოციქულნი, ზეციდან ელია და ქუესკნელიდან მოსე“. მეოთხე მიზეზი: მოციქულებს უნდა ენახათ, თუ როგორ იყო განდიდებული ის ორი წინასწარმეტყველი : კერძოდ, მოსეს ჰქონდა დიდი სიმშვიდე და სიკეთე, ხოლო ილიას - სარწმუნოების დიდი მომურნეობა. ამიტომ მოციქულებიც უნდა იყვნენ ისეთივე მშვიდები, კეთილები და მომურნეები იქ, სადაც იქნება საჭირო რწმენის სიმტკიცე და ჭეშმარიტი ღმრთის თაყვანისცემა.

ამ ოთხი მიზეზისთვის მაცხოვარს გამოეცხადა მოსე და ილია. უფრო სწორედ რომ ვთქვათ, მათი გამოცხადება იყო საჭირო იმისთვის, რომ მოციქულებისთვის დაემოწმებინათ, რომ იესო არის მესია, თუმცა, ეს მოწმობა არც უნდა ყოფილიყო აუცილებელი, რადგან ზეციდან გაისმა მამა ღმრთის ხმა, ბევრად უფრო სარწმუნო, ვიდრე წინასწარმეტყველებისა: „და აჰა ხმაი იყო ღრუბლით გამო და თქუა: ესე არს ძე ჩემი საყუარელი, რომელი მე სათნო-ვიყავ; მაგისი ისმინეთ“.<sup>2</sup>

ჰოი, რა ჭეშმარიტი და სარწმუნოა ეს მოწმობა! ჰოი, რა სიკეთე და ნეტარება მოიხვეჭეს იმათ, ვინც მოისმინა ეს მოწმობა და ზეციერი მამის ბრძანების შესაბამისად გაჰყვა მაცხოვარს! მართალია, რომ ამ ცხოვრებაში მცირეოდენ იდევენბოდნენ, მაგრამ როგორც ამბობს ბრძენი სოლომონი, დიდ ნეტარებასა და სიხარულს ეღირსნენ: „რადგან ისინი ღმერთმა გამოსცადა და

---

თავისი თავის ღირსად შერაცხა. ქურაში ოქროსავით გამოსცადა ისინი და დასაწველ მსხვერპლად შეიწყნარა “.<sup>2</sup> მართალია, მცირეოდენ იყვნენ ღვაწლში, მაგრამ დიდი საზღაური მიიღეს. მცირე ხანი იყვნენ მწუხარებაში, მაგრამ მარადიულ ცხოვრებაში გაიხარეს, რადგან როგორც ამბობს პავლე მოციქული, ამქვეყნიური ცხოვრების დევნა ვერ შეედრება მომავალი ცხოვრების დიდებას.

და აჰა, ხმა ღრუბლიდან, რომელმაც თქვა: „ესე არს ძე ჩემი საყუარელი, რომელი ძე სათნო-ვიყავ; მაგისი ისმინეთ“.<sup>2</sup> ნეტავ, ეს სიტყვები, რომელნიც წარმოსთქვა მამა ღმერთმა: “მაგისი ისმინეთ“, ნათქვამი იყო მხოლოდ მოციქულებისთვის, თუ ჩვენთვისაც? მე მგონი, რომ ეს ჩვენთვისაც იყო ნათქვამი, რადგან ჩვენ ქრისტიანები ვართ და ქრისტეს მოწაფენი. ახლა პირველად უნდა გავიგოთ ამ სიტყვის – „ისმინეთ“ მნიშვნელობა. შემდეგ კი, უკვე უფრო ნათლად გავიგებთ სხვა სიტყვების შინაარსაც. ეს „ისმინეთ“ აქ არ გაიგება, როგორც ცარიელი სიტყვა, რომელიც ადამიანის პირიდან გამოდის და ყურით ვისმენთ, რადგან ასეთი მოსმენა არ ნიშნავს დაჯერებასა და მორჩილებას, არამედ მხოლოდ ხმის გაგებას. სახარებაში იგულისხმება ქმედების დასასრული, მაგალითად, როდესაც მსახურს ეუბნებიან მიდი და გააკეთე, ხოლო მას ესმის რა ეს სიტყვები, ავლენს მორჩილებას, მიდის და ასრულებს ბრძანებას. ასე მამა ღმერთი გვეუბნება: „მაგისი ისმინეთ“, ანუ, რასაც გვიბრძანებს ქრისტე, უნდა დავემორჩილოთ და შევასრულოთ მისი ნებისაებრ ჩვენი სულების სასიკეთოდ.

მაშასადამე, დავიცვათ ღვთის მცნება და დავემორჩილოთ ქრისტეს. მე ვთვლი, რომ როგორც შორსაა ცა მიწისაგან, ასე შორს უნდა ვიყოთ მხოლოდ გარეგნული მორჩილებისაგან, რადგან ქრისტე გვეუბნება იოანე სახარების მე-14 თავში: „უკეთუ გიყუარ მე, მცნებანი ჩემნი დაიძარხენით“.<sup>2</sup>

ახლა ვნახოთ, თუ გვიყვარს ქრისტე, მისი რომელი მცნება უნდა დავიცვათ.

---

ქრისტე გვასწავლის: „ჭირი არ დაგელევათ ამქვეყნად“.<sup>2</sup> ჩვენ არ გვსურს არანაირი მწუხარების ტვირთვა, ხოლო თუ განსაცდელში აღმოვჩნდებით, იმიტომ კი არა, რომ ღვთის სიყვარული მოგვაკლდა, არამედ ჩვენი თავკერძა სურვილების შეუსრულებლობის გამო.

ქრისტე გვასწავლის: „ჩემს მშვიდობას გაძლევთ თქვენ“,<sup>2</sup> ხოლო ჩვენ არ ვიღებთ ღვთის მშვიდობას და მუდმივად ვშფოთავთ, როგორც ზღვის ტალღები ქარიშხლის დროს.

ქრისტე გვასწავლის: „ნუ განიკითხავთ, რადთა არა განიკითხნეთ“<sup>2</sup> ხოლო ჩვენ არც დღეს, არც ღამეს და არცერთ საათს არ ვატარებთ, რომ ბოროტებით არ განვიკითხოთ არა მხოლოდ ისინი, ვისაც ვიცნობთ, არამედ უცნობებიც.

ქრისტე გვასწავლის: „ყოველი რომელი გინდეს თქვენ, რაითა გიყონ კაცთა, ეგრეცა თქვენ ჰყვით მათა მიმართ“,<sup>2</sup> ხოლო ჩვენ გვსურს, რომ პატივს გვცემდნენ, თავს გვიხრიდნენ, საჩუქრებს გვჩუქნიდნენ, გვაქებდნენ, ჩვენზე კარგს ლაპარაკობდნენ, ყველა სურვილს გვისრულებდნენ, ბოროტებას რომც ჩავდიოდეთ, არავინ იღებდეს ხმას და არ გვეწინააღმდეგებოდეს. ჩვენ კი ამ დროს ყველას განვიკითხავთ, არავის არ ვეხმარებით, სიკეთეს არ ვუკეთებთ და არ გვსურს, რომ ვინმემ თხოვნით მოგვმართოს. ყველას ვლანძღავთ, ყველას ბოროტებით ვიხსენებთ, ცილს ვწამებთ, ვიგდებთ მასხრად და დავცინით, ყველაზე ვლაპარაკობთ, რომ არიან გიჟები და უგუნურები. მხოლოდ ჩვენი თავი მოგვაქვს, როგორც ყველაზე ბრძენი, ღმერთზე უფრო მეტადაც კი და ვივიწყებთ რომ, ამა სოფლის სიბრძნე არის სისულელე ღვთის წინაშე.

ქრისტე გვასწავლის: „მცნებასა ახალსა მიგცემ თქვენ, რაითა იყუარებოდეთ ურთიერთას, ვითარცა მე შეგიყუარეთ თქვენ, რაითა თქვენცა იყუარებოდით ურთიერთას“,<sup>2</sup> ხოლო ჩვენ ერთმანეთი გვძულს და ვცდილობთ, ხელი ვკრათ ერთმანეთს, თითქოს მშობლები მოგვიკლეს ან სხვა რამ ბოროტება გაგვიკეთეს.

---

ქრისტე გვასწავლის: „რომელსა სირცხვლ უჩნდეს ჩემდა მომართ მას ძემანცა კაცისამან არცხვნოს, ოდეს მოვიდეს დიდებითა თვისითა და მამისაჲთა და წმიდათა ანგელოზთაჲთა“<sup>2</sup>, ხოლო ჩვენ არც ღმერთის გვრცხვენია, არც მის სიტყვებს ვისმენთ, არ ვიცავთ იმას, რასაც გვასწავლიან ჩვენი სულიათვის საცხოვნებელსა და სასარგებლოს, უფრო მეტიც, სხვადასხვა საბაბს ვეძებთ, რომ თავი გავიმართლოთ, თითქოსდა არ შეგვიძლია იმის შესრულება, რასაც იესო ქრისტე გვასწავლის. ვითომ ოჯახებში გვაქვს პრობლემებიო, დრო არ გვიწყოფს ხელსო, ჩვენზე ბატონობენ წარმართებიო, და საერთოდ, გვაქვს ბევრი პრობლემა და მწუხარებაო. მაგრამ როდესაც ჩვენი საკუთარი სურვილებისა და ახირებების შესრულება გვინდა, მაშინ როგორღა ვპოულობთ დროსაც და ყველანაირ საშუალებას მათ მისაღწევად?!

ღმერთს არ ვემორჩილებით იმაში, რაც ჩვენი სულებისთვის სასარგებლო და კარგია, რადგან ჩვენ გვგონია, რომ მისი მცნებები მძიმე და ცუდია. ამიტომაც არც პატივს ვცემთ მას, თითქოს ჩვენი მოსისხლე მტერი იყოს. ხოლო ადამიანებს, რომლებსაც არ ეშინიათ ღმერთის, არც ხალხის რცხვენიათ, მათ ვუჯერებთ ყველაფერში და ამით ვიღუპავთ სულებს. ჩავდივართ ბოროტებებს და ამით ხალხის სალაპარაკო, გასალანძლი და დასაწყევლები ვხდებით ხოლმე. ვღებულობთ ურწმუნო ადამიანების რჩევებს და დიდი სურვილით, სიხარულითა და სიყვარულით ვასრულებთ მათ. ვაქებთ ამგვარ ადამიანებს და პატივს ვცემთ მათ, როგორც საუკეთესო მეგობრებს და არ ვფიქრობთ იმას, რომ მათი რჩევების შესრულებით ვიღუპავთ სულებს. ხოლო ღმერთს, რომელსაც ყველა ადამიანის ცხოვნება სურს, არაფრად ვაგდებთ.

ქრისტე გვასწავლის: „ამით ცნან ყოველთა, ვითარმედ ჩემნი მოწაფენი ხართ, უკუეთუ იყუარებოდით ურთიერთას“<sup>2</sup> ხოლო ჩვენ გვშურს ერთმანეთის, ბოროტებას ვუსურვებთ და ყველაფერს ვაკეთებთ ზიანი რომ მივაყენოთ არა მხოლოდ სხვის ქონებას, არამედ მათ პატივსა და ღირსებას და



---

ამით ჩავდივართ ცოდვას სულიწმიდის წინააღმდეგ. მაგრამ ღმერთს არ შეუქმნია ეს სამყარო მხოლოდ ერთი ადამიანისთვის, არამედ ყველასთვის, არც ცათა სასუფეველი შექმნილა ერთეულებისთვის, არამედ ყველასათვის; ღმერთს სამყარო მხოლოდ ერთი ადამიანისთვის რომ შეექმნა, რაში დაჭირდებოდა მას ევას შექმნა? და ამის შემდეგ მათი კურთხევაც: „ინაყოფიერეთ, იმრავლეთ და აავსეთ ქვეყანა“.<sup>2</sup> ხოლო თუ ვინმე გამოხატავს კიდევაც სიყვარულს სხვის მიმართ, ამას აკეთებს ტყუილითა და თვალთმაქცობით, ან შიშის, სირცხვილის, ან რაიმე ბოროტი სარგებლის გამო.

ქრისტე გვასწავლის: „მიაგეთ კეისარს კეისრისა, ხოლო ღმერთს-ღმერთისა“<sup>2</sup> ხოლო ჩვენ არც საეკლესიო, არც საერო უფროსებს, არც თავად ღმერთს არ ვემორჩილებით სიმართლით და არ ვცემთ მათ სათანადო პატივს. არამედ სიყვარულის სანაცვლოდ, ბოროტებით და ცბიერებით ცილს ვწამებთ და ბოროტებით ვსაუბრობთ მათზე. მაგრამ ნახეთ, რას ამბობს ღმერთი მათზე გამოსვლათა წიგნის 22-ე თავში: „ღვთის მსაჯულებს ნუ შეურაცხყოფ და თავკაცს შენს ხალხში ნუ დასწყევლი“.<sup>2</sup> წმინდა წერილის განმმარტებლები ღვთის მსაჯულებში გულისხმობენ ეკლესიის მღვდელმთავრებს, მოძღვრებსა და მასწავლებლებს, ხოლო თავკაცებში - მეფეებს, ბატონებსა და მსაჯულებს.

ხოლო ჩვენ ბოროტს ვისზე ვამბობთ, ვის ვწყევლით და ვის ვწამებთ ცილსა? რა თქმა უნდა, მღვდელმთავრებს, მთავრებსა და ჩვენს ბატონებს, სწორედ მათზე, ვისზედაც ღმერთი გვასწავლის, რომ ბოროტად არ მოვიხსენიოთ. დავით წინასწარმეტყველი გვასწავლის: „დასდევ უფალო საციო პირსა ჩემსა“, <sup>2</sup> ხოლო ჩვენ საერთოდ არა გვაქვს ღვთის შიში. რადგან ჩვენი გონება ღვთისა და ადამიანთა წინაშე ბოროტია, სწორედ ამიტომაა ჩვენი ცხოვრება დაწყველილი, შფოთვარე, სავსე შიშითა და სიძულვილით, გაჭირვებებითა და მწუხარებით.

აჰა, ჩვენ გვამხელენ ჩვენივე საქმეები, რადგან არც ვემორჩილებით ქრისტეს, არც გვიყვარს ის, რადგან თუ გვეყვარებოდა, შევასრულებდით

---

კიდევ მის მცნებებს. თითოეული ჩვენგანი იქცევა თვითნებურად, ჩავდივართ მხოლოდ იმას, რაც ჩვენ გვსურს და არ გვახსენდება არც სიკვდილი და არც სამსჯავრო. თუ ჩვენ არ გამოვასწორებთ ჩვენს ცხოვრებას, ჩვენი დასასრული ბოროტი იქნება.

ამიტომაც, ჩემო საყვარელო, აღვმართოთ ჩვენი გონება თაბორისაკენ, ჩვენსკენაც მოვიდეს ნათელი ჭემარიტი, ვიხილოთ ის სულიერი თვალთ, ვიყოთ ჩვენც მოციქულებივით ქრისტეს მიმართ სავსენი მოშურნეობითა და სიყვარულით, დავემსგავსოთ ჩვენს მოსეს და ილიას მათ ღვაწლში და ღვთის მცნებების აღსრულებაში. რათა ჩვენც ქრისტესთან ერთად ავმალდეთ სულიერ სიმაღლეზე, ვიხილოთ მისი დიდება, ნათელი ღრუბელი და ვისმინოთ მამა ღმერთის ხმა: „ესე არს ძე ჩემი საყვარელი,“<sup>2</sup> და სხვა დანარჩენი. და ბოლოს, ღირს ვიქმნეთ მასთან ერთად შევიდეთ ცათა სასუფეველში.

ჰოი, უფალო იესო ქრისტე, გვედრებით ჩვენ უღირსნი და ცოდვილნი მონანი შენნი, რომელნიც გამოგვისყიდე შენი უძვირფასესი სისხლით ცბიერი ეშმაკის ხელიდან, მოწყალე გვექმენ ჩვენ მრავლისა მოთმინებისა შენისათვის, შენი სიბრძნის ნათელით განგვინათლე დაბნელებული სულის თვალები, ჩვენს გაქცავებულ გულებში აღანთე შენი ცეცხლი და ღირს გვყავ მაღლითა შენითა, რათა ვყოთ ნება შენი და მთელი სულით შეგიყვაროთ შენ, ამ დაცემულ და მწუხარებით სავსე წუთისოფელში; ხოლო მომავალ ცხოვრებაში, შენი ღვთაებრიობის ნათელისა და დიდების ხილვის ღირსად შევიქმნეთ, რომ მარადის გადიდებდეთ შენი დაუსაბამო მამით და ყოვლადწმიდით და სახიერით და ცხოველსმოფელი სულითურთ, აწ და მარადის და უკუნითი უკუნისამდე. ამინ!

---

## ქადაგება ბზობის კვირიაკეზე

დიდი მონდომება და წმინდა სიყვარული, უფრო მეტად კი მამობრივი ვალდებულება, რომელიც გამაჩნია თქვენ მიმართ, მარად მაიძულებს, არ ვიყო დაუდევარი თქვენზე ზრუნვაში და შეძლებისდაგვარად გასაზრდოოთ სულიერი დამოძღვრებით. რამეთუ ამაშია ჩემი ჭეშმარიტი დანიშნულება, რომ ვიყო თქვენი სულიერი მოძღვარი და მამა და ვიზრუნო თქვენს სულიერ ცხოვებაზე. ხოლო თქვენ, მაშინ გამოაჩენთ რომ ხართ ნამდვილი სულიერი შვილები, რჩეული და წმინდა სამწყსო, როდესაც თითოეული თქვენგანი სიყვარულით მიიღებს და შეძლებისდაგვარად შეასრულებს, რასაც გასწავლით.

ამიტომაც, ჩემო საყვარელო მსმენელებო, მიუხედავად იმისა, რომ დღეს ყველანი შევიკრიბეთ ბზობის კვირის აღსანიშნავად, ახლა ამ დღის შესახებ არაფერს გეტყვით. ერთი: იმიტომ რომ ეს საუფლო დღესასწაულია და ამიტომ ბევრის თქმა და ლაპარაკია (არ არის საჭირო)საჭირო, რომ რაღაც მაინც განვმარტოთ ამ დღის დიდების თაობაზე, და მეორე: ვიცი, რომ თითოეული ამ კვირაში ცდილობს მოემზადოს და ღირსი გახდეს წმინდა ზიარების მისაღებად ზოგი დიდ ხუთშაბათს, ზოგი შაბათს, ზოგი კი კვირას, აღდგომა დღეს.

ამიტომ ვალდებულები ვართ პირველ რიგში ამაზე ვისაუბროთ, როგორც გაგვინათლებს გონებას უფალი ჩვენი იესო ქრისტე. ხოლო თქვენ, გთხოვთ, სიყვარულით მომისმინეთ, რასაც გეტყვით, რადგან ვგონებ, თუ ჩემი სიტყვებიდან არ მიიღებთ არანაირ სარგებელს, დანამდვილებით ვიცი, არაფერი დაგიშავდებათ მაინც.

შვიდი საიდუმლოთაგან, რომლებსაც იცავს წმინდა აღმოსავლეთის ეკლესია, ყველაზე პირველი და დიდი არის ნათლობა. მის გარეშე ვერავის

---

ძალუმს ცათა სასუფეველში შესვლა; რადგან ასე ამბობს მაცხოვარი იესო ქრისტე იოანეს სახარების მე-3 თავში: „უკუეთუ ვინმე არა იშვეს წყლისაგან და სულისა, ვერ ხელ-ეწიფების შესვლად სასუფეველსა ღმრთისასა“, ზუსტად ამ ნათლობით ადამიანი ხდება წმიდა, ნეტარი, სრულყოფილი და მადლის მიერი ძე ღვთისა.

მაგრამ მე გავბედავ და ვიტყვი, რომ სინანულის საიდუმლო წმინდა ნათლისღებასთან არის თანასწორი ღირსებაში და მოქმედებაშიც და ვთვლი, რომ არ ვცდები ამ შეფასებაში. რატომ? რადგან ის ოთხი ნიჭი, რომელიც ეძლევა ადამიანს ნათლობით, იბილწება ცოდვით და ნეტარისგან ადამიანი გარდაიქცევა ბოროტად, წმინდანისაგან ცოდვილად, სრულყოფილისაგან - არარაობად, ღვთის ძეობიდან ეცემა ეშმაკის შვილად; რადგან ასეა ნათქვამი იოანეს სახარების მე-3 თავში: „რომელმან ქმნეს ცოდვაი, იგი ეშმაკისაგან არს, რამეთუ დასაბამითგან ეშმაკი ცოდავს“.<sup>2</sup> და ის, რომ სინანულის საიდუმლო ნათლისღებასთან არის თანასწორი ღირსებაში და მოქმედებაში, შეგვიძლია დავამტკიცოთ ბევრი ფაქტებით, რომლებსგანაც გავიხსენებთ ერთ-ორს.

შექმნათა წიგნის მერვე თავში ღმერთი ეუბნება ნოეს: „ამიერითგან აღარ დავწყევლი მიწას ადამიანის გამო, რადგან ბოროტისკენაა მიდრეკილი ადამიანის გულისთქმა მისი სიყრმიდანვე. მეტად არ გავანადგურებ ცოცხალ არსებას, როგორც მოვიქეცი“;<sup>2</sup> და ამით გამოაჩინა თავისი დიდი სულგრძელობა და მოთმინება.

ამიტომაც, როგორც გვასწავლიან ეკლესიის მამები, ის წარღვნა სიმბოლურად წმინდა ნათლისღებას აღნიშნავდა; რადგან, როგორც წარღვნის წყალმა მთელი დედამიწისაგან წაშალა ყველა ცოდვა და უსჯულოება; წმინდა ნათლისღების წყალიც წმენდს მთელ კაცობრიობას როგორც პირვანდელი ცოდვისა, ასევე ბოროტი ნებით ჩადენილი პირადი ცოდვებისაგან. მაგრამ ღმერთმა რადამც იცის, რომ ეშმაკი თავისი დიდი ბოროტებით, შურითა და ბოლძით ათასი ხერხით არ შეეშვება ადამიანის ცდუნებას და, რომ ადამიანმა

---

ცოდვის სიბილწითა და კუპრით არ წაიბილწოს ნათლობისას შემოსილი წმინდა სამოსელი, ამიტომაც, როგორც წყალობის და მოწყალების მამა, ღმერთმა მისცა ადამიანს სინანულით განკურნების საშუალება, რომ მისი მეშვეობით ისევ უბრუნდებოდეს თავდაპირველ ღირსებას და ურჩობის და წარწყმედის ძისაგან ისევ ხდებოდეს ძე ღვთისა, მკვდრისაგან ისევ ცოცხალი, დაკარგულისაგან ისევ ნაპოვნი. რადგან ნათქვამია ლუკას სახარების მე-15 თავში: „ძე ესე ჩემი მომკუდარ იყო და განცოცხლდა, წარწყმედილ იყო და იპოვა“.<sup>2</sup>

ამბობს ღმერთი ისაია წინასწარმეტყველის წიგნის პირველ თავში: „განიბანებით, წმიდა იქმნებით, მოსპენით უკეთურებანი სულთაგან თქვენთა წინაშე თვალთა ჩემთა, დასცხერით ბოროტთაგან თქვენთა. და მოვედით და შევიტყუნეთ, – იტყვს უფალი, – და უკეთუ იყვნენ ცოდვანი თქვენნი, ვითარცა ლებილნი, ვითარცა თოვლი განვასპეტაკო. ხოლო უკეთუ იყვნენ, ვითარცა მოწეულნი მეწამულნი, ვითარცა მატყლი განვასპეტაკო“.<sup>2</sup>

დაუფიქრდით, გთხოვთ, მთელი გონებით და გაიგეთ ეს სიტყვები, რომლებსაც გვეუბნება ღმერთი ისაია წინასწარმეტყველის პირით: „განიბანეთ და განიწმიდეთ“, რადგან არ ამბობს მხოლოდ განიბანეთო ამ უბრალო წყლით, რომელსაც ვსვავთ და ყოველდღიურად ვხმარობთ, რომელსაც მხოლოდ ადამიანის კანის დაბანა შეუძლია, არამედ ამბობს განიბანეთ და განიწმიდეთ თქვენი ცოდვებისაგან წმინდა სინანულის წყლითა და ცრემლებითო. ასევე გვეუბნება: „ავი საქმეები თვალთაგან განმარიდეთ, შეწყვიტეთ ბოროტის ქმნა“, ანუ ეს ნიშნავს, რომ უნდა ვთქვათ ხოლმე აღსარება არა მხოლოდ ბაგეებით, არამედ გულით და იმ ფიქრით, რომ ამიერიდან აღარ უნდა შევცოდოთ, რადგან ღმერთი სრული თვალია და ყოვლისმხედველია, ის არ უყურებს მხოლოდ ბაგეებით ნათქვამს, რომლებიც ხორცის სამსახურისთვისაა შექმნილი, არამედ იყურება ადამიანის გულის სიღრმეში; რადგან ღმერთია, რომელიც განიკითხავს გულსა და თირკმელს, როგორც ამბობს დავით

---

წინასწარმეტყველი მე-7 ფსალმუნში, თუ არ შეინანებთ გულით და: „არა თუ მოიქცეთ, მახვლი მისი ლესულ არს, მშვლდსა მისსა გარდაუცუამს და განუმზადებდეს იგი; და მის თანა განუმზადებდეს ჭურნი სიკუდილისანი; ისარნი მისნი შესაწველთათჳს ქმნა.“<sup>2</sup> რადგან სინანული მაშინაა სინანული, როდესაც ადამიანი თავისივე ნებით, ყველანაირი ზეწოლის გარეშე მიდის მოძღვართან აღსარების სათქმელად შემუსვრილი გულით, თავმდაბლობით, მხურვალე ცრემლებით და მტკიცე გადაწყვეტილებით, რომ აღარ ჩაიდინოს ცოდვები, რადგან ესაა აღსარების საფუძველი. მხოლოდ ამის შემდეგ გვეუბნება ღმერთი: „მერე მოდიო და ცილობა ვყოთ“, ანუ მერე გვექნება კადნიერება მივიდეთ, გავხსნათ პირი და ვიჩვილოთ ეშმაკის წინამდღე იმ გაჭირვებისა და უბედურების გამო, რომელსაც ის ჩვენ გვმართებს. და ღმერთი გვპირდება, რომ ჩვენი ცოდვების დიდ სიწითლეებს, ანუ მკვლევლობების სისხლებს, ის განწმედს და განასპეტაკებს თოვლივით და მატყლივით, ისე როგორც ეს მოთხრობილია მარკოზის სახარების მე-9 თავში – განსპეტაკდა მაცხოვარი და მისი სამოსელი თაბორის მთაზეო.

ამიტომ ამაზე დიდი სიკითე და შენდობა განა რა შეიძლება არსებობდეს, რომ მონანული ადამიანები ხდებოდნენ წმიდა და სპეტაკნი, როგორც თავად მაცხოვრის სხეული, „რომელმაც უსჯულოება არ ქმნა და არც მზაკვრობა მოიპოვა პირსა მისსა“.

აჰა, მაშასადამე, როგორც უკვე გითხარით, სინანულის საიდუმლო ნათლისღების საიდუმლოსთან ტოლია ღირსებასა და ქმედებაში. რადგან, როგორც ერთი განბანს პიროვნებას პირვანდელი ცოდვისაგან და ქმნის მას ნეტარად, წმიდად, სრულყოფილად და მადლით ძედ ღვთისად, ასევე წმინდა სინანულიც დაღუპულ ადამიანს აცოცხლებს, დაკარგულ ადამიანს ხდის ნაპოვნს, უღირსს ხდის პატიოსნად და წმიდად და ურჩობის ძისაგან ღვთის ძედ ხდის.

---

როგორც ამბობენ ისტორიკოსნი, როდესაც ღმერთმა უბრძანა ნოეს, აეშენებინა კიდობანი, ის მას აკეთებდა ასი წლის განმავლობაში მხოლოდ იმ მიზეზისთვის, რომ ადამიანებს ჰქონოდათ დრო მოსულიყვნენ გონს და მოენანიებინათ თავიანთი ცოდვები. მთელი ამ ასი წლის განმავლობაში მართალი ნოე ქადაგებდა და აფრთხილებდა ხალხს, რომ ღმერთი მოავლენს წარღვნას, რომელიც დაფარავს მთელ დედამიწას და ყველა ცოცხალი არსება დაილუპება. მაგრამ ადამიანებს საერთოდ არ სჯეროდათ მისი, არამედ დასცინოდნენ და მასხრად იგდებდნენ მას, ამბობდნენ, რომ ნოეს თავად არ ესმოდა, რას ლაპარაკობს და რას აკეთებს. ასევე, როდესაც დაიწყო წვიმა, ღმერთს შეეძლო ერთ დღეშივე დაემთავრებინა ყველაფერი, მაგრამ არ მოინდომა, არამედ 40 დღისა და 40 ღამის განმავლობაში აწვიმა და ამით აჩვენა თავისი დიდი მოთმინება, რადგან ადამიანებს კიდევ აძლევდა სინანულის დროს, მაგრამ სამწუხაროდ, არც ასეთნაირად მოვიდნენ გონზე. ხოლო უკვე გვიან, როდესაც დაინახეს ადამიანებმა, რომ წყალი მატულობდა და არ ჩერდებოდა, დაიწყეს სახლის სახურავებზე, ბორცვებზე, ხეებზე და მთებზე ასვლა, მაგრამ უკვე აღარაფერი შველოდა. რადგან ღმერთმა ჩაკეტა კიდობანი გარედან და გასაღებიც თვითონ შეინახა, ამიტომაც გარეთ დარჩენილთათვის აღარ იყო გადარჩენის არცერთი საშუალება და დაილუპა ყველა ცოცხალი არსება, ადამიანიც და ცხოველიც.

ასევე ჩვენც, ქრისტიანებს, 100 წელი კი არა, არამედ უკვე 1710 წელია გვექადაგება მართალი ნოეს მიერ იესო ქრისტე, რომელმაც თავისი სხეულის კიდობნით გვაცხოვნა პირვანდელი ცოდვისაგან. გვექადაგება, რომ მოვა წარღვნა სამინელი და მწარე, წარღვნა სავსე მწუხარებითა და ტკივილით, წარღვნა უკანასკნელი და სამინელი სამსჯავროსი. და თუ არ მოვალთ გონზე, არ მივატოვებთ ბოროტებას და თუ არ მოვინანიებთ, სამუდამოდ ჩავიძირებით ჩაუქრობელი ცეცხლის უფსკრულში.

---

და ეს ამბავი მუდმივად გვეუწყება ეკლესიის პირით, სახარების ქადაგებითა და მოძღვრების სწავლებით, მაგრამ მაინც ვერ მოვდივართ გონზე, რომ მოვინანოთ და შევეშვათ ბოროტ საქმეებს. ვხედავთ რა, რომ იმატებს ჩვენი წარწყმედის წარღვნის წყალი, არ ვჩქარობთ ჩვენს გადასარჩენად გავიქცეთ სინანულის კიდობნისკენ. ამიტომ ჩვენ უფრო მეტად ვეცემით ბუნებით და ვფიქრობთ, რომ არც დღეს, არც ხვალ და არც ზეგ არაფერი დაგვემართება, სანამ მოულოდნელად არ მოვა ჟამი და არ წარვწყმდებით სულითა და ხორციით.

შეგიძლიათ დარწმუნდეთ ჩემი აქამდე ნათქვამი სიტყვების სისწორეში იქიდან, რასაც ახლა გეტყვით: ვინც ვართ ჩვენ ახლა შეკრებილები ამ ტაძარში, რაც დაიწყო ეს წმინდა და დიდი მარხვა პირველივე კვირიდანვე, ვაღიაროთ: ვთქვით რომელიმე აღსარება ისე, როგორც ეს საჭიროა? შევასრულეთ რომელიმე სიყვარულით სინანულის კანონი, რომელიც დაგვადო მოძღვარმა? შეძლებისდაგვარად დავიცავით რომელიმე თავი წმიდად და უბიწოდ? გავატარეთ ქრისტიანულად ეს დღეები ეკლესიური წესითა და კანონით, მარხვით, ლოცვითა და სიკეთის ქმედებით? მე მგონი, რომ ეს ყველაფერი არცერთმა არ შევასრულეთ; მაგრამ, რომ არ გამოვჩნდე მატყუარა, ვუშვებ, რომ შეიძლება ეს ყველაფერი შეესრულებინა რომელიმე უბრალო ადამიანს. ხოლო ჩვენ, რომლებიც თავს წარმოვაჩენთ სხვებზე მეტად პატივცემულებად, ღირსეულებად, ბრძენებად და მცოდნეებად, სულ გადავდეთ ეკლესიაში მოსვლა კვირიდან კვირამდე და დროს ვატარებდით ნაირ-ნაირი საჭმელებისა და სასმელების მირთმევით და ჩვენი ხორცების ყველანაირი სურვილების დაკმაყოფილებით; ხოლო ჩვენი სულებისთვის არანაირად არ გვიზრუნავს, თითქოსდა უსინდისოები ვიყოთ. და მხოლოდ ამ ბოლო კვირას ვაბარებთ აღსარებას, რომ შევინახოთ მარხვა სამი დღე და ვეზიაროთ დიდ ხუთშაბათს. მაგრამ რა აღსარებას ვაბარებთ ხოლმე, მხოლოდ ღმერთმა იცის, მრცხვენია კიდევაც ამისი თქმა.



---

ზოგიერთები აღსარებას ამბობენ რაიმე ცუდი შემთხვევის შიშის გამო, სხვები უბრალოდ ტრადიციის გამო, სხვები მხოლოდ ადამიანური სირცხვილის გამო, სხვები ბატონების შიშით. ზოგს ორ-ორი მოძღვარი ჰყავს, ერთი სოფელში და მეორე ქალაქში; სოფელს მღვდელს, როგორც უბრალო ადამიანს ეუბნება, როგორც თვითონ თვლის, მძიმე ცოდვებს, ხოლო ქალაქელ მღვდელს ეუბნება თავისი ჭკუით მსუბუქ ცოდვებს და ასეთნაირად რეალურად ვაჭრობს და ცბიერობს აღსარებაში.

და მოკლედ რომ ვთქვათ, არცერთ ჩვენგანს არ უნდა კეთილი ნებით, ღვთისმოსაობითა და სრული გონებით აღსარების თქმა, რომ მივატოვოთ ცოდვები, არამედ მხოლოდ ხალხის დასანახად იმ მიზეზებისთვის, რაც უკვე გითხარით, რომ მხოლოდ ვეზიაროთ და მერე მაპატიეთ, როგორც ძაღლები, ვუბრუნდებით ხოლმე ჩვენივე ნარწყევს, როგორც დედა-ლორები, ვუბრუნდებით ჩვენივე სიბინძურესა და სიმყრალეს, როგორც ამას ამბობს მოციქულთა თავი პეტრე თავის მეორე კათოლიკე ეპისტოლეს მეორე თავში. ნაჩქარევად ვამბობთ აღსარებას, ნაჩქარევად ვეზიარებით და ასევე ნაჩქარევად ვუბრუნდებით ჩვენს ჩვეულ ცოდვებს, თანაც ისეთი სიხარულითა და ბედნიერებით ჩავდივართ მათ და თანაც ვტრიაბახობთ ამით, თითქოსდა დიდ სიკეთესა და სიმდიდრეს ვიგებდეთ, როგორც ამბობს ამის შესახებ დავით წინასწარმეტყველი: „რამეთუ იქებინ თავით თვისით ცოდვილი გულის თქმათა შინა სულისა თვისისათა, და უღმრთონი იკურთხევიან“.<sup>2</sup>

და ამ ტყუილი აღსარების დროს რას ვაკეთებთ? ვეძებთ ძალიან უბრალო მოძღვარს, რომ მას აქეთ ეშინოდეს და რცხვენოდეს ჩვენი და როგორც მას ვატყუებთ, ასე გვგონია, რომ ღმერთსაც მოვატყუებთ. მაგრამ ღმერთს ვერ მოვატყუებთ, არამედ ჩვენ თვითონ ვიტყუებთ საკუთარ თავს ჩვენივე სულების წარსაწყმედად.

და როდესაც მივდივართ აღსარებაზე, მოძღვარს არ ვეუბნებით, რომ ვჭამთ ჩვენი ქრისტიანი მოყვასის ხორცსა და მისი შრომის ნაყოფს; არ

---

ვეუბნებით, რომ ნაყოფანებითა და გაუმადლობით ვსვამთ მის სისხლსა და მისი მძიმე შრომით ჩამოწურულ ოფლს, არამედ ვამბობთ იმას, რომ ბატონის სუფრაზე ოთხშაბათსა და პარასკევს ვჭამეთ თევზი, ხოლო დიდ მარხვაში მივირთვით კიბორჩხალა, ღვინო და ზეთი.

არ ვამბობთ, რომ გულებში შურის შვიდთავიანი გველუმაპი გვყავს დაბუდებული, რომელიც მუდმივად გვიჭამს ღვიძლს, როგორც ჟანგი რკინას და როგორც ჭია ხეს, არამედ ვამბობთ, ვითომ არავისთვის არაფერი დაგვიშავებია.

არ ვამბობთ აღსარებაში უკუღმართობებს, ცილისწამებებს, ჩადენილ ბოროტებებს, პირფერობებს, დასმენებს, ღალატს, რომლებსაც მუდმივად ჩავდივართ ერთიმეორის მიმართ. და ამ დროს თავს ვიმართლებთ იმით, რომ ვერ ვიღებთ მოწყალებას, ვითომ არა გვაქვს ხელის შეწყობა ცხოვრებაში, ჩვენ თვითონ გვიჭირს, გვაქვს ბევრი გადასახადი, სახლი გასაკეთებელი, გვყავს ბევრი შვილი და სხვა ადამიანები, რომლებსაც ვინახავთ.

არ ვამბობთ, რომ ჩვენ ჩვენი მსახურების ტყუილებისა უფრო მეტად გვჯერა, ვიდრე გაჭირვებული ადამიანის სიმართლის, რომელსაც, რომც დაიფიცოს, არ ვამართლებთ, არამედ ისეთი სისასტიკით ვსჯით, რომ შეგვეძლოს, საერთოდ გავაქრობდით ამ ქვეყნიდან. ამ დროს თავს ვიმართლებთ, რომ ამ მძიმე ცხოვრების ტალღების ქვეშ ვითომ არ გვაქვს დრო, ვიზრუნოთ ჩვენს სულებზე და მხოლოდ ათასში ერთხელ გადავიხდით ხოლმე ერთ ორმოცდდიან მოსახსენებელს და ისიც მოპარული, და არაპატიოსნად ნაშოვნნი ფულით.

არ ვამბობთ აღსარებაში, რომ როდესაც ვხედავთ ვინმეს, ვინც გაჭირვებულს ავიწროებს, აყაჩაღებს და უსამართლოდ ექცევა, ჩვენ მას ვაქებთ და ვამბობთ, რომ ეს ადამიანი მართალი, ბრძენი, ჭკვიანი და სამართლიანიაო. ხოლო ვინც არ ერევა მსგავს უსამართლობებში, იმას ვწყევლით, ვამბობთ, რომ სულელია, უღირსი და გონება ნაკლული საიმისოდ, რომ ქნას სამართალი და

---

სამართლიანობა. ამ დროს გვავიწყდება ისაია წინასწარმეტყველის მიერ ნათქვამი სიტყვები 64-ე თავში: „ჩვენი უწმინდურობის გამო ჩვენი სიმართლე ღვთის წინაშე, როგორც ქალის გამოსაცვლელი ტილოები, მყრალია“.<sup>2</sup> და რომ არ გამიგრძელდეს საუბარი, მოკლედ ვიტყვი, იმ ბოროტებებისთვის, რომლებსაც ჩავდივართ ჩვენი სურვილისამებრ, ვპოულობთ დროსაც და საშუალებებს, ხოლო სულის სასარგებლო საქმეებისთვის ვერ ვპოულობთ ხოლმე დროს.

ამიტომაც, ჩემო საყვარელო მსმენელებო, გთხოვთ იესო ქრისტეს სახელით, რომელმაც ეშმაკის მონობისაგან ჩვენს გამოსასყიდად ჯვარზე დასთხია თავისი უძვირფასესი სისხლი, მოვიდეთ გონზე და მივხვდეთ, რომ რასაც ჩავდივართ, დაღუპვის გზაზე მივყავართ. და იმ დროს, როდესაც ჯერ თავი არ დაგვინებებია ჩვენი ბოროტი ჩვევებისთვის, ვიშრომით ხოლმე ღვთის ვენახში ჩვენი სულების საცხონებლად დიდი მარხვის პირველი ჟამიდან, ან თუნდაც მეთერთმეტე ჟამიდან, როგორც ახლაა. ხოლო მოწყალე და კაცთმოყვარე ღმერთი მოგვცემს სრულ საზღაურს, რომელსაც შვენის ყოველი დიდება, პატივი და თაყვანისცემა, აწ და მარადის და უკუნითი უკუნისამდე. ამინ!

## ქადაგება №17

### ქადაგება ყველიერის კვირიაკეზე

თითოეული მონადირე იმზადებს იარაღს თავისი ხელობის შესაბამისად. ანუ ის, ვინც ფრინველებზე ნადირობს, იმზადებს ბადეებს, თოკებსა და გალიებს, ხოლო გარეულ ცხოველებზე მონადირე იმზადებს თოფს, რკინის ხაფანგებს, თხრის ორმოებს და სხვა მსგავს. ასევე მეთევზეც იმზადებს ანკესებს, კაუჭებს, ბადეებს და ყველაფერს, რაც სჭირდება მის ხელობასა და

---

საქმეს. ხოლო ვისაც უნდა მოინადიროს ადამიანები, როგორ ფიქრობთ, რა იარაღები უნდა გამოიყენოს? (რადგან ადამიანების მონადირეობაცა და დაჭერაც შესაძლებელია, როგორც ამას ამბობს მაცხოვარი იესო ქრისტე მათეს სახარების მე-4 თავში: ”მოვედით და შემომიდეგით მე, და გყვნი თქვენ მესათხევლე კაცთა“.<sup>2</sup>)

არ მგონია, რომ ადამიანების მონადირეობა შესაძლებელი იყოს სხვა რამეთი, გარდა სიტყვითა და სწავლებით. რადგან არ მგონია, რომ ადამიანებისთვის მეტად ძლიერი და მყარი ბაღე და კაუჭი არსებობდეს, ვიდრე ღვთის სიტყვებით დაწესებული მოძღვრება, რომელიც იჭერს ადამიანებს და სამარადისოდ აერთიანებს მათ ღმერთთან! მარჯვნივ და მარცხნივ გასროლილი სწავლების ეს ბაღე, როდესაც გაივსება ნადავლით, არის დიდი მადლისა და სიხარულის მომტანი როგორც ამქვეყნიურ ცხოვრებაში, ასევე მომავალშიც.

ეს ღვთაებრივი სიტყვების კაუჭი და სულიწმინდის მადლი იჭერს ადამიანს მისი ცოდვების სიღრმეში, ისევე როგორც თევზის დაჭერა ხდება წყალში და გამოყავს ადამიანი ღვთის ცნობიერების ნათელზე. მამასადაამე, კურთხეულნი ქრისტიანნი, რომელნიც შეიკრიბეთ დღეს ამ ტაძარში, მე, როგორც ღვთის მიერ დადგენილ უღირს სულიერ მეთევზეს, მაქვს ვალდებულება გავშალო დამოძღვრების ბაღე და ასევე ვისროლო სიტყვის კაუჭი და ღვთის იმედით დარწმუნებული ვარ ცოდვების სიღრმიდან ამოვიღებ დიდ ნადავლს, რადგან ვიცი თქვენი გულების კეთილი განწყობა და სიყვარული. სიყვარული სულიერი სიტყვების მოსმენის მიმართ და ამ ნადავლით ღმერთს გავუშლით დიდ და მისთვის მოსაწონ სუფრას. რადგან ღმერთს იმაზე მეტად არაფერი არ უხარის, როგორც ის, როდესაც ცოდვილი ადამიანი სინანულით დაუბრუნდება ღმერთს, როგორც ნათქვამია ეს წმინდა სახარებაში: “დიდი სიხარული იქნება ზეცაში ერთი ცოდვილისთვის, რომელიც სინანულისკენ მოიქცევა”;<sup>2</sup> ასევე წინასწარმეტყველი ამბობს: “ნებით არა მნებავს სიკვდილი ცოდვილისა, არამედ მოქცევა მისი, რათა იყოს ცოცხალი....”

ამიტომაც გთხოვთ, გახსენით თქვენი გულების სასმენელნი და მოისმინეთ ჩემი სიტყვები, რომ თქვენც და მეც ვისარგებლოთ სულიერად. რადგან პავლე მოციქული ამბობს, “ნეტარ არიან ვისი მეტყველებაც შესმენილ იქნება”; ხოლო შემდეგ მოსმენილი სიტყვებიდან უნდა გამოიღოთ სულიერი

---

ნაყოფი, რომ ქადაგების მოსმენა და ღვაწლი არ დარჩეს უაზროდ და უნაყოფოდ. რადგან თქვენც თუ აღმოჩნდებით, როგორც უნაყოფო ხეები და ვენახი მტევნების გარეშე, რა აზრი ექნება თქვენს აქ ყოფნას?

აჰა, დადგა ჟამი და ღვთის წყალობით, ხვალიდან ვიწყებთ მოგზაურობას წმინდა მარხვაში და რადგან გვიწევს ჩვენი სულების მტრის წინააღმდეგ ომში წასვლა, უნდა მოვემზადოთ, როგორც ქრისტეს მამაცი მეომრები. და როგორც ამბობს პავლე მოციქული: ფეხზე ჩავიცვათ სახარების ქადაგებისათვის, შევიმოსოთ სამართლის დღეს, დავიფაროთ ცხონების მუზარადი, ჩვენს ხელთ ავიღოთ სარწმუნოების სადავეები, რომლითაც შევძლებთ სიცოცხლის ცეცხლოვანი ისრების მოგერიებას, ასევე ავიღოთ სულის მახვილი, რომელიც ღვთის ქადაგებაა. რადგან ჩვენი ბრძოლა არ არის სისხლისა და ხორცის წინააღმდეგ, არამედ ამა სოფლის წყვდიადის ძალთა წინააღმდეგ, იმ სულების წინააღმდეგ, რომელნიც ცის ქვეშეთში არიან.

და ყველამ, ვინც ვართ, ზრდასრულებმა თუ მცირეწლოვნებმა, მამაკაცებმა თუ ქალებმა, ვაჟებმა თუ გოგონებმა, მოხუცებმა და ახალგაზრდებმა, დაოჯახებულებმა თუ დასაოჯახებლებმა, შევასრულოთ სამი რამ: პირველი-- ყველანი მივიდეთ ჩვენს მოძღვრებთან, და დიდი პასუხისმგებლობითა და შემუსვრილი გულით, ვაღიაროთ ჩვენი ცოდვები, დაუფარავად და ყველანაირი შიშის გარეშე. უნდა ვთქვათ ყველაფერი, რაც ჩავგიდენია სიტყვით თუ საქმით, გინდა გონებით, ნებსით თუ უნებლიეთ, ცოდნით თუ უცოდინარობით, რადგან აღსარება არის ერთ-ერთი შვიდთაგან საიდუმლო და როდესაც ვამბობთ აღსარებას, მღვდელს კი არა, არამედ უშუალოდ ღმერთს (ვაბარებთ მას. რედ.შენ.).

მაგრამ შეიძლება ვინმემ გაიფიქროს, თუ ღმერთს ვაბარებთ აღსარებას, მღვდელი რაღაში გვჭირდება, რადგან ისიც ჩემსავით ცოდვილია? მართალია, ცოდვილია შენსავით, მაგრამ ღვთის მადლითა და სულიწმინდის ქმედებით მაცხოვარ იესო ქრისტესგან აქვს ძალა, რასაც შეკრავს ან გახსნის დედამიწაზე, ის იქნება გახსნილი ან შეკრული ზეცაშიც. როგორც ეს ნათქვამია იოანეს სახარების მეოცე თავში... ” უკუეთუ ვიეთნიმე მიუტევნეთ ცოდვანი, მიეტევნენ მათ; და უკუეთუ ვიეთნიმე შეიპყრნეთ, შეპყრობილ იყვნენ.”<sup>2</sup>

---

და არა მხოლოდ საერონი უნდა აზარებდნენ აღსარებას, არამედ უფრო მეტად სასულიერო დასიც, ანუ დიაკვნები, მღვდლები, ბერები და მღვდელმთავრები. რადგან ჩვენ ვართ ღვთის წინაშე უფრო ცოდვილნი და დამნაშავენი, ვიდრე უბრალო ხალხი; და რა ცოდვებსაც ჩვენ ჩავდივართ, ძირითადად ცოდნით ჩავდივართ და თუ არ მოვინანიებთ, უფრო მეტ სასჯელს მივიღებთ, ვიდრე ისინი, ვინც უცოდინარობით სჩადის ცოდვებს, როგორც ეს არის ნათქვამი ლუკა სახარების მეთორმეტე თავში ”რამეთუ ყოველსა, რომელსა მიეცა დიდად, დიდადცა იძიოს მისგან და რომელსა მიეცა ფრიად, უმეტესი მოჰხადოს მას.”<sup>2</sup>

და ეს აღსარების საიდუმლო ღვთის მიერ იმიტომ დაწესდა, რომ ადამიანი, რომელიც მიდის და სხვა ადამიანთან სჩადის ცოდვას( მაგალითად, მეძავთან, იშიშვლებს თავის სირცხვილს და ასეთნაირად უერთდება ეშმაკს და იბილწავს სხეულს), ისევ ადამიანთან უნდა მივიდეს ანუ მოძღვართან და აღიაროს ყველა თავისი ცოდვა. რადგან ცოდვა მან ადამიანის მეშვეობით ჩაიდინა, ამიტომ ის ცოდვა ადამიანისვე მეშვეობით უნდა განადგურდეს, როგორც ქრისტემ გააკეთა ეს ჩვენთან; რადგან ჩვენ ადამიანის ანუ ადამის გამო დავკარგეთ სასუფეველი და ისევ ადამიანის ანუ ქრისტეს წყალობით ჩვენ დავიბრუნეთ ის. რომც არ აღიარო ღვთის წინაშე შენი ცოდვები, მან მაინც ყველაფერი იცის. რადგან მასთან არის ყველაფერი დაწერილი, რაც ჩავგიდენია და რაც არა. განა არ იცოდა ღმერთმა, სად იყო ადამი, როდესაც ის დაემალა მას ცოდვის ჩადენის შემდეგ? ღმერთი კითხულობდა: “ადამ სად ხარ?”<sup>2</sup> და ამით მოუწოდებდა მას სინანულისკენ, რომ მას ეთქვა: “უფალო, შევცოდე, და დავარღვიე შენი მცნება და განვიძარცვე შენი მადლისაგან, ამიტომ მრცხვენის დავდგე შენ წინაშე და დავიმალე” (მაგრამ სად დაიმალეები ღვთის წინაშე, ჰოი, საწყალო, რადგან: ზეცაში თუ აფრინდები, მანდაა მისი სამკვიდრებელი; ჯოჯოხეთში რომ ჩახვიდე, მისი პირი იქაცაა; ზღვის კიდეზე რომ დაიმალო, იქაც მიუწვდის მას ხელი).

მაგრამ ადამმა ვერ მოიფიქრა, რომ ასეთი პასუხი გაეცა და რაც თქვა, იმან სარგებლობა არ მოუტანა არაფერში, რადგან არ მოუნანიებია. განა აბელის მკვლელობის შესახებ არ იცოდა ღმერთმა? და ასევე ღმერთმა მოუწოდა კაენს სინანულისკენ: “სად არის შენი ძმა აბელი?” მაგრამ არც მან მოინდომა დანაშაულის აღიარება, არამედ როგორც დაწყევლილმა ,ისე

---

უპასუხა, “განა ვარ მე მცველი ძმისა ჩემისა?” და ასეთივე პასუხი მიიღო -- წყევლა.

და როდესაც ქრისტე დედამიწაზე იყო, ის ეუბნებოდა თავის მოციქულებს: “ვინც მალიარებს ადამიანთა წინაშე, მეც ვალიარებ მას მამისა ჩემისა წინაშე: ხოლო ვინც უარმყოფს ადამიანთა წინაშე, მეც უარვყოფ მას, მამისა ჩემისა წინაშე.”<sup>2</sup>

ამ სიტყვებში ჩანს : ღმერთს მარტო ის კი არ უნდა, რომ მას ვალიარებდეთ ადამიანთა წინაშე, არამედ ვალიარებდეთ, რომ ვართ ცოდვილები ღვთის წინაშე, რომ ასეთნაირად ღმერთმა შეგვინდოს ჩვენი ცოდვები.

და როდესაც ვამბობთ აღსარებას, არ უნდა გვრცხვენოდეს და არ უნდა დავმალეთ რაიმე მცირე ცოდვაც კი, რადგან ასეთნაირად ვერ მივიღებთ ვერანაირ სარგებელს. ჩვენ წმინდა მამების წიგნებიდან ვიცით, რომ ბევრი ადამიანი, რომელსაც არ უთქვამს ყველა ცოდვა მოძღვართან, ჯოჯოხეთში დაისაჯა. და რომ ჩვენც ასევე არ დავისაჯოთ, ყველაფერი სრულად უნდა ვალიაროთ, რათა შენდობაც ასევე სრულად მივიღოთ. ასევე, აღსარების შემდეგ, რა კანონსაც მოგვცემს ჩვენი მოძღვარი, უნდა მივიღოთ ის დიდი სიყვარულით და სრულად უნდა შევასრულოთ. როგორც კაცს, რომელსაც აქვს ვინმეს მიმართ ვალი, ვერ გადარჩება, სანამ მას სრულად არ გაისტუმრებს, ასევე აღმსარებელიც, რომელსაც მიღებული აქვს მოძღვრისაგან კანონი, ვერ ცხონდება, სანამ არ შეასრულებს მას. ამიტომაც მთელი ძალითა და ღონით დავიზღვიოთ თავი ცოდვის ჩადენისაგან.

მეორე-- რაც აუცილებელია, უნდა ვიმარხულოთ, რადგან მარხვა არის წლის მეთედი ღმერთისთვის შესაწირი და მარხვის მაგალითი გვიჩვენა იესო ქრისტემ, რომელმაც იმარხულა ორმოცი დღე და ღამე, როგორც ნათქვამია ეს ლუკას სახარების მე-4 თავში, მაგრამ მარხვა უნდა იყოს ლოცვასთან შეერთებული, რადგან როგორც საჭმელი არ არის გემრიელი მარილის გარეშე, ასევე არც მარხვა ლოცვის გარეშე.

როგორც ამბობს წმინდა ბასილი დიდი მარხვის შესახებ მეორე ქადაგებაში, რომელიც მოგვეპოვება მის პირველ წიგნში, ყველა ეკლესიაში ანგელოზები იწერენ, ვინც მარხულობს. ასევე ჩვენც შევეცადოთ, რომ მცირე

---

გემრიელი საჭმლის გულისათვის, არ დაგვკარგოთ ჩვენი ადგილი ანგელოზების სიაში.

ასევე წმინდა გრიგოლიც აღნიშნავს მარხვის დაწყებაზე ქადაგებაში, რომელიც წერია მის მეორე წიგნში, მარხვა არის სულისა და ხორცის მშვიდობა, აუღელვებელი და კეთილი ცხოვრება, ცხოვრება, რომელიც ახარებს ღმერთს და მწუხარედ ხდის ეშმაკს. როგორც მარხულ ადამიანებს იცავენ ხოლმე განსაცდლებისგან კეთილი ანგელოზები, ასევე იმათ, ვინც არ მარხულობს თავზე ადგანან ეშმაკები, რომლებიც ცოდვისაკენ უბიძგებენ.

ამიტომაც უნდა ვიმარხულოთ, რათა არ გავხდეთ ეშმაკთა თანაზიარნი; არავინ გამხდარა მცოდნე და ბრძენი, ვინც ცხოვრება გაატარა საჭმელებით განცხრომაში, არც სათნოების მოწაფე გამხდარა, ვინც გართობებზე დაიარებოდა, არც წმინდანი გამხდარა უწმინდურობის მოყვარული, არც ხორციელად მცხოვრები გამხდარა ცათა სასუფეველის თანაზიარი.

ამიტომაც ყველა მორწმუნე და ღვთის მოყვარე ადამიანი სიხარულით, მხიარულებით შეუდგეს მარხვას, რადგან ბრძოლისა და განსაცდლის პირისპირ ვერვინ იქნება მამაცი, თუ იქნება მწუხარე, მწუხარე, როგორც ბავშვი, რომელიც მიჰყავთ სკოლაში; ნუ წუწუნებ წმინდა დღეების გამო, ნუ ითრგუნები კვირის ბოლოს, ისევე როგორც ზაფხულის მოსვლა თრგუნავს ზამთარს; ჰურიებივით ნუ გამოიყენებ შაბათს ლოთობისათვის, ნუ ითვლი მარხვის დღეებს, როგორც ითვლის ხოლმე ბოროტი მუშა შრომის ანაზღაურებას; ნუ ხარ მწუხარე იმის გამო, რომ შენს სამზარეულოში ცეცხლი არ ანთია და რომ შენი მზარეული არ დგას ღუმელთან.

მრცხვენია, კიდევაც ვილაპარაკო გემოთმოყვარეების მწუხარების შესახებ, როგორ იტანჯებიან ხოლმე მარხვის დღეებში, ხშირად ამთქნარებენ, წვებიან საწოლში მცირე ხნით და შემდეგ ისევ ფეხზე დგებიან. ძალით იძინებენ და ცდილობენ ისე გაატარონ მარხვის დღეები, რომ ვერც შეამჩნიონ. უბრაზდებიან მზეს, რომ სწრაფად არ ჩადის და რომ მალევე არ დგება ღამე; მარხვის დღეები ეჩვენებათ ბევრად უფრო ხანგრძლივი, ვიდრე ჩვეულებრივი დღეები. ჩივიან თითქოსდა სტკივათ მუცელი, აქვთ თავბრუსხვევა და კუჭის აშლილობა, რაც რეალურად მარხვის მიზეზი კი არ არის, არამედ გაუმადლობის. უმადოდ მიუსხდებიან სამარხვო სუფრას, ლანძღავენ და



---

აგინებენ კომბოსტოსა და სხვა ბოსტნეულს და ამბობენ, რომ “მცენარეული საკვები უაზროდ შეიქმნა ამ ქვეყანაზე”. ასევე გემოთმოყვარე ხალხს ახასიათებთ წყლის უზომოდ სმა, თითქოსდა სამკურნალო მწარე წამალს იღებენ და უნდა ჩაიტანონ სიმწარე. ზოგიერთები კი მადას სპირტიანი სასმელებით იკმაყოფილებენ: ბრაგით, ლუდით, შერბეთით, მეოდითა და ლივეჭით.

ნუ აღრევ მარხვას შენს გემოთმოყვარე სურვილებთან, რადგან არ დარჩები დაუსჯელი. საბაბად ნუ იგონებ არარსებულ სნეულებებს. ცილს ნუ სწამებ მარხვას, თითქოს და ავადმყოფობის მომტანი იყოს. პირიქით, მარხვა საჯანმრთელოა. ხოლო შენი ბოროტი ჩვევების გამო მარხვა მტრად გეჩვენება, არადა ასე არ არის. რა თქმა უნდა, ძნელია, მაგრამ მიაჩვიე შენი თავი მარხვას და დროთა განმავლობაში გაგიადვილდება და სამკურნალოც გახდება შენთვის. მაგრამ თუ მუდმივად შენ თვალწინ გეჩნება არა სამარხო საჭმელები და სასმელები, ასეთნაირად ვერასდროს შეიძენ სიყვარულს მარხვის მიმართ, არამედ ყოველთვის ის მოგეჩვენება უცხოდ და მძიმედ. მარხული ცხოვრება ემსგავსება მომავალ უხრწნელ და მარადიულ ცხოვრებას. მაშასადამე, გავექცეთ გემოთმოყვარეობას, რაც შეგვიძლია, რადგან შეუძლებელია, რომ ადამიანი იყოს იმავდროულად გემოთმოყვარე და ღვთის მოყვარეც.

როდესაც მარხულობთ, არ უნდა იმარხულოთ მხოლოდ საჭმლით, არამედ უმთავრესად თავი უნდა შევიკავოთ ბოროტი საქმეებისაგან; ვიზიანებთ სულს, როდესაც ვიწყევლებით, ვგმობთ, გვშურს, ცილს ვწამებთ, ვმრისხანებთ, ამბები მიგვაქვს ერთი მეორის შესახებ, რის გაკეთებაც ძალიან ხშირად გჩვევიათ. აი, ასეთნაირად თქვენ სულიერად ცარიელდებით. მსგავსი რამ მხოლოდ ეშმაკს უყვარს, რომელიც კაცთა ნათესავის მტერია. კიდევ ვის აქვს ეს ჩვევა, რომ თავისი მოყვასი დაასმინოს, ქრისტიანს, რადგან მას ბოროტი შთააგონებს, რომ ჩადიოდეს ამ ცოდვას და ასეთნაირად დაილუპოს სული. ყველა ცოდვა, რომელსაც ადამიანი აღსარებაში იტყვის და მას შემდეგ, რაც შეასრულებს მოძღვრის მიერ მოცემულ კანონს, ადამიანს მიეტევება, მაგრამ მას არაფრით არ მიეტევება დასმენის ცოდვა, რადგან მკვლელობაზე უფრო დიდი ცოდვაა.

თქვენც მოძღვრებო, გაძლევთ ლოცვა-კურთხევას, როდესაც ვინმე აღსარებაში გეტყვით, რომ ჩაუდენია დასმენის ცოდვა, თუ მთელი გულით

---

ადამიანი იტყვის, რომ აღარ ჩაიდენს ამ ცოდვას, მხოლოდ ამ შემთხვევაში მიეცით ამას შენდობა, თან მიეცით სინანულის კანონი და მხოლოდ ამის შემდეგ აზიარეთ. მაგრამ თუ არ შეეშვება ამ ცოდვას, არც თუ მხოლოდ ზიარებისგან დააყენეთ, არამედ ეკლესიაშიც არ მიიღოთ, რადგან ეს ადამიანი არის ღვთის წინააღმდეგი და ემსგავსება ეშმაკს.

მესამე --რაც უნდა გავაკეთოთ ყველამ, არის ის, რომ მოწყალეობა უნდა გავიღოთ. ახლა რომ მოისმინეთ ეს ჩემი სიტყვა, ზოგიერთმა შეიძლება გაიფიქრა თავის გულში: “მაგრამ ჩვენ თვითონ ვართ ღარიბები და გაჭირვებულები, არ გვაქვს ფული და როგორ შეგვიძლია მოწყალეობის გაღება?” მოწყალეობა მრავალი სახისაა და მათგან რომელზეც მიგიწვდება ხელი, ის გააკეთე. როგორც ეს ნათქვამია მათეს სახარების 12 თავის 36-ე მუხლში: “რამეთუ მშობიარე და მეცით მე ჭამადი; მწყუროდა, და მასუთ მე; შიშუელ ვიყავ, და შემმოსეთ მე, სნეულ ვიყავ და მოხედეთ მე; საპყრობილეს ვიყავ, და მოხუდით ჩემდა”.<sup>2</sup> ამის გარდა მოწყალეობის სხვა სახეებიც არსებობს: თუ დაარწმუნებ ვინმეს, რომ გააკეთოს კეთილი საქმე, ესეც მოწყალეობაა; თუ ურჩევ ვინმეს, სულიერად იცხოვროს, ესეც მოწყალეობაა; თუ სიტყვებით ანუგეშებ ვინმე მწუხარე ადამიანის გულს, ესეც მოწყალეობაა; და მოკლედ რომ ვთქვათ, ქრისტეს სახელით თუ მიაწვდი ვინმეს ცივი წყლის ერთ ჭიქას, იცოდე არ დაგეკარგება შენ შენი საზღაური, როგორც ეს არის ნათქვამი მარკოზის სახარების მე-9 თავში.<sup>2</sup>

აჰა, როგორც ხედავთ, შესაძლებელია მოწყალეობის გაღება ფულის გარეშეც, ამის მაგივრად ჩვენი დიდი ამპარტავნებით ჩვენ ვიმაღლებთ თავს და ვამაყოფთ და ცამდე აგვყავს ჩვენი თავი, თითქოს და არასოდეს მოვკვდებით, ვართ სავსენი სიხარბითა და გემოთმოყვარეობით და სრული ბოროტებისკენ ვართ მიდრეკილნი და ვერც ვჩერდებით. არც ღვთის სიტყვები გვაწყნარებს და არც ჯოჯოხეთის ტანჯვას მოვყავართ გონებაზე.

და აღარ ვიცი რაღა ვთქვა, ჩვენი მოვალეობის გამო, როდესაც ვეუბნები ადამიანებს სულისთვის სასარგებლო სიტყვებს, უმრავლესობა ჩენზე ბოროტად ლაპარაკობს: რაღა ეს გამოჩნდა, ყველაზე წესიერი და მცოდნე, რომ მოინდომა ჩვენი გამოსწორება. გვახსოვდეს, რომ ჩვენი წინაპრებიდან გადმოგველოცა ზნეობა და წესიერება და აქამდე ჯერ არავის არ უთქვამს, რომ ეს წესები არის ბოროტი და გასაუქმებელი.

---

ამიტომ მეც გეტყვით თქვენთვის გასაგები მაგალითით, რათა დაინახოთ, რას ემსგავსება თქვენი ლაპარაკი: ჭიას, რომელიც პირშუშხა ფესვსა ჭამს, ვინმემ რომ უთხრას: შეეშვას და სხვა მეტად ტკბილ ფესვებზე გადავიდეს, ის უპასუხებს, რომ პირშუშხაზე უფრო ტკბილი არაფერიაო, რადგან იქ დაიბადა და მის დღეში მხოლოდ ეს მცენარე აქვს გასინჯული. ასევე თქვენც, მიჩვეული რომ ხართ ამ თქვენი ცხოვრების წესსა და ქმედებებს და არავინ გყავდათ, რომ ესწავლებინა თქვენთვის სწორად ცხოვრება, ამიტომაც ჩემი სიტყვები ახლა გერჩვენებათ უჩვეულოდ და მწარედ. მაგრამ როდესაც ჩვენი გონებით დავიწყებთ ფიქრს, ჭეშმარიტ საქმეებს, როგორადაც გვასწავლის ფილოსოფოსი: შევიცნოთ ჩვენი თავი ანუ დავინახოთ, რა ვიყავით თავდაპირველად და რა ვართ ახლა და გარდაცვალების შემდეგ რა დაგვემართება. ეკლესიასტეს წიგნის მე-12 თავი გვასწავლის: ღმერთის გვეშინოდეს და მის მცნებებს ვასრულებდეთ, რადგან ასეა ადამიანი, ღმერთის სამსჯავო მოიტანს ყველაფერს წარსულიდან -სიკეთე იქნება ეს, თუ ბოროტება.<sup>2</sup>

და თუ ჩავწვდებით ამ სიტყვებს და თუ ისინი მიეკრობა თქვენს გულებს, მაშინ ვიცი, მიხვდებით, რომ ცუდს არაფერს გასწავლით და გირჩევთ, ხოლო უფრო მეტად ვადანაშაულებ მღვდლებს, რადგან, როგორც ამბობს მაცხოვარი იესო ქრისტე, ისინი არიან მიწის მარილი; თუ მარილი დაკარგავს თავის თვისებას, რითილა უნდა დამარილდეს? ანუ, როდესაც მღვდლები არიან უსწავლელნი და გამოუცდელნი, რასლა ასწავლიან ხალხს? რადგან პირველი და ყველაზე დიდი საფუძველი-- ღვთის შიში მათ თავად არ გააჩნიათ, რადგან საიდან უნდა ჰქონოდათ სიბრძნე, როგორც ამბობს დიდი სოლომონი: “დასაბამი სიბრძნისაი არს შიში უფლისაი”.<sup>2</sup>

და თუ არ მოვლენ გონს, არ გამოსწორდებიან და არ შეასრულებენ თავის მოვალეობას, დიდ სასჯელს მიიღებენ ღვთისგან. მაგრამ თქვენც ვალდებულნი ხართ მიხვიდეთ კარგ მოძღვართან, რომელიც არის ნასწავლი და ვინც სულისთვის სასარგებლოს გასწავლის და არ უნდა მიხვიდეთ ნებისმიერ წყეულთან. რადგან ის, ვინც თავს თვლის ექიმად, მაგრამ არ იცის, როგორ უმკურნალოს წყეულებს, რა სარგებელს მოუტანს დაჭრილ ადამიანს? ასევეა სულიერი მოძღვარიც, თუ არ არის განათლებული, თუ არ იცის ეკლესიის საიდუმლონი და არ აქვს ღვთის შიში, რა სარგებელს მოუტანს იგი ადამიანს, რომელიც მასთან აღსარებისათვის მივა?

---

ეს ყველაფერი გითხარით, რადგან ვალდებული ვარ, რომ ეს ყველაფერი აგიხსნათ, ხოლო მაღალმა ღმერთმა, რომელიც თვალებს აღუხელს ბრმებს და წამოაყენებს წაქცეულებს, აღვიხილოთ თქვენც სულისა და გონების თვალები, გატაროთ სწორ გზაზე და ყველანი გვადირსოს ამ მარხვის მშვიდობით გავლას, ჯანმრთელობით და ცოდვების შენდობით მივალწიოთ წმინდა ცხოველმყოფელ აღდგომას, უფლისა ჩვენისა მაცხოვრისა იესო ქრისტესი, რომლისა არის დიდება, პატივი და თაყვანისცემა უკუნითი უკუნისამდე. ამინ

## ქადაგება № 18

### კიდევ ერთი ქადაგება ბზობის კვირიაკეზე

“წარვედით დაბასა მაგას, რომელ არს წინაშე თქუნესა; და შე-რაი-ხვიდოდით მას შინა, ჰპოით კიცვი დაბმული, რომელსა კაცი არღა დაჯდომილ არს, აჰხსენით იგი და მომგვარეთ და უკეთუ ვინმე მრქუას რაი თქვენ მარქუთ, ვითარმედ: უფალსა უხმს ეგე, და მეყსეულად მოავლინოს იგი აქა.”

როგორაა შესაძლებელი, რომ მთელი სამყაროს შემქმნელ უფალს ხელთ არ ჰყავდეს თუნდაც ასეთი უბრალო ცხოველი? მიუხედავად იმისა, რომ მას წასასვლელად არ ჰქონდა არც ეტლი და არც პირუტყვი ჰყავდა. მას შეეძლო ანგელოზთა და მთავარანგელოზთა ფრთებით, დიდებით, გადაადგილება: როგორც ეს არის ნათქვამი დავით წინასწარმეტყველის მე-17 ფსალმუნში: “ქერუბიმებზე ამხედრდა და გაფრინდა და გაემურა ქარის ფრთებით.”

მაშ, რა აკლდა ღმერთს, რომ შემჯდარიყო ასეთ უბრალო ცხოველზე? მას თავისთვის რაიმე კი არ აკლდა, არამედ ჩემთვის, რადგან დიდ შიშში მაგდებს მე, როდესაც წერია: “საშიშია, ვინც იღებს მთავართა სულებს, საშიშია უფრო მეტად, ვიდრე ამაქვეყნის მეფენი.” და სხვა ადგილას ამბობს: “უფალი ღმერთი მოშურნე, თავისუფლად მოქმედებს.” ამის შიშით, რომ იყო შეპყრობილი ჩვენი წინაპარი და პირველმშობელი ადამი, ამიტომ დაიძალა და ვერ გაბედა

---

საშინელი ღვთის სახის წინაშე დამდგარიყო. მაგრამ ღმერთი რამდენადაც საშიში და შესაძრწუნებელია, იმდენად სათნო და თავმდაბალიცაა. რადგან მან არ მოისურვა, კაცობრიობა მოეყვანა ჭეშმარიტების გზაზე შიშითა და ზარით, არამედ სათნოებითა და სიკეთით. ამიტომაც მას დასჭირდა ეს პირუტყვები, რომ თავმდაბლობითა და სათნოებით შესულიყო იერუსალიმში.

რადგან მანამდე საკმარისად ჰქონდა ნაჩვენები თავისი სამართლიანობის დიდება, ძრწოლა და შიში, ამიტომაც საჭირო იყო სუსტი და მომაკვდავი ადამიანებისთვის ეჩვენებინა თავისი დიდი წყალობა და სათნოება, რომ შესრულებულიყო ზაქარია წინასწარმეტყველის სიტყვები: „იხარებდ ფრიად, ასულო სიონისაო, ქადაგებდ, ასული იერუსალჴმისაჲ. აჰა, მეუფე შენი მოვალს შენდა მართალი და მაცხოვარი, თავადი მშვიდი, და მჯდომარე კარაულსა ზედა, და კიცუსა ახალსა.“<sup>2</sup> ამ სიტყვებით სულიწმინდამ უჩვენა ხალხს, რომ მეფე, რომელიც შეიძლება ყოფილიყო საშიში, სინამდვილეში არის სათნო და თავმდაბალი.

იმისათვის რომ ეჩვენებინა თავისი სიკეთე, ჰოი, საყვარელნო, ღმერთს დასჭირდა ეს პირუტყვები. ისევე როგორც მეფეები სხვა სამოსლით მიდიან სანადიროდ, სხვა სამოსლით დაკრძალვებზე და სხვა სამოსლით ქორწილებში, ასევე ღმერთიც სხვადასხვა დროს სხვადასხვა მშვენიერებით იმოსება. ამიტომაც იგი სხვა მშვენიერებით შემოსილი მოვა ღრუბლებზე, კაცობრიობის სამსჯავროდ, რადგან მსაჯულს შეჰფერის იყოს შემოსილი დიდებითა და ძალაუფლებით. მაგრამ ახლა რადგან არ მოდის სამსჯავროდ, არამედ მოდის, რომ გამოისყიდოს და თავისთან მოიყვანოს კაცობრიობა, ასეთი სამოსელი შეჰფეროდა მას, რადგან თვითონვე ბრძანა ღმერთმა: თავისი ძე მოავლინა არა სოფლის განსასჯელად, არამედ საცხოვნებელად ამა სოფლისა.

ამიტომაც დასჭირდა მას, რომ ყოფილიყო თავმდაბლობითა და სიკეთით შემოსილი, რადგან არ მოდიოდა შესაშინებლად, რათა ადამიანები შიშისგან არ გაქცეულიყვნენ ისე, როგორც ოდესღაც ჰურიები შეშინდნენ სინას მთაზე, ვერ გაუძლეს ღვთის გამოცხადებულ დიდებასა და გაექცნენ. ვინმეს რომ ჰქონდოდა სარკესავით ყოვლისმხედველი თვალები და რომ შეძლებოდა სულ ოდნავ მაინც დაენახა ღვთის სიკეთეთა სიდიადე, ის აღინთებოდა უდიდესი სიყვარულითა და სიხარულით და შეუჩერებლად აღავლენდა

---

ღვთის ქებას, რათა არ დაეკარგა ღმერთთან სიახლოვე და ხსოვნა იმ დიდი სათნოებებისა, რაც იხილა.

და ისინი, ვინც ხედავენ ღვთის სათნოებებს, რა სიხარულით გაიხარებენ დღე და ღამე?! რა მხიარულებით იქნებიან აღვსილნი?! და რა დღესასწაულებს იზიებენ?! რა საგალობლებს და რა ფსალმუნებს იგალობებენ?! რა თქმა უნდა, არა მხოლოდ საგალობლებისა და ფსალმუნების გალობით უნდა აღვნიშნოთ ღვთის სათნოების წინაშე ჩვენი სიხარული, არამედ (შეიძლება ითქვას) განსაკუთრებულად, ზებუნებრივი და უდიდესი სიხარულით.

და რომ ჩვენი სიხარული და მხიარულება არ იყოს აზრს მოკლებული, ჩვენი სულიერი გონებით უნდა ვიცოდეთ ყველა დღესასწაულის ჟამი, რათა არ გვითხრას წინასწარმეტყველმა შემდეგი სიტყვები: „და ასიდანამ ცათა შინა ცნა ჟამი თვისი. გურიტმან და მჭურინავმან და მერცხალმან, ველისა სირთა, დაიცვნეს ჟამნი შემოსლვისა მათისანი, ხოლო ერმან ჩემმან არა ცნა სასჯელნი უფლისანი,“ რადგან არ ეგების. თუკი ფრინველებს ეცოდინებათ ჟამი თავისი გადაფრენისა და ჟამი ბუდის გაკეთებისა. ხოლო ჩვენ არ გვექნება სულიერი საგნების ხედვის უნარი და ჩვენ წმინდა ეკლესიის მიერ შექმნილ ჟამებს არ ვიცნობდეთ; რადგან ცოცხალი ადამიანის სხეულისა და ასევე სულისათვისაც საზიანოა დროების ცვლა, რადგან ადამიანებს ხშირად არ გვყოფნის დრო სათნოებების გასამრავლებლად. ამიტომაც ჩვენმა ეკლესიამ, როგორც მზრუნველმა და მოსიყვარულე დედამ, რომელიც მარადის მღვიძარებს და ლოცულობს ჩვენთვის, ისე დააწესა დროების ცვალებადობა, რომ ის საზიანო კი არა, არამედ ღვთის ქებისათვის და სიკეთის კეთებისკენ შთაგვაგონებს. ამიტომაც მაცხოვარ იესო ქრისტეს იერუსალიმში შესვლის კვირიაკედან-წითელ პარასკევამდე ეკლესიამ დააწესა: იყოს სინანულისა და კანონების შესრულების ჟამი; ხოლო წითელი პარასკევიდან-აღდგომამდე: მწუხარებისა და სიმწრის ჟამი; ხოლო აღდგომიდან-სულთმოფენობამდე: სულიერი სიხარულისა და მხიარულების დრო. იმიტომ დააწესა ღმერთმა დროთა ცვლილებების ეს საიდუმლო, რომ ადამიანი სულიერად იზრდებოდეს და მრავალ კეთილ საქმეს აკეთებდეს.

ხოლო ახლა, რადგან მაცხოვარის, იესო ქრისტეს, იერუსალიმში შესვლის დღემ და ჟამმა მოაწია, შეიძლება იკითხოთ: რატომ დააწესა ჩვენმა ეკლესიამ ეს წმინდა დღესასწაული, ანუ უფრო სწორად, რა უნდა ვაკეთოთ? ეკლესიას

---

უნდა, რომ ამ დროს ჩვენი სულიერი გონება იყოს ღმერთისკენ მიმართული; სურს ჩვენი სიმართლე, სურს ჩვენი ჭეშმარიტი სიყვარული, სურს ჩვენი თავმდაბალი გულებიდან წამოსული ღვთის დიდება, რადგან ადამიანის ცხოვება ღმერთისაგან მოდის, ადამიანს არ უნდოდა ღმერთთან მისვლა, ხოლო მოწყალე ღმერთი თავად მოვიდა ჩვენთან. მაგრამ თუ იკითხავთ, რატომ მოვიდა? მოვიდა (როგორც თვითონ ამბობს), დაკარგულის და წარწყმედილის მოსაძიებლად და საცხოვრებლად; მოვიდა, რომ მათ, ვინც იმყოფებოდა სიკვდილის სიბნელეში, გამოუცხადოს ჭეშმარიტი ნათელი; მოვიდა, რომ იხსნას ცოდვის მიმართ დამონებული და დაკარგული ადამიანები; მოვიდა, რომ უცხონი მოიყვანოს მათ მშობლიურ მამულებში; მოვიდა, რომ მკვდარნი აღადგინოს, რომ ღვთისგან განდგომილები ისევ შეარიგოს მამა ღმერთთან და ისევ გახადოს ისინი სულიწმინდის მატარებელი და ცათა სასუფეველის მემკვიდრენი, ანუ მოვიდა, როგორც მონების გამოსყიდვა, როგორც მკვდრებისთვის აღდგომა და ცხოვრება, უძლურთათვის მკურნალი და დაკარგულთათვის სწორი გზა.

ამიტომაც განკაცდა ღმერთი, თავად მივიდა მასთან, ვინც თავის დროზე გაექცა მას; სულიერად დაბრმავებული და გონებაშეშლილი ადამიანი გაექცა სიკეთეს, გაექცა ისე, რომ წინასწარმეტყველთა სიტყვებმაც ვერ შეძლეს დაებრუნებინა ის ჭეშმარიტების გზაზე. ამიტომაც, თავად ღმერთი განკაცდა და მივიდა მასთან, ვინც გაურბოდა, რათა დაებრუნებინა. *ამას გვასწავლის წმინდა მოციქული, რომელიც ამბობს, რომ მაცხოვარ იესო ქრისტეს არ აუღია ანგელოზებისგან, არამედ აბრაამის თესლისგან მიიღო. შეიძლება ითქვას, რომ ღმერთმა შეიპყრო ერთ-ერთი თავისი მტერი, მაგრამ იმისთვის კი არა, რომ მოკლას, არამედ გახადოს თავის ძედ და თავისი სახლის მემკვიდრედ.*

ამიტომაც მიიღო ჩვენმა მაცხოვარმა აბრაამის თესლი, მაგრამ, თუ გინდა, გასაგები იყოს ის, რის შესახებაც მოგახსენე, მოისმინე ესაია წინასწარმეტყველის სიტყვები: „სული უფლისაჲ ჩემ ზედა, რომლისა ძლით მცხო მე, მახარებელად გლახაკთა მომავლინა მე. განკურნებად შემუსრვილთა გულითა, ქადაგებად ტყუეთა განტევებასა და ბრმათა ახილვასა წოდებად წელიწადი უფლისაჲ შეწყნარებული, და დღე ნაცვლისმოგებისა ღმერთისა ჩემისა, ნუგეშინის-ცემად ყოველთა მგლოვარეთა, მიცემად მგლოვარეთა სიონი დიდებად, ნაცრისა წილ საცხებელი შუებისაჲ მგლოვარეთა, სამკაული დიდებისაჲ სულისა წილ მოწყინებისა, და იწოდნენ: ნათესავებ სიმართლისა,

---

დანერგულ უფლისა სადიდებელად. ”<sup>2</sup> ნეტავ, რა არის ამ სიტყვებზე უფრო მეტად ტკბილი და სათნო? რა არის უფრო მეტად საყვარელი და მშვენიერი? ამიტომაც მამა ღმერთმა გამოგზავნა ქრისტე ამ სათნო საქმეების გასაკეთებლად, ამიტომაც კურთხეულ იყოს მისი მოსვლა ამსოფლად, კურთხეულ იყოს ის, ვინც გამოგზავნა მაცხოვარი ადამიანებთან და კურთხეულ იყოს მომავალიც, რომლის კეთილი საქმეების დიდებას დღეს აღავლენენ ყრმები: “კურთხეულ არს მომავალი სახელითა უფლისათა, ოსანა მაღალთა შინა” და ამ სიტყვებს ჩვენც უნდა ვიმეორებდეთ, არა მხოლოდ დღეს, არამედ მთელი ჩვენი ცხოვრება. ეს არის ის დიდი საიდუმლო, რომლის აღნიშვნასაც იწყებს დღეს ჩვენი ეკლესია და ამავდროულად ჩვენ გვაგებინებს ძველი აღთქმის წინაპრების მწუხარებას, ოხვრასა და ტირილს, რადგან მათ უსაზღვრო საყვარულით სურდათ ენახათ ქრისტეს მოსვლა ამსოფლად, როგორც ამას ეუბნება თავად მაცხოვარი თავის მოწაფეებს: “ნეტარ არიან თუაღნი, რომელნი ხედვენ, რომელსა თქუენ ხედავთ, და ყურნი, რომელთა ესმის, რომელი თქუენ გესმის. ხოლო გეტყვ თქუენ, რამეთუ: მრავალთა წინაწარმეტყუელთა და მეფეთა უნდა ხილვაჲ, რომელსა თქუენ ხედავთ, და ვერ იხილეს, და სმენად, რომელი თქუენ გესმის, და ვერ ესმა.”<sup>2</sup> რადგან ძველი აღთქმის მამებმა მიიღეს მხოლოდ ღვთის ამ სიკეთის აღთქმა, მაგრამ არ მიუღიათ მემკვიდრეობა, რადგან ასე ამბობს თავად მოციქული. ყველა, ვინც ამ რწმენის მქონე იყო, მოკვდა, რადგან ვერ მიიღეს ეს აღთქმული მემკვიდრეობა, არამედ მხოლოდ შორიდან უყურებდნენ მას, ძალზედ შთამბეჭდავად ამბობს ამ სიტყვებს მოციქული, როდესაც ლაპარაკობს ძველი აღთქმის მამებზე, რადგან ისინი ემსგავსებოდნენ იმათ, ვინც შორიდან უყურებდა ძალიან საყვარელ საგანს, მაგრამ არ შეეძლოთ მასთან მიახლოება, მხოლოდ თვალებით უყურებდნენ და გონებით და სულით ნატრობდნენ, მაგრამ ვერ წვდებოდნენ. ძველი აღთქმის ერთ-ერთმა პატრიარქმა, რომელიც ქრისტეზე დიდი ხნით ადრე გარდაიცვალა, თქვა: ”მაცხოვარებასა შენსა მოველი, უფალო, და ძვალნი ჩემნი სასოებასა შინა განისვენებენ.“ ძველი აღთქმის მამებს შევადარებდი იმათ, ვინც ღამის სიბნელეში ზღვაში შეპყრობილნი არიან ქარიშხლით, სიშორეში ხედავენ იმედის მომცემ რაღაცა ნათელს. ყველანაირად ცდილობენ, რომ მიაღწიონ მას, მაგრამ, რომ ვერ ახერხებენ, მხოლოდ თვალებით და გონებით წვდებიან მას. ასევე ჩვენი წინაპრები უყურებდნენ რა ჭეშმარიტების ნათელს, უფალს, ჩვენს მაცხოვარ იესო ქრისტეს, რომლის ნათელმაც გაანადგურა ჯოჯოხეთის სიბნელე და ჩრდილი, თავმდაბლობით აღაპყრობდნენ თავიანთ ხელებს და მთელი



---

სულითა და გონებით ნატრობდნენ კაცობრიობის ხსნას, ამიტომაც წინასწარმეტყველმა ღაღადებით თქვა: “სწრაფად გვიბოძე შენი წყალობა, უფალო, რადგან ძალზედ შევწუხდით”. ამ ღაღადებისთვის მოგვიწოდებს ჩვენ ისაია წინასწარმეტყველიც: “ვინც გაიხსენებთ ღმერთს ნუ დადუმდებით და ნუ ხართ უხმოდ, სანამ არ და აღასრულებს იერუსალიმის დიდებას ქვეყანასა ზედა” სხვა ადგილას ასევე ამბობს: ”სიონისათვის არ დავდუმდები და იერუსალიმისათვის არ დავისვენებ, სანამ არ გამოვა ნათელივით, მისი მართალი და მაცხოვარი როგორც, ანთებული ჩირაღდანი”. აქ ნათქვამია, რომ ტაძრისა და მორწმუნეთა კრებულის დიდი სიყვარულის გამო არც გავჩუმდები და არც დავისვენებ, არამედ მარადის ჩემი ლოცვებით შევღაღადებ მოწყალე ღმერთს, სანამ არ მოავლენს მთელი კაცობრიობის მიერ ნანატრ მაცხოვარს, რომელიც, როგორც მზე და აღნთებული ჩირაღდანი გაარღვევს ამასოფლის სიბნელეს და ჭეშმარიტ ნათელს მოუტანს მორწმუნეებს, ღვთაებრივი საგნების ცოდნით აღუხელს მომაკვდავ ადამიანებს სულიერ თვალებს, რადგან ძე ღვთისამ აღასრულა თავისი აღთქმა; წინასწარმეტყველმა გულის სიღრმიდან თქვა ეს სიტყვები: “დანამეთ ზეცა და მაღალი ღრუბლები, რომ აწმყოს მართალთა ზედა, გაიხსნას მიწა და გამოცხადდეს მაცხოვარი.” ჰოი, წინასწარმეტყველო, რას ამბობ? რა გსურს? თუ გსურს, რომ ჩამოვიდე ზეციდან და ღრუბლებიდან, როგორ ეუბნები დედამიწას, რომ გამოაჩინოს მაცხოვარი? როგორ შეუძლია ცას, ღრუბლებსა და დედამიწას გამოაჩინოს ძე ღვთისა? ორივე მართალია, ზეციდან გადმოვა და დედამიწაზე გაცხადდება: ზეციდან, რადგან ძე ღვთისაა დედამიწაზე, ძე კაცისაც არის. ამიტომაც ვღაღადებ ზეცისკენ და დედამიწისკენ, რომ გამოგვიცხადონ ამასოფლის მაცხოვარი.

ამიტომაც ჩვენი ეკლესია ამ დღეს გვიცხადებს ძველი აღთქმის მამების ამ სიტყვებს: რაც მათთვის იყო მხოლოდ აღთქმული, ჩვენ ღვთის წყალობით მოგვეცა. რასაც ნატრობდნენ ის წმინდა მამები, ჩვენ ის გვაქვს. რა წყალობასაც ელოდნენ, ჩვენ მოგვეცა; და რასაც ისინი შორიდან უმზერდნენ, ჩვენ დღეს გაგვაჩნია, როგორც ამას ამბობს მახარებელი : რომელი იყო პირველითგან, რომელი გუესმა და ვიხილეთ თუალითა ჩუენითა, რომელი ვიხილეთ და კელნი ჩუენნი ჰმსახურებდეს სიტყუასა მას ცხორებისასა.”<sup>2</sup> ეს გამოცხადება ჩვენ გვაძლევს იმაზე დიდ სიხარულს, რაც ჰქონდათ ძველი აღთქმის წმინდანებს, ამ სიხარულის მოლოდინი მაიძულებს ვთქვა ეს სიტყვები: “მეამბორე შენი ზაგეთა ამბორით”. რადგან ყველამ, ვინც იყო სულიწმინდის

---

მადლის, სულით იცოდა, რაოდენ დიდი მადლი გადმოვა მის ბაგეებზე. ამიტომაც, რადგან ჰქონდა ძალიან დიდი სურვილი, რომ თვითონაც ყოფილიყო ამ უდიდესი სათნოების თანაზიარი, ამბობს, რომ სურს მემთხვიოს თავისი ბაგეებით; ამ სიტყვებით თითქოს ამბობს: მოსესი არ მესმის, რადგან ენაბლუა; ესაიას ბაგეები არ არის წმინდა; იერემიას არ ძალუძს მეტყველება, რადგან ყრმაა. და ყველა წინასწარმეტყველი დადუმდა. არამედ თავად მაცხოვარმა მიქადაგოს და გამომიცხადოს თავისი მამის ნება და განმიხლოს ჩემი ბუნება და გონება განმინათლოს, რომ მისი ღვთაებრივი მოძღვრების მდინარენი გახდეს მარადიულ ცხოვრებასთან ჩემი მიმყვანნი, ცხოველსყოფელი წყლის წყარო.

მაშასადამე, ძმანო, ხედავთ რა დიდ საიდუმლოს აღნიშნავს დღეს ჩვენი ეკლესია. საიდუმლო, რომლის ნახვასაც ნატრობდნენ ჩვენი წინაპრები, დაწყებული კაცობრიობის შექმნიდან, მაგრამ ვერ მიიღეს. ჩვენ დღეს გვებოძა ის და აღვნიშნავთ კიდევაც. აქედან გასაგებია, რას მოითხოვს ჩვენგან ეს წმინდა ჟამი: ითხოვს ლოცვის ღვაწლს, ღვთის ქებას, მადლიერებას იმ სიკეთეთათვის, რომელიც მიგვიღია ღვთისგან, მოწყალების გაღებას, მარხვას, ხშირ ზიარებას, სულის სიწმინდეს. ეს ყველაფერი ამზადებს ჩვენს გულს, რომ ღვთის სავანედ იქცნენ და რომ სათნოებით აღივსოს ჩვენი გულები, რადგან სათნოებების ამ სამკაულებით რძალი ეძახის თავისკენ თავის საყვარელ სიძეს და ეუბნება მას: ჩემი გულის სარეცელი მორთულია ღვთაებრივი მონატრების ყვავილებით და ჩემი სახლი აგებულია კეთილი საქმეების კეთილსურნელი უხრწნელი ხეებით.

და ამ მშვენიერ სარეცელზე სიძესაც უხარის განსვენება და რჩება იქ, ვიდრე არ გავა დღე და არ დადგება ღამის ჩრდილი. ამ საიდუმლოს ჭეშმარიტების აღსანიშნავად ადამიანი უნდა ემზადებოდეს საკუთარი ცხოვრების ყოველ დღეს.

მაგრამ თუ არაფერს არ გავაკეთებთ ჩვენი სულის მოსამზადებლად, რაღამი გვერგება ეს წმინდა დრო? ამიტომაც საჭიროა, რომ ჩვენც გავხვდეთ ამ დროის თანაზიარნი და ვიღვაწოთ მაცხოვარის, იესო ქრისტეს, იერუსალიმში შესვლის დღის აღსანიშნავად. მოვემზადოთ მისი წმინდა ვნებების მოსასმენად, რათა ჩვენც ავაზაკთან ერთად შევლადლოთ: მომიჯსენე მე, უფალო, ოდეს მოხვდე სუფევითა შენითა და სიკვდილითა სიკვდილისა დამთრგუნველმა ღმერთმა გვიბოძოს მარადიული ცხოვრება. ამინ.

---

## ქადაგება № 19

### ქადაგება ყოვლადწმიდა ღვთისმშობლის და მარადის ქალწულის მარიამის მიძინებაზე

„რამეთუ მოხედა სიმადაბლესა მხევლისა თვისისა, რამეთუ ნატრობდნენ ყოველნი ნათესავნი“.

„მართალთა ზეიმზე მრავალი დიდებაა „ , ამბობს ყოვლად ბრძენი სოლომონი, და „მართლის თავზე კურთხევაა“

ამიტომაც ყველა წმინდანი, გამონაკლისის გარეშე, არის მართალი ღვთის წინაშე და კურთხეულნი მის მიერ; მაგრამ ზეცაში და დედამიწაზე არ არსებობს უფრო მეტად მართალი და კურთხეული, ვიდრე ყოვლადწმიდა მარიამი, რადგან, როგორც წმინდანი, ღირს იქნა ეშვა ყველაზე წმიდა და ჭეშმარიტად მართალი კურთხეული მაცხოვარი იესო ქრისტე და მის მიძინებას აღნიშნავს ჩვენი წმიდა ეკლესია.

და მიუხედავად იმისა, რომ ჩემი დაბნელებული გონების გამო, არ ვარ ღირსი რამე ვთქვა მისი დიდებისთვის და ქებისათვის, ჩემი მრავალი ცოდვის გამო, მაინც შეძლებისდაგვარად და მისი მეოხებით ვიტყვი იმას, რასაც განმინათებს გონებაში ჭეშმარიტი ნათელი - იესო ქრისტე, მაშასადამე, გთხოვთ, მისმინოთ სიყვარულით.

„რამეთუ მოხედა სიმადაბლესა მხევლისა თვისისა“<sup>2</sup> და სხვა.

---

ყოველგვარი გადაჭარბების გარეშე ცნობილია, რომ ღმერთი არის ყოვლადმღიერი, რადგან მისი ძალა შეესაბამება მის ნებას და მას შეუძლია გააკეთოს ყველაფერი, რასაც მოისურვებს, როგორც ამას ამბობს დავით წინასწარმეტყველი: „ყოველივე, რაც სურდა, მოიმოქმედა უფალმა.“<sup>2</sup> ამიტომაც მას, რომ მოესურვა შეეძლო სხვა გზით ადამიანის ხრწნა ბოროტის ხელიდან და მისი ცხოვნება, ისე რომ თვითო არ განხორციელებულიყო, მაგრამ არ ისურვა. ალბათ შემეკითხებით რატომ? იმიტომ, რომ თავისი განხორციელების საიდუმლოებით მან ისურვა ეჩვენებინა თავისი ბუნების ოთხი თვისება: სიკეთე, სიბრძნე, ძალა და სიმართლე.

უპირველეს ყოვლისა გამოაჩინა თავისი სიკეთე, რადგან ისურვა, რომ ადამიანი ცხოვებულიყო მისი დაცემული მდგომარეობიდან, ადამიანი, რომელიც იყო ცოდვის მონა, როგორც ამას წმინდა პავლე მოციქული ამბობს, სხვა არაფრის გამო, არამედ მხოლოდ თავისი სიკეთით ჯერ შექმნა ადამიანი, ხოლო შემდეგ აცხონა იგი

მეორე-- გამოამჟღავნა სიბრძნე, რადგან როგორც ყოვლად ბრძენმა, ნახა ის გზა, თუ როგორ უნდა ეცხოვნებინა ადამიანი. როგორ? ისე, რომ გაეერთიანებინა ორივე ბუნება და გამხდარიყო ღმერთიც და კაციც. როგორც ადამიანს უნდა ებრძოლა ბოროტ ეშმაკთან ადამიანისთვის, ხოლო როგორც ღმერთს უნდა გაემარჯვა და ეცხოვნებინა ადამიანი, როგორც ამას ვიტყვით ქვემოთ.

მესამე-- გამოაჩინა ძალა, რადგან როგორც ყოვლადმღიერმა ღმერთმა გააკეთა ასეთი დიდი და საშინელი საქმე. ამბობს წმ. იოანე დამასკელი: რა არის უფრო მეტად დიდებული-- ის რომ ღმერთი განკაცდა, შემქმნელი იქცა ქმნილებად. არამატერიალური ღმერთი იქმნება მატერიალურ ადამიანად, უხილავი - ხილულად, უფალი - მონად, და მაღალი ღმერთი მდაბალ ადამიანად. და ამ ორი ურთიერთსაწინააღმდეგო ბუნების გაერთიანებით ღმერთმა შეინარჩუნა ორივე ბუნება უცვლელად, უქმნელი რჩება უქმნელად, ქმნილი ქმნილებად, და უხილავი უხილავად. მოკლედ რომ ვთქვათ: ღვთაება რჩება ღვთაებად, ხოლო კაცობრივი ბუნება კაცობრივად. არც ღვთაებრივი ბუნება გარდაქმნილა კაცობრივად და არც კაცობრივი გარდაიქცევა ღვთიურად.

და ის არის ყველაზე დიდი და საკვირველი საქმე, რომ შეერთების შემდეგაც თითოეულმა ბუნებამ შეინარჩუნა თავისი თვისება.

---

მეოთხე-- გამოამჟღავნა სიმართლე. როგორ? იმით, რომ არ მოინდომა ვებრძოლებოდა ბოროტ ეშმაკს განცხადებული ღვთაებრიობით, არამედ შეიმოსა სხეული, რადგან ეშმაკს შეეძლო თავის გასამართლებლად ღმერთისთვის ეთქვა: მე ადამიანს ვებრძვი და არა ღმერთს, და არ არის სამართლიანი, რომ შენ, ღმერთი, მებრძოლო მე, შენ, სამყაროს შემქმნელი -მე, რომელიც ვარ ქმნილება. ამიტომაც მაცალე მე, როგორც ქმნილებამ ვებრძოლო ქმნილებას, ანუ ადამიანს.

ამიტომაც, როგორც ამბობს დავით წინასწარმეტყველი, ღმერთი, რომელიც ყოვლად სამართლიანია, და ყოვლის მძლეველი, რას აკეთებს? ეშმაკს რომ არ ჰქონოდა თავისმართლებისათვის სათქმელი სიტყვა, და არ ეთქვა, რომ ღმერთი უსამართლოდ იქცევა, ამიტომაც ღმერთმა შეისხა ხორცი და გახდა ჭეშმარიტი კაცი, რათა შეებრძოლოს ადამიანის ბუნების მტერს, როგორც კაცი და სძლიოს იგი როგორც ღმერთმა.

ადამიანის ბუნება დამარცხებული იყო ბოროტის მიერ და ამიტომაც ბოროტი უნდა დამარცხებულიყო ადამიანის ბუნებით: დამარცხებული ხდება გამარჯვებული და გამარჯვებული-დამარცხებული. რა ხერხითაც თავის დროზე გაიმარჯვა იმავე ხერხით უნდა დამარცხდეს; მოატყუა ადამიანი, რომ ის ვითომ გახდებოდა ღმერთი და ახლა თვითონ მოტყუვდა, რადგან ხედავდა კაცს და აღმოჩნდა ღმერთის ხედვაში, რომელიც კაცში იყო დამალული.

ამიტომაც ღმერთი, რომ დაეცვა სამართლიანობა, ხდება კაცი - ყოვლადწმიდა ქალწულის ხორცისა და სისხლიდან. ვუფიქრდები ამ სასწაულის სიღრმეს და ვრჩები გაკვირვებული სიტყვების გარეშე, რათა შესაფერისად ვადიდო ეს უდიდესი მადლი/ნიჭი. როგორ ვადიდო კაცთმოყვარეობის წყარო? როგორ ვიქადაგო წყალობის სიმრავლე? როგორ გავკადნიერდე ქალწულობის სიწმიდის წინაშე და გამოვცადო ბუნებაზე აღმატებული საიდუმლოს სიღრმე? და როგორ ვისაუბრო შენს შესახებ ყოვლადწმიდაო ქალწულო, რადგან არა მხოლოდ შენგან იშვა ხორციელად ძე და სიტყვა ღვთისა, არამედ ეს შორსაც არის ბუნებაზე აღმატებული, რამეთუ გახდი დედა და დარჩი ქალწულად. რადგან ქალის ბუნება ისეთია, რომ ის არის ქალწული მანამ, ვიდრე იცავს ქალწულებას. მაგრამ თუ ქალწულია, ვერ გახდება დედა და ქალი, რომელმაც შვილი შვა, ვეღარ დარჩება ქალწულად, ხოლო შენს შემთხვევაში შენგან შობილმა, როგორც ბუნების შემქმნელმა, შეცვალა ბუნების წესი და შობის შემდეგ ისევ დარჩი ქალწულად.

ჰოი, დიდებული და ბუნებაზე აღმატებული საქმე!! ჰოი, წმინდა საშო და ღვთაების ჭურჭელი! ჭეშმარიტად შენში დაირღვა ცოდვის წერილი. შენში

---

გახდა ღმერთი კაცი, ისე, რომ არ შეიცვალა ღვთაებრივი ბუნება. ამიტომაც რა ერთ უნდა ვადიდო შენი ქალწულობა და ბუნებაზე აღმატებული შობა? რადგან შენი მეშვეობით ღირსნი გავხდით დიდი წყალობისა (სიკეთეებისა), რა ყვავილებით უნდა შევამკო შენი ქალწულობის გვირგვინი, შენ, რომელიც ზეციერი მამის მიერ სათნოებათა ყველა ყვავილის გვირგვინით ხარ გვირგვინოსანი?

რა ძღვენი უნდა მოგართვათ შენი ღირსების შესაფერისი? შენ, რომელმაც მთელი კაცობრიობა დიდებითა და პატივით გვირგვინოსანი გახადე, რადგან ყველაფერი, რაც ამა სოფლისაა, არარაობაა შენს წინაშე. რადგან თუ ცას გიწოდებ, შენ უფრო მაღალი ხარ, რადგან ცის შემქმნელი შობე. თუ გიწოდებ ღვთის ხატებას, ნამდვილად ღირსი ხარ. თუ ანგელოზთა დედოფალს გიწოდებ, ჭეშმარიტად სიმართლე იქნება, და სხვა რაც არ უნდა გიწოდო, არ იქნება საკმარისი, რომ ვადიდო შენი სიწმიდე.

გიხაროდენ, რამეთუ შენ თვითონ იწინასწარმეტყველე, რომ შენ გნატროდნენ ყოველნი ნათესავნი კაცთანი და ჭეშმარიტად შეგნატრიან, რათა შენი უსაზღვრო თავმდაბლობით წარსდექ შენი შემქმნელის წინაშე და გახდი მიზეზი იმისა, რომ თავი დაიმდაბლა მან, ვინც ბუნებით არ არის თავმდაბალი, დატოვა მამის სავანე, მოვიდა და დაემკვიდრა შენს ყოვლადწმიდა საშოში.

ჰოი, ქალწულობის ნეტარო წმიდაო თავმდაბლობავ, რამხელა ძალა გქონია! რადგან შენი მეშვეობით სიკვდილამდე დაიმდაბლა თავი მან, ვისგანაც შიშით იმალება ცა და ყველაფერი ქედს იდრეკს და ამავედროულად აღამალლე ბუნებით თავმდაბალი ადამიანი, იმდენად, რომ ცათა სასუფეველი დაიმკვიდრა. ჭეშმარიტად ნეტარია ის, ვინც მოიგო კურთხეული თავმდაბლობა და მიიღო დიდება ადამიანებისგანაც და ღვთისგანაც.

და შენ ყოვლადწმიდაო ქალწულო (იმ მიზეზით, რედ.), როგორც მე თავად ვთქვი, ღმერთმა მოხედა სიმდაბლეს ჩემსას, ამალღდი დედამიწიდან ზეცაში, რომ ღმერთთან ერთად იყო დედოფალი, მოგვხედე ჩვენ, უფლის მონებს და შენი თბილი ლოცვებით ეფერე შენს ძესა და სამყაროს საშინელ მსაჯულს, რომ გვიხსნას ყოველი მწუხარებისა და განსაცდელისაგან.

და როგორც ღვთაებრივი ძალით ერთ წამშივე მთელი მსოფლიოდან შეკრებაზე საქადაგებლად წასული მოციქულები, რომ დასამარხად გააცილონ შენი წმინდა სხეული, გალობებითა და ლოცვებით (რა?), ასევე შეკრიბე ჩვენი გაბნეული გონებაც ამა სოფლის ამო ცხოვრებიდან, შეკრიბე და განგვინათლე, რომ მარადის ვადიდოთ და ვაქებდეთ ღმერთს. ხოლო შენ, როგორც ჭეშმარიტ

---

ღვთისმშობელს, ღირსებით გიგალობთ ანგელოზებრივ სიტყვებს: „გიხაროდენ მიმადლებულო, უფალი შენთანა“.

## ქადაგება № 20

### ქადაგება წმინდა მღვდელმთავარ ნიკოლოზის დღესასწაულზე

„ მე ვარ მწყემსი კეთილი; მწყემსმა სული თვისი დასდვა ცხოვართა თვისთათვის“

როდესაც ვიხსენებ იმ დიდ მოშურნეობასა და უზომო სიყვარულს, კეთილ მწყემსებს რომ აქვთ თავისი ცხვრების მიმართ, დიდი გაოცება მიპყრობს და ვადიდებ მათი გულის რწმენასა და სიყვარულს, რომლითაც იცავენ თავიანთ ცხვრებს. ასეთი იყო წმინდა და ღვთის ერთგული მონა მოსე, რომელიც ისრაელი ერის მწყემსი იყო. როდესაც მოსემ დაინახა ჰურიათა მიმართ ღვთის უდიდესი და საშინელი მრისხანება, და იმასაც მიხვდა, რომ განადგურება დაიმსახურეს. თავისი სამწყსოსადმი დიდი სიყვარულის გამო, მოსემ არ მოინდომა თავად გაქცეულიყო და მარტო გადარჩენილიყო, არამედ, როგორც ნათქვამია გამოსვლათა წიგნის 22-ე თავში, დადგა მრისხანებით სავსე ღვთის წინაშე და დაუწყო ვედრება: „გევედრები, უფალო, შეგცოდა ამ ერმა დიდი ცოდვით და გაიკეთეს ღმერთები ოქროსგან; და ახლა თუ გნებავს, რომ

---

შეუნდო ეს ცოდვა -შეუნდე, ხოლო თუ არა, მეც წამშალე იმ წიგნიდან, რომელშიც ჩამწერე.“<sup>2</sup> დაინახეთ ამ მწყემსის დიდი მოშურნეობა და სიყვარული? ჭეშმარიტად, ჩემო საყვარელო მსმენელო, აქა ვდგავარ და მიკვირს ამ მძიმე სიტყვების გამო, რომელნიც მოსემ წარმოთქვა ესოდენი მრისხანებით, მაგრამ უფრო მეტად მაკვირვებს და აღმაფრთოვანებს ადამიანების მიმართ ღვთის უდიდესი მოთმინება და სიყვარული, სიკვდილით რომ არ დასაჯა მოსე ურჯულო ჰურიებთან ერთად: რადგან ღმერთს არა მარტო მოსე, არამედ მთელი სამყაროც არაფერში სჭირდება, როგორც ამას ამბობს დავით წინასწარმეტყველი მე-16 ფსალმუნში: „ჩემი სიკეთეები არ გჭირდება“.<sup>2</sup> ჩემი სიტყვებით ზედმეტად შორს რომ არ წავიდე, ვიტყვი, რომ ღმერთმა იმ მხრიდან კი არ შეხედა მოსეს ამ სიტყვებს, რომლებიც მას მრისხანებისაკენ უბიძგებდნენ, არამედ დაინახა მოსეს უდიდესი სიყვარული, რომელიც მას თავისი ცხვრების მიმართ ჰქონდა, რომ მათ არაფერი ცუდი არ დამართოდათ, მას ერჩინა თვითონაც დალუპულიყო მათთან ერთად. ამიტომაც ღმერთმა არავის დასჯა არ მოისურვა.

ჭეშმარიტად დიდი იყო მოსეს სიყვარული ჰურიების მიმართ, მაგრამ უფრო დიდი იყო ქრისტეს სიყვარული მთელი კაცობრიობისადმი. რადგან მოსე მზად იყო მხოლოდ ერთი ერისთვის მომკვდარიყო, ხოლო ქრისტე მთელი კაცობრიობისთვის. მოსეს არ უთქვამს: დამსაჯე მე და ჰურიები გადაარჩინე, ხოლო ქრისტეს სურვილი და მიზანი სწორედ ეს იყო, უბრალოდ მოვიდა, რათა თავისი სიკვდილით მთელი სამყარო გადაერჩინა, როგორც ეს ნათქვამია დღევანდელ სახარებაში: „სულსა ჩემსა დავდებ ცხოვართა ჩემთათვის“<sup>2</sup> და სხვა ადგილას ისევ ამბობს: „საჭიროა რომ მე ღვთისა ამაღლდეს, რომ ყველა, ვინც ირწმუნებს მას, არ დაიღუპოს და ჰქონდეს მარადიული ცხოვრება“.



---

მაშასადამე, ამ სიტყვებიდან შეიძლება დავინახოთ კეთილი მწყემსის ერთგულება და ჭეშმარიტი სიყვარული; აწ გთხოვთ, ყურადღებით მომისმინოთ.

მსოფლიოში ბევრი თავის თავს მწყემსს უწოდებს და ვითომ ზრუნავს თავის ცხვრებზე. მაგრამ ვამბობ, რომ ესენი ბოროტი არსებანი არიან და მხოლოდ სიტყვით იბრალებენ სიკეთეს, ხოლო საქმით შორს არიან მისგან, ისე როგორც ცა დედამიწისგან, რადგანაც ისინი თავის ცხოვართა სიკეთეზე და გადარჩენაზე კი არ ზრუნავენ, არამედ პირადი სარგებელი ამოძრავებთ. მათ მწყემსი კეთილის სახელი კი არ შეეფერებათ, არამედ -დაქირავებულის, უფრო ზუსტად კი, ქურდები და ავაზაკები უნდა ერქვათ; რადგან ისინი თავიანთ ცხვრებს ტოვებენ მგლების ხელში, ხოლო მგლები კი დაუსჯელად დანავარდობენ ცხვრის ფარაში, რათა მოიპარონ, დაგლიჯონ და დალუპონ ცხვრები. ამათზე ამბობს მაცხოვარი იესო ქრისტე მათეს სახარების მე-7 თავში: „უფროსილდით ცრუ წინასწარმეტყველებს, რომლებიც მოდიან თქვენთან ცხვრის ტყავში გახვეულნი, მაგრამ შიგნით არიან მტაცებელი მგლები, ისინი მათი საქმის ნაყოფით გამოიციან“,<sup>2</sup> ანუ უღირსი და ბოროტი საქმეებით გამოიციან მათ.

ასევე 23-ე თავში მაცხოვარი მსგავს ადამიანებს უწოდებს თვალთმაქცებს, ბრმებს, სულელებს და გარედან გალამაზებულ საფლავეებს. თვალთმაქცებს ეძახის, რადგან მათ ადამიანების წინაშე მაცდურად თავის წარმოჩენა სჩვევიათ, თითქოსდა წმინდანები და მართლები არიან;<sup>2</sup> ბრმებს უწოდებს, რადგან არ სურთ, ადამიანებს ასწავლონ, რაც სწორია, მართალია და ჭეშმარიტი, არამედ ყოველთვის სულის წარსაწყმედელი საქმეებისაკენ უბიძგებენ. სულელებს ეძახის, რადგან ღვთის ყველაზე დიდ მცნებებს აღრვევენ და ცხოვრობენ ამაო ცხოვრებით. გარედან შელამაზებულ საფლავეებს ეძახის, რადგან ხალხს თავს აჩვენებენ თითქოსდა წმინდა მამებზე და მოციქულებზე უფრო მცოდნენი, მართალნი, კეთილნი და ღირსნი არიან,

---

თუმცა როგორც რჯულის დამრღვევნი, არ იღებენ და არ იცავენ იმას, რაც დააწესეს წმინდა მამებმა და მოციქულებმა ეკლესიის სადიდებლად, ქრისტიანობისა და სარწმუნოების განსამტკიცებლად.

იმისათვის რომ ათასნაირი სარგებელი მიიღონ, ხალხს აბრკოლებენ ღვთის ნებისადმი მორჩილებაში და ამის გამო ეს გარეწარნი უფრო დიდ სასჯელს მიიღებენ.

„მწყემსი კეთილი სულსა თვისსა დასდებს თვისსა ცხვართათვის“.  
ტიმოთეს მიმართ პირველი ეპისტოლეს მე-3 თავში წმ. პავლე მოციქული ამბობს, რომ ეპისკოპოსი უნდა იყოს უბიწო, გონიერი, წესიერი, სტუმართმოყვარე, კარგი მასწავლებელი, სათნო, ცუდის არ ჩამდენი, არა ვერცხლისმოყვარე, თავისი ოჯახის კეთილი გამგებელი. რადგან, თუ მას არ ძალუძს თავისი სახლის კეთილი მართვა, როგორ შეძლებს უფლის ეკლესიაზე ზრუნვას?<sup>2</sup>

ამიტომ მე კი არა, არამედ მართალი გონება ჩვენ გვკარნახობს, რომ კეთილ მწყემსს უნდა ახასიათებდეს სამი რამ:

პირველი--მართალი სარწმუნოება, მეორე--სრული სიბრძნე და მესამე--ხელთ ეპყრას კვერთხი. წმინდა რწმენით უნდა მარადის ეძიოს სამწყსოს სიკეთე და სარგებელი და არა მხოლოდ ძლიერთა და ჯანმრთელთათვის, არამედ უძლურთა და სუსტთათვის. თავისი სიბრძნით უნდა მწყემსავდეს ადამიანებს ისე, რომ თითოეულს უნდა აძლევდეს მისი ასაკისა და ცხოვრების წესის შესაბამის სწავლებას, რადგან სწეულებანი მრავალფეროვანია და არ შეიძლება განიკურნონ ერთი და იმავე წამლით, ასევე არც ერთ სწავლებასა და რჩევას არ ძალუძს, განკურნოს და დაამშვიდოს ყველა ადამიანის სული, ყველას სხვადასხვა წამალი სჭირდება. სხვა რჩევა-დარიგება სჭირდება კაცს და სხვა ქალს; სხვა დარიგება სჭირდება ხნიერს და სხვა ახალგაზრდას; სხვანაირი სწავლა სჭირდება მდიდარს და სხვა ღარიბს, სხვა ნუგეში სჭირდება მხიარულს და სხვა მწუხარეს; სხვა განკურნებას სჭირდება

---

ჯანმრთელი და სხვას ავადმყოფი. სხვა საყვედური სჭირდება ბატონს და სხვა მოსამსახურეს; სხვა დარწმუნება სჭირდება თამამ ადამიანს და სხვა მშვიდარას; სხვა გაკეთილშობილება სჭირდება თვინიერ ადამიანს და სხვა ფიცხს; სხვა სიტყვა სჭირდება განათლებულ ადამიანს და სხვა უწიგნურს. მოკლედ რომ ვთქვათ, როგორც უკვე გითხარით, თითოეულს მისი ასაკისა და ცხოვრების წესის მიხედვით უნდა ასწავლოს და ანუგემოს კვერთხით, რომელიც ხელთუპყრია, ანუ ძალაუფლებითა და სულიწმიდის მაღლით, რომელიც მას აქვს მოცემული, უნდა დასაჯოს როგორც ცხოვარნი, ასევე მგლებიც და სხვა ველური მტაცებელნი, რომლებიც მოდიან სამწყსოს გასანადგურებლად. მართლაც, რატომ არ უნდა დაისაჯონ, თუ თავს არ ანებებ ესოდენ უთვალავ ცოდვებს, ვნებებს; ასევე მგლებიც, რომლებიც მწყემსის ხელში კვერთხს ვერ ხედავენ, ყოველგვარი შიშის გარეშე იტაცებენ და ჭამენ ცხვრებს. ამ კვერთხისთვის აქვს დავით წინასწარმეტყველს ნათქვამი 22-ე ფსალმუნში: „კვერთხმან შენმან და არგანმან შენმან -ამათ ნუგეშინის-მცეს მე“.<sup>2</sup> წმინდა კვერთხით მოსემ გადაარჩინა ჰურიათა ერი და ზღვაში დააღრჩო ფარაონი. ამიტომაც მწყემსს, რომელსაც სურს, რომ სჯულითა და სიმართლით მწყემსავდეს თავის სამწყსოს, მუდმივად ხელთ უნდა ეპყრას თავისი კვერთხი ანუ საჭიროებისა და კვალად, მუდმივად უნდა არიგებდეს და საყვედურობდეს და სჯიდეს თავის სამწყსოსა და ამავდროულად უნდა იგერიებდეს ბოროტ მტაცებლებს. ამაშია მისი მწყემსობის კეთილი აღსრულება, რომ მართალი სწავლებით დაიცვას თავისი სამწყსოს სულიერი ჯანმრთელობა, მწყემსი ვალდებულია, მარადის ზრუნავდეს თავისი სამწყსოს ჯანმრთელობისთვის და თუ ფარაში აღმოჩნდება რომელიმე უძლური და ავადმყოფი ცხვარი, მისი ნების გარეშეც კი უნდა დაიჭიროს, დააწვინოს, დააბას, ამოკვეთოს დაწყლულებული ხორცი, გადააგდოს და ჭრილობაზე დაადოს მალამო. ამ დროს ყურადღებას არ უნდა აქცევდეს ცხვრის ფეხების ქნევას, რომლებითაც შეიძლება თვითონ მწყემსსაც მიადგეს ზიანი ან სახეზე,

---

ან ხელზე, ან ფეხზე. ასეთი კეთილი მზრუნველობითა და ღვაწლით მწყემსი კეთილი განირჩევა დაქირავებულისგან, რადგან დაქირავებული არ მწყემსავს სამწყსოს სასარგებლოდ, არამედ მხოლოდ იმისთვის, რომ თავისი გასამრჯელო მიიღოს, მაგრამ როგორც კი შორიდან მომავალ მგელს ანუ ეშმაკს დაინახავს, ის ტოვებს სამწყსოს და გარბის, რადგან დაქირავებულია და გული არ შესტკივა ცხოვართათვის. ღმერთმა დაიცვას ყველა სამწყსო ასეთი მწყემსებისაგან. როგორც შავი ჭირისაგან.

„მწყემსი კეთილი სულსა თვისსა დასდებს სამწყსოსათვის“

როდესაც ინება უფალმა, ჩვენმა მაცხოვარმა, იესო ქრისტემ, ზეცად ამაღლება, თავის მოწაფეებს აღუთქვა, რომ მათ არ დატოვებდა მარტო, არამედ გამოუგზავნიდა სხვა ნუგეშინისმცემელს ანუ სულიწმიდას, რომლის მიერაც ისინი ყოველივეში განისწავლებიან და მიიღებენ სრულ ჭეშმარიტებას. ეს აღთქმა უცვლელად გადავიდა ყველა მღვდელმთავარზე, რომლებსაც საუკუნეების განმავლობაში დღემდე და სოფლის დასასრულამდე უმწყემსიათ და მომავალშიც იქნებიან მწყემსნი კეთილნი. როგორც უთქვამს სინესის: როგორც კეისარს არასდროს არ მოაკლდება მეომრები, ასევე ქრისტეს ეკლესიასაც არასდროს მოაკლდებიან მწყემსნი კეთილნი, რათა ანუგეშონ და სულის ცხოვნების გზაზე უწინამძღვრონ ღვთის რჩეულ ერს. ასეთ კეთილ მწყემსთა შორისაა წმინდა ნიკოლოზიც, მირონ-ლუკიის სასწაულმოქმედი მთავარეპისკოპოსი, რომლის ხსენებასაც აღვსარულებთ დღეს. იგი აღმოჩნდა თავისი მოძღვრისა და მასწავლებლის, იესო ქრისტეს, ღირსეული მიმდევარი. მან გაამრავლა მისთვის ბოძებული ტალანტი არა ორმაგად, არამედ სამმაგად, რადგან იმდენად იღვაწა, რომ აღასრულა სამი დიდი სათნოება: პირველ-თავისი უფლისა და მაცხოვრის, იესო ქრისტეს, დიდება და თაყვანისცემა; მეორე- მსოფლიო ეკლესიის მთელი სამრევლოს სარწმუნოებაში განმტკიცება; მესამე-მისთვის ჩაბარებული სამწყსოსათვის გაკეთებული სიკეთე. მაცხოვარ იესო ქრისტეს დიდებისა და თაყვანისცემისათვის გაწეული ღვაწლის

---

სათნოებაში იგულისხმება: ჭეშმარიტი სარწმუნოება, წმიდა სიყვარული, განუწყვეტელი ლოცვა, მარხვა, სინანულის ცრემლები, უსაზღვრო თავმდაბლობა, მღვიძარება ღვთის მიმართ, დიდების მეტყველება და მრავალი სახის სხვადასხვა ღვაწლი. ეს ყველაფერი ერთად აჩვენებს ღვთის მიმართ მის განუზომელ სიყვარულს. ამიტომაც ღმერთმაც შეიყვარა იგი და მთელ სამყაროში ცნობილი და დიდებული გახადა. ხოლო მისი საყოველთაო სათნოება გამომჟღავნდა კეთილმორწმუნე კეისარ კონსტანტინესა და ნიკეაში შეკრებილი მსოფლიო კრების წინაშე, სადაც ის დაუპირისპირდა ერესიარქ არიოზს, რომელსაც, როგორც მაცდურსა და ჭეშმარიტების მგმობელს, სახეში ხელი გაართყა და ასეთნაირად, ერთის მხრივ, დაადუმა მისი ბინძური და ცილისმწამებელი პირი და მეორეს მხრივ, აღიარა ძისა და სიტყვის თანაარსობა მამასთან და სულისწმიდასთან.

ხოლო ის სათნოებანი, რომლებიც გამოაჩინა მან თავისი სამწყსოს მიმართ როგორც თავის სიცოცხლეში, ასევე გარდაცვალების შემდეგ, რაც გამოიხატა მის განუზომელ სიყვარულში სულისთვის სასარგებლო დარიგებებში, გულუხვ მოწყალებებში, მრავალსახის განკურნებაში, ყველას მიმართ გამოჩენილ ზრუნვაში, სიკვდილისაგან ხსნაში, საპყრობილის ტუსადთა განთავისუფლებაში, ზღვის ღელვიდან მგზავრთა გამოხსნაში და სხვა უთვალავ კეთილ საქმეებში, რომელთა სათანადო გამოთქმაც ასე ძალუმს ჩემს ნაკლულსა და უღირს ენას. ამ საქმეს მივანდობ ცოდნასა და განათლებაში ჩემზე გამოცდილებსა და სრულყოფილებს, რომელთაც ხელეწიფებათ ჩემზე უკეთ და სრულად დაგიმოწმონ საქმენი მისნი. ხოლო მე თავმდაბლად ქედს ვიდრეც და ვევედრები ყოვლისმპყრობელ ღმერთსა და ზეცათა მეუფეს, რომ წმინდა ნიკოლოზის მხურვალე მეოხებით ჩვენს დიდებულ მთავარს უბოდოს მშვიდობიანი და ბედნიერი ცხოვრება, სრული ჯანმრთელობა, ხილულ და უხილავ მტერთა ძლევა და ამ მცირე ღვაწლისა და წარმავალი შესაწირავისათვის, რომელიც მან გაიღო ღვთის, წმინდანის პატივსაცემად და

---

ღვთის სახელის შესამკობად. ცხოვრების მრავალი ბედნიერი წლის შემდეგ უბოძოს მას ცათა სასუფეველში მარადიული განსვენება, მადლი და ნეტარება.

ასევე თქვენც, ვინც დღეს აქ ხართ შეკრებილნი, თქვენი საზრუნავით, გიბოძოთ ჯანმრთელობა, წმიდა ცხოვრება, სულის ცხონება, ყველა თქვენს კეთილ და სასარგებლო საქმეში დახმარება და შეწევნა, ასევე ყველა ქრისტიანს იგივეს ვუსურვებ, რათა ყველანი ერთად ვაქებდეთ და ვადიდებდეთ მის წმინდა ნეტარ სახელს.

ამინ!

## ქადაგება № 21

### წინასიტყვაობა ბზობის ქადაგებაზე

ჰოი, რაოდენ საკვირველი და დიდებულია სიხარულის ნიშნები, რომელნიც ეჩვენა დღეს იერუსალიმს უფალის იესო ქრისტეს შესვლისას!

იგი (რედ.)ი ღებს მას როგორც გამარჯვებულს! მთელი ქალაქი გამოსულია მის შესახვედრად. მთელი ერი და ხალხის სიმრავლე ყველა ასაკის ადამიანი თავმდაბლობით თაყვანს სცემს მას. ყველა მას აქებს და ადიდებას. ზოგი საკუთარ სამოსელს უფენს მიწაზე, რომ მასზე გადაიაროს, ზოგიერთები კი ხეების ფოთლებით უმკობენ მას გზას, მას ყვავილებით წინ მიძღვებიან, პალმის ტოტებით მოყვებიან, ადიდებენ მას, როგორც დავითის ძეს: „ოსანა ძესა დავითისა“. ხოლო სხვები ქადაგებენ მასზე, როგორც ისრაელის მეფეზე: „კურთხეულ არს მომავალი სახელითა უფლისათა, მეფე ისრაელისა“.

და ეს სიხარული რომ უფრო მეტად საკვირველი იყოს, უმანკო ყრმებიც ტოტებით ხელში ადიდებენ მას: „ოსანა მაღალთა შინა“.

---

ნეტავ საიდან მოდის ამდენი მხიარული ხმა? საიდან ამდენი ოსანა? რა მიზეზითაა ამდენი სიხარული ხალხში და ამხელა პატივი მაცხოვარ იესო ქრისტეს მიმართ? ამაზე გვპასუხობს წმ. მოციქული იოანე დღევანდელ სახარებაში: „ამიტომაც შეეგება მას ერი, რადგან გაიგო, რომ აღასრულა ეს ნიშანი! ლაზარეს ხორციელმა აღდგენამ მიზეზი მისცა ერს, რომ ასე განსაკუთრებულად დახვედროდნენ ქრისტეს. სირბილით მიუყვებოდნენ მას, ხის ტოტებით ხელში და ადიდებდნენ: „ოსანა ძესა დავითისა“.

და აღდგომის შესახებ ჩემი საიდუმლო ფიქრი მაიძულებს დღეს, ჩემო საყვარელნო, რომ გითხრათ ეს სიტყვები, ხოლო განგიმარტავთ, ვის განასახიერებს ეს ლაზარე და რამდენი წყალობაა საჭირო, რომ აღადგინოს ის, ვინც, როგორც ლაზარე, ოთხი დღის განმავლობაში მკვდარი წევს საფლავში. მომისმინეთ სიყვარულით, თუ გნებავთ, რომ სულიერი სარგებელი ნახოთ.

## ქადაგება № 22

### ქადაგება ბზობის კვირიაკეს თავმდაბლობის შესახებ

არა მგონია, რომ მათ შორის, ვისაც სახარების თუნდაც მცირედი ცოდნა აქვს, მოიძებნებოდეს ისეთი ვინმე, რომელიც, დიდი განმარტებების გარეშე, თვითონ ვერ ხვდებოდეს, ვის განასახიერებს ლაზარე, რომლის შესახებაც დაწვრილებითაა მოთხრობილი იოანეს სახარებაში. ვერ ხვდებოდეს, რომ ცოდვა არის სულის სიკვდილი, რომ მკვდარი, რომელიც ოთხი დღის განმავლობაში წევს საფლავში და ყარს, არის ცოდვილი ადამიანი, რომელიც თითქოს ცოცხალია, ლაპარაკობს, ხარობს და მუდმივად დროს ატარებს-მკვდარია! რადგან მისი სული, რომელიც პიროვნების ყველაზე გამორჩეული და მბრძანებელი ნაწილია - მკვდარია! რადგან მას აკლია ღვთის მადლი, რომელიც ჭეშმარიტი ცხოვრების მომცემია და ამ მცირე სიტყვებიდან

---

ყველასათვის გასაგები ხდება, ვის განასახიერებს ლაზარე.<sup>2</sup> მაგრამ არ ვიცი ყველასათვის გასაგებია თუ არა, რას წარმოადგენს თავად ლაზარე, რადგან აქაც გვაქვს ბევრი მიზეზი ფიქრისა და გაკვირვების, რადგან მკვდარი ლაზარეს ამ ამბავში ვხედავთ გარკვეულ განსხვავებულ ნიშნებს როგორც ქრისტეს, ასევე ხალხის მხრიდანაც, რომლებიც არ ჩანს ქრისტეს მიერ მკვდრეთით აღდგენის სხვადასხვა შემთხვევაში, და არც მოთხრობილი არ არის არც ერთი სხვა მახარებლის მიერ.

ჩვენ ვიცით, რომ ლაზარეს გარდა უფალმა იესო ქრისტემ აღადგინა ორი სხვა მიცვალებულიც როგორც ეს ჩანს მათეს სახარების მე-9 თავში, და ლუკას სახარების მე-7 თავში. ერთი იყო იაიროსის ქალიშვილი და მეორე ქვრივის ძე: ერთი მოხდა კაპერნაუმში, მეორე ქალაქ ნაინში; ერთი იყო 12 წლის, მეორე ასევე ახალგაზრდა ასაკის. ერთი იყო მხოლოდშობილი, მეორეც ასევე დედისერთა; ერთი მოხდა თავის მამის სახლში, ხოლო მეორე ქალაქის შესასვლელში. არცერთ შემთხვევაში - არც მკვდრეთით აღდგენილი გოგოსა და არც ბიჭის შემთხვევაში, ერს არ გამოუჩენია რაიმე განსაკუთრებული, როგორც დღეს, ლაზარეს აღდგინების შემთხვევაში, არ გამოსულან არც ხის ტოტებითა და ყვავილებით ხელში ქრისტეს შესახვედრად. არც ყრმებსა და არც მოზრდილებს არ უძახებიათ: „კურთხეულ არს მომავალი სახელითა უფლისათა, ოსანა მაღალთა შინა ღმერთსა“.

ნეტავ, რატომ არსებობს ეს განსხვავება ამ ორი მიცვალებულის აღდგენის ამბავსა და ამ მესამე ამბავს შორის? განა ის ორი შემთხვევაც არ იყო სასწაული, როგორც ეს მესამე? განა ეს ორი მკვდარი და ეს მესამეც იმავე ქრისტემ არ აღადგინა? ნეტავ, რატომ მოჰყვა ლაზარეს აღდგინებას ამხელა სიხარული, პატივი და დიდება, ხოლო იმ ორი მიცვალებულის შემთხვევაში მოხდა მხოლოდ მადლობის შეწირვა უფლისადმი და სხვა არაფერი? ამ სიტყვების საიდუმლოსა და ამ მიცვალებულის ამბავს რომ ჩავწვდეთ, იგი უნდა განვმარტოთ არა მარტო სახარების სიტყვებით, არამედ სახარებისეული აზრითა და სულით.

წმინდა მამები ერთ აზრზე დგანან, როდესაც ამბობენ, რომ პირველი ორი განსახიერებს ცოდვილს ისევე, როგორც ლაზარე, როგორც უკვე ვთქვი. მაგრამ სამივე მიცვალებული არ განასახიერებს მხოლოდ ერთ ცოდვილს, არამედ ცოდვილთა სხვადასხვა სახეობებს, რადგან ცოდვილთა სხვა სახეობას განასახიერებს იაიროსის ქალიშვილი, სხვა სახეობას ქვრივის ძე, ხოლო სხვას ლაზარე. იაიროსის მიცვალებული ქალიშვილი, რომელიც გარდაიცვალა სახლში, განასახიერებს ადამიანს, რომელიც სცოდავს თავისი გონებითა და



---

ნებით, ანუ რომელსაც გააჩნია ცოდვის ნება, მაგრამ ის ცოდვა ვერ გამოავლინა საქმეში: ან იმის გამო, რომ მას არ მიეცა შესაბამისი დრო, ან იმის გამო, რომ მას არ მიეცა საშუალება განეხორციელებინა ის, რაც სურდა. ასევე განასახიერებს იმას, ვინც არცოდნის, გაუფრთხილებლობის, ახალგაზრდული სულისკვეთების, ან ადამიანური ბუნების სისუსტის გამო, მოულოდნელად ებმება ცოდვის მახეში, როგორც ამას განმარტავს წმ. თეოფილეს ძე. ასევე განასახიერებს იმას, ვინც ნამდვილად შესცოდა, მაგრამ მისი ცოდვა, ვთქვათ ასე, არის დამალული სახლში, არ განცხადდა და არ გახდა ცნობილი ხალხისათვის. ხოლო ქვრივის ძე, რომელსაც საკაცით მისვენებდნენ ქალაქგარეთ, განასახიერებს იმ ადამიანს, რომელმაც ჩაიდინა ცოდვა: დატკბა ნაყროვანებით, ან მრუშობით, ან უკუღმართობით, ან სხვა რამე მსგავსი ცოდვით განასახიერებს ასევე იმასაც, ვინც პირველ ცოდვას დაამატა მეორე. ღვთის ერთი მცნების დარღვევით არ შეშინდა და დაარღვია მეორეც და მესამეც, თან არა ფარულად როგორც პირველმა, არამედ ურცხვად და უტიფრად შუა ქალაქში ხალხის დაბრკოლებით და თავისი მეზობლისათვის ზიანის მიყენებით.

მესამე მიცვალებული ანუ ლაზარე განასახიერებს ადამიანს, რომელიც დაბერდა ცოდვაში, მიეჩვია ბოროტებას და არასდროს არ ზრუნავს თავისი სულის ცხოვნებისთვის, ყოველდღე მრუშობს, სიძვას სჩადის, იპარავს, იტაცებს, არ რცხვენია ადამიანების, არ ეშინია ღმერთის, ყურად არ იღებს სწავლებებსა და რჩევებს. გაჭირვებულები ტირიან მის წინაშე, მაგრამ მას ისინი არ ეცოდება; ისმის ქვრივთა ღაღადისი, რადგან არ ზრუნავს მათზე და არ აღასრულებს მათზე სამართალს; კვნესის მეზობელი, რადგან უსამართლოდ ექცევა და არ უსმენს მას. ეს ცოდვილი არა მხოლოდ დამარხულია ცოდვის საფლავში, მეტყველების, სუნთქვის გრძნობისა და ცხოვნების იმედის გარეშე, არამედ ლაზარესავით სახვევებით დაბმული აქვს ხელები და ფეხები, ანუ მაგრად არის შეკრული მისი ცოდვებით, როგორც ეს არის ნათქვამი სულიწმინდის მიერ, იგავთა მე-5 თავში: თითოეული იკვრება თავისი ცოდვების ღვედებით ისე, რომ აღარც შეუძლია რაიმე სიკეთისა ან ღვთისთვის სათნო საქმის გაკეთება.

მისი სახე სუდართაც იყო დაფარული, რადგან დაბრმავებულა თავისი ცოდვების გამო, ვერ აცნობიერებს თავის საცოდავ მდგომარეობას, ვერ ხედავს იმ უფსკრულს, რომელშიც იმყოფება და არ ფიქრობს იმ მარადიულ ტანჯვაზე, რაც მას ელის. წევს და ზემოდან ადევს მძიმე ქვა, რომელიც ბოროტ ჩვევას განასახიერებს. ჩვევა, რომელიც აწვევა და ამძიმებს მის სულს, არ აძლევს მას

---

საშუალებას წამოდგეს თავისი დაცემის სამარიდან და არც ამოსუნთქვის საშუალებას.

როგორც მართას უთქვამს ლაზარეს შესახებ: „უფალო, ყარს“, ასევე სრულიად მართებულად, ჩვენც შეგვიძლია ვთქვათ, რომ ასეთი ცოდვილიც ნამდვილად ყარს, რადგან არა მხოლოდ ოთხი დღე, არამედ კვირების, თვეების, წლების და მრავალი ხნის განმავლობაში წევს დამარხული ცოდვის სამარეში. ახლა შეგვიძლია ნათლად დავინახოთ, თუ რატომ მოჰყვა ასეთი დიდი სიხარული ლაზარეს აღდგინებას და მსგავსი რამ არ მომხდარა პირველი ორი მიცვალებულის შემთხვევაში. მიუხედავად იმისა, რომ ღმერთისათვის ყველაფერია შესაძლებელი, ადამიანური გაგებისათვის უფრო ძნელი და საკვირველი ჩანს ისეთი მიცვალებულის აღდგინება, რომელიც ოთხი დღის განმავლობაში იწვა საფლავში, აყროლებული, როგორც ლაზარე, ვიდრე ისეთი მიცვალებულის აღდგინება, რომელიც მიყავდათ დასამარხად, როგორც ვაჟის შემთხვევაში. ან მიცვალებული, რომელიც რამდენიმე წუთით ადრე გარდაიცვალა, როგორც იაიროსის ქალიშვილის შემთხვევაში. ეს ყველაფერი ასე მოხდა იმისათვის, რომ დაინახოს იმ ცოდვილმა, რომელმაც მთელი თავისი ცხოვრება გაატარა ცოდვაში, დაბერდა ბოროტებაში, სრულად დაშორდა ღვთის მადლს, გახდა ცოდვების მსახური და ეშმაკის მონა, რაოდენ ძნელია მისი მობრუნება ბოროტი ჩვევის უფსკრულიდან და რომ შეუძლებელია მისი აღდგენა, თუ არა დიდი ღვაწლით, უზომო სინანულითა და ღვთის განსაკუთრებული წყალობით. თუ თქვენ ჩაუღრმავდებით ყველაფერს იმას, რაც ვთქვით, გთხოვთ, დაუფიქრდეთ, რა გააკეთა ქრისტემ, როდესაც აღადგინა ის სამი მიცვალებული და თქვენ მიხვდებით ჭეშმარიტებას.

პირველი მიცვალებულის, იაიროსის ქალიშვილის შემთხვევაში, როგორც მოგვითხრობს მათე მახარობელი, როდესაც მივიდა მასთან მაცხოვარი იესო ქრისტე, არ წარმოთქვა არც ერთი სიტყვა, არამედ ხელით შეეხო მიცვალებული გოგონას ხელს და გოგონაც მაშინვე წამოდგა.

მეორე მიცვალებულის, ანუ ქვრივის ვაჟის შემთხვევაზე მოგვითხრობს ლუკა მახარობელი. შეეხო თუ არა მაცხოვარი მიცვალებულის კუბოს, უთხრა მას: ჭაბუკო აღსდევ! და მიცვალებულიც მაშინვე წამოჯდა.

მესამის, ანუ ლაზარეს შემთხვევაში, რას არ ამბობს და რას არ აკეთებს იესო ტკბილი რომ აღადგინოს ის. წაიკითხეთ იოანეს სახარების მე-11 თავში. პირველად ნათქვამია: „ამოიოხრა სულით და აღშფოთდა (განრისხდა) მეორედ მისი ღვთაებრივი თვალებიდან ცრემლები გადმოდინდა: „და ცრემლოდა

---

იესუცა“. მესამედ: „აღაპყრო თავისი თვალები ზეცად და ილოცა მამა ღმერთის მიმართ:“ მამაო გმადლობთ, რომ მომისმინე.“ რის შემდეგაც საშინელი ხმით, რომლითაც აღაშფოთა მთელი ჯოჯოხეთი ამოიყვანა ლაზარე სიკვდილის წყვდიადიდან ცხოვრების ნათელზე: „და ესე ვითარცა თქუა, კმითა დიდითა ღაღატ-ყო: ლაზარე, გამოვედ გარე“!.

ახლა მითხარით, რას განასახიერებს ეს ყველაფერი? რას გვასწავლის ეს განსხვავებულობა? რომლითაც ქრისტემ აღადგინა სამი მკვდარი: პირველს ხელის შეხებით, მეორეს - უბრალო სიტყვით, ხოლო მესამეს - ცრემლებით, ლოცვითა და დიდი ხმით?

ღვთივგანბრძობილი ოქროპირი, წმინდა თეოფილაქტე და წმინდა სახარების განმმარტებელი გვეუბნებიან, რომ სიცოცხლისა და სიკვდილის უფალს, მაცხოვარ იესო ქრისტეს, ამით ჩვენთვის უნდა ესწავლებინა, რომ ცოდვილი, რომელიც მკვდარია ღვთის მადლის დაკარგვის გამო, რადგან შესცოდა უყურადღებობითა და ბუნების სისუსტის გამო, შედარებით იოლად აღსდგება, მიატოვებს ცოდვას და მოვა ღვთის მადლის შეხებით სინანულში.

ასევე სხვაც, რომელიც დაშორდა ღვთის სიყვარულს, ორჯერ თუ სამჯერ, მაგრამ ჯერ კიდევ ახალგაზრდაა ბოროტებაში, ესეც ღვთის შეწევნით და სახარების სწავლებით თუ არ შეინანებს დღეს, შეინანებს ხვალ, მიატოვებს ბოროტებას და მოუბრუნდება ცხონების გზას.

ხოლო მესამე, რომელიც დაბერდა ცოდვაში და სრულიად მიეჩვია ამა სოფლის ამაოებასა და ბოროტ სურვილებს, მისთვის არ არის იოლი მობრუნება, არამედ რჩება სინანულის გარეშე და კვდება ცოდვაში, როგორც ამას ამბობს დავით წინასწარმეტყველი: „შორსაა ცოდვილთაგან ცხონება“. რადგან მთელი თავისი ცხოვრების განმავლობაში არ უძებნია ღვთის გზა და იმისათვის რომ მოვიდეს სინანულში მას სჭირდება დიდი ზეციური დახმარება, ღვთის ცოცხალი სიტყვა, რომელიც სრულად აღადგენს მას ცოდვისაგან, როგორც აღადგინა ლაზარე საფლავიდან.

და რადგან მსგავსი რამ არ ხდება არასდროს, ან ხდება ძალზედ იშვიათად, რადგან ღმერთი არ არის ვალდებული, რომ ვინმეს აცხოვნებდეს ძალით, ამიტომაც, როდესაც ხდება მსგავსი სასწაული, როდესაც ცოდვაში დაბერებული მოვა სინანულში, როდესაც ოთხი დღის მკვდარი აღსდგება მკვდრეთით, როდესაც უძლები შვილი დაუბრუნდება მამის სახლს, როდესაც მოიძებნება დაკარგული ცხვარი და დრაქმა. ჭეშმარიტად ღვთის წყალობის ამ სასწაულს დიდი სიხარული მოაქვს როგორც ზეცაში, ასევე დედამიწაზეც და ამ სიხარულის განსახიერებაა ის სიხარული, რომლითაც შეეგებნენ იესოს

---

იერუსალიმში ლაზარეს აღდგინების შემდეგ. უხარია ღმერთს, უხარია ანგელოზებს, უხარია მთელ ეკლესიას, რადგან მოიპოვა ხელახლა თავისი საყვარელი ძე, რომლის ცხონების იმედიც არ არსებობდა. აი, რაოდენ სირთულეს, ბრძოლასა და დაბრკოლებას გულისხმობს იმ ადამიანის სინანული, რომელიც ცოდვაში დაბერდა.

ჩემო საყვარელო, ნეტავ თუ შეიძლება ვიფიქრო მე, რომ ჩემპირ მეტყველ სამწყსოში არიან ასეთი გზააბნეული ცხვრები, ასეთი ლაზარეები, ასეთი გულგაქვავებული და სინანულის არ მქონე ცოდვილები? თქვენი დიდი რწმენა არ მამლევს საშუალებას, რომ მსგავსი რამ ვიფიქრო. მაგრამ თუ ისე მოხდება, რომ ღმერთთან დაშორების გამო, აღმოჩნდება ვინმე ასეთ საცოდავ და სავალალო მდგომარეობაში, დიდი გულის ტკივილით ვეტყვი მას იმავე სიტყვებს, რაც უთხრა ქრისტემ ჰურიებს ლაზარესათვის: „სად დადევით ის?“ სად დასდევ, ჰოი ცოდვილო, შენი მშვენიერი, საკვირველი და პატიოსანი სული? სად დამარხე შენი პიროვნების ყველაზე გამორჩეული ნაწილი, ღვთაებრივი ძალის ყველაზე გონიერი ქმნილება, ანგელოზთა საყვარელი მეუღლე? სად არის ღვთის ხატების მშვენიერება? სად არის ღვთის მადლის სამკაული? სად არის დიდება? სად არიან საკვირველი საუნჯენი, რომლებიც მზეზე ძლიერად ანათებენ?

და ასე, ყოველგვარი ზრუნვის გარეშე, მიანდე შენი სული ცოდვას და მან განაბნია ის, როგორც ქარმა მტვერი. მაგრამ როგორ არ გეცოდება შენი თავი? როგორ არ დასტირი შენს უბედურებას? დაგტირის მთელი ეკლესია? ტირიან მართალნი, ტირის შენი სულის მფარველი ანგელოზი, რადგან ცხადად ხედავს შენს დაღუპვას. ხოლო შენ ერთ ცრემლსაც არ ღვრი, არ წუხხარ და არც სინანულში მოდიხარ. ჰოი, ჩემო მკვდარო შვილო, ამ უგრძნობლობის საფლავში დამარხულო, ლაზარევ, გამოვედ გარეთ! გონს მოდი, დაინახე შენი საცოდაობა, დატოვე შენი ბოროტი ჩვევები ცოდვის მიმართ, რომელმაც მოგკლა და დაგაშორა შენს შემქმნელ ღმერთს: „მობრუნდით ჩემსკენ და მეც თქვენსკენ მოვტრიალდები,“ ამბობს ღმერთი მალაქია წინასწარმეტყველის პირით ყველა ცოდვილის მიმართ.

შვილნო ჩემნო, ჭეშმარიტად მოწყალეა ღმერთი და დიდად მომთმენი და ყველა ადამიანის მობრუნება და ცხონება სურს და ამიტომ მიიღო კიდევაც ჯვარი და სიკვდილი. მხოლოდ ერთი რამაა საჭირო, რის გარეშეც შეუძლებელია როდესმე ცოდვილი მოვიდეს სინანულში. ის, რაც არც არის ნაჩვენები ქრისტეს მიერ ლაზარეს აღდგინებაში. მართალია, მაცხოვარს შეეძლო აღედგინა ლაზარე ისე, როგორც იყო ის ჩაკეტილი საფლავში, მაგრამ

---

არ ინება, პირველად ბრძანა, რომ გადაეგორებინათ საფლავის ქვა და მხოლოდ ამის შემდეგ აღადგინა მიცვალებული. მაგრამ იცით, რატომ გააკეთა ასე? იმიტომ რომ გაიგოს ყველა ცოდვილი, თუ მათგან არ გადააგორებენ ბოროტი ჩვევის ქვას, შეუძლებელი იქნება აღდგინება და სინანული. „გადააგორეთ ქვა!“ ეს ქვა თავის გულიდან უნდა აილოს ვერცხლისმოყვარემ, დააბრუნოს სხვისი ნივთი, არავინ არ შეავიწროვოს და არავინ გაძარცვოს. ხოლო თუ ამას არ იზამს, ვერ აღსდგება.

ეს ქვა უნდა მოიხსნას მრუშობის მოყვარემ, უნდა მიატოვოს ბოროტი ჩვევა და ხორციელი სურვილი. ხოლო თუ ამას არ იზამს, ვერ აღსდგება. ეს ქვა უნდა გადააგოროს შურიანმა, დამსმელმა, ამპარტავანმა და ცილისმწამებელმა კაცმა. იგი არ უნდა შეურაცხყოფდეს ცილისწამებებით თავის ძმას, არ უნდა ინახავდეს მტრობას გულში, არ უნდა უსურვოს სხვას ბოროტება და არ უნდა ქედმაღლობდეს სხვათა მიმართ. თუ ამას არ იზამს, ვერც ცხონებას მიიღებს და ვერც აღსდგება ცოდვის საფლავიდან.

მაგრამ რა უნდა ვთქვა? მე მეშინის, რომ ჩვენ შესახებ იქნება ნათქვამი ისაია წინასწარმეტყველის წიგნის მე-6 თავში გამოთქმული სიტყვა: „გაუსქელდათ გული, ყურებით ძნელად იგებენ და მათი თვალები დახშულია,“ ეს არის ჩემი შიშის მიზეზი.

როდესაც დავითმა გოლიათთან შეხვედრა გადაწყვიტა, მან არ წაილო არც ერთი იარაღი გარდა შურდულისა და მდინარიდან აღებული ხუთი ქვისა. და რა მოხდა?! როგორც ნათქვამია წმინდა წერილში, კერძოდ, მეფეთა პირველი წიგნის მე-17 თავში, ისროლა რა პირველივე ნატყორცი ქვა, დამპყრობელს შუბლში მოახვედრა, იგი ძირს დაანარცხა და მოკლა. გოლიათი განასახიერებს ცოდვას; დავითი, რომელიც ებრძვის ცოდვას, განასახიერებს სახარების მქადაგებელს; ქვები განასახიერებენ ღვთის სიტყვებს, ხოლო შურდული ღვთის მადლის ძალას.

ამ გოლიათს, ჰოი, რამდენი დავითი, სახარების რამდენი მქადაგებელი შეებრძოლა, სული წმინდის ძალით, ძველად და ჩვენს დროშიც, ცოდვას ესროლეს არა მხოლოდ სახარების ერთი სიტყვა, არა მხოლოდ ერთი ქვა, როგორც ეს გააკეთა დავითმა, არამედ მრავალი და მრავალგვარი სიტყვა და სწავლება.

იმ დროს, როდესაც წმინდა წერილი მოქმედებს და სახარების ქადაგება არ წყდება. და მერე რა? განა დაეცა ამით გოლიათი? განა მოკვდა თქვენში ცოდვა? სად არის თქვენი ცხონების ნიშნები, სად არის ძლევის ნიშნები?

---

ვიცი, რომ დღეს ყველამ მიიღეთ ეკლესიიდან მცენარეთა მწვანე რტოები, რომლებიც ძლევას განასახიერებენ, ვხედავ, რომ ხელთ გიპყრიათ ისინი; რადგან ამ დღეებში თქვენ დაამარცხეთ თქვენი მტრები, ანუ ეშმაკი და ცოდვა.

მაგრამ ეს ყველაფერი ჭეშმარიტად ასეა? ღმერთმა ქნას, რომ ეს მართალი იყოს! ჰოი, რა დიდი სიხარული იქნებოდა თქვენ გამო ზეცაში! მაგრამ მე მეშინის, რომ თქვენ ხელთ გიპყრიათ ძლევის ნიშნები, მაგრამ გამარჯვებულია ეშმაკი, რადგან ვერ ვხედავ თქვენში სინანულს, ვერ ვხედავ ჭეშმარიტ აღსარებას, ვერ ვხედავ სიკეთეს, რომელიც ახარებს ანგელოზებს და ამწუხრებს ეშმაკს.

ჩემო საყვარელო შვილნო! ჯერ კიდევ გაქვთ ცხოვნებისათვის დრო. თქვენ კიდევ გაქვთ ვნების შვიდეულის მაცხოვრებელი დღეები, რომლის დროსაც თქვენი სულების ცხოვნებისთვის მე ღვთისამ დაათხია თავისი წმინდა სისხლი. მამასადაძმე, ამ წმინდა დღეებში გამოასწორეთ ის, რაც უღებებისა ან ბოროტის ცდუნების გამო ვერ გააკეთე ამ წმინდა მარხვის განმავლობაში, მიატოვეთ მტაცებლობა, მიატოვეთ სხვების შევიწროვება, მტრობა, ცილისწამება და მრუშობა.

წინასწარმეტყველი იონა, როდესაც ნინევიელებს უქადაგებდა სინანულს ეუბნებოდა: „სამი დღელა და ნინევია განადგურდება“. ასევე დღეს, მეც გეუბნებით თქვენ: „სამი დღელა დარჩა“: ორშაბათი, სამშაბათი და ოთხშაბათი; ვინც ამ სამ დღეში არ შეინანებს და არ იტყვის აღსარებას ქრისტიანულად, სინანულითა და გულის შემუსვრით და ვნების ხუთშაბათს არ ეზიარება ქრისტეს წმინდა სისხლსა და ხორცს. ჭეშმარიტად ასეთი ადამიანისთვის ძალზე მცირედი იქნება ცხოვნების იმედი.

თითოეულმა დიდი ყურადღებით იფიქროს იმაზე, რაც ვთქვი და ღმერთმა გაანათლოს თითოეულის გონება, რომ შეასრულოთ ყველაფერი, რაც აუცილებელია თქვენი სულების საცხოვრებლად.

**ქადაგება № 23**

**ქადაგება უფალის იესო  
ქრისტეს ფერისცვალებაზე**

---

„და აჰა ჳმად იყო ღრუბლით გამო და თქუა: ესე არს მე ჩემი საყუარელი, რომელი მე სათნო-ვიყავ; მაგისი ისმინეთ.“.

დედამიწას ჯერ არ უნახავს უფრო დიდებული რამ ,ვიდრე ის, რაც დღეს მოხდა, არც ხილულ სამყაროს უნახავს ამაზე დიდი და ნათელი სასწაული. ზედა სიტყვა ღვთისა, რომელმაც მოახდინა უთვალავი ნიშანი და სასწაული, არ გაუკეთებია უფრო დიდი სასწაული, ვიდრე ეს: თაბორის მთის მწვერვალზე იწება მოციქულებისთვის ეჩვენებინა თავისი ღვთაებრიობის ზენათელი დიდება. ამიტომაც ერთ წამში შეიცვალა სახე და ხატი ისე, როგორც ეს იყო უწინარეს საუკუნეთა შემკული ზეცის სილამაზით, განათებული ღვთიურობის მთელი ნათელით. სხივები, რომელნიც გამოედინებოდნენ მისი ღვთაებრივი სახიდან ამარცხებდნენ მზის ნათელს და მისი სამოსის სიქათქათე იყო გაცილებით დიდი, ვიდრე სინათლის ბრჭყვიალება.<sup>2</sup> წინასწარმეტყველთა შორის გამორჩეული მოსე და ილია ამ დიდებული ამბის მოწმენი იყვნენ. ხოლო მოციქულთა შორის დიდებულნი:პეტრე, იაკობ და იოანე. ღრუბლის სახით მოვლენილმა ნათელმა, რომელმაც მთა და ამ დიდების შემხედვარენი, მოციქულები, მთლიანად დაფარა, გააცხადა სულიწმინდა; რათა ყველას გაეგო, რომ ამ დიდებულ მოვლენაში განცხადდა სრულად წმიდა სამება, დაუსაბამო მამამ დაამოწმა მოციქულების მიმართ ნათქვამი სიტყვები: ესე არს მე ჩემი საყვარელი, მისი ისმინეთ.<sup>2</sup>

ჰოი, ნეტარნო მოციქულთა თვალეზო, რომელნიც ღირს იქმენით ამ საოცარი სილამაზის დიდების ხედვისა! რა საიდუმლოები არ ცხადდება ამ დიდებულ საქმეში და რა სულიერ და მაცხოვნებელ სწავლებებს არ გვიცხადებს მაცხოვრის ასეთი გამშვენება! ადამიანის ცნობიერება ვერ მისწვდება ამას, ანგელოზებრივ გონებას შეუძლია მისი დატევა.

ამიტომ მეც, რაკი ვიცნობ ჩემს უღირსობას და ცოდნის სიმცირეს, ვერ ვბედავ შევიდე ამ სასწაულის სიღრმეში და რამეთუ პატივს ვცემ ამ ღვთაებრივ სილამაზეს, თავმოდრეკითა და მდაბალი დუმილით ვბედავ და მცირე სწავლებით მოგმართავთ თქვენ, რომელიც ვფიქრობ, იქნება ძალზედ სასარგებლოა თქვენი სულების ცხონებისათვის და ამიტომაც გთხოვთ, მომისმინეთ სიყვარულით.

ვუყურებ ამ ღვთაებრივ და გასაოცარ სილამაზეს, როდესაც უჟამო მამამ ზეციდან ცოცხალი ხმით დაამოწმა, რომ ეს გამშვენებული იესო, არის მისი

---

საყვარელი ძე.<sup>2</sup> იქ მყოფი მოციქულებისათვის სხვა არა უსწავლებია რა, მხოლოდ ეს: „მისი ისმინეთ!“ არ უთხრა მათ: ადიდეთ ჩემი ძეო, არც ადიდეთ საქმენი მისნიო, არც მისი სახელით იქადაგეთო, არც მისი სწავლებით განცვიფრდითო, ნურც სიცოცხლეს გაწირავთ მისთვისო, არც ტანჯვა, გაჭირვებანი და მწუხარებანი დაითმინეთ მისთვისო და არც სხვა მსგავსი რამ, არამედ თქვა, რომ მხოლოდ ისმინონ, იქონიონ მორჩილება, საკუთარი ნება მის, მამამისის მხოლოდშობილი ძის, ნებას დაუმორჩილონ- „მისი ისმინეთ!“

როდესაც გამოვიძიე ამის მიზეზი, დავინახე, რომ წმიდა წერილის ძველ და ახალ აღთქმაში და ასევე წმინდა მამების სწავლებაში, ეს მცნება არის ძალზედ საიდუმლო და ღრმა. და შეუძლებელი იყო, რომ მოციქულთათვის მიეცა სულისთვის სასარგებლო და ცხონებისთვის აუცილებელი სხვა უფრო დიდი მცნება, ვიდრე ეს - მორჩილება!<sup>2</sup>

მიზეზი არის ის, რომ, ვისაც მორჩილება აქვს, მას აქვს ყველა ნიჭი, მაღლი და სათნოება; ის არის გონებით სრული, მომთმენი, თავმდაბალი და კეთილი, მიმტევებელი, სტუმართმოყვარე, პატიოსანი, მშვიდი და მოკლედ რომ ვთქვათ, ის არის ყველა სათნოების ნავთსაყუდელი და ყველა ნიჭის ქურჭელი. და ეს ყველაფერი რომ სიმართლეა, ამას გვიმტკიცებს წმიდა სახარება.

წმინდა იოანე მახარობელი მოგვითხრობს თავისი სახარების I თავში, როდესაც იოანე ნათლისმცემელმა, მიღებული მაღლის გამო, დაინახა მისკენ მიმავალი იესო ქრისტე, ყველას მიმართ სიხარულით დაიწყო მოწმობა: “და მიჰხედა იესუს, ვიდოდა რაღ იგი, და თქუა: აჰა, ტარიგი ღმრთისაჲ.”<sup>2</sup> იოანეს ეს სიტყვები ეკლესიის ყველა მოძღვრის გაკვირვებას იწვევს.

მიუხედავად იმისა, რომ კაცობრიობაში იმდენი ცოდვაა, რომელიც უნდა წარეხოცა ძეს ღვთისას, ნეტავ, რატომ არ თქვა: რომელიც აღიღებს ცოდვათა სოფლისას, არამედ „ცოდვას“. და როდესაც ამბობს „ცოდვას“, გაუგებარია: ქრისტეს უნდა წარეხოცა მხოლოდ ერთი, რომელიღაცა ცოდვა და დანარჩენი დაეტოვებინა?

წმინდა თეოფილაქტე<sup>2</sup> განმარტავს სახარების ამ ადგილს: სოფლის ცოდვა, რომელიც წარხოცა უფალმა, არის ურჩობა. წარხოცა იმით, რომ თვითონ გახდა მორჩილი სიკვდილამდე. იოანემ დაარქვა მას სოფლის ცოდვა - ისე თითქოსდა სხვა უფრო დიდი ცოდვა არ არსებობდეს ამ სოფელში, ვიდრე ურჩობა. და თქვა: ცოდვა და არა ცოდვები, რადგან ერთი ურჩობა მოიცავს ყველა სხვა ცოდვას.



---

ამიტომაც, როცა ითქმება, რომ უფალმა წარხოცა ეს ერთი ცოდვა, იგულისხმება, რომ მასთან ერთად წარხოცა ყველა დანარჩენი და როგორც ამბობს წმინდა თეოფილაქტე: ურჩობა მისი საპირისპიროთი იყო განკურნებული, ანუ სოფლის ურჩობა დაიძლია ქრისტეს მორჩილებით. აქედან ძალიან ნათლად ჩანს, რომ ურჩობა არის ყველა ცოდვის დასაწყისი და ფესვი. და ამავდროულად მორჩილება არის ყველა სათნოების წყარო და დედა. ამიტომაც მამა ღმერთმა, ფერისცვალების დროს, სრული სამართლით მოციქულებს მისცა მორჩილების ეს მცნება. რადგან მასში მოქცეულია ყველა სათნოება და ნიჭი.

ჩემი სიტყვები მტკიცდება, უფლის, იესო ქრისტეს, ხორციელი ძმის, იაკობის მიერ ეპისტოლეს მეორე თავში ნათქვამი სიტყვებით, რომელიც ეხება აბრაამის მიერ თვისი ძის, ისააკის, მსხვერპლშეწირვას, მოციქული ამ მსხვერპლს ახსენებს მრავლობით რიცხვში, მაგრამ მსხვერპლი იყო ერთი და არა რამდენიმე. ანუ შესაწირი იყო ერთი და არა მრავალი. ამიტომაც წესით უნდა ეთქვა მხოლოდ ერთ რიცხვში და არა მრავლობითში. ამის საიდუმლო მდგომარეობს შემდეგში -- მსხვერპლი, რომელსაც სწირავდა აბრაამი, იყო მორჩილება და რადგან მორჩილება მოიცავს ყველა სათნოებას, შესაბამისად იგივეა ყველა კეთილი საგანი. ამიტომაც იაკობ მოციქულმა თქვა, რომ აბრაამი გამართლდა საგნებით და არა საგნით, რადგან ღვთის წინაშე მას შეეხება(?) მორჩილება, არა როგორც ერთი, არამედ როგორც მრავალი სათნოება. ასეთია დიდი და საკვირველი მორჩილების სათნოება.

ამიტომაც მეფეთა პირველი წიგნის მე-15 თავში სული წმინდა ამბობს: „უკეთესია მორჩილება, ვიდრე მსხვერპლი“. ანუ ღმერთისთვის მეტად სათნოა მორჩილება, ვიდრე მსხვერპლი, რადგან, ვინც სწირავს მსხვერპლს, ღმერთს სწირავს უცხო საგანს, ხოლო მორჩილება გულისხმობს, რომ ადამიანი ღმერთს საკუთარ ნებასა და თავისუფლებას უძღვნის. ღმერთისათვის მორჩილებაზე მეტად სხვა რაგვარი მსხვერპლი შეიძლება იყოს უფრო მოსაწონი? ამიტომაც წმინდა ეფრემი, მორჩილების შესახებ ქადაგებაში ამბობს: მორჩილებას შეუძლია ბევრად უფრო მეტი, ვიდრე სხვა დანარჩენ სათნოებას. რაშიც გვარწმუნებს წმინდა წერილის როგორც ძველი, ისე ახალი აღთქმა, საიდანაც ნათლად ჩანს, რომ ღვთის მორჩილებმა მოიხვეჭეს განსაკუთრებული საზღაური.

ღმერთმა ნოეს დაავალა კიდობნის გაკეთება ამაო და ბოროტი ფიქრების გარეშე.

---

აბრაამს უბრძანა: „გამოვედ შენი მიწიდან და შენი ნათესავებიდან და წარვედ მიწად, რომელსაც მიგიითითებ.“ და აბრაამმა შეასრულა ეს ბრძანება ყოველგვარი ეჭვის გარეშე. მეორედ ისევ აბრაამს უბრძანა, რომ დაეკლა საკუთარი ძე - ისააკი; და მან არა მწუხარებით, არამედ სიხარულით მიიღო ეს ბრძანება.

ისააკს მიეცა წყალობა, რადგან დამორჩილდა და სიყვარულით დათანხმდა, რომ შეწირულიყო ღმერთისთვის და არ შეშინდა. მოსეს მიეცა ბრძანება, რომ წასულიყო ეგვიპტეში ეგვიპტელთა მონობიდან ისრაელი ერის გამოსახსნელად. და მიუხედავად იმისა, რომ იყო ენაბლუ და ხედავდა ბევრ დამაბრკოლებელ სიძნელეს, მას ელოდა ტირანი და გულით მრისხანე ფარაონი, მაინც არ შეშინდა.

ქრისტეს მიერ პეტრეს ებრძანა გაეგლო წყალზე და მიუხედავად იმისა, რომ ეს შეუძლებელი რამაა, იგი უსიტყვოდ დაემორჩილა ბრძანებას.

პავლემ, ხილვისგან გამოწვეული შიშის გამო, როდესაც ცხენიდან გზაზე გადმოვარდა, თქვა: „უფალო, რას მიბრძანებ, რომ გავაკეთო?“ და ყოველგვარი ყოყმანის გარეშე დამორჩილდა იმას, რაც მას უთხრა ხმამ.

და ყველა მათ, ვინც ზემოთ ვახსენეთ, მათი მორჩილების გამო, ღვთისგან მიიღეს დიდება, ქება და პატივი: ნოე გახდა კაცობრიობის მხსნელი, აბრაამი - მრავალი ერის მამა; ისააკი - მაკურთხეველი ძისა და ქრისტეს წინა სახე; მოსე - ისრაელის წინამძღოლი და ღმერთის სიყვარული; პეტრე იქცა მოციქულთა თავად, რომელსაც ჩაბარდა ცათა სასუფეველის გასაღები; პავლე გახდა წარმართთა მოძღვარი, გამორჩეული ჭურჭელი და ზეციურ სათნოებათა მჭვრეტელი.

და არა მხოლოდ ესენი, არამედ ძველი თუ ახალი აღთქმის ყველა პირი, ის, ვინაც დაემორჩილა ღმერთს, გახდა მადლის ძე და ანგელოზებთან ერთად ხარობს ცათა სასუფეველში.

ახლა ჩვენი ცხოვნებისთვის ასეთ აუცილებელ და საჭირო მცნებას, რომელი ჩვენგანი იცავს? ჩვენ ყოველდღე: ლოცვის დროს, შეკრების, საუბრის, თითოეული საქმის კეთებისას ვახსენებთ ღმერთს და ვუწოდებთ მას უფალს და თუ ვუწოდებთ მას უფალს, სადღაა ჩვენი მორჩილება? რომელიც გვევალება, როგორც მონებს ბატონის მიმართ? მსახური ასრულებს თავისი ბატონის ნებას, ხოლო ჩვენ განა რას ვაკეთებთ? რომელ მცნებებს ვიცავთ? განა რა სიყვარულსა და პატივს მივაგებთ მას? თავად ამას მაღაქია წინასწარმეტყველის პირველ თავში: თუ ვარ მე უფალი, სადაა ჩემს მიმართ

---

შიში? რომელია თქვენს შორის, ვისაც ეშინის ჩემი, თაყვანს მცემს, და რცხვენია ჩემი.

„არ არის არც ერთი“, ამბობს დავით წინასწარმეტყველი მესამე ფსალმუნში, „ყველანი ერთად განდგნენ, უღირსნი გახდნენ; არცერთი არ აკეთებს სიკეთეს“.

ამიტომაც არ არის გასაკვირი, არც ჩვენი შვილები, არც ჩვენი მოსამსახურეები არ გვემორჩილებიან და ყველა ვნება, რომელიც აწვება ჩვენს სულს, ყველაფერი ეს ღმერთის სამართლიანი სასჯელია ჩვენ ზედა.

პავლე მოციქული რომაელთა მიმართ ეპისტოლეს პირველი თავის 29-ე მუხლში ამბობს: ვართ სავსენი უსამართლობით, მრუშობით, ნაყროვანებით ..... და თუ ეს ყველაფერი მართალია, დაამტკიცე სიყვარული, რომელიც გაგვაჩნია.

## ქადაგება № 24

ქადაგება მიწისძვრაზე 26 ოქტომბერს,

წმინდა დიდმოწამის და მრონმდინარის დიმიტრის

ხსენების დღეს

„უფალო, გვაცხოვნე, რამეთუ წარვწყდებით“

ქებისა და გალობის გარდა, სხვას რას უნდა ველოდოთ ქრისტიანული დღესასწაულების მოყვარულებისაგან წმინდა დიდმოწამე დიმიტრის ხსენებისას, რომელიც მთელს მსოფლიოში დღეს აღესრულება, მაგრამ მე, უღირსი და მცირედ მცოდნე, ვერ ვბედავ ქების გვირგვინების დაწნას და მისი სასწაულების შესახებ იმგვარად საუბარს, როგორც მას შეჰფერის. რადგან სხვაგვარ სწავლებას ითხოვს მისი მოწამეობრივი ბრძოლები და სხვას მისი ბრწყინვალე ღვაწლი.

---

ამიტომაც სხვებს მივანდობ მისი დიდებული საქმეების განდიდებას, დაე, სხვებმა ისაუბრონ მისი ზებუნებრივი სიმამაცის შესახებ, სხვებმა იქადაგონ მისი მოთმინების შესახებ, თუ როგორ დაითმინა ჭრილობები და შეხვდა სიკვდილს, ??ხოლო მე, მისი არა მჭევრმეტყველი გონებით განკვირვებული, ვცდილობ დუმილით თაყვანის ვსცე მას, მაგრამ მაინც წარმოვთქვამ დასაწყისში თქმულ სიტყვებს: „უფალო ,გავცხოვნე, რამეთუ წარვწყდებით“.

მსურს გიჩვენოთ, თუ რა განსაცდელში ჩაცვივდნენ შუა ზღვაში ნავში მყოფი მოციქულები, და როგორ დაუყოვნებლივ მიიღეს ხსნა მაცხოვარი იესო ქრისტესგან. იმედი მაქვს წმინდა დიმიტრის მეოხებით გასარგებლებთ სულიერად. ამიტომაც გთხოვთ, მომისმინოთ სიყვარულითა და ყურადღებით.

ვგიჟობ, ნამდვილად საშინელი იქნებოდა ზღვის ღელვა იმ დღეს, რადგან სახარებაც ამბობს, ის იყო დიდი: „აჰა, დიდი ღელვა მოხდა ზღვაში“.<sup>2</sup>

ცხადად წარმომიდგენია ის ზღვა, როგორ ქროდა ყველა მხრიდან ქარი, როგორ გროვდებოდნენ შავი და ხშირი ღრუბლები, მთელი ზღვა ივსებოდა მრისხანების ქაფით და ყველა მხრიდან მთასავით მაღალი ტალღები მოემართებოდა მათკენ. თითქოსდა ცხადად ვხედავ, როგორ გაშმაგებული ებრძვის ზღვის ღელვას მოციქულთა ნავი: ერთის მხრივ, მას ეხეთქებოდნენ ტალღები, ხოლო, მეორეს მხრივ, ქარი, ერთის მხრივ, მალღებოდა ცამდე, მეორეს მხრივ, ეცემოდა ჯოჯოხეთამდე. თითქოსდა ცხადად ვხედავ მოციქულთა სახეებზე გამოხატულ სიკვდილის შიშს: ერთი კანკალებს, მეორე ღელავს, მესამე შიშითაა შეპყრობილი, სხვა ყვირის, ამავდროულად ყველა ოხვრითა და ცრემლით, და ლოცვით ითხოვს ქრისტესაგან შველას, რომელსაც ამ დროს სძინავს: „უფალო, გვაცხოვნე, რამეთუ წარმწყდებით“.<sup>2</sup>

---

ხოლო მე არ მიკვირს, არც ზღვის მღელვარების, რადგან ასეთია მისი, როგორც არამდგრადი სტიქიის მუდმივი ბუნება-- ხან წყნარია, ხან მღელვარე. არც მოციქულების შიშისა მიკვირს, რადგან გაჭირვება ყოველთვის იწვევს ადამიანებში მღელვარებასა და შიშს. მე მიკვირს იმისა, რაც მოხდა შემდეგ, როცა მაცხოვართან მივიდნენ და შეევედრნენ, და იმავე წამს მიიღეს დახმარება, „და შეიქმნა დიდი სიმშვიდე,“<sup>2</sup> ნათქვამია სახარებაში.

იმავე წამს დამშვიდდნენ ტალღები, გაქრა სიბნელე, გაიფანტა ღრუბელი, დამშვიდდა ზღვა, და მთელმა და უვნებელმა ნავმა და მიაღწია ნაპირს.

როდესაც ვიძიებდი ამ სასწაულის სწრაფი ასრულების მიზეზს, სახარების განმარტებებიდან გასაგები ხდება, რომ ეს იყო მოციქულების მიერ ერთი სულითა და ერთი ხმით ნათქვამი ლოცვა; ყველამ ერთდროულად ღაღადჰყო, ყველამ შეევედრა და ყველამ ერთდროულად სთხოვა დახმარება: „უფალო, გვაცხოვნე და რამეთუ წარწყდებით“ ამიტომაც უფალმა იმ წუთშივე, როგორც კი მოისმინა მათი ლოცვა, დაიცვა და გადაარჩინა ისინი, არც ერთი არ მიატოვა ზღვის ღელვაში დასაღუპად.

ამიტომაც ამბობს წმიდა თეოფილაქტეც: სძინავს უფალს, რომ მოვიდნენ მასთან დახმარების სათხოვნელად შეშინებული მოციქულები, რათა მათი ერთობლივი ლოცვის შედეგად გადაარჩინოს ისინი განსაცდელისაგან. ნამდვილად, დიდ მაგალითს ვიღებთ ჩვენ ამ ამბიდან, რათა ჩვენც ვილოცოთ და ვთხოვოთ ღმერთს დახმარება ჩვენი საერთო განსაცდელის ჟამს.

წუთისოფელის მღელვარებაში ადამიანებს არასდროს აქვთ არც სიმშვიდე, არც მოსვენება. ზღვის ტალღებში მცურავი ნავეები არის სამეფოები, მხარეები, საუფლონი, ქალაქები, ხალხთა სიმრავლე, სახელმწიფოები, ქვეშევრდომნი, მდიდრები, ღარიბები, დიდნი და

---

მცირენი, რომლებიც მოგზაურობენ ზღვაში და განსაცდელში იმყოფებიან. დიდი ტალღები, რომლებიც აზვირთებენ ზღვას, იმ განსაცდელს განასახიერებენ, რომლებიც მუდმივად გვაწუხებს. ტალღები, რომლებიც ნავს ეკვეთებიან, იმ განსაცდელებსა და უბედურებებს -- რომლებიც ყოველდღიურად გვემართება.

ღრუბლები, რომლებიც ცას აბნელებენ, ელვანი, რომლებიც თვალებს აბრმავებენ, ქუხილი, რომელიც მამაც გულსაც კი აფრთხობს, განასახიერებს სხვადასხვაგვარ შემთხვევას: მოულოდნელ ხიფათს, მტერთა მიერ დაგებულ საფრთხეებს, სხვა ადამიანების გამოისობით გამოწვეულ მწუხარებას; ყაჩაღობებს, ტყვეობებს, მძიმე და აუტანელ გადასახადებს. ღმერთი უშვებს, რომ დაინახოს ჩვენი რწმენა და მოთმინება. ღმერთმა რომ ერი თვისი იხსნას ამ მძიმე განსაცდლებისაგან, ნეტავ, ახლა რაშია გადარჩენის საშუალება? ამ საშუალებას გვიჩვენებს მაგალითი ისრაელი ერისა, როდესაც მას უდაბნოში ავიწროებდა ქანაანის ჯარი, არადის მეფე<sup>2</sup>. მაგალითს გვაძლევენ ბეთილუას მცხოვრებლები<sup>2</sup>, როდესაც მათ ქალაქს ალყა შემოარტყა ოლომფორნეს მრისხანე მხედრობამ; მაგალითს გვაძლევს ეზრა, როდესაც ბაბილონის ტყვეობიდან ისრაელის გათავისუფლებულ ერთან ერთად ბრუნდებოდა იერუსალიმში; მაგალითს გვაძლევენ ნინევიელნი, რომლებიც, იონა წინასწარმეტყველის მიერ გაფრთხილებულნი, გადაურჩნენ ღვთის რისხვას-- განადგურებას.

ყველანი რადგან ილოცეს ერთი ხმითა და ერთი გონებით და სთხოვეს ღმერთს დახმარება, ამიტომაც გადარჩნენ. წმიდა წერილში ნათქვამია: „და ევედრებოდნენ ისრაელიანები უფალს, და შეისმინა უფალმა ხმა ლოცვისა ისრაელისა, და მისცა ქანაანი მის ხელთქვეშ.“ ასევე, ბეთილუას მცხოვრებლებმა შელადადეს უფალს, ყველამ ერთად და განუწყვეტილად, და შეისმინა ღმერთმა მათი ლოცვა და იხსნა ოლომფორნეს ხელთაგან. სთქვა ეზრამ: „შევსთხოვე ჩვენს ღმერთს სწორი გზა ჩვენთვის, ჩვენი

---

შვილებისთვის და ჩვენი გონებისთვის. და შეისმინა ჩვენი“. ასევე ნინევიელებმა ღმერთს განუწყვეტილად შელადადებდნენ, და ძაძებით შემოსნენ ყველანი, დიდნიც და მცირენიც, და დაინახა უფალმა მათი ცრემლები და არ მოსპო არც ისინი და არც მათი ცხოველები და არც მათი ქალაქი. ამიტომაც დავით წინასწარმეტყველი 21-ე ფსალმუნში ამბობს: „შენ გესავდნენ მამანი ჩვენნი, იხსენ ისინი, შენდა შეგლადადეს და აცხოვნეთ და რას ვნახულობთ ჩვენ კიდევ წმინდა წერილის ისტორიებსა და იგავებში, საიდანაც ვსწავლობთ, როგორ უნდა გავექცეთ ჩვენკენ მომავალ გასაჭირს. თავად ღმერთი გვასწავლის დავით წინასწარმეტყველის მიერ 41-ე ფსალმუნში: „დამიძახე მე დღესა გაჭირვებისა ჩემისასა, გიხსნი და გადიდებ“. 90-ე ფსალმუნში ნათქვამია: „ხმა ჰყოს ჩემდამი, და მე ვისმინო მისი და მის თანა ვიყო ჭირსა შინა; ვიხსნა იგი და ვადიდო იგი დღეგრძელობითა განვაძლო იგი და ვუჩვენო მას მაცხოვარებაი ჩემი.“ ასევე ისაია წინასწარმეტყველის წიგნის 50-ე თავში ნათქვამია „და განიხარებ გაჭირვებულნი, რადგან მთხოვენ და მე ვისმინო მათი ღმერთი ისრაელისა და მე არ მივატოვებ მათ“.

ასევე მსგავსი რამ ნათქვამია იერემია წინასწარმეტყველის 29-ე თავში, ზაქარია წინასწარმეტყველის წიგნში მე-10 თავში. უფალი ჩვენი იესო ქრისტე ასევე წმინდა სახარებაში გვასწავლის: „მთხოვდეთ და მოგეცემათ“. და რომ დავრწმუნდეთ, რომ მისი აღთქმა არის ჭეშმარიტი, მარკოზის სახარების მე-11 თავში გვეუბნება: “ყველაფერი, რასაც ითხოვთ ლოცვაში, ითხოვეთ და მოგეცემათ თქვენ.“ ამ ყველაფრიდან შეგვიძლია დავინახოთ, რომ არ არსებობს სხვა უფრო სასარგებლო და ღირსეული საქმე, ვიდრე ერთობლივი ლოცვა. ვთხოვით ღმერთს წყალობა და შემწეობა.

ჩვენ რომ ვიცავდეთ უფლის ამ რჩევასა და სწავლებას და ვლოცულობდეთ, როდესაც შეგვემთხვევა დიდი გაჭირვება და

---

განსაცდელი, ჰოი! რაოდენ დიდ დახმარებას, ნუგეშსა და უზომო წყალობას მივიღებდით ღვთისაგან.

ღმერთი არის ყოველთა მამა. ყველანი ვუყვარვართ, როგორც ჭემმარიტი შვილები და მისი უსაზღვრო წყალობისა და კაცთმოყვარეობიდან გამომდინარე, ის ვერ ითმენს, რომ ჩვენ მუდმივად ვიმყოფებოდეთ უბედურებებსა და გაჭირვებებში, ის მხოლოდ ჩვენს ლოცვას მოელის. მისი ყურადღება მუდმივად არის მომართული ჩვენკენ, რომ ისმინოს ჩვენი ლოცვების ხმა, მისი სასმენელი მუდმივად გახსნილია, რომ მოგვისმინოს მაშინვე, როცა მოვუხმობთ მის წმინდა სახელს.

მაგრამ რა უნდა ვთქვა ჩვენი საუკუნეების ადამიანთა დიდ (უგრძნობლობაზე) გულქვაობაზე, ყველას უჭირს, ყველა გაჭირვებაშია, ყველა კვნესის ტანჯვის უღელის ქვეშ. მაგრამ არის განა ვინმე, ვინც დავით წინასწარმეტყველთან ერთად ეტყვის უფალს: “უფლისა მიმართ ღალატყვა ჩირისა ჩემისასა?” ან არის ვინმე განა, რომელიც მწუხარების ჟამს არ მიმართავს ღმერთს: „შემიწყალე, უფალო, და ისმინე ჩემი?“

ჩვენ გვინდა, რომ ღმერთი გვეხმარებოდეს და გვწყალობდეს ისე, რომ არც კი ვლოცულობდეთ. მაგრამ განა გაგონილა ისეთი მეფე ან ბატონი, რომელიც ურიგებდეს თავის ერს წყალობას, შეუმსუბუქოს მძიმე გადასახადები იმის გარეშე, რომ არ სთხოვეს მას და არ დაუმტკიცეს თავისი გაჭირვება? ანუ უკეთ რომ ვთქვა-გაგონილა ისეთი მამა, რომელიც აძლევდეს პურს თავის შვილებს ისე, რომ არ სთხოვონ მას და ის, რასაც არ უკეთებს მეფე თავის ერს და მამა თავის შვილებს მათი თხოვნის გარეშე, გინდათ, რომ ღმერთმა გაგვიკეთოს ჩვენ--უღირსებს ისე, რომ არც ვილოცოთ? „გლახაკმა და ამპარტავანმა შემძულა მე“, - ამბობს უფალი ზირაქის წიგნის 25-ე თავში. ღმერთი ვერ ითმენს დაქცეულ, უბედურ ადამიანებს, არამედ იმათ, რომლებიც ამპარტავნობის გამო ქედმაღლობენ და არ უნდათ აჩვენონ რომ უჭირთ.



---

და როგორ ფიქრობთ, ვინ არის ეს ხალხი? ჩვენ ვართ ყველანი, რომლებიც განვიცდით მაგდენ აუტანელ მწუხარებას, ვნებებს, განსაცდელებს, გაჭირვებებს, უბედურებებს და მიუხედავად ამ ყველაფრისა,, არ ვიმდაბლებთ თავს ღვთის წინაშე, არ ვიხრით ქედს ჩვენი დიდი ამპარტავნობის გამო. ოხვრითა და ცრემლებით არ მივდივართ ღმერთთან დახმარების სათხოვნელად.

და როგორ უნდა გადარჩეს ერი, ეს უბედური ქვეყანა, როგორ უნდა დაიბერტყოს გაჭირვების ის მძიმე ტვირთი, რომელიც მას აწევბა? ჩვენ მხოლოდ ჩვენს ძალებსა და გონებაზე ვართ მინდობილი, რომელიც ღვთის წინაშე არარაობაა, ვცდილობთ, წარვმართოთ ერი და დავიცვათ ის ბოროტებისაგან. მაგრამ ტყუილად ვშრომობთ. რადგან ამბობს მაცხოვარი იესო ქრისტე: „უჩემოდ ვერაფერს ვერ შეძლებთ“. ასევე დავით წინასწარმეტყველი ამბობს 126-ე ფსალმუნში: „უკეთუ არ დაიცავს უფალი ქალაქი თვისი ცუდად შვრებიან მლოცველი მისნი“.

მაგრამ ასე მგონია, რომ ზოგიერთმა მსმენელმა შეიძლება თქვას, რომ ჩვენ ისედაც ბევრს ვლოცულობთ ღმერთზე, როდესაც გვემართება მწუხარება და გაჭირვება და მივმართავთ მის წყალობას, მაგრამ ვერ ვხედავთ ვერანაირ დახმარებას, ვერც ვრწმუნდებით, რომ ჩვენი ლოცვები აღწევნ ცას. თუმცა არა მგონია, ამას აკეთებდეს ვინმე.

მოგიყვებით რა უპასუხა კეისარმა ტიბერიუსმა ერთ ახალგაზრდას, რომელიც მრავალი ჩადენილი ბოროტების გამო დიდხანს იტანჯებოდა საპყრობილეში ბორკილებით, შიმშილით, მწყურვალეობით და წყვდიადში ყოფნით და რადგან იცოდა, რომ ციხიდან გამოსვლის არანაირი იმედი არ ჰქონდა, დიდი ხვეწნით მიმართა კეისარს, რომ ებრძანებინა მისი სიკვდილით დასჯა, რომ შეწყვეტილიყო მისი ტანჯვა-წამება, რაზეც ტიბერიუსმა უპასუხა: „შენ ჯერ არ მოგიპოვებია მაღლი ჩემი თვალების წინაშე და მთხოვ დიდ წყალობას?“

---

და თუ დამნაშავეს არა აქვს კადნიერება ითხოვოს მიწიერი მეფისაგან თუნდაც სიკვდილი, ხოლო ჩვენ, როდესაც იმდენად დამნაშავენი ვართ ყოვლად ძლიერი ზეციური მეფის წინაშე და ვართ ცოდვებით დამძიმებული, როგორ გვინდა ღმერთმა მოისმინოს ჩვენი ლოცვები და გვიბოძოს წყალობა? წაიკითხეთ ისაია წინასწარმეტყველის წიგნის 59-ე თავი და გაიგეთ მიზეზი: ჩვენი ლოცვები რატომ არ აღწევენ ღმერთის სასმენელს. წინასწარმეტყველი ამბობს: განა არ ძალუძს უფალს ჩვენი გადარჩენა? განა დამძიმდა მისი ყური, რომ მოგვისმინოს? როგორ ფიქრობთ-აგრძელებს წინასწარმეტყველი-განა არ ძალუძს ღმერთის ყოვლადძლიერ ხელს თქვენი განსაცდლებისაგან ხსნა? თუ გგონიათ, რომ მისი ყურები დახშულია და არ ისმენს თქვენს ლოცვას? არა, ასე არ არის. თქვენი ცოდვების გამო შეატრიალა ღმერთმა თქვენგან თავისი სახე, რომ არ შეგიწყალოთ. თქვენი მრავალი ცოდვა არის ის, რაც აჩერებს მის წყალობას და ის, რაც აჩერებს თქვენს ლოცვებს, რომ მიაღწიოს მის ღვთაებრივ დიდებას. რადგან ხელნი თქვენნი გასვრილნი არიან სისხლში; ბაგენი თქვენნი უსჯულოებას მეტყველებენ, თქვენი ენა უკუღმართობებს ფიქრობს; ფეხნი თქვენნი ბოროტების გზაზე დადიან. არავინ არ მეტყველებს მართალს, არავინ არ იძლევა სწორ რჩევებს, არავინ არ ადასრულებს სწორ სამართალს.

და როგორ გინდათ, რომ თქვენი ისმინოს ღმერთმა? როგორ გიხსნათ გაჭირვებისაგან? და უკეთ რომ ვთქვა, როგორ გვითმენს მაგდენს, როგორ გვაცდის, როგორ გვიტანს და არ გვანადგურებს, როგორც სოდომელებს? (დიდება, უფალო, დიდ მოთმინებასა შენსა, დიდება შენდა).

ერთ-ერთი ფილოსოფოსი ერთხელ ზღვაზე მოგზაურობდა ნავით და მასთან ერთად ნავში იმყოფებოდა რამდენიმე ბოროტი ადამიანი. დაწყობა ზღვაზე დიდი ქარიშხალი, დალუპვის საფრთხის წინაშე აღმოჩნდნენ. ბოროტმა ადამიანებმა დაიწყეს თავიანთ ღმერთებზე ლოცვა, რომ იხსნან

---

ისინი. ხოლო ფილოსოფოსმა უთხრა მათ: გთხოვთ, ხმას ნუ იღებთ, ვაი და გაიგონ ღმერთებმა, რომ აქა ხართ, მაშინ მართლა დავილუპებით. ასევე მეც ვეუბნები ცოდვილებს, რომლებიც ლოცულობენ, სჯობს გაჭირვების ჟამს ხმას ნუ იღებენ თავიანთი ბილწი ბაგეებით, რადგან გადარჩენის ნაცვლად, შეიძლება სულ მთლად დაილუპონ მათი ცოდვების გამო.

უპირველესად გვმართებს მივატოვოთ ბოროტება, მტაცებლობა, უკუღმართობა, მტრობა, შური, სიძულვილი და მხოლოდ მაშინ ვილოცოთ. რადგან მხოლოდ მაშინ ღმერთის სასმენელი იქნება ჩვენს მიმართ მოპყრობილი. წმინდა იოანე ოქროპირი ამბობს: „მხოლოდ მაშინ, როგორც წმინდა ბაგეებით ვლოცულობთ, მხოლოდ მაშინ ის აღწევს უფლის სასმენელს“. როდესაც ჩვენ ვართ წმინდა, მხოლოდ მაშინ ჩვენი ლოცვა აღწევს ზეცას. მაგრამ ამის გარდა სხვა რაღაც არის საჭირო, რომ ლოცვის მეშვეობით დავიხსნათ თავი ჩვენი გაჭირვებებისაგან. აუცილებელია, რომ ლოცვა იყოს საერთო, რადგან ბოროტება არის საერთო. ამიტომ ყველამ ერთობლივად უნდა ვილოცოთ, ყველამ ერთობლივად უნდა ვთხოვოთ უფალს დახმარება, როგორც ეს გააკეთეს დღეს მოციქულებმა ნავში. ერთი პირითა და გულით შეღალადეს: „ უფალო, გვიხსენ, რამეთუ წარვწყდებით“. მაგრამ ისე კი არ უნდა იყოს, რომ ერთი ლოცულობდეს და სხვა არც კი ფიქრობდეს; ერთი ტიროდეს და მეორე იცინოდეს; ერთი წუხდეს და სხვა ხარობდეს, რადგან მაშინ, ნამდვილად, ღმერთი არ მოგისმენს.<sup>2</sup>

მაცხოვარი იესო ქრისტე, მათეს სახარების მე-16 თავში ამბობს: „თუ დედამიწაზე შეიკრიბება ორი ადამიანი, ნებისმიერს, რასაც ითხოვენ - მიეცემათ მათ მამისგან ჩემისა ზეცათას“, მაშასადამე, როდესაც ორი ადამიანი ერთად ლოცულობს და იღებს წყალობას, მით უმეტეს, მიიღებს მთელი ერი და მთელი სიმრავლე, თუ ერთი პირით, ერთი ხმით და ერთი გულით შესთხოვს ღმერთს დახმარებას.

---

ამიტომაც, ჩემო საყვარელო შვილებო, გთხოვთ, ილოცეთ ყოველთვის და ყველამ ერთად. მით უმეტეს, ჩვენს დროში, როდესაც იმძლავრა გაჭირვებამ და ყველას ყოველი მხრიდან გვავიწროვებენ უბედურებები, მწუხარებები და ტანჯვები. წინასწარმეტყველი დავითი ამბობს: „ნება, რომელთა ემინოთ უფლისა. აღსრულება და მათ ლოცვას შეისმენს და აცხოვნებს მათ“. ღმერთი მარადის შეგვისმენს, როდესაც წმინდა გულით შევთხოვთ მას და ის გვიხსნის ყოველი განსაცდელისა და გაჭირვებისაგან მეოხებითა წმინდისა დიდისა მოწამისა დიმიტრისა, რომლის ხსენებას აღვასრულებთ ჩვენ დღეს და რომლის მეოხებაც შეეწიოს ჩვენს მთავარს, პატიოსან თავადობას და მთელ ქრისტიან ერს. ამინ.

## ქადაგება № 25

### ქადაგება მთავარანგელოზთა დღესასწაულზე, 8 ნოემბერს

„ყურად იღეთ, რომ არ აწყენინოთ ამ მცირეთაგანს“.

მხოლოდ მდიდრებსა და დიდ ადამიანებს არ ეკუთვნით დიდება და პატივი, არამედ ამ მადლის ღირსნი ასევე მცირე და თავმდაბალი ადამიანებიც არიან, მიუხედავად იმისა, რომ დიდნი ბრჭყვიალებენ მდიდრული სამოსით, ხოლო მცირეთ ისიც კი არ გააჩნიათ, რომ სხეული დაიფარონ. დიდებულნი განისვენებენ ლამაზ და ფართო საწოლებზე, ხოლო მდაბიონი პირდაპირ მიწაზე ან ჭილოფზე გდიან. პირველთ გარს ახვევიათ მრავალი მსახურნი, ხოლო მეორენი მეგობართა და ახლობელთა დახმარებასაც კი მოკლებულნი

---

არიან; ერთნი სიმდიდრესა და ფუფუნებაში არიან, ხოლო მეორენი-  
მწუხარებასა და გაჭირვებაში. მიუხედავად ამ დიდი განსხვავებებისა, მცირეთ  
არ ეკუთვნით ნაკლები პატივი და სიყვარული, ვიდრე დიდებულებსა და  
მდიდრებს, არც სამართლიანია, რომ დიდებულებს ხალხი თაყვანს სცემდეს,  
ხოლო მცირეთ მასხრად იგდებდნენ. ამიტომაც ყველას ეშინოდეს  
გაჭირვებულების წყენისა; ამიტომაც რცხვენოდეს მათ, ვინც ჩაგრავს  
გაჭირვებულებს, თუ მდიდარი ძალითა და ძალაუფლებით პასუხობს  
შეურაცხყოფას, ღარიბების შემთხვევაში მფარველი ანგელოზები სჯიან მათ,  
ვინც მათ აწყენინებს. ამიტომაც უფალი იესო ქრისტე უბრძანებს ყველას,  
დღევანდელ სახარებაში, ფრთხილად იყვნენ და ასეთი ადამიანები არ  
ჩათვალონ ამ ქვეყნის ნაგვად და დასაცინად. „ყურად იღეთ, არ აწყენინოთ ამ  
მცირეთაგანს“ (მათე 18), - ამბობს უფალი. ამის მიზეზი არის ის, რომ ღმერთს  
იმდენად უყვარს ისინი, რომ მათ ანგელოზები, რომლებიც მუდმივად ჭვრეტენ  
ღვთის სახეს ზეცაში, თან სულ სდევნენ. <sup>2</sup>დღევანდელი სახარების სიტყვებიდან  
ვიგებთ,

თუ რაოდენ დიდებულნი არიან ღვთის წინაშე მცირენი; ყველა ხედავს,  
რომ ის, ვინც ბედავს მათთვის წყენის მიყენებას, რაოდენ ცოდვას სჩადის და  
რაგვარი პასუხისგება მოუწევს თავიანთი საქციელის გამო.

მე მივმართავ ბრძენსა და სწავლულ ადამიანებს, მთავარანგელოზთა  
კრებას, რომლის ხსენებასაც აღვნიშნავთ ჩვენ დღეს, იდღესასწაულონ ისე,  
როგორც მას ეგების. მე მათ გავახარებ სხვა სიტყვებით: იქნებ ღმერთმა  
დაუშვას რომელიმე ცოდვილის გონების განათება და მოიყვანოს იგი  
სინანულში, როგორი სიხარული იქნება ზეცაში, ერთი მონანიებული  
ცოდვილის გამო! ამიტომაც გთხოვთ, მომისმინეთ სიყვარულით და მიიღეთ  
სულიერი სარგებელი. ამა სოფელში არსებობენ ორი სახის დამცირებულნი,  
რომელთაც ადამიანები, როგორც წესი, წყენას აყენებენ: პირველნი არიან  
ღარიბნი, ხოლო მეორენი მღვდელნი. ღარიბებისათვის ნათქვამია ზირაქის

---

სიბრძნის მე-13 თავში: „მდიდარს სძულს ღარიბი“. ასევე იაკობ მოციქული (უფლის ძმა) თავისი ეპისტოლეს მე-2 თავში ამბობს: „ხოლო თქვენ შეურაცხევით გაჭირვებული.“ მღვდლების შემთხვევაში კი ამას მოწმობს საყოველთაო და განსაკუთრებით ამ კუთხის ჩვეულება, რომ მღვდლები იყვნენ ყველაზე უპატიო და დამცირებულნი. მაგრამ სინამდვილეში ისინი, ვინც ხალხს მცირედ და უბრალოდ მიიჩნევს, არ არიან მცირენი, არამედ ბევრი მათგანი მეტად ღირსეული და დიდი ადამიანია, რადგან შემძლია ამათ შესახებ ვთქვა მოციქულის სიტყვებით, რომ მთელი სოფელი არ არის მათი ღირსი. ღარიბნი არიან იმდენად დიდნი, რაოდენ დიდიც არის თავად ქრისტე, რადგან მათ არც მსახურნი, არც მეგობრები ეწოდებათ, არამედ ძმები: „რაც უქენით ამ მცირეთაგანს ძმათა ჩემთაგანს, მე მიყავით.“ ხოლო რაც შეეხება მღვდლებს, ისინი იმდენად შეუდარებელნი არიან, რომ ღმერთის შემდეგ მათი მსგავსი არ არსებობს არც ზეცაში, არც დედამიწაზე. ისინი ღმერთთან შედარებით მცირენი არიან, ხოლო სხვა ადამიანებთან შედარებით კი დიდნი. რა თქმა უნდა, მღვდლები ანგელოზები არ არიან, მაგრამ მაღლის გამო, რომელსაც ატარებენ, ანგელოზზეც დიდნი არიან. ამიტომაც ამბობს წმინდა ეფრემ ასური მღვდლობის შესახებ პირველ სიტყვაში: „დიდებულ სასწაულს და გამოუთქმელ ძალას წარმოადგენს მღვდელი; ცას სწვდება, ანგელოზებთან ურთიერთობს და ღმერთთან აქვს სიახლოვე“. ამ მცირედთა ანუ მღვდელთა სიდიდე, რომ შეგეწიოთ, რომლებსაც ხალხი მასხრად იგდებს, დაუფიქრდით, რა ძალის მქონენი არიან ზეცაში და დედამიწაზე, ადამიანებისა და ღვთის წინაშე.

როდესაც უფალმან ჩვენმან, იესო ქრისტემ, შეუნდო ცოდვები განრღვეულს, რომელიც მოუყვანეს მას განსაკურნებლად, იცით, რა თქვეს მწიგნობრებმა და ფარისევლებმა, რომლებიც იქ იმყოფებოდნენ: „ვის ძალუძს ცოდვების შენდობა?“ მართალია, ერთადერთი, ვისაც შეუძლია ადამიანებისათვის ცოდვების შენდობა-არის ღმერთი ანუ ღვთის მაღლი,

---

მაგრამ მღვდლები ყოველდღე შეუწოდებენ ცოდვილებს მათ ცოდვებს და ჩვენ ყველას გვწამს, რომ მათ აქვთ ამისი ძალა, შეგვიძლია ვთქვათ, რომ ამ სოფელში არ არიან სხვა ღმერთები?

მოისმინეთ, სხვა უფრო მნიშვნელოვანი რამ რომ მომხდარიყო აქ, თქვენ თვალწინ. რომ გენახათ ერთ მხარეს მტრების მიერ დაჭრილი შავი არაბები, სასიკვდილო წყლულებით და მძიმე ჯაჭვებით დაბმულნი და მეორე მხარეს ძალზედ ძლიერი ადამიანი, რომელიც ეტყვის მათ: გათავისუფლდით და განიკურნოს თქვენი წყლულები, თქვენს სხეულებს მოსცილდეს სიშავე და ამ სიტყვების შემდეგ დაგენახათ, მათ ხელებსა და ფეხებს როგორ ეხსნებათ ბორკილები, როგორ ხდებიან მეყსეულად ჯანმრთელნი და როგორ თეთრდება მათი სხეულები, გეკითხებით, ნეტავ, რას იტყოდით იმ ადამიანზე? რას იტყოდით მის ძალაზე? დარწმუნებული ვარ, თქვენ იტყოდით და აღიარებდით, რომ ის ადამიანი ყველა ადამიანზე აღმატებულია, რომ ის ზეციდან გადმოსული სხვა ღმერთი და კაცია.

ახლა წარმოიდგინეთ, რომ ეს ადამიანი არის ერთი მცირეთაგანი, რომელსაც მთელი სოფელი არაფრად აგდებს, შავი არაბები არიან საწყალი ცოდვილები, რომელთაც ცოდვა ეშმაკებივით აშავებს; ესენი ყოველნი დაჭრილნი არიან, რადგანაც რამდენჯერაც სჩადიან ცოდვას, იმდენჯერ მათ სულებში აღიბეჭდება სასიკვდილო ცოდვები. ისინი მძიმე ჯაჭვებით არიან დაბმულნი, რადგან ცოდვა ეშმაკის მონებად აქცევს მათ. აქ მოდის ის მცირე საწყალი მღვდელი და ერთი სიტყვით: „ღმერთმა შეგინდოს ცოდვანი შენი,“ ცოდვილთა სულებს უკეთებს უფრო დიდებულ რამეს, ვიდრე, რაც წედან მოვისმინეთ: ხსნის ცოდვების საკვრელებს, კურნავს ჭრილობებს, წმენდს ცოდვის ლაფისაგან, ათავისუფლებს ეშმაკის სულებისაგან, ამეგობრებს ღმერთთან და ხდის ანგელოზებთან თანამყოფს.

ახლა როგორ გეჩვენებათ ეს მცირედი? როგორ ფიქრობთ, არსებობს მასზე ძლიერი დედამიწაზე? სხვა რა გითხრათ: არც დედამიწაზე და არც ზეცაში

---

ღმერთის გარდა არავის აქვს იმხელა ძალა, როგორც იმ მცირეს. ეხლა დაგიმტკიცებთ ამას- გაიხსენეთ ის ადამიანი წმინდა სახარებიდან, რომელიც იერუსალიმიდან იერიქონში ჩამოდიოდა და რომელსაც ავაზაკები დაესხნენ თავს, ის შეიძლება ყოფილიყო როგორც ჩვენ, ქრისტიანი და მართლმორწმუნე. ცხადად წარმომიდგენია ის, წყლულების გამო, ნახევრად მკვდარი წევს მიწაზე, ყველასგან ითხოვს დახმარებას, წუხს და ტირის არა იმდენად სიცოცხლისათვის, რომელიც სცილდება, არამედ სულისთვის, რომელიც შეიძლება დაეკარგა მრავალი ცოდვების გამო.

ახლა ვნახოთ, აქ მოვიდნენ დიდებული მეფეები და ამა სოფლის ძლიერი, ვნახოთ-აქვთ იმდენი ძალა, რომ გადაარჩინონ იმ საწყალი ადამიანის სული მარადიული ტანჯვისაგან? რა გითხრათ: მეფეები და ამა სოფლის ძლიერი აქ რა მოსატანია?! მოვიდნენ სასუფევლის ანგელოზები, მრავალთვალნი ქერუბიმნი, ექვს- ექვს ფრთიანი სერაფიმნი, საყდარნი, უფლებანი, ანგელოზთა ყველა დასნი და ვნახოთ, ეყოფათ თუ არა იმდენი ძალა; მიუშვი დასახმარებლად, თან წამოიყვანონ ანგელოზთა დასნი, მოვიდნენ მოწამეები, მოციქულები, იჩქარონ ღირსთა, მართალთა, წინასწარმეტყველებმა, პატრიარქებმა, მათთან ერთად ზეციდან გადმოვიდეს თავად ყოვლადწმინდა დედა ღვთისმშობელი- ანგელოზთა და ადამიანთა დედოფალი, და რა გგონიათ? ფიქრობთ, რომ ანგელოზთა და წმინდანთა ეს ყველა დასი შესძლებს გამოიხსნას ის ნახევრად მკვდარი ადამიანის სული ცოდვებისაგან, რომელიც ექაჩებიან მას ჯოჯოხეთში? თუ ვინმე იტყვის, რომ მათ ეს შეუძლიათ, ის ადამიანი არ იქნება მართალი, რადგან ასეთი რამ ეწინააღმდეგება წმინდა ეკლესიის სწავლებას, ის ადამიანი არ იქნება ქრისტეს სამწყსოდან, რადგან ქრისტეს არ უსწავლებია ასეთი რამ სახარებაში. ანგელოზებს შეუძლიათ ილოცონ, წმინდანებს და მართლებს ევედრონ, დედა ღვთისმშობელს-უმუამდგომლონ, რომ იმ ცოდვილი ადამიანის სულმა მიიღოს



---

ცოდვებისაგან ხსნა, მაგრამ ცოდვების შენდობა საკუთარი ძალით არ შეუძლია არც ერთ წმინდანს.

მიზეზი ის არის, რომ წმინდანებს კი არა აქვთ გახსნისა და შეკვრის ძალა ზეცაში, არამედ მღვდლებს, ადამიანებს, აქ- დედამიწაზე. ახლა ხედავთ? რაც არ შეუძლია წმინდათა მთელ დასს, ძალუმს დედამიწაზე ამ მცირეთაგან ერთ-ერთს. აბა ვნახოთ, აქ, შემთხვევით რომ მოვიდეს ნებისმიერი მღვდელი, დაინახოს სასიკვდილოდ დაჭრილი ადამიანი, რომელიც ითხოვს დახმარებას და სულის ცხოვნებას, დაინახოს მისი ცრემლები, მისი კვნესა, მოისმინოს მისი ლოცვა და დალოცოს ის კაცი იმ ხელით, რომელსაც არ იღებენ სამთხვევად ამა სოფლის დიდებულნი, მიუშვი მხოლოდ თქვას: გათავისუფლებ ყველა შენი ცოდვისაგან. იმავე წამს დაინახავთ უცხო, საშინელსა და დიდებულ საქმეს, იმ წამშივე იმ ადამიანის სული მარადიული ტანჯვისაგან ცხოვნებას მოიპოვებს, მიიღებს ცოდვათა შენდობას, გაიქცევიან ეშმაკები, გაიხარებენ წმინდა ანგელოზები და ღვთაებრივი სამართლიანობა, რომელსაც ხელთ ეპყრა საზღაურის მიღების მახვილი; მას ისევ ჩააგებს ქარქაშში და გახდება ღმობიერი.

ამიტომაც ცხადია, რომ ღმერთის გარდა ზეცაშიც არავის აქვს იმხელა ძალა და უფლება, როგორც აქვთ დედამიწაზე ამ მცირედთაგანთ, ანუ მღვდლებს

ამ თითქოსდა უმნიშვნელო ადამიანთა კიდევ ერთ სასწაული საქმე იხილეთ. მთელი სამყარო გაოცდა, როცა იესო ნავემ ცაზე მზე უძრავად გააჩერა, იქამდე ვიდრე არ დაამარცხა მტრები; მაგრამ ბევრად საკვირველი იქნებოდა, რომ იესო ნავეს მზისათვის ეთქვა, რომ უძრავად კი არ გაჩერებულიყო ცაზე, არამედ დედამიწაზე ჩამოსულიყო- ეს ხომ ჭეშმარიტად საშინელი რამ იქნებოდა. ის, რასაც მღვდელი თითქმის ყოველდღიურად საკურთხეველში აკეთებს, არაფრით არ ჩამოუვარდება ამ საქმეს. იგი კი არ უბრძანებს ცაში მყოფ ხილულ მზეს, არამედ მის მიერ გამოთქმული

---

სიტყვებისა და ლოცვებით დედამიწაზე ჩამოჰყავს მზე სიმართლისა, ანუ თავად მხოლოდშობილი ძე ღვთისა ჩამოჰყავს ზეციდან, პურისა და ღვთის საკუთარ ხორცად და სისხლად გადასაქცევად და ცოდვათა მისატევებელი მსხვერპლის აღსასრულებლად. მღვდელი ამას ასრულებს ერთხელ და ორჯერ კი არა, არამედ წლის განმავლობაში ნებისმიერ დღესა და ნებისმიერ ადგილას, სადაც მოისურვებს. განა ეს არ არის ძალა, რომელიც ანგელოზებსაც კი განაკვირვებს. პავლე მოციქული ებრაელთა მიმართ ეპისტოლეს VII თავში, ძველი აღთქმის მელქისედექს ამსგავსებს ძეს ღვთისას, რადგან ისიც სწირავდა ღმერთს მსხვერპლს ღვინისა და პურის სახით, რაც წმიდა ევქარისტის წინა სახეს განასახიერებდა.

ხოლო ჩვენ ვკადნიერდებით და უღირსად ვიხსენიებთ ხოლმე ჩვენს მღვდლებს, რომლებიც ყოველდღიურად არა წინა სახეს და ჩრდილს, არამედ ჩვენი მაცხოვარი ღმერთის ჭეშმარიტ სისხლსა და ხორცს სწირავენ.

განა ეს მღვდლები მელქისედექზე უფრო მეტად არ არიან მიმსგავსებულნი ძეს ღვთისას? ჭეშმარიტად, გონება ვერ პოულობს აზრებს, არც ენა სიტყვებს, რათა გამოხატოს ამ მცირეთა სიდიადე.

და ამ დროს რა პატივს მიაგებს მათ ხალხი? უფრო სწორედ რომ ვთქვა, რა წყენას არ იღებენ ეს ადამიანები ქრისტიანებისაგან და თავიანთი სულიერი შვილებისაგან?

ხოლო მე ვიტყვი, ამაში ჭეშმარიტად არის სიმართლის მარცვალი, მაგრამ უპირველეს ყოვლისა, მე ყველას ვუპასუხებ წმინდა წერილის სიტყვებით:

„ვინ დაგადგინა შენ მთავრად და მსაჯულად ჩუენ ზედა?!“ ასევე ჩემთან ერთად წმინდა პავლე მოციქულიც ამბობს:

„შენ ვინ ხარ, რომელი განიკითხავ სხვისა მონასა?“ ასევე ებრაელთა მიმართ ეპისტოლეს მეორე თავში ნათქვამია: „ამას რამე ჰგონება, ჰოი, კაცო, რომელი შჯი ესევითარისა მოქმედთა მათ და იქმ მასვე ვითარ-მე შენ განერე საშჯელსა ღმრთისასა?“ ვინ მისცა უფლება საერო ხალხს, რომ ბოროტად

---

ილაპარაკონ მღვდლებზე და მზაკვრულად ილაპარაკონ მათ ცხოვრებაზე და ქმედებებზე? განა დიდი კონსტანტინე არ იყო კეისარი და თანაც ქრისტიანი კეისარი? მაგრამ, როდესაც მიუტანეს ამბავი, რომ ერთ-ერთ მღვდელი ცოდვილი და უძლები ცხოვრებით ცხოვრობს, კონსტანტინემ არ მოინდომა მისი ცხოვრებისა და საქმეების გამოძიება, არამედ, როგორც ქრისტეს მოყვარე კაცმა, თქვა: „საკუთარი თვალებითაც რომ დავინახო, რომ მღვდელი ცოდვას ჩადის, ჩემს მანტიას გადავაფარებდი და დავმალავდი მის ცოდვას.“ ასევე ნივეის პირველ მსოფლიო კრებაზე, როდესაც ზოგიერთი მღვდლისა და ეპისკოპოსის წინააღმდეგ მიმართული წერილი მიუტანეს, ნეტარმა კეისარმა არ მოისურვა წაკითხვა, დახია და თავადვე ჩააგდო ცეცხლში და ამგვარი ღირსშესანიშნავი სიტყვები წარმოსთქვა: „ღმერთმა ნუ ქნას, რომ როდესმე განვიკითხო ღვთის მღვდლები.“

მაშასადამე, რისი გაკეთებაც ვერ გაბედა ასეთმა დიდმა და წმინდა კეისარმა, როგორ ბედავს, რომ რიგითმა, ცოდვილმა, უღირსმა, საცოდავმა ადამიანმა გააკეთოს?

მეორეს ასეთ პასუხს გავცემ: თქვენ რომ ამბობთ მღვდლებზე ცოდვები აქვთო, ის ცოდვები ბავშვობიდანვე მოჰყვებათ, თუ მას შემდეგ დაიწყო შეცოდება, რაც მღვდლები გახდნენ? თუ ბავშვობიდან მოჰყვებათ, ე.ი. მათი ბრალი კი არ არის, არამედ ერის ხალხისა, რომლებმაც ისინი არ აღზარდეს ღვთის შიშით, სწორი სწავლებითა და კეთილი მაგალითებით. ხოლო, თუ შემდგომში, უკვე როგორც მღვდლებმა დაიწყეს მათი ჩადენა, ისევ და ისევ ერის კაცებისაგან ისწავლეს ეს, იმათგან ისწავლეს ყველანაირი ბოროტება, რამეთუ ბოროტებას მღვდლები კი არ ავრცელებენ, არამედ ერისკაცნი. მაშ, რატომ არ ლაპარაკობთ თქვენს თავზე, ბოროტების მაგალითს რომ იძლევიან? რატომ განიკითხავთ მღვდლებს, რომელნიც თუმცა კი გახდნენ ბოროტნი, მაგრამ განა იმიტომ არა, რომ ბოროტი მასწავლებლები ჰყავდათ?

---

მაგრამ შევუერთდები თქვენს აზრს და დაგეთანხმებით რომ ყველაფერი, რასაც ამბობთ მღვდლებზე, სიმართლეა. ოღონდ მოისმინეთ ერთი ისტორია.

არკადი კეისარის მეუღლემ, დედოფალმა ევდოკიამ, როდესაც შეიტყო, რომ ღაზის მოსახლეობის უმრავლესობა არ არის ქრისტიანი, თაყვანს სცემენ კერპებს, ურჩია თავის გვირგვინოსან მეუღლეს ყოველი ღონე ეხმარა ამ ხალხის ქრისტიანობაზე მოსაქცევად, რომ ისინი თავიანთი წარმართობით არ შეურაცხყოფდნენ: არც სამეფოს, არც ქრისტეს სახელს და არც ჭეშმარიტ სარწმუნოებას. არკადი კეისარმა უპასუხა: „დიახ, დიდი ხანია ვიცი მე ეს ამბავი, რომ იმ ხალხის უმრავლესობა კერპთაყვანისმცემელია, მაგრამ რა ვქნა? საჭიროა მოვაჩვენო, რომ არაფერი ვიცი და მივუშვა, ისე მოიქცნენ, როგორც უნდათ, რადგან მათი მიერ გაღებული გადასახადებიდან სამეფო დიდ მოგებას იღებს.“

ახლა მეც ამ პასუხიდან ვიღებ მაგალითს, როგორ გავაჩუმო ის ხალხი, რომელიც ასეთი კადნიერებითა და მონდომებით განიკითხავს მღვდლების ცხოვრებას. თქვენ, მოშურნენო, როდესაც ამბობთ, რომ მღვდლები ბოროტნი და ცოდვილნი არიან, მეც გიდასტურებთ და ვამბობ, რომ ცოდვილნი არიან, ოღონდ ისინი, ვისაც თქვენ ცოდვილებად თვლით, თქვენ გლოცავენ. ისინი თქვენ გაკურთხებენ, წმინდა ნათლისღებით მეორედ გშობენ, წმინდა მირონცხებით სულიწმიდის ბეჭედს განიჭებენ, თქვენი ცხოვრების წიგნიდან ცოდვებს შლიან, ღვთის მეგობრებად გხდიან, გაზიარებენ უფლის სისხლსა და ხორცს, თავიანთი ლოცვებით გეხმარებიან თქვენი ავადმყოფობის, თქვენი გაჭირვების, მთელი სიცოცხლის ბოლო ჟამს და გარდაცვალების შემდეგაც. და თქვენ კი უყურადღებოდ ტოვებთ იმ სულიერ სარგებელს, სიკეთესა და მადლს, რომელსაც მათგან იღებთ. საოცრად დიდი გაბოროტებითა და მრისხანებით უყურებთ მათ ცოდვებსა და შეცდომებს, რასაც ისინი, როგორც ხორციელნი და წუთისოფლის შვილნი, სჩადიან. განა ვის რას უშავებს მღვდელი, როცა თავად სცოდავს? და თუ არავის არაფერს

---

უშავებს, არამედ პირიქით, სარგებელი მოაქვს მორწმუნეებისა და ეკლესიისათვის, რატომ ცდილობთ დაამციროთ და შეურაცხყოფა მიაყენოთ ადამიანს- მღვდელს, რომელიც არაფერს გიშავებთ? რა ვთქვა ამაზე? ბოროტება, რომელიც ფეხმოკიდებულია ხალხში, აბრმავებს თითოეული ჩვენგანის თვალს და არ აძლევს საშუალებას, დავინახოთ საკუთარი დიდი ცოდვა და განვიკითხავთ ამ მცირეთაგანთა ცხოვრებას.

ხოლო თავად დიდი [იოანე] ოქროპირი, მათეს სახარების შესახებ ასეთ სიტყვებს ამბობს: მღვდლები არიან ისინი, ვინც ქრისტეს ადგილს იკავებს; და ვინც პატივს სცემს მღვდელს, ამით თავად ქრისტეს სცემს პატივს; ხოლო ვინც აგინებს მღვდელს, თავად ჩვენს უფალს აგინებს და შეურაცხყოფას აყენებს; რადგან ქრისტემ მღვდლები დატოვა ეკლესიაში თავის მსახურებად (თავადიც ხომ არ მოითმენს, როცა ვინმე შეურაცხყოფას მიაყენებს მისი სახლის მმართველად დატოვებულ მის მსახურს) მითუმეტეს როგორ მოითმენს ქრისტე თავისი მსახურების შეურაცხყოფას?

და როგორ ფიქრობთ, რა საზღაურს მიიღებს ასეთი ხალხი- სააქაოს, თუ საიქიოს? არასოდეს წაგიკითხავთ წმინდა წერილში, რა დამართა ნოეს, როცა დალია და დათვრა? სულ მთლად გაშიშვლდა და ისე დაიძინა თავის სახლში, ხოლო მისმა შვილმა ქამმა, დაინახა რა მამის სიშიშვლე, კი არ დააფარა, არამედ გარეთ გავიდა და ბოროტი ილაპარაკა თავის ძმებთან მამაზე. ხოლო ისინი, როგორც ბრძენი და ღირსეული შვილები, უხმოდ მივიდნენ და დააფარეს, თან ისე, რომ თავი არ მიუტრიალებიათ და არ შეუხედავთ მამის სიშიშვლისათვის. და რა მოჰყვა ამას? ნათქვამია წმინდა წერილში:

„და განიფრთხო ნოე ღვინისაგან და ცნა, რაოდენ უყო მას ძემან მისმან უჭაბუკესმან და თქუა: წყეულ არიან ყრმა, მონა იყავნ ძმათა მისთაი, რადგან ბოროტი ილაპარაკა ჩემზე ხალხში“. „წყეულ იყავნ თვითონ მისი შვილებიც და მისი ქონებაც; ბატონობა არ ჰქონოდეს მის ცხოვრებაში. არამედ მისი ძმების

---

მორჩილი მონა ყოფილიყოს.“ ასე თქვა მოხუცმა ნოემ და დღემდე და მარადის ქამის მოდგმა წყეული იქნება.

ჩემო საყვარელნო, იფიქრეთ იმაზე, რომ ასევე დაემართება იმათ, ვინც წყენას მიაყენებს ამ მცირეთაგანს, მხოლოდ ღვთისმოყვარე ქრისტიანები დაცულ იქნებიან და არ შეურაცხყოფენ მღვდლებს, რათა სემისა და იაფეტის კურთხევა მიიღონ. მე ვევედრები მოწყალე ღმერთს, რომ სააქაო და საიქიო ცხოვრებაში ღმერთმა გიბოძოთ სემისა და იაფეტის დალოცვა. ამინ!

## ქადაგება № 26

### ქადაგება სტიქიონებზე წმ. მირონმდინარე დიდმოწამე დიმიტრის ხსენების დღე, 26 ოქტომბერი

„და აჰა, ატყდა დიდი ღელვა ზღვაზე ისე, რომ ნავი ტალღებით იფარებოდა“ როგორც ბუნებით კეთილ და მართალმიწიერ მამას უყვარს თავისი შვილები, ყველას ერთნაირად და თანასწორად უნაწილებს მემკვიდრეობას, ანუ არ აძლევს ერთს უფრო მეტს და მეორეს უფრო ნაკლებს, ან მაგალითად არ დაუშვებს უყვარდეს უფროსი უფრო მეტად, ვიდრე უმცროსი, გარდა იმ შემთხვევებისა, როდესაც ერთი შვილი აღმოჩნდება უფრო მეტად მორჩილი თავისი მამისა, ვიდრე სხვა. მხოლოდ ამ შემთხვევაში, მორჩილებიდან ან ურჩობიდან გამომდინარე შვილმა შეიძლება უფრო გაამრავლოს, ან შეამციროს თავისი მამის სიყვარული. მსგავს მაგალითზე მოგვითხრობს მათე მახარებელი ერთ-ერთ იგავში, როგორც ნათქვამია, რომ ერთ კაცს ჰყავდა ორი ძე და ერთ-ერთს დაავალა საქმის გაკეთება, შვილი დაპირდა, მაგრამ არ შეასრულა, ხოლო მეორე არ დაპირებია, მაგრამ

---

შეასრულა. ასეთივე კეთილი და მართალი არის მთელი ქმნილი სამყაროს მამა, წმინდა სამება ღმერთი, რადგან თითოეულ ქმნილებას მადლს ანიჭებს მისი დამსახურების მიხედვით.

ამიტომაც პატივს მიაგებს ანგელოზებს, როგორც მასთან ყველაზე მიახლოებულ უხორცო და უკვდავ არსებებს; პატივს მიაგებს ადამიანებს, როგორც თავის ხატად და მსგავსად შექმნილებს; პატივს მიაგებს უსულო ქმნილებებსაც- ანუ ცასა და ქვეყანასაც და ყველაფერს, რაც არის შექმნილი მის მიერ.

ყველაზე გამორჩეული, ღვთის მიერ მონიჭებული პატივი არის ორმაგი: პირველი პატივი გამოიხატა მაცხოვარი იესო ქრისტეს ამქვეყნად პირველი მოსვლის ჟამს; ხოლო მეორე პატივი გამოცხადდება მეორედ მოსვლის საშინელი სამსჯავროს დროს. პირველი მოსვლის ჟამს ადიდა ანგელოზები, რადგან ჯერ გაბრიელ მთავარანგელოზს დაავალა ეხარებინა და ეზრუნა დედა ღვთისმშობლისათვის. ანგელოზთა დანარჩენმა სიმრავლემ უფალობა ღმერთს ქრისტეს შობისას: „ დიდება მაღალთა შინა ღმერთსა, ქვეყანასა ზედა მშვიდობა და კაცთა შორის სათნოება.“

ხოლო ადამიანებს პატივი მიაგო სიყვარულით, როგორც ეს ნათქვამია, პავლე მოციქულის რომაელთა მიმართ ეპისტოლეს მე-5 თავში: „ვინაიდან თუ მისი ძის სიკვდილით შევურიგდით ღმერთს, როცა მტრები ვიყავით, მითუმეტეს, შერიგებულნი გადავრჩებით მისი სიციცხლით“.<sup>2</sup>

ასევე ყველაფერ დანარჩენსაც პატივი მიაგო ღმერთმა, რათა ყოველი ქმნილება მოიყვანოს უფალ იესო ქრისტეში. როგორც ეს ნათქვამია პავლე მოციქულის ეფესელთა მიმართ პირველ ეპისტოლეში: „გვაუწყა რა თავისი ნების საიდუმლო თავისი სურვილით, რომელიც წინასწარ განიზრახა მასში დროთა სისავსის განგებულებისათვის, რათა ქრისტეში მოიყაროს თავი ყოველივემ, რაც ცაშია და რაც დედამიწაზეა“.<sup>2</sup> და ყველაფერს მიაგო პატივი რომელიმე განსაკუთრებული სამკაულით:

ცას მიაგო პატივი ანგელოზთა და სულიწმინდის გარდამოსვლით, რადგან გაიარეს იგი; მტკნარ წყლებს მიაგო პატივი ნათლისღების ჟამს; დედამიწას პატივი მიაგო მიწისძვრით, საფლავთა გახსნით და მიცვალებულთა აღდგომით. საჭირო იყო მლაშე წყალთათვის პატივის მიგება და მათ იგი მიანიჭა ზღვის ღელვით.

„და აჰა ატყდა დიდი ღელვა ზღვაზე.“ მიწისძვრის შესახებ ლაპარაკობენ ძველი ელინი ფილოსოფოსები, რომ ის წარმოიშვება სტიქიების შეზავებით, და თითოეული (ეს ფილოსოფოსი ამ საკითხზე. რედ.) მსჯელობს

---

სხვადასხვანაირად. ხოლო ყველა ივიწყებს ამ ღელვის მთავარ მიზეზს-  
ღმერთს. ჩვენ ახლა ვისაუბრეთ იმის თაობაზე, რაც ილაპარაკეს  
ფილოსოფოსებმა - ანაქსაგორამ, არისტოტელემ, დემოკრიტემ და ანაქსიმენმა,  
მაგრამ დავუჯერეთ ღვთის მიერ ფილოსოფოსს და წინასწარმეტყველს,  
რომელმაც თქვა: „ემიებს დედამიწას და ისიც ირყევა, ხოლო შეატრიალებს  
პირსა თვისსა, ისიც იძვრის“.

რაკი დავასკვნით, რომ რყევის მთავარი მიზეზია ღმერთი, ამასთან  
დაკავშირებით უნდა აღვნიშნოთ სამი რამ: პირველი, რისთვის შეიქმნა ზღვაში  
ღელვა; მეორე, რატომ ეძინა ქრისტეს ნავში; მესამე, რატომ დაუშვა, რომ მის  
მოწაფეებში გაჩენილიყო შფოთი და მღელვარება.

ჯერ პასუხი გავცეთ პირველ კითხვაზე. წმინდა წერილში ბევრგანაა  
ნათქვამი, რომ ღმერთი მუდმივად ორმაგ მოქმედებაშია: კერძოდ, ადამიანების  
განგების მიზნით, ერთი მხრივ, რისხავს და, მეორე მხრივ, სწყალობს  
კაცობრიობას.

ისრაელის ხალხზე გადმოსულ ღვთის რისხვაზე ნათქვამია ისაია  
წინასწარმეტყველის წიგნის მე-9 თავში: „და წაართვა უფალმა ისრაელს თავი  
და კუდი დიდი და მცირე ერთ დღეშივე.“ ხოლო, რაც შეეხება წყალობას, იქვე  
ისაია წინასწარმეტყველთან ისრაელი აღიარებს ღვთის წინაშე: „გაკურთხებ შენ  
უფალო, რამეთუ განმირისხდი და მერე ისევ უკუაქციე შენი რისხვა და  
შემიწყალე მე.“

ღვთის რისხვაზე ასევე ლაპარაკობს დავით წინასწარმეტყველი: „ჭაბუკნი  
მათნი შეჭამა ცეცხლმა და ქალწულნი მათნი არა იგლოვიდეს, მღვდელნი  
მათნი მახვილითა დაეცნენ და შვილნი მათნი არა იტირნეს.“ ხოლო უფლის  
წყალობის შესახებ ნათქვამია

68-ე ფსალმუნში: „ისმინე ჩემი, უფალო მრავლითა წყალობითა შენითა და  
მოწყალებითა შენითა მომხედნე ჩემს ზედა“.

და როგორც ვთქვით, რომ ღმერთი ადამიანთა განგების მიზნით ორმაგ  
ქმედებებს მიმართავს, ორივეს ახორციელებს დიდი სიბრძნით. მაგრამ აქვე  
უნდა ვთქვა, რომ ღმერთი უფრო მეტად რისხვის მქმნელია, და ადამიანებს  
სჯის ბუნებრივი სტიქიონების მეშვეობით, ანუ ცეცხლით, ჰაერით, წყლით და  
ამ მიწით, რომელიც აერთიანებს ყველა ადამიანს.

მაგალითად, ნოეს ჟამს ღმერთმა წყლით დასაჯა ადამიანები, როდესაც  
მოუვლინა წარღვნა და დაიღუპა ყველა ხორციელი არსება ადამიანიდან  
დაწყებული ყველა ცხოველამდე, როგორც ეს ნათქვამია მოსეს წიგნის მე-7  
თავში. ცეცხლით დასაჯა სოდომელები აბრაამის დროს, როდესაც დაწვა მათი



---

ქალაქები, როგორც ეს ნათქვამია დაბადების წიგნის მე-19 თავში. მოსეს დროს, მიწით დასაჯა ქორე და თანიაბირონი, როდესაც გაიხსნა მიწა და შთანთქა ისინი და ყველა ვინც იყო მათთან ერთად, როგორც ეს აღწერილია რიცხვთა წიგნში. ჰაერით ღმერთმა დასაჯა ჯიუტი ფარაონი, რომელიც ქარის ძალით, თვითონ და მისი ჯარი დაიხრჩო მეწამურ ზღვაში, როგორც ნათქვამია გამოსვლათა წიგნის მე-14 თავში. ამიტომ ძველი აღთქმის დროს ღმერთი უფრო მეტად იყო შურის მაძიებელი, ხოლო ახლა არის წყალობისა და მოწყალების ღმერთი. ამიტომ ღმერთი ახლაც მოქმედებს იმავე სტიქიონებით, მაგრამ უკვე იმისათვის, რომ გამოავლინოს თავისი დიდი წყალობა და მოწყალება: წყალი, ნათლობის ჟამს ახრჩობს ცოდვებს. ცეცხლი, ცეცხლოვანი ალების სახით, სულიწმინდა გადმოდის მოციქულთა თავებზე; მიწა, წმინდა ქალწულის მიერ გამოქვაბულში უფლის შობით, შემდეგ მიწაზე სიარულით და ქადაგებით, ჯვარცმით, დაფვლით და მკვდრეთით აღდგომით; ჰაერი, მაცხოვრის ზეცაში ამაღლებით;

მაშასადამე, ღმერთის ამ ორმაგი ქმედების საჩვენებლად მათე მახარებელი მოგვითხრობს დღევანდელ სახარებაში: „და აჰა ატყდა დიდი ღელვა ზღვაზე“.

ღელვით უფალი იძლევა მცირე სასჯელს და ამით უნდა აჩვენოს, რომ თვითონაა ის, ვინც ძველი აღთქმის დროს სჯიდა სტიქიონებით და მათი მეშვეობით იჩენდა წყალობას. რადგან ნათქვამია: „შერისხა ქარები და ზღვა და ჩამოვარდა დიდი მყუდროება.“<sup>2</sup> ზღვაში იქმნება დიდი მღელვარება იმისათვის, რათა ყველამ შეიცნოს, რომ მისია ზღვა და მან შექმნა იგი: „და ხმელეთიც მისმა ხელებმა შექმნეს“. და რომ არ იფიქროს ვინმემ, რომ არა მხოლოდ მიწით შემოისაზღვრება ქრისტე ღმერთის ძალა, არამედ მთელ ქვეყნიერებაზე ის მოქმედებს, როგორც ყოვლადძლიერი უფალი. ნათქვამია: „შენ ბატონობ ზღვის ძალებზე და მისი ტალღების მღელვარებას შენ ამშვიდებ.“

მეორე, რატომ ეძინა მაცხოვარს ნავში, როგორცაა ნათქვამი მათეს სახარებაში, ხოლო მარკოზ მახარებელი ამბობს: „და თავადი იყო პირით კერძო.“ რატომ უნდა მომხდარიყო მღელვარება იმ დროს, როდესაც ეძინა? ვგონებ, მღვიძარე რომ ყოფილიყო, შეიძლება სამი რამ მომხდარიყო: პირველი, არც მოხდებოდა ზღვის მღელვარება! მეორე, ზღვის მღელვარების დაწყებისთანავე რომ გაეღვიძა, მაშინვე თვითონვე დააცხრობდა მას და ასე რომ არ გაეკეთებინა, ნავში მყოფი მოწაფენი იფიქრებდნენ, რომ მას არ შეუძლია ასეთი რამის გაკეთება; მესამე, თვითონ რომ გამოერკვია მოწაფენი,

---

(ისინი) არც შეევედრებოდნენ მას: „უფალო გვიხსენ ჩვენ, რამეთუ წავრწყმდებით.“

ნათქვამს იმასაც ვამატებ, რომ აუცილებელია გავიხსენოთ უფალი ჩვენი იესო ქრისტე, როგორც ჭეშმარიტი ღმერთი, ყოვლისმცოდნე და იცოდა მოციქულების მცირედმორწმუნეობა. ამიტომ დაიძინა ნავში და აცადა ზღვის მღელვარებას, რათა მოციქულებისთვის მათი რწმენის სისუსტე ეჩვენებინა და ამის გამო მცირეოდენ ესაყვედურა და გასწყრომოდა მოციქულებს. რადგან სრული რწმენა რომ ჰქონოდათ, არც უნდა ეთქვათ, რაც თქვეს, და არც უნდა შეშინებულიყვნენ, რათა ერწმუნათ მისი ღვთაებრივი ბუნება. უნდა ეფიქრათ: თუ უფალი ჩვენთან არის, რა ბოროტი უნდა შეგვემთხვას? რადგან წმინდა მოციქული პავლე რომაელთა მიმართ ეპისტოლეს მეათე თავში ამბობს: რამეთუ, ყოველმან რომელმან ხადოს სახელისა უფლისასა, ცხონდეს. არ არის აუცილებელი უშუალოდ ხედავდეს ქრისტეს, არამედ ოდენ წმინდა რწმენით შეჰღადადოს მის ყოვლადწმინდა სახელს და ცხონდება გაჭირვებებისაგან, მაგრამ მათ ხომ მაცხოვარი თან ჰყავთ სახელითაც და საქმითაც?

ამიტომაც უფალმა ჩვენმა იესო ქრისტემ შერისხა მათი ურწმუნეობა, გამოუცხადა მათ მათი სულიერი მცირედ მორწმუნეობა. მოციქულებს შერისხვისას უთხრა: „რაისა შეშინდით, მცირედ მორწმუნენო?“ ხოლო ამის შემდეგ ადგა ფეხზე და შეჰრისხნა ქარსა და ზღვასა.

ჩემო საყვარელნო, დაინახეთ მკურნალის, ანუ სრულყოფილი მკურნალის, მზრუნველობა ჩვენზე, პირველ რიგში ჭრილობებს ასუფთავებს დამპალი ხორცისაგან, ხოლო ამის შემდეგ ადებს მაკურნებელ მაღამოებს. უფრო მეტს ვიტყვი, რომ არ განკურნებულიყო მოციქულების ურწმუნეობა არც დასცხრებოდა მღელვარება, არც დამყარდებოდა სიმშვიდე. და იგივე საიდუმლო, დაფარული სახით, იყო გამოცხადებული მაცხოვარი იესო ქრისტეს მიერ მოხდენილ სხვა სასწაულებშიც. რადგან განრღვეულსაც უფალმა იესო ქრისტემ უთხრა: „კადნიერ იყავ შვილო, შეგინდვეს შენ ცოდვანი შენი“ ანუ თავიდან მოუხსნა მას ცოდვების სიმყრალე, ხოლო ამის შემდეგ უთხრა: „აღიღე სარეცელი შენი და წარვედ სახლსა შენსა“.

უცნაურად არ ჩამითვალოთ ჩემი ნათქვამი მოციქულებთა მცირე რწმენის შესახებ, რადგან ის შიში, რომელიც მათ გაუჩნდათ, ზუსტად ამტკიცებს მათ მცირედ მორწმუნეობას, ასე მოხდა ნავში ბერდაისკენ მგზავრობისასაც, რადგან ასევე შეეშინდათ ღამით, როდესაც დაინახეს მათკენ შორიდან წყალზე მიმავალი ქრისტე. შეეშინდათ, რადგან, როგორც მახარობელი მარკოზი ამბობს: მათი გულები იყო გაქვავებული და არ ესმოდათ ბოლომდე, რაც ხდებოდა.

---

მათი მცირედ მორწმუნეობა ჩანს იმ სიტყვებშიც, რომლითაც მიმართეს ქრისტეს: „მოდღვარ, არას ჰზრუნავ, რამეთუ წარვწყდებით.“<sup>2</sup> ხოლო ქრისტემ უპასუხა: „რაისა ესოდენ მოშიშ ხართ, ვითარ არა გაქუს სარწმუნოებაი?“

როგორ ფიქრობთ საყვარელნო ჩემნო: ეს სიტყვები მხოლოდ საყვედურისთვის იყო თქმული და ამავედროულად ცარიელი და უსაფუძვლოა? არა, ასე არ არის! ეს სიტყვები იყო მაკურნებელი მალამოების მსგავსი, რომლებსაც გამოცდილი ექიმები იძლევიან, მალამოები, რომლებიც გემოთი მწარე და მჟავაა, მაგრამ ძლიერი მოქმედება აქვთ, ასუფთავებენ სხეულს წყლულებისგან, შხამებისაგან, ყველანაირი უწმინდურობისგან და აჯანმრთელებენ ადამიანს. ასეთივე იყო მაცხოვარი იესო ქრისტეს სიტყვებიც- სიტყვები, სიცოცხლის და ჯანმრთელობის მომტანი, მიუხედავად იმისა, რომ მწარე გემოც დაჰკრავდა. როგორც თქვა მოციქულმა პეტრემ: „უფალო ვისთან უნდა წავიდეთ, რადგან შენთანაა ცხოვრების სიტყვები.“ ეს სიტყვები ამტკიცებს იმას, რომ მოციქულებში იმ დროისთვის უკვე იყო განმტკიცებული რწმენა, რადგან ზღვის ღელვაში ყოფნით მაცხოვარმა დაინახა რა მოციქულების რწმენის სისუსტე, შეჰრისხნა ქარი და შეიქმნა დიდი სიმშვიდე.

აქა ვდგავარ და მიკვირს ამის გამო. ნეტავ, რა საჭირო იყო, რომ ქრისტე ჰრისხავდა უსულო და უგრძნობ სტიქიონებს: ზღვასა და ქარს? არ მგონია, რომ ქრისტე სტიქიონებს ჰრისხავდა, არამედ ეშმაკებს, რომლებიც მსგავს რამეს ღვთისგან დაშორების გამო ჩვენს განსაცდელად მოქმედებენ. საიდან ვრწმუნდები, რომ ნამდვილად ასეა?

მარკოზ მახარობლის სიტყვებიდან, სადაც ნათქვამია, რომ მაცხოვარმა ქარს მიმართა სიტყვებით: დადუმენ პირი და იყავ! მსგავსი სიტყვებით, როგორც წესი, მაცხოვარი ქრისტე მიმართავდა ეშმაკებს, როგორც ეს მოხდა კაპერნაუმში, ადამიანის შემთხვევაში, რომელსაც ჰყავდა ბოროტი სული და იმ ადამიანის შემთხვევაში, რომელმაც მაცხოვარს მიუყვანა თავისი ძე, რომელსაც ყრუ და უტყვი სული ჰყავდა. როგორც ამბობს მათე მოციქული, მაცხოვარმა იმავე სიტყვებით მიმართა ქარს: დადუმენ და შეჰრისხნა ქართა მათ და ზღუასა. მესამე კითხვაა, რატომ დაუშვა, რომ მისი მოწაფენი შეშინებულიყვნენ. თავიდანვე, განკაცებული მაცხოვარი იესო ქრისტე, ღმერთი ჩვენი, თავის მოწაფეებს სიტყვითა და საქმით ასწავლიდა გაჭირვებულ, შევიწროებულ და განსაცდელებით სავსე ცხოვრებას, და ამით აჩვენებდა, რომ ეს არის ჭეშმარიტი გზა. რადგან თვითონაც თავისი ამქვეყნიური ცხოვრების დასაწყისშივე გადაიტანა დევნა, მწუხარება, განსაცდელი და შემდეგ სიკვდილიც. ამიტომაც გააფრთხილა თავისი

---

მოწაფეები: თქვენც იქნებით დევნილებაში, თქვენც მოგკლავს და შეგიძულეხს ყველა ერი სახელისა ჩემისათვის. დაუშვა, რომ მისი მოწაფენი შეშინებულიყვნენ, გასაჭირში ჩავარდნილიყვნენ, და ეს იმისათვის, რათა მოეხდინა დიდი სასწაული და ამ სასწაულით გამოეყვანა ისინი მცირედმორწმუნეობისაგან.

ჭეშმარიტად, სასწაულის მიზეზი არის ზღვა და მხოლოდ ღმერთს შეეძლო ამ სასწაულის მოხდენა. რადგან მან არ მოახდინა სასწაული კვერთხით, როგორც ეს გააკეთა ღვთის მონა მოსემ, მეწამულ ზღვაში, ან ხალენით, როგორც ელისემ ილიას<sup>2</sup> შთაგონებით გადაირია იორდანეზე, ან აღთქმის კიდობნით, როგორც ეს გააკეთა ისუ ნავემ, როდესაც გააჩერეს ორივე მხარეს იორდანე, არამედ მაცხოვარმა მხოლოდ სიტყვითა და ბრძანებით გააჩერა ზღვის მღელვარება, როგორც ბატონმა მის მონას მხოლოდ უთხრა ზღვასა და ქარს: დადუმენ და იქმნა მეყსეულად დაყუდება დიდი. და ამბობს მარკოზ მოციქული „და შეეშინა მათ შიშითა დიდითა და იტყოდეს ურთიერთას: ვინ - მე არს ესე, რამეთუ ქარნიცა და ზღუიცა ერჩიან მას?“<sup>2</sup>

აჰა, ვდგავარ და მიკვირს, როგორ გახდა შესაძლებელი, რომ დღეს ერთდროულად აღვნიშნავთ ორ მღელვარებას: ერთი, რომელიც მოხდა ზღვაში ეშმაკთა მიერ, ღმერთისგან დაშორების მიზეზით, იმისათვის, რომ გამოსწორებულიყო მოციქულთა მცირედმორწმუნეობა; და მეორე, რომელიც მოხდა ხმელეთზე, ეშმაკის წყვილის- დიოკლეტიანესა და მაქსიმეს გულთა სისასტიკის გამო. იმისათვის, რათა დამტკიცებულიყო დიდი მოწამის, დიმიტრის სარწმუნოება, რომლის ხსენებასაც აღვასრულებთ ჩვენ დღეს. იმხელა მღელვარება და აბოზოქრებული ტალღები მიემართა წმიდა დიმიტრის კურთხეული ნავის წინააღმდეგ, რადგან (ეშმაკის წყვილი) ცდილობდა შეეღწია მისი ნეტარი სულის სიღრმეში და ჩაეძირათ ის. მაგრამ იმ ველურმა და ცოფიანმა ადამიანებმა არ იცოდნენ, რომ წმიდა დიმიტრის ნავი არ იყო ადვილად ჩასაძირი, მას ჰქონდა ძლიერი ანძა, გამძლე აფრები და ჰყავდა გამოცდილი მეზღვაური და კარგი, მცოდნე მესაჭე.

მისი ანძა იყო-პატიოსანი ჯვარი, რითაც იგი ამაყობდა, როგორც მარადიულად უძლეველზე, და მას შეუძლია გაუძლოს სულიწმიდის (ქარების) ქროლვას მის გულში.

დიდ ძალასა და კადნიერებას მას ანიჭებდა პავლე მოციქულის მიერ გალატელთა მიმართ ეპისტოლეს მე-6 თავში ნათქვამი: „ხოლო ჩემდა ნუ იყოფინ სიქადულ, გარნა ჯუარითა უფლისა ჩვენისა იესო ქრისტესითა“<sup>2</sup>. და განსაკუთრებით მას აძლიერებდა მაცხოვარ იესო ქრისტეს ნათქვამი სიტყვები

---

წმინდა სახარებაში: „ვინც არ აღიღებს ჯვარსა თვისსა და არ შემომიდგება მე, არა არს ჩემდა ღირს.“ ხოლო მეზღვაური, ყველასათვის ცნობილია, გარდა იესო ქრისტესი, განა, სხვა შეიძლება ყოფილიყო ვინმე?, რადგან იგია ყველაზე გამოცდილი მოგზაური ზეციურ ქალაქში, იგი თავად იქაურია, მისი მამული ზეცაა, როგორც ნათქვამია იოანეს სახარების მე-16 თავში: „მეუფეზაი ჩემი არა ამის სოფლისაგან არს;“<sup>2</sup> და მე-6 თავში ნათქვამია: „მე ვარ პური ცხოველი, რომელი ზეცით გარდამოხვედ“.<sup>2</sup>

თავად ეს მეზღვაური და მესაჭე მყოფობდა დიმიტრის სულის სიღრმეში და როდესაც ხედავდა ოდნავ შეშინებულს, ეუბნებოდა: „დიმიტრი, შენ ხარ ჩემი კრავი და ძალიან კარგად ვიცი, რომ მომყვები მე. ნუ გეშინის, ვერავინ მოგიტაცებს ჩემი ხელებიდან. მოგცემ შენ მარადიულ ცხოვრებას და იქ, სადაც შენს ხელს განგმირავენ შუბებით - მე ვიქნები; შენს ჭრილობებს მე მივიღებ და არ მიგატოვებ, რათა (არ) გქონდეს აუტანელი ტკივილები. იჩქარე, რადგან ხელსაყრელი ამინდია, მე, ჩემი სული წმინდით (წმიდა სულით), უკვე აღვავსე შენი რწმენის აფრები. დიმიტრი, გაგხდი ჩემი სიკვდილის თანაზიარს. ღვთის მადლით ვნებებს გადიხარ და ამიტომაც ღვთის შვილი ხარ. არ მიგატოვებ, მონობის სული შიშისკენ გიბიძგებს, მე გიბოძებ ძეობის, მემკვიდრეობის სულს, რომელიც დაამოწმებს, რომ შენ ხარ ღვთის შვილი და როგორც ღვთის შვილი, იქნები ჩემთან ერთად, შენ მიერ შეყვარებული ქრისტეს თანამემკვიდრე. დიმიტრი, ჩემო შვილო, ხედავ ჯვარს? მე იგი შენს გულში აღვმართე. ამ ჯვარზე განისვენებს ვნება და სიკვდილი, რომელთა მემკვიდრეობითაც მთელ სოფელს მიეცა სიცოცხლე და იმ დიდი სიყვარულისათვის, რომლითაც შენი და მთელი სამყაროსათვის ყოვლადძლიერმა ღმერთმა აღმადგინა მკვდრეთით.

„ეს ქარიშხალი და საშინელი ტალღები დასცხრებიან და მე გადაგარჩენ მათგან. შემომიდექ მე, რადგან მე შევატრიალე საჭე ამაოების თავისუფალი მხრიდან ჩემი სასუფეველის აღუწერელი მშვენიერებისკენ. შემომიდექ, სიკვდილით მარადიული ცხოვრებისკენ, რომ მიხილო და განიხარო.“<sup>2</sup>

ამიტომაც ჩვენც, მდაბალნი მონანი შენნი, დიდო მოწამეო დიმიტრი გვედრებით, რადგან ესოდენ დიდი პატივი გაღირსა ღმერთმა, რომ გახდი მისი შვილი და მისმა მარჯვენამ აღგიყვანა სასუფეველში, რათა იხარებდე ანგელოზებთან ერთად, შენს სიტყვასა და ლოცვას ბევრი რამ შეუძლია. ამიტომაც გაგვიხსენე ჩვენც, ვინც ვმღელვარებთ ეშმაკთა მიერ გამართულ დიდ ქარიშხალსა და ამქვეყნიური ამაოების ტალღებში.

---

თუ ღმერთს სძინავს, ანუ თავს გვაჩვენებს თითქოსდა სძინავს, და არ უნდა ჩვენი მოსმენა, შენ გაქვს დიდი კადნიერება მის წინაშე და აღადგინე ის ძილისაგან და მეოხ გვეყავ შენ, ღირსო, ჩვენ უღირსთათვის; მეოხ გვეყავი შენ, ღვთის მიერ შეყვარებულო, ჩვენთვის, ჩვენი ურჩობისა და ცნებათა დარღვევის გამო, ღვთის შემძლებლისათვის; მეოხ გვეყავი შენ, ღვთის სრულყოფილო მეგობარო, ჩვენთა ცოდვათა გამო.

დაცხრეს ქარიშხალი და დამშვიდდნენ ზღვის ტალღები, რადგან ვალდებულნი არიან შეასრულონ შენი ნება. იღვაწე, რომ ყველანი შეგვკრიბო შენს კურთხეულ ნავში, როდესაც მოგვიხმობს ყოვლადმოწყალე უფალი თავისთან სამსჯავროს ტკბილ დღეს, რათა შენთან ერთად ვაკურთხებდეთ ყოვლად დიდებულ სახელსა მამისა და ძისა, და წმინდისა სულისა, აწ და მარადის და უკუნითი უკუნისამდე.

## ქადაგება № 27

### ბზობის კვირიაკეს

„კურთხეულ არს მომავალი სახელითა უფლისათა,  
ოსანა მაღალთა შინა.“

მათე მახარობელი მოგვითხრობს დღევანდელი წმინდა დღესასწაულის ისტორიას, როგორ შევიდა უფალი და მაცხოვარი იესო ქრისტე იერუსალიმში: „და ვითარცა მიეხლნეს იერუსალიმად და მოვიდნენ ბეთაბაგედ და ბეთანიად, მთასა მას ზეთის ხილისათასა, მაშინ წარავლინა იესუ ორი მოწაფეთა მისთაგანნი და ჰრქუა მათ: წარვედით დაბასა მაგას, რომელი არს წინაშე თქუენსა და მეყსეულად ჰპოოთ ვირი დაბმული და კიცვი მის თანა, აჰხსენით და მომგუარეთ მე იგი. და უკეთუ ვინმე გრქუას რაიმე, თქვენ არქუთ, ვითარმედ: უფალსა უხმენ ეგე, და მეყსეულად მოავლინნეს იგინი. ესე

---

ყოველი იქმნა, რაითა აღესრულოს სიტყუაი იგი წინასწარმეტყველისაი, რომელ თქუა: არქუთ ასულისა სიონისასა: აჰა, ესერა მე უკვე შენი მოვალს შენდა მშვიდი და ზე ზის იგი ვირსა და კიცუსა, ნაშობსა კარაულისასა.”

მაგრამ ჩვენ ამჯერად გვერდზე გადავდებთ მახარებლის სიტყვებს და (გავიმეორებთ) გავამახვილებთ ყურადღებას წინასწარმეტყველის სიტყვებზე: „აჰა, ესერა მეუფე შენ მომავალს შენდა მშვიდ.“ და არა მხოლოდ ეს ერთი წინასწარმეტყველი, არამედ წინასწარმეტყველთა მთელი კრებული ერთხმად აღიარებს უფალ იესო ქრისტეს, როგორც მეუფეს და ამიტომაც მას ეწოდება მესია (ანუ ცხებული მეფე).

მაგრამ შეიძლება ვიღაცამ იკითხოს ქრისტესთვის, ამქვეყნად რა დიდი სამეუფეო საქმე აჩვენა? ან რა ნება და სურვილი შეუსრულა? სად ჰყავდა კარისკაცი? სად ედგა ტახტი? სად ჰყავდა სამეფო მსახურნი და ხალხთა სიმრავლე? სად ჰქონდა გერბი, სამკაულები და სხვა ნივთები, რომლებიც ეკუთვნის მეფეებს? მართალია, არც ერთი მსგავსი საგანი მას არ ჰქონდა, რადგან ქრისტეს სასუფეველი არის უხილავი და მიუწვდომელი, მარადიული და ურყევი, უძლეველი და უკვდავი, ზეციური და სულიერი და არა მიწიერი და ხორციელი. როგორც თავად უთხრა პილატეს: „მეუფებაი ჩემი არა ამის სოფლისაგანი არს“ ; ამიტომაც ზეციურმა მეუფემ და მოძღვარმა სახარების მთელ საქმეს დაარქვა ცათა სასუფეველი, ანუ ყველაფერი, რაც წერია წმინდა სახარებაში არის ზეციური და ღვთაებრივი, რადგან წარმართავს ჩვენს გეზს ცათა სასუფეველის სწორ გზაზე. ზეციური სულით ჩვენ გვამდიერებს და გვასწავლის, რომ ვიცხოვროთ ზეციური ცხოვრებით, რომ მოვიგოთ ცათა სასუფეველის სავანეები და გავხდეთ სრულყოფილნი, განმდრთობილნი და ზეციურნი. ამიტომაც, რადგან ასეა მართებული, მაცხოვარმა იესო ქრისტემ მთელ სახარებას დაარქვა ცათა სასუფეველი, რადგან მასში სხვა არაფერია, გარდა ღვთაებრივი და ზეციური საქმისა.

---

ამიტომაც ამ მეუფეზე თითქოსდა თითით მიგვითითებს ზაქარია წინასწარმეტყველი: „აჰა ესერა მეუფე შენი მოვალს შენდა მშვიდი.“ ხედავდნენ რა ამ მეფეს ფარისევლები, შურის გამო, ბოროტს ლაპარაკობდნენ. მაგრამ მცირეწლოვანი ყრმები, სული წმინდით შთაგონებულები, სიხარულის ხმებით ადიდებდნენ მას: „კურთხეულ არს მომავალი სახელითა უფლისათა; ოსანა მაღალთა შინა“. რაც იმას ნიშნავს, რომ გვაცხოვნე ჩვენ, რომელიც მოხვედ ზეცით.

ღირსეულმა და კეთილმა მეფეებმა მრავალი და გამორჩეული საქმენი უნდა აღასრულონ, მაგრამ მათი მთავარი დანიშნულება არის თავისი ერის დაცვა მტრების ხელყოფისა და შემოსევებისაგან. და ეს საქმე მაცხოვარმა ჩვენმა იესო ქრისტემ შეასრულა სრულყოფილად, რადგან ჩვენ მუდმივად გარშემორტყმულნი ვართ ხუთი უძლეველი მტრის მიერ, რომელნიც მუდმივად გვებრძვიან და ჩვენ დიდ და განუკურნებელ ჭრილობებს გვაყენებენ. ყოვლადძლიერმა ღვთაებამ ისინი სძლია და გაანადგურა. რომელია ეს ხუთი მტერი? ესენია: ცოდვა, სიკვდილი, ჯოჯოხეთი, ეშმაკი, სხეული.

ცოდვა, მისი ყოვლადწმინდა სისხლის დათხევით ჩამქრალია და ვერაფერს დაგვიშავებს, თუ არ შეგვიპყრობს რაიმე ბოროტება. სიკვდილი, რომელიც ცოდვისგან წარმოიშვა, როგორც ამბობს პავლე მოციქული: „ერთი ადამიანის მიერ ცოდვა შემოვიდა სოფელში, ხოლო ცოდვის მიერ სიკვდილი“. როგორც უმოწყალო მტერი თავზე გვადგა, მაგრამ მაცხოვარმა თავისი სიკვდილით დასთრგუნა იგი. ჯოჯოხეთი, რომელიც ცოდვის სამართლიანი საზღაურია, თავისი შთასვლით იესო ქრისტემ იგი დააცარიელა და გაანადგურა. ეშმაკი, როგორც ყველა ცოდვის საწყისი და ჩვენი სულების მტანჯველი დააბა და შთააგდო ჯოჯოხეთის ყველაზე ღრმა უფსკრულში. ხორცი, საკუთარი ვნებებითა და ჯვარზე სიკვდილით, დაიხსნა ვნებებისაგან და განწმინდა.



---

მაცხოვარმა იესო ქრისტემ, რომ ამ ხუთი უმოწყალო მტრისაგან გვიხსნა, წმინდა წერილის მოწმობიდან შეგვიძლია დავრწმუნდეთ. პირველი, ცოდვისთვის მალაქია წინასწარმეტყველი ამბობს: „გვიხსნის ყველა ჩვენი ვნებებისაგან და ყველა ჩვენს ცოდვას დაახრჩობს ზღვის სიღრმეში.“ ჩვენს ცოდვებს ასევე განასახიერებენ ფშვინიერი ეგვიპტელები, რომლებიც მისდევდნენ რა ისრაელის შვილებს, დაიხრჩვენ მეწამულ ზღვაში (ანუ ქრისტეს სისხლში).

სიკვდილის შესახებ კორინთელთა მიმართ პირველი ეპისტოლეს მე-15 თავში პავლე მოციქული ამბობს: „ახალ ჟამს (ანუ საყოველთაო აღდგომის დროს) ჩვენი მტერი, სიკვდილი განქარდება და იმ დღიდან აღარ იარსებებს ადამიანებში სიკვდილი“.

ჯოჯოხეთის შესახებ იგივე წმინდა მოციქული გვასწავლის: „ არაფერი დამლუპველი არ დაემართება მათ, ვინც არიან იესო ქრისტეში, რომლებიც არა ხორცის, არამედ სულის მიერ არიან.“

ეშმაკის შესახებ თავად მაცხოვარი იესო ქრისტე ამბობს იოანეს სახარების მე-12 თავში: „ახლა არის სოფლის განკითხვის ჟამი; ახლა ამა სოფლის უფალი განიგდება გარეთ.“<sup>2</sup>

ხორცის ვნებებისაგან გვიცავს ჯვრის ძალა, რომელზეც ჩვენი ძველი ადამიანი ჯვარცმულ იქნა, როგორც ნათქვამია ეს რომაელთა მიმართ ეპისტოლეს მე-6 თავში:

„ დაითრგუნოს ხორცი, ანუ ცოდვის ძალა, რომ აღარ ვემსახუროთ ცოდვას.“<sup>2</sup>

მაცხოვრის სიკვდილით ყველა მორწმუნეს მიეცა მადლი და ძალა, რომლითაც ძლიერდება რა შინაგანი ადამიანი, გარე და ძველ ადამიანს ჯვარს აცმევს მის ცოდვებთან და ვნებებთან ერთად, და მოსავს ახალ ადამიანს მეცნიერებასა და ჭეშმარიტებაში.

ხოლო თუ გნებავს შეიცნო ამ დიდებული მეფის ბუნება და ხასიათი მახარებელი (განმარტავს რა წინასწარმეტყველის სიტყვებს) წერს: „მოვალს

---

შენდა მშვიდი“<sup>2</sup> ადამიანებს სურთ მეფის ხილვა ამპარტავნებით ამაღლებულს და მბრძანებლობდეს ძალაუფლებითა და დაშინებით. ხოლო ბრძენი სოლომონი ბრძანებს: „წყალობა და ჭემმარიტება არის მეფის მცველები და სამართლიანობა აძლიერებს მის ტახტს.“ ეს არის ყველაზე დიდი ქება ჩვენი მეფისთვის.

კეთილად თქვა მის შესახებ ზაქარია წინასწარმეტყველმა: „მოვალს შენდა მშვიდი.“ იგი ამბობს მშვიდი და არა საშიში და მრისხანე. რადგან არ მოვიდა ჯარის მოსახმობად, არ მოვიდა იმისათვის, რომ ხალხს დაუწესოს გადასახადები (ხარჯი) ან დაამძიმოს დიდი და მძიმე შრომით. და არც წაართვას მიწიერი ქონება იმისათვის, რომ გასცეს ზეციური სამკაულები. „მოდის მშვიდი ანუ მოდის რომ დაითმინოს ტანჯვა, გვემა, დანერწყვა, დამცირება და დევნა; და მისი ხორცი, როგორც ამბობს ისაია წინასწარმეტყველი; „მისცა გვემისთვის სახე მისი დანერწყვისათვის“. უფრო მეტიც, იმხელა სიმშვიდე ჰქონდა ამ მეფეს და იმდენი სიკეთე გვიბოძა ჩვენ, რომ როდესაც მოციქულს დასჭირდა თხოვნით მიემართა ადამიანებისათვის, იგი ქრისტესმიერ სიმშვიდეს სთხოვდა მათ: გაფიცებთ თქვენ, ძმანო სიმშვიდესა.

და რადგან ყველა ადამიანი მიყვება და ემორჩილება მეფეებს, ჩვენ როგორ არ უნდა მივმართოთ ჩვენი ცხოვრება ამ ჩვენი ზეციური მეფისკენ? ხოლო ამის სანაცვლოდ ჩვენს გულებში ვნახავთ ველური მტაცებლების მრისხანებას და მტაცებლობის სურვილს, ასპიდის კბენას, გველის პირს, რომლებითაც მთელი დღეების განმავლობაში სხვებს ცილს ვწამებთ, ვამცირებთ, მასხრად ვიგდებთ, ვაგინებთ და ერთიმეორეს ბოროტებასა და ზარალს ვუსურვებთ.

ამის შემდეგ მახარობელი მოგვითხრობს, რომ მოწაფეებმა შეასრულეს უფლის დავალება და მიუყვანეს ვირი და მასთან ერთად კვიცი. მაგრამ აღმოჩნდნენ ისეთები, რომლებმაც დაუყვირეს, რას აკეთებთ, რატომ ხსნით კვიცს?! ეს სიტყვები არ დაიწერა ტყუილად მარკოზ მახარებლის მიერ, რადგან

---

ამით მას უნდოდა ეჩვენებინა, რომ მომავალშიც ყოველთვის იქნებიან ისინი, რომლებიც შეეწინააღმდეგებიან მოციქულებს და ყველას, ვინც გაყვება მათ, ყველას ვინც მოისურვებს მიიღოს ქრისტე და იღვაწოს ერთი სიკეთისკენ მოქცევისათვის. რადგან ასეც წერია, რომ სიკეთის წინააღმდეგ აღსდგება ბოროტება, სიცოცხლის წინააღმდეგ - სიკვდილი და მართლის წინააღმდეგ - ცოდვილი.

ამის შემდეგ უფალი შეჰჯდა ვირზე და ხალხის მრავალრიცხოვან ჯგუფთან ერთად გაემართა იერუსალიმისკენ.<sup>2</sup> ხოლო ადამიანებს, სიყვარულით აღძრულებს, უხაროდათ ასეთი დიდებული შესვლა და ფინიკისა და ზეთისხილის ტოტებით ეგებებოდნენ მას, ამით ქადაგებდნენ არა მხოლოდ მის ძლევას, არამედ მის წყალობასაც. და ისინი, ვინც ანთებულნი იყვნენ ღვთაებრივი სიყვარულით, უფენდნენ ფეხქვეშ თავის ტანსაცმელს და მსგავსი პატივისცემის გამოხატვა არ გვხვდება არსად, არც ერთი ძალმოსილი მეფისათვის. მის მერე მსგავს თაყვანისცემას გამოხატავენ იესო ქრისტეს მიმართ ადამიანები, რომლებმაც განაგდეს ძველი ადამიანები. მის ბოროტ ჩვევებთან ერთად და ქრისტეს სადიდებლად შეუდგნენ სულიერ ღვაწლს. რა თქმა უნდა, ამის გაკეთება აუცილებელია წლის სხვა დროსაც, მაგრამ ახლა მაინც სინანულის ჟამს გამოვხატოთ თაყვანისცემა მისადმი. იმისთვის, რომ ქრისტესთან ერთად ჯვარზე ვაცვათ ჩვენი ცოდვები და მასთან ერთად აღვსდგეთ მარადიული ცხოვრებისათვის.

ამიტომაც, თუ გვსურს, რომ დახვდეთ ქრისტეს ქრისტიანულად, ღირსებით და თაყვანისცემით, უარი უნდა ვთქვათ მრისხანებაზე, ამოვნერწყვოთ შური, ჩავაქროთ მომხვეჭელობის სურვილი, დავახშოთ ცბიერი პირი და მგმობელი ბაგეები. თუ უსამართლოდ წავართვით რამე, უნდა დავუბრუნოთ და თუ თან დაგვხვდება რაიმე ჩვევა, რომელიც გვიბიძგებს უღირსი და ბოროტი საქმეებისკენ, ისიც უნდა განვაგდოთ. რადგან ყველაფერი ეს ეშმაკის საკვრელებია; და თუ ამას არ გავაკეთებთ ახლა, როდესაც ჩვენ

---

თვალწინ გვაქვს იმდენი მაგალითი, და როდესაც ამისკენ მოგვიწოდებს მთელი ეკლესიის სწავლება, უფრო მეტიც, ქრისტეს მიერ გადატანილი სიკვდილი, ჯვარი, სამჭვალნი, ლახვარი, გვემა და დანერწყვა, გინება, საკვრელები და სისხლის დანთხევა - როდესღა უნდა მოვიდეთ სინანულისკენ?

და თუ გვინდა, რომ სიყვარულით მივიღოთ უფლის ნება და აღდგომა და გვინდა ღირსეულად დავხვდეთ უფალს, რომელიც მოდის ჩვენს საცხოვნებლად, უნდა განვიძარცვოთ ძველი ადამიანის სამოსელი, დავამსხვრიოთ და გავსრისოთ ჩვენი ძველი ვნებები და მხოლოდ ასე შევძლებთ მის ღირსეულ მიღებას. და მცირეწლოვან ყრმებთან ერთად, რომლებიც უბოროტონი არიან მდაბალი გულით და სულიერი სიხარულით, ღირსებით ვლადებდეთ: „კურთხეულ არს მომავალი სახელითა უფლისათა. ოსანა მალალთა შინა“.

## ქადაგება № 28

წმინდა მოციქულთა სწორთა კონსტანტინე და

ელენეს ხსენების დღეს

„ყველა ვინც თავს აიმაღლებს, დამდაბლდება,  
და ვინც თავს დაიმდაბლებს-აიმაღლება“

შეუძლებელია ვინმემ მიაღწიოს ცხოვნების სიმშვიდეს, თუ მანამდე არ გაივლის მოთმინების კარიბჭეს.

---

შეუძლებელია ვინმე ამაღლდეს ნეტარების ზეციურ ქალაქში, თუ მანამდე არ გაივლის თავმდაბლობის გზას.

შეუძლებელია ვინმე აღვიდეს წმინდათა სასახლეში, თუ მანამდე აქ მიწიერ ქალაქში არ დაიმდაბლებს სულს.

შეუძლებელია ვინმემ ჯვრით ხელში არ გაიაროს ქრისტეს გზა.

შეუძლებელია ვინმეს შერჩეს დიდი და ქებული სახელი, თუ მას ექნება ბოროტი და უღირსი საქმეები გაკეთებული.

ეს ყველაფერი იცოდა დიდმა კონსტანტინემაც და ნეტავ ვის ძალუმს აღწეროს მისი დიდი თავმდაბლობა? ვის შეუძლია გამოაშვარაოს მისი სრულყოფილი ქრისტიანული ცხოვრება და მისი ქრისტიანული აზროვნება, რის წყალობითაც მას მიეცა ღვთაებრივი მადლი და ცათა სასუფეველის აღუწერელი სიხარულისა და ნეტარების თანაზიარება? როდესაც აღმოცენდა ამ სოფლის ნათელში და გაიზარდა, დაუტევა მშობლების სახლი ბრეტანიაში. იგი არ იყო ჯერ ქრისტიანი, მაგრამ უკვე გაურბოდა წარმართულ აზროვნებას, გაურბოდა წარმართული ცხოვრების ბილწ ცხოვრებას და მიილტვოდა ქრისტიანული ცხოვრებისკენ. და განა არ გამოაჩინა თავისი დიდი ქრისტიანობა? როდესაც გაიგო მაქსენტის წარმართული ცხოვრების უსამართლოებანი, რომლითაც იგი სჩადიოდა ქრისტიანების წინააღმდეგ, მიუხედავად შესაბამისი ძალების არქონისა, მან მაინც წამოიწყო ომი მაქსენტის წინააღმდეგ, რადგანაც ღვთაებრივი განგებისაგან იყო გამხნევებული და სულიერად გაძლიერებული იმით, რომ გამოუცხადა ზეცაში ჯვარი, რომელსაც თან ჰქონდა წარწერა: „ამით დაამარცხე“- ამ გამოცხადებით კეთილმორწმუნე კონსტანტინე იმდენად გაძლიერდა სულიერად, რომ იმდენად ძლიერად შეებრძოლა წარმართ მაქსენტის , რომ სრულად დაამარცხა ის და დაახრჩო მდინარე ტიბერიის წყლებში.

ამ ზეციური ნიშნებით გამხნევებულმა კურთხეულმა იმპერატორმა იმდენად

---

ბევრი გააკეთა ქრისტიანობისთვის, რომ ყველას უკვირს, ვისაც კი ესმის. ადამიანი არის თავის თავში შეყვარებული პირუტყვი. რატომ არ უყვარს შრომა? რატომ არ უყვარს ღვაწლი? და რას არ აკეთებს იმისათვის, რომ ოღონდაც იყოს მოსვენებით, სიმშვიდეში და გაუფრთხილდეს თავის ჯანმრთელობას? და როდესაც არის ჯანმრთელი, რას არ აკეთებს, რომ დაშორდეს იმას, რაც მის ჯანმრთელობას ავნებს. რაღას არ ხარჯავს, რომ გაუძლოს ზამთრის ყინვას და ზაფხულის სიცხეს? და როდესაც არის ავად, რას არ გაიღებს, რამდენს არ ითმენს, რამდენს არ იტანჯება იმისთვის, რომ დაიბრუნოს ის, რაც დაკარგა? ადამიანი ყველაფერზე მიდის: ქონებას ხარჯავს, იღებს მწარე წამლებს, სვავს გულის ამრევ სითხეებს და სისხლსაც გამოიღებს ხოლმე და ყველაფერს აკეთებს საკუთარი ჯანმრთელობისათვის და ხორციელი გადარჩენისათვის. აქედან შეიძლება ყველა მიხვდეს რამდენად ტკბილია ჯანმრთელობა და რამდენად შეყვარებულია თავის თავზე ადამიანი.

მამასადამე, ჯანმრთელობის ასეთმა სურვილმა, რომელიც სხვებს აიძულებს ყველაფერი გააკეთოს, შესაძლებელიც და შეუძლებელიც, კეთილშობილ კონსტანტინეს ვერაფერში ვერ უშველა. როდესაც მისი სხეული დაიფარა საშინელი წყლულებით, წმინდა კონსტანტინემ მაინც არ დაკარგა თავისი ქრისტიანული კეთილშობილება. არც ერთ ექიმს არ შეეძლო მოეძებნა მისთვის განმაკურნებელი წამალი.

ხოლო ჰურიები თავისი შურით ურჩევდნენ იმპერატორს მოეკლა დიდი რაოდენობის ჩვილი ბავშვები და ებანავა ამ ბავშვების თბილ სისხლში და ასეთნაირად თითქოს და დიდი კონსტანტინე განიკურნებოდა. როგორ ფიქრობთ, მიიღო ქრისტეს მოყვარე იმპერატორმა ეს რჩევა? რა თქმა უნდა, არა. რატომ? რადგან კეთილმორწმუნე იმპერატორმა თავისი დიდი რწმენით თქვა დიდი ხმით: „უკეთ იქნება ღვთის სიყვარულით მოკვდე ავადმყოფი, ვიდრე დავიბრუნო ჩემი ჯანმრთელობა და სიცოცხლე მაგდენი უდანაშაულო სისხლის დანთხევით.“

---

ჭეშმარიტად მორწმუნე იმპერატორის პასუხია. მან უფრო მეტად დააფასა სხვების სიცოცხლე, ვიდრე თავისი საკუთარი. განა, არ გამოჩნდა ამით ქრისტეს მოყვარეობა? მე მგონი, რომ მთელმა ზეცამ და ყველა ანგელოზმა სიხარულით ადიდეს ღმერთი იმპერატორის ასეთი პასუხისთვის. განიხარეს ზეცაში წმინდანების სულეობა და ანგელოზთა დასებმა- ქერუბიმთა და სერაფიმთა, განიხარეს, დაინახეს რა იმპერატორში ღვთის ამდენად დიდი სიყვარული და რწმენა. ეს ყველაფერი დამტკიცდა იმით, რაც მოხდა მოგვიანებით, რადგან შემდეგივე ღამეს წმინდა მოციქულების, პეტრესა და პავლეს, მეშვეობით თავად იმპერატორმა გამოუცხადა მას, რომ მისი სრულყოფილი სარწმუნოებისთვის მან მიიღო უშუალოდ ღვთისგან ხელდასხმა მოციქულთა სწორთა ხარისხში და წმინდა სილვესტრის<sup>2</sup> მიერ ნათლობის მიღების შემდეგ, მას მიენიჭა როგორც ხორცის, ასევე სულის ჯანმრთელობაც. მოინათლა მეორედ შობის ემბაზში და განიწმინდა ყოველი ავადმყოფობისაგან.

ჰოი, კონსტანტინე მეფის დიდო სარწმუნოებავ! ნეტა ვის ძალუმს გონებით ჩასწვდეს მას? და რადგან მაგხელა რწმენა ჰქონდა დიდ იმპერატორს მანამდე, სანამ შეიმოსებდა წმინდა ნათლისღების სამოსელს. უნდა ნახოთ, სარწმუნოების რაოდენ დიდ სიმაღლეზე ავიდა ნათლობის შემდეგ.

ირეოდა ეკლესიის მშვიდობა პირუტყვული არიოზული მწვალებლობის გამო და სარწმუნოების მართმადიდებლობა ებრძოდა ურწმუნოების ტალღებს, და ამ გაჭირვების ჟამს გამობრწყინდა კეთილშობილი კონსტანტინეს ნათელი და ბრჭყვიალა ვარსკვლავი. მოიწვია რა ნიკეაში დიდი და ქებული კრება, დააცხრო ეკლესიის მღელვარება. როგორც წესი, ბუნება აჩენს სამკურნალო მცენარეს იქ, სადაც სიკვდილის მატარებელი თესლებია, მაგალითად, მორიელს აქვს მომაკვდინებელი შხამი, მაგრამ მას მერე, რაც თვითონ კვდება, ის გადაიქცევა სამკურნალო ნივთიერებად - იკბინება სასიკვდილოდ, მაგრამ მისი სხეულიდან კეთდება შხამის საწინააღმდეგო წამალი. ასევე ღვთის

---

განგებამ ინება, რომ უწმინდური არიოზის დროს გაბრწყინებულიყო კურთხეული კონსტანტინე, რათა რწმენის ნათელით განედევნა არიოზის მწვალებლობის ღრუბელი.

ჭეშმარიტად ანგელოზებრივი გონების უნდა ყოფილიყო, რომ გამოემჟღავნა წმინდა სწავლებები, რომელიც თვითონვე დაწერა ქრისტიანობის გასაძლიერებლად, ღვთის სადიდებლად, მრავალი ეკლესიის ასაშენებლად, გაჭირვებულების დასახმარებლად და ყველას მიმართ ქრისტიანული სიყვარულის გასაზიარებლად.

მოციქულთა სწორმა იმპერატორმა უსაზღვროდ დიდ თავმდაბლობას მიაღწია; და რადგან თავმდაბლობა არის რწმენის ნაყოფი. შეხედეთ მის უთვალავ გამარჯვებებს და მიღწევებს, რომლებიც მისი სიცოცხლის დღეებზე გაცილებით მეტია. შეხედეთ მის უდიდეს ძალაუფლებას, რომელიც იწყებოდა შორეულ აღმოსავლეთში და სრულდებოდა დასავლეთში.

ყველა ეს მიზეზი უბიძგებდა ადამიანს ასეთ დიდებულ და საშინელ იმპერატორს ამპარტავნებისკენ, ასეთ ძლევამოსილ ადამიანს რაოდენ ბევრი მიზეზი ექნებოდა, რომ დამტკბარიყო თავისი დიდებით, რადგან მას მოციქულთა სწორობის ხელდასხმა მიღებული ჰქონდა არა ადამიანებისგან, არამედ თავად ზეციერი მღვდელმთავრისაგან, მაცხოვარი იესო ქრისტესაგან. მას ჰქონდა უფლება, რომ პირველი მჯდარიყო წმინდა კრებებზე, მაგრამ, როგორც თავმდაბალი ადამიანი, არასდროს დამჯდარა პირველ ადგილას, არამედ მხოლოდ წმინდა მამების ბოლოს და არა სამეფო მაღალ სკამზე, არამედ დაბალზე და უბრალოზე.

კურთხეული იმპერატორის ბრძანებებით შენდებოდა ეკლესიები, სამლოცველო სახლები და ღვთისთვის სათნო სხვა შენობები. როგორც თავმდაბალი ადამიანი, ის ჩამოდიოდა მისი მაღალი ტახტიდან, ხელიდან უშვებდა თავის სკიპტრას, იხდიდა სამეფო სამოსელს, იხსნიდა ძვირფას



---

გვირგვინს, როგორც უბრალო ადამიანი, სხვებთან ერთად თხრიდა  
სამირკვლებს და ეზიდებოდა ეკლესიებისთვის ასაშენებელ ლოდებს.

ჰოი, უსაზღვრო თავმდაბლობავ! ჰოი, მოვედით უდაბნოს მოღვაწენო, და  
თავმდაბლობის მასწავლებელნო, მოვედით და გაიკვირვეთ დიდი  
იმპერატორისა მოციქულთა სწორის თავმდაბლობით; აღიარეთ, რომ ასეთი  
თავმდაბლობისთვის ჯერ არავის მიუღწევია, არაა გასაკვირი, რომ თქვენ  
შესძელით მიგელწიათ დიდი თავმდაბლობისათვის, რადგან მთელი ცხოვრება  
ებრძოლეთ ხორცის ცხოველურ ვნებებს, უარყავით უსარგებლო სურვილები,  
შეიყვარეთ აკრძალვები, უარყავით ამპარტავნება, ცხოვრება გაატარეთ  
სიწმინდეში, არ არის გასაკვირი, რომ გახდით თავმდაბლობის მაგალითნი.  
რადგან სოფლის განტევება და უპოვარება ამდაბლებს ადამიანის სულს.

მაგრამ დიდმა კონსტანტინემ, დიდმა იმპერატორმა, მსოფლიოს  
მბრძანებელმა, უზარმაზარი სამეფოთი და სრული ძალაუფლებით როგორ  
მოახერხა და თავი დააღწია ამპარტავნებას, უფრო მეტიც, გახდა  
თავმდაბლობის ნიმუში და მაგალითი. განა ეს არ არის სასწაულთა სასწაული?  
განა არ არის დიდი სიწმინდის მაგალითი? განა არ არის ზეციური ღმერთის  
მიერ მოცემული დიდი მადლის ნიშანი?

და რადგან დიდი და მოციქულთა სწორი კონსტანტინე გაბრწყინდა  
თავისი გამორჩეული სათნოებებით, ის აძლევს ყველა ქრისტიანს და ყველა  
ადამიანს მაგალითს, რომლებიც დღეს აღნიშნავენ მის ხსენებას, იარონ წმინდა  
სიმამაცით ცხონების გზაზე, რომ მიიღონ ღვთის მიერ აღთქმული მადლი და  
გახდნენ ზეციური, მარადიული სიხარულისა და ნეტარების მატარებელი.

წმინდა კონსტანტინე აძლევს მაგალითს მდიდრებს, რადგან თვითონ იყო  
ძალიან მდიდარი, მაგრამ სახარების ბრძანებისამებრ ის საგანძურს იგროვებდა  
ზეცაში. აძლევს მაგალითს კეთილშობილ ადამიანებს, რადგან ის იყო ყველაზე  
კეთილშობილი, მაგრამ აირჩია უბრალო და მარტივი ცხოვრებით ყოფნა.  
მაგალითს აძლევს მეფეებს, რადგან მაგხელა ძალაუფლების იმპერატორი იყო.

---

მთელი ძალით ცდილობდა მოეხვეჭა ქრისტეს მიერ აღთქმული მადლი. მაგალითს აძლევს ხელოსან და მდაბალ ხალხს. რადგან მასში სიმდიდრე და დიდება დამარცხებულ იქნა სიკეთის კეთების სურვილით და როგორ არ გამრავლდებოდა აქ უბრალოება, რადგან უბრალოება არის სიკეთის ერთ-ერთი მთავარი მიზეზი, როგორც ამას ამბობს დავით წინასწარმეტყველი?

გიხაროდენ, ჰოი, კურთხეულო იმპერატორო, ცათა სასუფეველში!  
ამაღლდი  
ღვთაებრივი ნეტარების სიმაღლეზე სადაც აგიყვანა შენ სრულყოფილმა თავმდაბლობამ, დაკრიფე შენი სარწმუნოების ნაყოფი, რომელიც დაგიგროვებია უხვად ცათა სასუფეველში, რომელიც უხვად დაგიტესია აქ დედამიწაზე და დაგიგროვებია ცათა სასუფეველში. მაგრამ ნურც ჩვენ უღირსებს ნუ დაგვტოვებ შენი მფარველობის, შეწევნისა და მხურვალე მეოხების გარეშე ღვთის წინაშე. უფრო მეტად ევედრე ღვთის სიტყვასა და ძესა, უფალსა ჩვენსა იესო ქრისტეს, რომ დაიცვას ჯანმრთელად და ბედნიერად შენი სიკეთის ჭეშმარიტი ხატი, შენი ქრისტიანული ცხოვრების ნამდვილი მემკვიდრე და ქრისტეს მოყვარე, ჩვენი ქრისტიანი ბატონი და მთავარი.

დაუმორჩილე მის ფეხქვეშ დასუსტებული და ღონედაცლილი მტრები, ისევე როგორც შენ დაამარცხე სარწმუნოების მოწინააღმდეგეები, რათა მრავალ ჟამს იყვნეს ჩვენი მთავარის მეუფება, რათა იყოს სამართლიანობის მცველი, სიკეთის განმრავლებელი და ბოროტების შემზღვეველი.

დაე, იდიდოს მაღალმა ღმერთმა, განმტკიცებულ იყოს ჭეშმარიტი სარწმუნოება, რომელთა ზიარების იმედიც გვაქვს შენი მეოხებით. დაე, ჩვენი მთავარი, რომელიც შენს სახელს ატარებს, იქმნეს შენი სათნოებათა სრულყოფილი მატარებელი. ამინ

---

## მაცხოვარ იესო ქრისტეს შობაზე

„რამეთუ არასადადთ ანგელოზთადათ იწყო, არამედ ნათესავისაგან აბრაჰამისა იწყო.“ ამბობს ნეტარი პავლე მოციქული ებრაელთა მიმართ ეპისტოლის მეორე თავში.

ორი გამორჩეული ბუნება შექმნა ღმერთმა, ანუ ანგელოზებრივი და კაცობრივი; რადგან ანგელოზები და ადამიანები ღმერთმა შექმნა თავისი ხატებისამებრ, როგორც ეს არის ნათქვამი შექმნათა წიგნში: „ვექმნით კაცი ხატებისაებრ ჩუენისა და მსგავსებისაებრ.“ მაგრამ უნდა ვიცოდეთ, რომ არა ხორცისთვის, არამედ სულისთვის არის ნათქვამი, რომ ადამიანი ღვთის ხატებად არის შექმნილიო, რადგან ღმერთი არ არის ხორციელი, არამედ სულია, როგორც ამბობს ამას მაცხოვარი ქრისტე: „სული არს ღმერთი“. ანგელოზი, ასევე არის სული, როგორც ამბობს ამას დავით წინასწარმეტყველი: „რომელმაც შექმნა ანგელოზნი მისნი სულად [და მსახურნი მისნი ალად ცეცხლისა]“. ადამიანის სულიც სულია, როგორც ამბობს ამას იგივე წინასწარმეტყველი: „აღიღებს სულსა მისსა და აღარ იქმნა და მიწად იქმნება ..“

ღმერთი არის უხილავი, ანგელოზი არის უხილავი და ადამიანის სულიც არის უხილავი. ღმერთი არის უკვდავი, ანგელოზი არის უკვდავი და ადამიანის სულიც არის უკვდავი.

ღმერთს აქვს გონი და თავისუფალი ნება, ანგელოზს აქვს გონი და თავისუფალი ნება და ადამიანის სულსაც აქვს გონი და თავისუფალი ნება.

მამასადაამე, ორივე ბუნება დაცემულია ამჰარტავნების გამო: ანგელოზის, რადგან მოინდომა ღმერთთან გათანასწორება, როგორც ამბობს ამას ისაია წინასწარმეტყველი მე-14 თავში: „აღფრინდეთ მე ღრუბლებზე ზემოთ და დავემსგავსო ყოვლადმადმარს“, ამიტომაც შთააგდო ღმერთმა ის ჯოჯოხეთის უფსკრულის წყვილიაღში; ადამიანისაც, რადგან, ასევე, მოინდომა

---

ღმერთთან გათანასწოლება, მაშინ, როდესაც მიიღო გველის პირიდან ნათქვამი სიტყვები - რა დროსაც შეჭამთ კეთილისა და ბოროტების ცნობადობის, ხის ნაყოფს, გახდებით, ვითარცა ღმერთიო; და რადგან შეჭამა, გაგდებულ იქნა ედემის ბაღიდან და მიიღო წყევლა, რომ დაბრუნებოდა მიწას, საიდანაც შეიქმნა.

ხოლო, ახლა ღმერთი ადამიანებს უბოძებს უდიდეს წყალობას იმით, რომ იღებს მათ დაცემულ ბუნებას; ხოლო ანგელოზებს ასეთ წყალობას არ აძლევს და შედეგად, ამათ ბუნებასაც არ ღებულობს. ამის შესახებ გვეუბნება წმინდა პავლე მოციქული: „რამეთუ არა სადაოთ ანგელოსთაით იწყო, არამედ ნათესავისაგან აბრაჰამისა იწყო“.

ამიტომაც, ჩემო საყვარელო, დღევანდელ სიტყვაში მინდა გითხრათ, რატომ მიიღო ღმერთმა კაცობრივი ბუნება და არა ანგელოზებრივი; ასევე, რატომ მიიღო კაცობრივი ბუნება მე ღვთისამ და არა წმინდა სამების რომელიმე სხვა პირმა, ან მამამ, ან წმინდა სულმა. ამ ყველაფრის შესახებ გეტყვით ძალზედ მოკლედ, რომ ზედმეტად არ დაგღალოთ, ამიტომაც ვევედრები მართალ ღმერთს, რომ მომცეს ძალა და შეწევნა, ხოლო თქვენ გთხოვთ სიყვარულით მოსმენას.

პირველი მიზეზი, რატომაც ღმერთმა მიიღო კაცობრივი ბუნება და არა ანგელოზებრივი არის ის, რომ ყველა ანგელოზი არ დაცემულა, არამედ ბევრი მათგანი დარჩა, ხოლო ადამიანები, თავდაპირველი ურჩობის ცოდვის გამო, ყველანი დაეცა. ამაში ჩვენ შეგვიძლია დავრწმუნდეთ ლუკას სახარების მე-15 თავში მოცემული მაცხოვარი იესო ქრისტეს იგავით: „ვის თქუენგანსა კაცსა ედგას ასი ცხოვარი და წარუწყმდეს მას ერთი მათგანი, არა - მე დაუტევნესა ოთხმოც და ათცხრამეტნი იგი უდაბნოსა ზედა და წარვიდეს წარწყმედულისა მისთვის ვიდრემდე ჰპოოს იგი? და ჰპოოს რაი, დაისუას იგი მხართა თვისთა ზედა სიხარულით“.

---

იმ კაცში იგულისხმება თავად უფალი იესო ქრისტე, რადგან ასე ამბობს დავით წინასწარმეტყველი: „გამოვალს კაცი საქმესა თვისსა და შრომასა თვისსა მიმწუხრამდე.“ ოთხმოცდაცხრამეტ ცხვარში იგულისხმება ანგელოზთა ცხრა დასი, რომლებიც ქრისტემ მიატოვა ზეცაში და წავიდა დაკარგული ცხვრის საძებრად, ანუ კაცობრივი ბუნების, რომელიც დაშორებული იყო ღმერთს და დაკარგული ამ სოფელში. რადგან ასე ამბობს დავით წინასწარმეტყველი ღვთის მიმართ: „დავკარგულვარ ვითარცა ცხოვარი, მოიძიე მონა შენი“.

მოიძია ქრისტემ ის დაკარგული ცხვარი და აიყვანა თავის მხრებზე, ანუ მიიღო კაცობრივი ბუნება, როგორც ამბობს ამას უფლის მოციქული: „გამოჩნდა ხორცში“.

ამაში შეგვიძლია დავრწმუნდეთ ქრისტეს სხვა იგავითაც, სადაც ნათქვამია: „დედაკაცსა, რომელსა აქუნდა დაქმაი ათი და წარწყმიდოს ერთი, არა - მე აღანთისა სანთელი და მოჰმართოს სახლი და ეძიებნ გულსმოდგინედ, ვიდრემდე პოის იგი?“

იმ ქალში იგულისხმება ღვთაების მეორე პირი, რომელმაც დატოვა ზეცაში ცხრა დრაჰკანი, ანუ ანგელოზთა ცხრა დასი, გარდამოხდა დედამიწაზე დაკარგული დრაჰკანის, ანუ კაცობრივი ბუნების მოსაძიებლად, ანთებული სანთელითო, ანუ ღვთაებრივი სწავლებით. რადგან ასე ამბობს დავით წინასწარმეტყველი: „სანთელ არს ფერხთა ჩემთა ჰსჯული შენი და ნათელ – ალაგთა ჩემთა“.

მოიძია ის დაკარგული დრაჰკანი ღვთაების მეორე პირმა, ანუ მე ღვთისამ და შეიმოსა ადამიანის სხეული, როგორც ამბობს ამას იოანე წინასწარმეტყველი: „და სიტყუაჲ იგი ჯორციელ<sup>2</sup> იქმნა“.

ამიტომაც, ანგელოზები არ დაღუპულა ყველა, რადგან მათგან დარჩენილა ზეცაში ცხრა დასი, ხოლო ადამიანის ბუნება იყო სრულად დაკარგული, რომელშიც იგულისხმება ცხვარი და დრაჰკანი დაკარგული და რომლებიც მოიძია ქრისტემ.

---

მეორე მიზეზი, რატომაც ღმერთმა მიიღო კაცობრივი და არა ანგელოზებრივი ბუნება, იყო ის, რომ ადამიანმა შესცოდა სისუსტის გამო, რადგან ხორცში იყო და ამ ხორცმა მიდრიკა კიდევაც ცოდვისკენ. სამი მიზეზის გამო შეიძლება სცოდავდეს ადამიანი: ან სისუსტის, ან უცოდინრობის, ან ბოროტი ბუნების გამო. სისუსტის გამო ჩადენილ ცოდვას ეძახიან მამა ღმერთის წინაამდდეგ ჩადენილ ცოდვას, რადგან მამა ღმერთი არის ყოვლადძლიერი.

უცოდინრობის გამო ჩადენილი ცოდვა არის ძის წინაამდდეგ ჩადენილი ცოდვა, რადგან ძე ღმერთი არის სიბრძნე.

ბოროტი ბუნების გამო ჩადენილი ცოდვა არის სული წმინდის წინააღმდეგ ცოდვა, რადგან სული წმინდა არის კეთილი.

ადამიანი თუ შესცოდავს სისუსტის ან უცოდინრობის გამო, ღმერთი შედარებით უფრო ადვილად შეუნდობს მას თუ, რა თქმა უნდა, ის შეინანებს. რადგან ასე ამბობს დავით წინასწარმეტყველი: „ცოდვას სიჭაბუკისა და უმეცრებისა ჩემისა ნუ მოიხსენებ“. მაგრამ ადამიანი თუ სცოდავს ბოროტი ბუნების გამო სული წმინდის წინაამდდეგ, ღმერთი აღარ შეუნდობს მას ასე იოლად. რადგან ასე ამბობს უფალი იესო ქრისტე: „ყველა ცოდვა და გმობა შეენდობა ადამიანს, ხოლო გმობა სული წმინდის წინაამდდეგ არ მიეტევება მას“.

სასიკვდილო ცოდვა სულ შვიდია, რაც იგულისხმება, რომ ეს ცოდვები სულიწმინდის წინააღმდეგაა. რასაკვირველია, ეჭვგარეშეა, რომ ეს ცოდვები არ მიეტევება ადამიანს, თუ არ მიიღო სათანადო განკურნება. პირველი ცოდვა არის ამპარტავნება, რომელიც წარმოშობს ქედმაღლობასა და ურჩობას; მეორე ცოდვა არის შური, რომელიც წარმოშობს მტრობასა და მკვლელობას; მესამე არის ვერცხლის მოყვარეობა, რაც იგივე კერპთაყვანისმცემლობაა, რომელიც ყველანაირ ბოროტებას წარმოშობს; მეოთხე არის სჯულის დარღვევა, ანუ ყველანაირი წესებისა და კანონების უგულვებელყოფა, რაც წარმოშობს

---

ურწმუნობასა და ღვთის უარყოფას; მეხუთე ცოდვა არის მეგობრებსა და ძმებს შორის მტრობის დათესვა, ცოდვა, რომელიც თავად სატანამ ჩაიდინა, შესაბამისად, ვისაც ახასიათებს მსგავსი რამ, უშუალოდ ეშმაკს ემსგავსება; მეექვსე არის ბოროტი სასოება, რომელიც ახასიათებს ზოგიერთ მორწმუნეს იმ გაგებით, რომ აღარ ებრძვის ცოდვებს, ფიქრობს, ვითომ ღმერთი მას მაინც შეუნდობს, ამის გამო წარმოიშვება ღვთის უშიშრობა და ყველანაირი სიბილწე; მეშვიდე, ბოლო და დანარჩენზე ყველაზე მძიმე ცოდვა არის სასოწარკვეთა, ანუ ღვთის წყალობის არ რწმენა, რომ ღმერთი როდესმე შეუნდობს მას მის ცოდვებს, აქედან წარმოიშვება სულიერი სიკვდილი და ჯოჯოხეთის მარადიული ტანჯვა.

და ვისაც გააჩნია რომელიმე ამ ცოდვათაგანი და არ მოისურვებს გამოსწორებას, სჯობდა, რომ დედამისს არც გაეჩინა ეს ადამიანი, რადგან ამბობს ისაია წინასწარმეტყველი 48-ე თავში: „ვიციდი, რომ ჯიუტი ხარ და რკინის მარღვები გაქვს კისერზე და სპილენძის შუბლი“. <sup>2</sup>

ამიტომაც მიიღო ღმერთმა კაცობრივი და არა ანგელოზებრივი ბუნება, რადგან ადამიანმა სისუსტის გამო შესცოდა მამა ღმერთის წინამდღეგ, ხოლო ანგელოზმა შესცოდა ბოროტი ბუნების გამო, ანუ სული წმინდის წინააღმდეგ.

მესამე მიზეზი, რატომაც მიიღო უფალმა კაცობრივი და არა ანგელოზებრივი ბუნება, არის ის, რომ ანგელოზმა შესცოდა თავისივე ნებით, ხოლო ბეჩავი ადამიანი შეაცდინა გველმა. რადგან ცოდვაც ორი სახისაა: ერთი-რომელსაც ჩვენ თვითონვე ჩავდივართ, ხოლო მეორე არის ის, რომელსაც ჩადის სხვა ადამიანი, მაგრამ ჩვენც ვხდებით იმ სხვისი ცოდვის თანაზიარნი. მაგრამ ღმერთი გვსჯის იმ სხვისი ცოდვების გამოც. ისევე, როგორც ეს ხდება ადამიანის სხეულში, რადგან, როდესაც ავადმყოფობს სხეულის ერთი ნაწილი, ყველა დანარჩენიც იტანჯება. ასევეა მსოფლიოშიც, რომელიც არის სხეული, ანუ ქრისტეს ეკლესია - ქრისტიანები, ერთი ბოროტი ადამიანის გამო შეიძლება ღმერთმა ბევრი კეთილი ადამიანიც დასაჯოს, როგორც ეს არის ბევრ

---

წიგნსა და ისტორიაშიც. მოციქულის სიტყვები გვასწავლიან, რომ „მცირე საფუარმა მთელი ცომი ამოიყვანა“, ასევე ერთი ადამიანის ცოდვამ და ბოროტებამ შეიძლება ბევრს მოუტანოს განსაცდელი.

ამიტომაც სთხოვდა დავით წინასწარმეტყველი ღმერთს, რომ შეიწყალოს სხვისი ცოდვის გამო. ამიტომაც მიიღო ღმერთმა ადამიანის ბუნება და არა ანგელოზის, რადგან ანგელოზმა შესცოდა თავისივე ნებით, ხოლო ადამიანმა შეცდენით, ამ ცოდვის თანაზიარი, რა თქმა უნდა, გახდა ბოროტი ანგელოზიც, ანუ ეშმაკი, რადგან მან შეაცდინა ადამიანი გველის მემკვიდრით.

მეოთხე მიზეზი, რატომაც მიიღო ღმერთმა კაცობრივი ბუნება და არა ანგელოზობრივი, იყო ის, რომ ანგელოზი უფრო დიდ პატივში იყო, ვიდრე ადამიანი; ამიტომაც ის ვალდებული იყო, უფრო მეტად დაეცვა თავი ცოდვისაგან. რადგან, ვინც უფრო მეტ პატივშია, ის ჭია და მატლია. ასეა ნათქვამი იოხის წიგნის 25-ე თავში: „აჰა, მთვარე რომ მთვარეა, ისიც ბნელდება და ვარსკვლავებიც არ არიან სუფთა მის თვალში! მით უფრო კაცი, რომელიც ჭიაა, და ადამის ძე, რომელიც მატლია!“<sup>2</sup> (ამიტომაც აუცილებელია, რომ სულიერი, ანუ ეკლესიური ადამიანი) იყოს მეტად წესიერი და პატიოსანი, ვიდრე ურწმუნო, რადგან ყველა უნდა ხედავდეს ეკლესიური ადამიანის კეთილ ცხოვრებას და მისგან მაგალითს იღებდეს.

ამიტომაც მაცხოვარი იესო ქრისტე სულიერ ადამიანებს ეძახის მარილს: „თქვენ ხართ მარილი ქუეყანისაი. უკეთუ მარილი იგი განქარდეს, რაითა-მე დაიმარილოს?“<sup>2</sup>. ასევე მათ ეძახის ნათელს: „თქვენ ხართ ნათელი სოფლისანი“.<sup>2</sup> და იქვე აგრძელებს: „ეგრეთ ბრწყინავდინ ნათელი თქუენი წინაშე კაცთა, რაითა იხილნენ საქმენი თქუენნი კეთილნი და ადიდებდნენ მამასა თქუენსა ზეცათასა“.<sup>2</sup> მათ ეძახის ქალაქს, როდესაც ამბობს: „ვერ ხელ-ეწიფების ქალაქსა დაფარვად, მთასა ზედა დაშენებულსა“.<sup>2</sup> ეძახის ასევე სანთელს ასეთი სიტყვებით: „არცა აღანთიან სანთელი და დადგიან ქუეშე



---

ხვიმირსა, არამედ სასანთლესა ზედა, და ჰნათობენ იგი ყოველთა, რომელნი იყვნინან სახლსა შინა“.<sup>2</sup>

რადგან ღმერთის მრისხანება მიმართულია არა იმდენად უბრალო ადამიანზე, როდესაც ის ცოდვას ჩადის, არამედ უფრო მეტად ეკლესიურ და პატივცემულ ადამიანზე. ამიტომაც ეკლესიურებს უფრო მეტად გვმართებს პატიოსნება და უფრო მეტად უნდა ვერიდოთ ცოდვებს.

მაშასადამე, ამ ოთხი მიზეზისთვის, რაც ვთქვი, მიიღო ღმერთმა კაცობრივი და არა ანგელოზებრივი ბუნება. მაგრამ, რატომ მიიღო ძე ღვთისამ კაცობრივი ბუნება და არა წმინდა სამების სხვა რომელიმე პირმა, მამამ ან სულიწმინდამ? ამასაც ოთხი მიზეზი აქვს. პირველი, რადგან ძე ღვთისას სიბრძნეს ეძახიან და მან მიიღო კაცის ხატება, რომ განკურნოს ადამიანის უგუნურება, რომლითაც ის ჩავარდა ცოდვაში.

მეორე, რადგან ძე ღვთისა არის უჟამო, ამიტომაც განხორციელდა, რომ ძე კაცისაც გამხდარიყო მარადიული.

მესამე, როგორც ძე ღვთისა გახდა ძე კაცისა, ასევე ძე კაცისა რომ გამხდარიყო ძე ღვთისა, როგორც ამას ამბობს იოანე მოციქული: „და მიეცათ მათ ძალა გახდნენ ძენი ღვთისა“.

მეოთხე, რადგან ძე არის წმინდა სამების პირებს შორის შუა პირი, ამიტომაც განხორციელდა ძე ღვთისა, რომ გამხდარიყო შუამავალი ღმერთსა და კაცს შორის, როგორც ამას ამბობს პავლე მოციქული: „რადგან ერთია შუამავალი ღმერთსა და კაცს შორის, კაცი იესო ქრისტე“.

რაც შეეხება მაცხოვარი იესო ქრისტეს შობას, რომელსაც აღნიშნავს დღეს ჩვენი წმინდა ეკლესია, არანაირი აზრი არ აქვს იმის გამოძიებას, თუ როგორ იშვა ძე ღვთისა მამისაგან დედის გარეშე და მერე როგორ განხორციელდა დედისაგან მამის გარეშე, რადგან ეს უდიდესი საიდუმლოა, რომელიც აღემატება ჩვენს გონებასა და ბუნებას. არამედ მხოლოდ რწმენითა და დიდების სიტყვებით უნდა ვცემდეთ თაყვანს მას, როგორც სიმაღლის მზეს,

---

ქალწულის საშოდან გაბრწყინებულს ჩვენთვის, რომლებიც ვსხედვართ წყვილიადსა და სიკვდილის აჩრდილში. მხურვალე გულებით შევსწიროთ მადლობა იმ უთვალავი და მრავალი სიკეთისთვის, რაც მან გაგვიკეთა, რადგან თავისი შობით მან განგვიახლა ჩვენი ბუნება. ხოლო მე, უღირსი, ვევედრები მხოლოდშობილ ძეს ღვთისას და ჭეშმარიტ ღმერთს, უბოძოს ჩვენს დიდებულ მთავარს, მთელ მის ოჯახს და ყველას, ჩვენს ქრისტიან მრევლს ჯანმრთელობა, მტკიცე და ბედნიერი ცხოვრება, დავესწროთ მრავალ შობას სიკეთითა და კეთილდღეობით.

## ქადაგება № 30

### ქადაგება მაცხოვარი იესო ქრისტეს შობაზე 25 დეკემბერს

„ნუ გეშინინ, რამეთუ აჰა ესერა გახარებ თქვენ სიხარულსა დიდსა, რომელი იყოს ყოვლისა ერისა: რამეთუ იშვა დღეს თქვენდა მაცხოვარი, რომელ არს ქრისტე უფალი, ქალაქსა დავითისსა“

დღევანდელი წმინდა წერილის ეს სიტყვები უდიდეს სულიერ სიხარულს გვანიჭებს ჩვენ, მორწმუნეებს, და დღესასწაულის მოყვარულთ. ამ სიტყვებიდან ვსწავლობთ ორ სასწაულებრივ და ზებუნებრივ რამეს: პირველი, ვიგებთ სასიხარულო ამბავს, რომელიც არც მანამდე და არც მის მერე აღარ იქნება გაცხადებული; და მეორე, ვიგებთ ამბავს, რომელიც მთელ დედამიწაზე ნებისმიერ მწუხარებას, გლოვასა და ცრემლს წარხოცავს. დიდად მსურს, რომ ეს სიტყვები გავშალო თქვენ წინაშე, როგორც მდიდარი სუფრა, და მოგართვათ სულიერი ტრაპეზი და შეძლებისდაგვარად ნაირ-ნაირი ნოყიერი საჭმელების მაგივრად სახარების სიტყვები მოგართვათ. მათრობელი

---

სასმელის მაგივრად, თქვენი ყოვლადბრძენი თავების ბარძიმები შევავსო დიდი სიხარულის სიტყვებით, და ამისათვის ვევედრები ყოვლადმღიერ ღმერთს, რომელიც უცოდინართ აღავსებს სიბრძნით, განგვინათლოს გონება და შეგვეწიოს, რათა დავტკბეთ სიტყვათა ნადიმით და დავატკბოთ ჩვენი სულიერი გული და სასმენელნი.

ყველა სახელთა შორის, რომელთაც ისაია წინასწარმეტყველი უწოდებს მაცხოვარს, ყველაზე უპირატესი არის საკვირველი; და ნამდვილად მას შეჰფერის ეს სახელი, რადგან არა მხოლოდ ერთში, არამედ ყველა საქმეში მაცხოვარი იყო საკვირველი. საკვირველი იყო მისი ჩასახვა, მისი შობა, მისი ცხოვრება, სწავლება, სიკვდილი, აღდგომა, ზეცად ამაღლებაც; საკვირველი იყო მისი ამაღლების დიდებაც, რადგან მასთან ერთად ჩვენც საკვირველად ავმაღლდით. მაგრამ ჩვენი დღევანდელი დღესასწაული ყველაზე საკვირველია, რადგან როგორც მახარობელი წერს: „და შვა ძე იგი მისი პირმშოდ და შეხვა იგი სახუეველითა და მიაწვინა იგი ბაგასა, რამეთუ არა იყო მათა ადგილ სავანესა მას.“ რა არის ამაზე დიდი საკვირველება, რომ ყოველთა უფალი იწვეს ბაგაში? განა არ იყო ამ სამყაროში სხვა, უფრო შესაფერისი ადგილი? რა არის ამაზე დიდი საკვირველება და დიდება, რომ შემოქმედი ღმერთი დაგდებულ იქნეს პირუტყვთა სადგომში? ხედავენ ანგელოზები ზეცათა უფალს ნაგავში დაგდებულს, გალობენ: დიდება მაღალთა შინა ღმერთსა!

ეს შობა არ იყო მხოლოდ მაცხოვრებელი, არამედ საკვირველიც. რადგან, ერთი მხრივ, ჩვენ უნდა გვიკვირდეს ღვთის განგების სიბრძნე, ხოლო, მეორე მხრივ, უნდა ვადიდოთ მისი საქმეების სიდიდე. რადგან მივიღეთ დღეს ზეცისა და ქვეყნის მსაჯული, რომელმაც დახია ჩვენი ცოდვების სია, წყალობა ჰქმნა და დაამსხვრია ჩვენი ცოდვების ბორკილებიც.

დღეს მივიღეთ უფალი, რომელმაც ჩვენს მხრებზე არსებული ძველი მონობის უღელი დაამსხვრია და ამ სოფლის მწუხარება სიხარულად

---

გადააქცია იმით, რომ მიანიჭა მარადიული თავისუფლება. დღეს მივიღეთ მშვიდი და სათნო მეუფე, რომელიც ზეციური სამართლიანობის ნაბიჯებით დადის რა ამ სოფელში, გაანადგურა ბოროტისა და სულიერი მტრის ტირანია.

დღეს გამობრწყინდა ახალი ადამი, რომელიც არ არის უბრალო მოქალაქე, არამედ ცათა სასუფევლის უფალი და მბრძანებელი, რომელსაც აკრძალული ხის ნაყოფის მშვენება არ მოხიბლავს; გველი არ მოატყუებს და ქალი არ შეაცდენს.

დღეს გამობრწყინდა ნათელი ბნელსა შინა, დღეს, რომელიც არღვევს ცასა და ზეცათა ცას, სოფელმა მიიღო ისე, რომ ვერც შეიცნო.

იხილეს ჩვენმა წინაპრებმა უთვალავი და დიდი სასწაულები, რადგან მეწამული ზღვა გაიხსნა და გაატარა ისინი; ცეცხლი სვეტის სახით ემსახურა და გაუნათა ღამე. ღრუბელმა, რომელმაც დაიცვა დღის სიცხისაგან, მზის სხივთა სიმბურვალისაგან; ზეცამ ანგელოზთა პური მისცა მათ; მადლის ქვა და ტკბილი სასმისი გაუხსნა მათ. იორდანემ თავისი სწრაფი დინება უკუაქცია; მტერთა გალავანები საყვირის ხმისაგან დაეცნენ; ხოლო მზემ შეაჩერა რა თავისი მსვლელობა ცის კამარაზე, გაახანგრძლივა დღე. მსგავსი სასწაული არ მომხდარა და არც არასოდეს სმენია ვინმეს, არც გაგებულა, რომ მხოლოდმობილი ძე ღვთისა, რომელსაც შიშით ემსახურებიან ანგელოზები, გვეცხადება ადამიანის ხორცში და იმ ხორცს განამღრთობს.

ამიტომაც ეს საიდუმლო რამდენადაც მაცხოვრებელია, იმდენად საკვირველიც, ადამიანის ენასაც ვერ ძალუმს მისი გამოთქმა და არც ანგელოზებს, რომელნიც გვახარებენ დღეს ამ ზეციური გალობით, არ ძალუმთ ამ სასწაულის გამოხატვა.

ნათქვამი იყო ავგუსტუს კეისრის მიერ გამოცემულ ბრძანებაში: რომ აღწერილიყო მთელი სამეფო, ანუ ყველა თავისი სახელისა და დაბადების ადგილის მიხედვით უნდა ჩაწერილიყო. ამიტომაც ამ ბრძანების გამო, რაკი იოსები გალილეის ქალაქ ნაზარეთიდან იყო, წავიდა ჰურიასტანს, დავითის

---

ქალაქში, რომელსაც ერქვა ბეთლემი (რადგან ის იყო დავითის სახლისა და სამკვიდროსაგან), რათა მასთან დაწინდულ მარიამს, რომელიც იმ დროს ორსულად იყო, აღწერაში მიეღო მონაწილეობა. ხოლო ამ რთული და დამქანცველი მოგზაურობის შესახებ ყველასათვის ცნობილია, თუ იმასაც გავითვალისწინებთ, თუ ვინ მოგზაურობდა და როგორ. რადგანაც ჟამი იყო ზამთრისა და სიცივისა და ცივი ქარების გამო, მიწაცა და წყალიც გაყინული იყო; ამ პირობებში ახალგაზრდა და მოკრძალებული ქალწული, რომელიც არც სახლიდან გამოსვლას იყო ჩვეული და თან მოლოგინების ჟამიც მოახლოვებოდა, ასეთ ძნელსა და განსაცდელებით აღსავსე გზას ადგას. ნეტავ ბეთლემში მისულთათვის მოძებნილიყო მშობიარობისათვის შესაფერისი სახლი; მაგრამ სიღარიბის მოყვარულმა უფალმა თავად ინება, რომ მდაბალ გამოქვაბულში დაბადებულიყო.

და როგორც ამბობს მახარობელი, გამოქვაბულში მოუწია მშობიარობის ჟამი; და იყო ღამე, რომელიც მზეზე ნათელი იყო; ღამე, რომელშიც გაბრწყინდა მზე სინათლისა. უფრო მეტიც, მე იმ დღეს ღამეს დავარქმევდი, რომელშიც პირველმა ადამიანმა, ადამმა, მოისურვა ღმერთის მსგავსი გამხდარიყო. ხოლო ეს ღამე, რომელშიც გაბრწყინდა ამ სოფელში ზეციური ნათელი, ანუ ახალი ადამი, მას დავარქმევდი დღეს.

ხოლო წმინდა ქალწული მოუთმენლად ელოდა ამ ჟამს, რომელშიც ღმერთი იშვებოდა, როგორც ყრმა, რათა აეყვანა, მკლავებზე მიეწვინა, მიფერებოდა თავისი ხელებით, გამოეკვება იგი თავისი ძუძუთა რძით, და ეს ყველაფერი სიმშვიდესა და დუმბილში(ზედმეტი ხმაურისა და ზარზეიმის გარეშე)

როდესაც ღამემ თავის გზის ნახევარი გალია, ამა სოფლის ნათელში გამოვიდა მაცხოვარი, როგორც სიძე თავისი პალატებიდან; გამოვიდა, როგორც ყოველთა საუკუნეთა სასოება, ანგელოზთა სიხარული, ადამიანთა მაცხოვარი, მიცვალებულთა აღდგომა, წყალობის წყარო და სიცოცხლის ფესვი. გამოვიდა

---

სიტყვა მამისა, ქალწულისაგან მიღებული ხორციტ მოსილი; გამოვიდა შიშველი, რათა შეგვმოსოს ჩვენ, ღატაკი, რათა გაგვამდიდროს ჩვენ, მდაბალი, რათა აღგვამაღლოს ჩვენ ზეცაში, როგორც ყრმა, რომ გაგვხადოს ჩვენ სრულყოფილნი და გვიბოძოს მარადიული ცხოვრება. გეკითხებით, გაგონილა ოდესმე მსგავსი ამბავი? ან გსმენიათ, რომ კიდევ მოხდება მსგავსი რამ? იმ დროს, როდესაც კარგ, მაგრამ დროებითსა და წარმავალ ამბავს, დიდი სიხარული მოაქვს ადამიანებისათვის, როგორც ანგელოზმა სთქვა: ეს ამბავი შეუდარებლად უზომო სიხარულის მომტანია მთელი სამყაროსათვის! როგორც მზის სიმხურვალე აშრობს წყალს და ორთქლი დედამიწიდან ზეცას აედინება, ხოლო შემდეგ წვიმის სახით კვლავ მიწაზე ეშვება, მიწა ხარობს და ნაყოფს იძლევა ამის გამო, ასევე მამაკაცის თესლის გარეშე, ნაყოფად გამოიღო მაცხოვარი იესო ქრისტეს სხეული, რომელიც არის ნათელი ჭეშმარიტი, გამოვიდა ამა სოფლის ნათელში და გაახარა მთელი კაცთა მოდგმა.

ღვთისმშობელი, ამქვეყნად მაცხოვარ იესო ქრისტეს შობამ, უფრო მეტად გაამშვენებდა, ვიდრე ნებისმიერი მიწიერი ნივთებით შემკობილი რომ ყოფილიყო. ყველა სათნოებათა წყარო, რომელიც თავისი უბიწოებითა და ქალწულობით, ყოველგვარი ტკივილის გარეშე მოავლინა ამ სოფელში ეს წმინდა ყრმა.

ბევრ ქვეყანაში არის წესი, რომ იმას, ვისაც ახალი ნაყოფი შემოაქვს გასაყიდად, ყველანაირი საბაჟო გადასახადი ეხსნება. მსგავსად ამისა, ყოვლადწმიდა ღვთისმშობელი იმსახურებდა, რათა გათავისუფლებულიყო მშობიარობის ტკივილებისაგან (ვალდებულებისაგან), რადგან მან პირველმა და ერთადერთმა ამ სოფელში მოიყვანა ახალი ნაყოფი. ყველა სხვა ქალს, რომელსაც ყრმა გაუჩენია, ამ სოფელში პირვანდელ ცოდვაში ჩასახული ძველი ნაყოფი მოუყვანია. ხოლო ის, ვინც შვა ყოვლადწმიდა ქალწულმა, ჭეშმარიტად არის ახალი ნაყოფი, რადგან იშვა კაცი, ჩასახული სიწმინდისაგან და არა მხოლოდ კაცი, არამედ ღმერთიც. ერთადერთმა მოიყვანა ამ სოფელში

---

ეს ულამაზესი ნაყოფი, ამიტომაც გათავისუფლდა მშობიარობის ტკივილთა (ვალდებულებებისგან), და ამავე დროს არ დაკარგა ქალწულობის სიწმინდე. რადგან ვინც ამ სოფლად მოვიდა იმისათვის, რომ ყველა ადამიანი აქციოს წმიდად და უბიწოდ, განა საკუთარ დედას რამე ვნებას მიაყენებდა?

ამიტომაც რა შეიძლება იყოს მეტად დიდებული და საკვირველი, ვიდრე ეს შობა? რადგან განცვიფრებისგან ბნელდება ადამიანის გონება და არ ძალუძს ჩაწვდეს, თუ როგორ შვა ქალწულმა ძე? ამ დიდ ძღვენში, რომელიც ამ სოფელს მოევლინა, ორი ძღვენი იყო დაფარული: ერთი-სამყაროს შემქმნელი იშვება თავისი ქმნილებისაგან, ქალწულისგან, რომელსაც არ მისდგომია მამაკაცი, გაკვირვებულია თავისი საშოს ნაყოფით; და მეორე- ქალი ხდება თავისივე დასაბამის დასაბამი.

არ ვიცი, უწინარეს ყოვლისა, რითი ვიყო გაკვირვებული? უთესლოდ მუცლადღებით, თუ შობით, რომლის დროსაც განდიდდა ქალწულობა? არ არის გასაკვირი, რომ შობის შემდეგაც დარჩა წმიდა ქალწულად, რადგან შვა ის, ვინც არის ქალწულების საწყისი და ყოვლადწმიდა.

ვის შეუძლია გამოთქვას, თუ რა სიყვარულითა და ამავედროულად შიშით ჩაიხუტა თავისი ძე, რადგან რწმენით იყო სავსე და იცოდა, რომ იგია ჭემმარიტი ღმერთი და ამავედროულად მისი შვილიც. თან საკუთარ თავზეც იცოდა, რომ დედაცაა და მსახურიც. ამის გამო, როგორც დედა სიყვარულით იხუტებდა, ეფერებოდა და ეამბორებოდა ყრმას, ხოლო, როგორც მსახური, მხოლოდ თავისი ყოვლადწმიდა ხელებით ბედავდა შეხებოდა ყოვლადძლიერ ღმერთს. რადგან იცოდა, რომ არც მღვდლებს ჰქონდათ უფლება შეხებოდნენ რჯულის კიდობანს, რომელიც ამ დიდი საიდუმლოს აჩრდილს წარმოადგენდა; იცოდა, რომ ის, ვინც ატარებდა უფლის წმიდა ჭურჭელს, პირველად თავად უნდა განწმენდილიყო, და თუ ძველი აღთქმის ტაძრის სპილენძს სჭირდებოდა ამხელა სიწმინდით მიდგომა, მითუმეტეს, რამხელა სიწმინდე დასჭირდებოდა სიწმინდის წყაროსა და სათავეს.

---

ამიტომაც, ყოვლადბრძენი ქალწული შიშითა და სიყვარულით, მრავალი ცრემლით, რომელთაც ღვრიდა თავისი შვილის სიყვარულის გამო, რწყავდა ყოვლადწმიდა ახალშობილ ყვავილის ბუტკოს, თან ხელში აიყვანა, სახვევებში გაახვია, მკლავებში ჩაიხუტა და თავისი ქალწულეზრივი ძუძუებით დაიწყო მისი გამოკვება.

და ის, რაც შემდეგ მოხდა, ნამდვილად აღემატებოდა ყველანაირ კაცობრივ გონებას, რადგან ნათქვამია: „და შეახვია სახვევლითა და მიაწვინა იგი ბაგასა, რამეთუ არა იყო მათი ადგილი სავანესა მას“ რადგან შეახვია ის, ვინც არის ყოვლადმაღალი, ყველაზე მდაბალი ნივთებით. როგორ არ შევკრთები გაკვირვების გამო, რადგან ამ ყრმას, რომელიც მიწვენილია ბაგაში, ჩვენი რწმენის მზერაა, ზე რომ აღვმართოთ, დავინახავთ ზეცაში, ღრუბლებიდან ელვათა კრთომას, ჭექასა და ქუხილს რომ წარმოქმნის, დავინახავთ, რომ იგია ის, ვინც განაგებს მზის, მთვარისა და ვარსკვლავების მსვლელობას და მთელი სამყაროს სიმყარესა და წესრიგს მართავს.

ვინ არის ის, ამდენად მცირე და ამავდროულად დიდი, ამდენად მდაბალი და ამავდროულად დიდი, რომელიც ბაგაში მიწვენილია და ამავდროულად ანგელოზთა ხმებით არის განდიდებული. რა არის მეტად მცირე და მდაბალი, რომ იშვას ვინმე ბაგაში, რადგან ეს ადგილი განკუთვნილია პირუტყვთათვის და არა ადამიანებისათვის. და რა არის უფრო დიდებული და ამაღლებული, რომ ამავე შობისას მთელი დედამიწა აღივსო ანგელოზების დასთა სიხარულის გალობით: „დიდება მაღალთა შინა ღმერთსა“! და აღივსო მთელი ცა ამ ტკბილი და მანუგეშებელი ხმებით. სად გაგონილა სამყაროს დასაბამიდან, ან რომელიმე ადამიანის დაბადებისას ეგალობათ ანგელოზებს? ადამიანო, შენი სისუსტის გამო, თუ არ შეგიძლია ირწმუნო, როგორ იშვა ღმერთი დედაკაცისაგან, იცოდე, რომ ის იშვა ქალწულისაგან. და თუ მიგაჩნია დამამცირებლად, რომ ჩვილი იყო უბრალო სახვევებში, შეხედე და განცვიფრდი, როგორი გალობით ადიდეს იგი, რა



---

სიტყვებით ადიდა ის ანგელოზთა დასმა. და თუ საზიზღრად გეჩვენება პირუტყვთა ბაგა, აღმართე შენი მზერა და ზეცაში დაინახავ ახალ ვარსკვლავს, რომელიც მთელ სამყაროში ამოწმებს უფლის შობას. და თუ გწამს ის, რაც არის მდაბიო, ირწმუნე ისიც, რაც აღმატებულია. და თუ ჩაწვდები იმას, რაც თავმდაბლობიდან მოდის, ადიდე ისიც, რაც ზეციურია და ყოვლად მაღალი.

ვინ არ დაინახავს, რომ მასში, ვისშიაც დიდება და სიმდაბლეა გაერთიანებული, ორი ბუნება აქვს, რომელთაგან ერთი ღირსია დიდებისა, ხოლო მეორე სათნოების მიმღებია? ამ ორ ბუნებაზე მეტყველებს ისაია წინასწარმეტყველი: „ყრმა იშვა ჩვენთვის და ძე მოგვეცა ჩვენ“. როდესაც იგი ყრმას უწოდებს, გულისხმობს კაცობრივი ბუნების სიმდაბლეს, ხოლო, როდესაც ძეს უწოდებს, გულისხმობს ღვთაებრიობის სიმაღლეს.

ჩვენთვის იშვა ის, ვინც დაუსაბამოა, ამიტომაც იშვა მამა ღმერთისაგან, ქალწულისაგან იშვა ის, ვინც წვდება სამყაროს კიდეებს; მოგვეცა ის, ვინც დაუსაბამოა; იშვა ის, ვინც სხვაზე ბევრად ახალგაზრდაა; მოგვეცა ის, ვინც ყოველ მშობელზე უზენაესია; იშვა ის, ვინც მოკვდება; მოგვეცა ის, რომლისაგანაც ცხოვრება იშვება, და ასე შემდეგ; მოგვეცა ის, ვინც არის დაუსაბამო და იშვა ის, ვინც მანამდე არ იყო. ერთი ზეობს, ხოლო მეორე თავს იმდაბლებს. თავად ზეობს და ჩვენ, მის მორწმუნეებს, გვიმზადებს სამკვიდროს; და არავინ იფიქროს, რომ განკაცებით რამენაირად დამცირდა მისი ღვთაებრივობის სიდიდე. იგი არ იშვა ანგელოზებისათვის, რადგან ისინი, ვინც მადლში მყოფობს, არ სჭირდება ცხონება, მხოლოდ დაცემულებს აღარ შეეძლოთ გამართლება და ამიტომაც ჩვენ მოგვეცა და ჩვენთვის იშვა ძე ღვთისა.

მაშინ როცა დასნი ანგელოზისანი გალობით ადიდებენ უფალს, მით უმეტეს, ჩვენ, ადამიანებს, გვმართებს მისი ქება და მადლობის შეწირვა იმისათვის, რომ შეგვადარა ჩვენ მამა-ღმერთთან, მთელ ქვეყნიერებაზე გადმოიღვარა უდიდესი სიხარული, გვიხსნა ბოროტისაგან, გაგვიხსნა

---

სასუფევლის კარნი და სხვა უთვალავი სიკეთისათვის, რომელიც მოგვანიჭა და გვანიჭებს ყოველთვის, იმ ყველაფრისათვის, სულიერი სიხარულით, ქებით, მადლიერებითა და დიდებით ვთქვათ: „დიდება მაღალთა შინა ღმერთსა.“

და თაყვანი ვცეთ მის შობას და ფილოსოფოსებთან ერთად სიყვარულით, შიშითა და ღირსებით მივართვათ მას სათნოების ძღვენი: ოქრო, გუნდრუკი და მური. ხოლო ოქროს ნაცვლად, როგორც ზეცისა, ქვეყნისა და ქვესკნელთა მეუფეს, მივართვათ ჭეშმარიტი სარწმუნოება; გუნდრუკის ნაცვლად, როგორც მარადიულ ღმერთს, მივართვათ სიყვარული; ხოლო მურის ნაცვლად, სამყაროს სასოებას, მივართვათ ჩვენი კეთილი იმედი.

და ასეთი ძღვენის მირთმევით ჩვენ ვიქნებით უფალი იესო ქრისტეს შობის ნამდვილი თაყვანისმცემლები და მედღესასწაულენი, რომელსაც, მიუხედავად იმისა, რომ ვართ უღირსნი, ვევედრებით, როგორც მრავალმოწყალეს, გვიბოძოს მისი უსრულესი წყალობა; და როგორც მოწყალეა ქნა და მისი განუსაზღვრელი სიმდაბლით დაამხო ამპარტავანი ლუციფერი, ასევე დაამხოს ჩვენი ყოვლადბრწყინვალე უდიდებულებობისა და ქრისტესმოყვარე მთავრის, იო კონსტანტინ ვოევოდას ხილული და უხილავი მტრები. და, როგორც მაცხოვარმა თავისი შობით განაახლა მთელი სამყარო და ადამიანთა სიცოცხლე, ასევე განაახლოს მისი უდიდებულებობის ცხოვრების წლები, რათა ღვთისათვის სათნოდ და მრავალჟამიერ აღნიშნავდეს ამ ნათელ დღესასწაულს ბედნიერები, სრული ჯანმრთელობით, მშვიდობითა და კეთილდღეობით და აღირსოს ღმერთმა, რომ ხანდაზმულობამდის მთვარის მაღალ ტახტზე ბატონობდეს და სიკეთით მართავდეს მისთვის ჩაბარებული ერი და სამწყსო, მის ღვთივკურთხეულ და განათლებულ ოჯახთან ერთად, მის განათლებულ ქალბატონთან, მის ყლორტებთან - ვაჟებთან და ქალიშვილებთან ერთად, მთელ კეთილშობილ თავადაზნაურებთან ერთად, რომლებიც აქ არიან და ისინიც, ვინც აქ არ არიან, მთელ საქრისტიანოსთან და ქვეყანასთან ერთად, მეოხებითა და კურთხევით ყოვლადსამღვდელოსთან

---

მიტროპოლიტთა, ქრისტესმოყვარე ეპისკოპოსთა, მეოხებითა ღირსთა  
ილუმენთა, პატიოსანთა მღვდელთა და ყოველთა დასთან ეკლესიასათათა  
ერთითა პირითა და ერთითა გულითა, სულიერი სიხარულით  
ანგელოზებთან ერთად ვთქვათ: დიდება მაღალთა შინა ღმერთსა ქვეყანასა  
ზედა მშვიდობა და კაცთა შორის სათნოება.

## ქადაგება № 31

### ქადაგება გარდაცვლილი ადამიანის გასვენებაზე

დიდად ვნებული და მომთმენი იობი, ბოროტთან დიდი შერკინების  
შემდეგ, წარმოჩნდა, როგორც მოთმინების კლდე, ბოროტმა წამშივე  
დაუტარიელა მთელი ქონება, წაართვა მთელი მისი ღირსება, სიმდიდრე,  
დიდება, წაართვა ასევე ყველა მისი ტოლი და იგი დარჩა მხოლოდ ერთი  
მეუღლის ამარა, სანაგვეში უსახლკაროდ მჯდომი, ძალზედ საცოდავ  
მდგომარეობაში, სავსე წყლულებითა და მატლებით. ეს ყველაფერი  
იმისათვის, რომ ბოროტი ეშმაკი შერცხვენილ და დამარცხებულიყო იობის  
სულის სიმამაცითა და მოთმინებით. როგორც დაწვრილებით მოთხრობილია  
მის ისტორიაში, მან არ დაგმო ღმერთი და თავისი ბაგეებით არ შესცოდა,  
რადგან იგი მთელი ამასოფლის სიამეს ამაოებად თვლიდა, ამ ცხოვრების  
საზრუნავს არაფრად მიიჩნევდა, თუმცა ტიროდა და მოთქვამდა: „სიკვდილს

---

მოვუხმე, რომ გახდეს ჩემი მამა“, ანუ იგულისხმა, რომ მამაჩემი არს სიკვდილი, რომელმაც მშვა მე.

ნეტავ, რას უნდა ნიშნავდეს, ჩემო საყვარელო, იობის ეს სიტყვები? სიკვდილი, როგორც ცელი ჭრის და ანადგურებს, ხოლო მამა შობს. მაგრამ როგორ შეიძლება შობა და ხრწნადობა იყოს ერთად, რადგან ურთიერთსაწინააღმდეგონი არიან? იქნებ, მართალი იობი იმ მრავალ განსაცდელთა და დანაკარგთა გამო, რაც მან განიცადა, დაკარგა გონება და ამიტომ თქვა, რომ სიკვდილი მამაჩემიაო; ამ მრავალი ტკივილების გამო, არ იცოდა, რას ლაპარაკობდა?

არა ჩემო საყვარელო, არა!

არ დაუკარგავს გონება და კარგად იცოდა, რასაც ლაპარაკობდა. რადგან იცოდა, რომ ადამიანს არ ძალუძს ცხონება ვნებებისაგან და ამ ცხოვრების სიმდაბლეთაგან გათავისუფლება, განა მხოლოდ სიკვდილით, როგორც მართალი იობი სხვა ადგილას ამბობს: „სიკვდილი არის ადამიანის განსვენება.“

მაგრამ აქა ვდგავარ და მიკვირს, რატომ არ თქვა: სიკვდილს მოვუხმე, რომ ვცხონდე, არამედ ამბობს სიკვდილს მოვუხმე, რათა ჩემთვის იყოს მამა.

ჩემო საყვარელო, მოისმინეთ ქრისტიანული სწავლება და განგება. შეიცანით, რომ ყველა ქრისტიანს აქვს სამი შობა: ერთი ხორციელი, მეორე სულიერი და მესამე მაცხოვრებელი. ხორციელი შობა არის ის, როდესაც ვინმე იშვება მამისაგან და დედისაგან, როგორც ამას ვხედავთ არა მხოლოდ ადამიანებში, არამედ ცხოველებშიც და ამიტომაც ქვია მას ხორციელი შობა, რადგან, როგორც ამბობს თავად მაცხოვარი იესო ქრისტე: „რაც იშვება ხორცისაგან ხორცი არს.“

მეორე შობა არის სულიერი, რომელიც არ ეძლევა ყველა ადამიანს, არამედ მხოლოდ იმათ, ვინც იშვა სულიერად, წმიდა ნათლობის საბანელში, როგორც ამას ეუბნება იესო ქრისტე თავის ფარულ მოწაფეს, ნიკოდიმოსს: „ვინც არ იშვება წყლისაგან და სულისაგან, არ ძალუძს შევიდეს ცათა სასუფეველში“.

---

ხოლო მესამე შობა, როგორც უკვე ვთქვი, არის მაცხოვრებელი. ამაზე ლაპარაკობს იობი, როდესაც ამბობს, რომ სიკვდილი მისთვის მამაა, რადგან როგორც პირველი, ანუ ხორციელი შობის დროს, ადამიანი თავისი დედის საშოს ბნელი საპყრობილედან გამოდის და მზის სინათლეს ხედავს. მეორე შობის დროს, ანუ წმიდა ნათლობის საბანელის მიღების დროს, ურწმუნოების სიბნელიდან გამოდის და ღვთის ცნობიერების ნათელში შემოდის, თვითონაც იწყებს ნათებას წმინდა სამების სამპიროვანი ნათელით. ასევე მესამე შობისას, რომელიც მაცხოვრებელია, იშვება ადამიანის სული და გამოდის სხეულის სიბნელისა და უწმინდურებებისაგან და როგორც საპყრობილედან გამოსული მარადიული ცხოვრების, ნეტარების, დიდებისა და ნათელის სახილველად მიდის.

ამ მაცხოვრებელი შობის ნახვა ასევე სურდა დავით წინასწარმეტყველს, რომელიც ამბობდა: „გამოიყვანე საპყრობილით სული ჩემი, რაითა აუვარო სახელსა შენსა.“ ასევე პავლე მოციქული ამბობს: „გული მეტყვს განსლვად და ქრისტეს თანა ყოფად, უფროდს და უმჯობეს ფრიად.“

ეს მესამე შობა არის ბევრად უკეთესი და სასარგებლო, ვიდრე დანარჩენი ორი, რადგან ხორციელ შობას ქვია ბნელი შობა, ხოლო სულიერ შობას, როგორც წმინდა ნათლობის შობას ეძახიან ნათელს. ამიტომაც წმინდა ნათლობას ხშირად ნათელს უწოდებენ, ხოლო მონათლულებს- ნათელდებულებს.

ხოლო მესამე შობა-სიკვდილი, რომელიც მაცხოვრებელი და მართალია, კეთილმორწმუნე ადამიანს ემართება, რადგან გარდაცვალების შემდეგ ადამიანს აღარ ძალუძს შეცოდება.

ამიტომაც, ყველა ჩვენს მორწმუნე მეგობრებთან და ნათესავებთან ერთად ვაცილებთ მიცვალებულს სასაფლაომდე (ან ეკლესიამდე) პატიოსან მოძღვრებთან, მორწმუნე ქრისტიანებთან ერთად; მივაცილებთ მას წმინდა

---

გალობით, დანთებული სანთლებით, კმევით, სადიდებელი და სავედრებელი ლოცვების წარმოქმით.

ამ შობით დაიბადა დღეს ჩვენი ნეტარი ძმაც (სახელი), რომელიც გარდაიცვალა. და მის შემდეგ, რაც შესრულდა ყველანაირი ქრისტიანული წესი და საყოველთაო ვალდებულება - მას საფლავამდე მივასვენებთ, რათა სამუდამოდ დატოვოს ეს ცხოვრება. ჩვენ სავსენი ვართ იმედით, რომ თავის დროზე ვიხილავთ მას საიქიო ცხოვრებაში. ამისათვის ყველამ უნდა შევუნდოთ მიცვალებულს. სულის სიღრმიდან მთელი გულით გთხოვთ ყველას, რომ ვთქვათ: ღმერთმა შეუნდოს! რადგან იცხოვრა ჩვენთან ერთად, როგორც ადამიანი ამსოფელში; შეიძლება ვიღაცას აწყენინა, მწუხარება მიაყენა, სიტყვით ან საქმით, ამიტომაც ყველამ ერთად ვთქვათ: ღმერთმა შეუნდოს! რადგან ამ გზის გავლა მოგვიწევს ყველას და ჩვენც გარდაცვალების შემდეგ, ცოცხალთაგან მივიღოთ ჩვენი ცოდვების შენდობას. კიდევ ერთხელ, მესამედ ვთქვათ: ღმერთმა შეუნდოს მას, და შეგვიწყალოს და გვაცხოვნოს ჩვენ, რამეთუ კეთილ და კაცთმოყვარე არს.

## ქადაგება № 32

### ქადაგება მიცვალებულ ადამიანზე

მწუხარე, საცოდავი და მწარეა სიკვდილის ზემოქმედება ადამიანზე; ურჩობის ცოდვის გამო სიკვდილით დასჯილ ჩვენს წინაპარ ადამს ღმერთმა უთხრა:

„მიწა ხარ და მიწად იქეც!“ მაგრამ, თუ მთელი გულითა და გონებით დავუფიქრდებით ამ სასჯელსა და ღვთის განგებას, დავინახავთ, რომ სიკვდილი არ არის ტანჯვა და სასჯელი, არამედ სიკეთეა და დიდად

---

სასარგებლო რამ. ღმერთს, რომ ადამიანისთვის სიკვდილი არ დაეწესებინა, მაშინ ბოროტება დარჩებოდა უკვდავი და ცოდვა შეუმუსრავი. ამიტომაც არის წმიდა წერილში ნათქვამი: „ნუსადა მიყოს ხელი თვისი და მიიღოს ხისაგან ცხოვრებისა და ჭამოს და ცხონდეს უკუნისამდე.“<sup>2</sup> მიხვდით ახლა მიზეზს? მას შემდეგ, რაც კაცმა იგემა ცნობადის ხის ნაყოფი და დაეცა ურჩობის ცოდვით, ღმერთმა არ მიუშვა, რომ ცხოვრების ხის ნაყოფიც ეგემნა, რადგან ამ შემთხვევაში ბოროტება დარჩებოდა უკვდავი, და ადამიანი მარადიულად ცოდვით დაცემულ მდგომარეობაში დარჩებოდა. ამაზე დიდი და საშინელი ბოროტება რა იქნებოდა დაცემული ადამიანისათვის, რომ მარადიულად ასეთ მდგომარეობაში ეცხოვრა? ამიტომაც დიდი წყალობა და მაკურნებელი მაღლი მისცა ღმერთმა ადამიანს იმით, რომ მომკვდარიყო და გახრწნილიყო ეს ცოდვით დამძიმებული ხორცი, რათა საყოველთაო აღდგომის ჟამს, ისევ აღსდგეს სულიერი, უხრწნელი და უკვდავი ხორციით. დიდი სარგებელი მოაქვს ადამიანისათვის სიკვდილს, როგორც ამას ამბობს წმიდა გრიგოლ ღვთისმეტყველი: ნადგურდება ცოდვა, რათა ბოროტება არ დარჩეს მარადიული და ამქვეყნიური ტანჯვა გადაიქცეს წყალობად და კაცთმოყვარეობად. ამიტომაც წმიდა წერილში ნათქვამია:

„მიწა ხარ და მიწადცა მიიქცევი“. ამიტომაც უფალმა ღმერთმა გამოიყვანა ადამი ედემიდან, რათა იქნეს იმ მიწის მუშაკი, რომლისგანაც თვითონვე იქნა შექმნილი. ამიტომაც ნათქვამია: „ოფლისა პირისა შენისათა სჭამდე პურსა შენსა ვიდრე მიქცევამდე შენდა მიწად, რომლისაგან მოშორებული იქმენ“.<sup>2</sup>

ამიტომაც შეიმოსეს ლეღვის ფოთლები, ამიტომაც შეიმოსეს ტყავის სამოსელი, რომელიც, როგორც განმარტავს წმიდა გრიგოლი: „ნიშნავს მძიმე და მოკვდავ სხეულს“.

ამიტომაც, ჰოი, ჩემო საყვარელო მსმენელებო, ჩვენი მიცვალებული დღეს განიმოსა ცოდვით დამძიმებული სხეულისაგან და დააგდო იგი მიწაზე, როგორც ძველი და გაცვეთილი პერანგი.

---

ვამბობ, რომ ეს ნეტარი გარდაცვლილი ჩვენი ძმა (სახელი),<sup>2</sup> განიმოსა ამ სხეულისაგან, რათა შეიმოსოს სხვა, უხრწნელი სხეულით, დატოვა ამქვეყნიური სამყოფელი, რომ მოიღოს სხვა სამყოფელი ზეცაში, როგორც ამას ამბობს წმინდა პავლე მოციქული: რადგან ვიცით, თუ დაიშლება ჩვენი სხეულის ამქვეყნიური სახლი, ღვთისგან გვაქვს ზეცაში სხვა მარადიული და ხელთუქმნელი სახლი. ამიტომაც მივაბარებთ მის ნეტარ სულს ღვთის ხელეზში, პატიოსანი მღვდლების კრებით, მორწმუნე ქრისტიანების სიმრავლით, წმინდა გალობით, დანთებული სანთლებით, კმევით და ყველანაირი სავედრებელი და სადიდებელი ლოცვებით.

ამ შობით იშვა დღეს ამ ჩვენი გარდაცვლილი პატიოსანი და ნეტარი ძმის (სახელი)<sup>2</sup> სული, ყველანაირი ქრისტიანული წესის აღსრულებისა და საყოველთაო ვალდებულების მოხდის შემდეგ მივასვენებთ მას საფლავამდე, რომ სამუდამოდ დასტოვოს ეს სოფელი; ჩვენ იმედით აღსავსენი ვართ, რომ მას თავის დროზე საიქიო ცხოვრებაში ვიხილავთ. ამისთვის ყველამ უნდა შევეუნდოთ მიცვალებულს; მთელი სულის სიღრმიდან გთხოვთ ყველას ვთქვათ: „ღმერთმა შეუნდოს!“ რადგან ამ სოფელში იცხოვრა ჩვენთან ერთად, როგორც ადამიანმა და შეიძლება ვიღაცას აწყენინა, მწუხარება მიაყენა სიტყვით ან საქმით, ამიტომ ყველამ ერთხმად ვთქვათ: „ღმერთმა შეუნდოს!“

ამ გზის გავლა ყველას მოგვიწევს და ჩვენც გარდაცვალების შემდეგ ცოცხლებისაგან მივიღებთ ჩვენი ცოდვების შენდობას. კიდევ ერთხელ, მესამედ ვთქვათ „ღმერთმა შეუნდოს!“ და შეგვიწყალოს და გვაცხოვნოს ჩვენ, რამეთუ კეთილ და კაცთმოყვარე არს.

**”ანთიმოზ ივერიელის მონასტრის ტიპიკონი”**



დარიგებანი ყოველთა წმინდათა სახელობის წმინდა მონასტრის ტიპიკონისათვის, ანუ 32 თავი, რომლებშიც თავმოყრილია მონასტრის მთელი მართვა-გამგეობა, მონასტრის შემოსავლებიდან მთელი წლის განმავლობაში ღარიბთა და გაჭირვებულთათვის მოწყალების გაცემის წესი. ამ სახით დადგენილია ჩვენ მიერ, ეტიტორის მდაბალი უნგრო-ვლახეთის მიტროპოლიტის ანთიმოზ ივერიელის მიერ. მაღალ ყოვლად უბრწყინვალესი მთავრის იო კონსტანტინე ბრინკოვიანუს ბასარაბ ვოევოდას მმართველობის ჟამს. სამყაროს დასაბამიდან 7221 წლის 24 აპრილი, როდესაც დაიწყო ტაძრის მშენებლობა.

ყოველი სული აქებდით უფალსა!

## ს ა რ ჩ ე ვ ი

ამ წიგნში შესული თავებისა

1. მონასტრის ხელშეუვლობისათვის
2. ილუმენტათვის-----
3. ეპიტროპთათვის-----
4. ბერთათვის-----
5. მღვდელთათვის-----
6. ბავშვთა განათლებისათვის-----
7. მიცვალებულთა დაკრძალვისათვის-----
8. პატიმართა და უპოვართათვის მოწყალების გაღებისათვის-
9. შიშველთა შემოსვისათვის-----
- ქალიშვილის გათხოვებისათვის-----
10. უცხოელთა მიმართ ზრუნვისათვის-----
11. კანდელთათვის-----
12. ოთხი წმინდანისა და პანაშვიდებისათვის-----
13. წირვებისათვის-----

- 
14. მომსახურეთა საზღაური და მათი მართვა-----
  15. ნაყოფის შემომწირველთათვის-----
  16. სტამბისათვის-----
  17. ბიბლიოთეკისათვის-----
  18. დავთართა განახლებისათვის-----
  19. მღვდელმთავართა დავანებისათვის-----
  20. მიტროპოლიტის შესაწირავისათვის-----
  21. ავადმყოფთა ზრუნვისათვის-----
  22. ილუმენის დაკრძალვისათვის-----
  23. ეპიტროპთა საქმიანობისათვის-----
  24. შემოსავლების მეათედისათვის-----
  25. ილუმენის არჩევისათვის-----
  26. ეკლესიის შემოსავლებისათვის-----
  27. სკიტებისათვის-----
  28. მოსახსენიებლისათვის-----
  29. ეპიტროპთა პატივისცემისათვის-----
  30. მოწყალების გაორმაგებისათვის-----
  31. თავების წაკითხვისათვის-----

### დ ა რ ი გ ე ბ ი ს ს ხ ვ ა თ ა ვ ე ბ ი

1. წმინდა ზიარებისათვის-----
2. მონასტრის შემოწირულობებისათვის-----
3. რათა მონასტერში არ იქნეს დამალული უცხო ქონება----
4. რათა სხვისი მამული არ იქნეს ხელყოფილი-----
5. ეკლესიის შიგნით არსებული საფლავებისათვის-----
6. ეკლესიის პირველი ეზოს მოვლისათვის-----
7. ჩვენი პანაშვიდისათვის-----
8. სხვათა ნივთების შენახვისათვის-----

---

## წინასიტყვაობა

უპოვართა და ეკლესიათა კეთილისყოფა უპირატესად გამორჩეული საქმიანობაა ღვთის წინაშე. თავადაც ვიცით წმინდა სახარებიდან, რომ უფალი ჩვენი იესო ქრისტე არავის ჩათვლის ზეციური სასუფევლის მკვიდრად, თუ მან ამქვეყნიურ ცხოვრებაში კეთილი საქმენი არ მოიმოქმედა: ღარიბთათვის არ გაიღო მოწყალება, მშიერნი არ დააპურა, მწყურვალენი არ დაარწყულა, შიშველნი არ შემოსა, უცხონი არ ანუგეშა, ავადმყოფნი და პატიმარნი არ მოიკითხა.

ღვთივგანბრძნობილმა მოციქულმა- პავლემ უწყოდა, რომ კეთილი საქმეები ადამიანს სულის ცხოვრებაში ეხმარება; ამიტომაც ებრაელთა მიმართ ეპისტოლეს მე-13 თავში, იგი გვასწავლის: არ დავივიწყოთ და ყოველთვის მოშურნეობით შევასრულოთ მისი დარიგება: „ ხოლო კეთილისა საქმესა და ზიარებასა ნუ დავივიწყებთ, რამეთუ ესევეითარნი მსხუერპლნი სათნო არიან ღმრთისა. “

ამ აზრით მოცულმა მე, მდაბალმა უნგრო-ვლახეთის მიტროპოლიტმა ანთიმოზ ივერიელმა, ჩემი სულის მცირეოდენი სარგებლისა და მოხსენიებისათვის როგორც ამსოფლად, ისე გარდაცვალების მერე, ამ წმინდა სავანის სამირკვლის ჩაყრა და აშენება გადავწყვიტე, სადიდებულად ღვთისა და ყოველთა წმინდათა თაყვანისცემად. ამ მცირე მონაგრით, რომელიც ღვთის წყალობამ მომმადლა, ასევე დიდი შრომითა და ოფლის დენით დავასრულე და შევამკე იგი, რაც ყველას შეუძლია, იხილოს. ასევე ჩემი შესაძლებლობის შესაბამისად დავუდგინე მცირე შესაწირავი: პირველი - რომ ღვთის სახლს ჰქონდეს შესაფერისი მშვენება და წესრიგი, მეორე - რომ ამ ეკლესიის ყველა შემომწირველი, ჩემთან ერთად, მარადის იქნეს მოხსენიებული.

---

რადგანაც სიკეთე სიკეთედ არ ჩაითვლება, თუ მას კეთილად არ აღასრულებ, ამიტომ ეს თავები ჩვენ შევადგინეთ იმისათვის, რომ ისინი დარჩეს უცვლელი, ხოლო მონასტრის მართვა ყოველთვის იყოს ღვთის შიშით, სიბრძნით, ღრმა დაფიქრებითა და წესრიგით, ისე როგორც თავიდანვე მქონდა ჩაფიქრებული და როგორც ამას კეთილად მართვის კანონი მოითხოვს.

ეს ტიპიკონი და ყველანაირი საქმის მართვის წესი, რომელიც ჩვენი სიმდაბლით დაიწერა ბუქარესტში ღვთის სადიდებლად და ყოველთა წმინდანთა თაყვანისცემისთვის, ჩვენ მიერ აშენებულ ეკლესიაში მუდმივად და უცვლელად უნდა სრულდებოდეს ყოველთვის, წლების განმავლობაში.

### **თ ა ვ ი 1. მონასტრის ხელშეუვალობისათვის**

ეს წმინდა ეკლესია, რომელიც ღვთის სადიდებლად და ყოველთა წმინდანთა მოსახსენიებლად და თაყვანისცემისთვის აღვაშენე, ჩემი მრავალი ღვაწლის ნაყოფია. მე იგი დიდი სიყვარულითა და ღირსებით შევწირე და დავუმორჩილე ჩვენს ღმერთს, მაცხოვარ იესო ქრისტეს, რადგანაც ის არის ყოველთა მბრძანებელი.

გადავწყვიტეთ, რომ მონასტერი სრულიად თავისუფალი იყოს: იგი არავის ემორჩილებოდეს და მასზედ არავინ მბრძანებლობდეს - არც ქვეყნის მთავარი, არც მღვდელთმთავარი, რომელიც ჩემ შემდეგ დადგება. და არც ერთი თავადი. ხოლო თუ რომელიმე სასულიერო, ან საერო პირი (რაიმე მიზნით ანდა საშუალებით, რომელსაც მისი გონება მოიფიქრებს) მაინც მოინდომებს მის დამორჩილებას და მონასტრის, ან მის კუთვნილებაში მყოფი რამე ნაწილის, ვინმესთვის შეწირვას, იგი შეჩვენებულ და შეუნდობელ იქნეს ყოვლისმპყრობელი ღვთის მიერ, მიეცეს ანათემას ამ და საუკუნო ცხოვრებასა შინა და საშინელი სამსჯავროს ჟამს მხილებულ იქნეს ყველა წმინდანის მიერ.

### **თ ა ვ ი 2. იღუმენტათვის**

---

მონასტერი უნდა იყოს გარედან და შიგნიდან მართული ერთი ილუმენის მიერ, რომელიც მომავალში ( ჩემ შემდეგ) იქნება. ილუმენი უნდა მართავდეს ღვთის შიშით, წინდახედულებითა და კეთილგონიერებით. ყოველთვის ფხიზლობდეს, ზრუნავდეს მონასტრის ძლიერებაზე, ამისათვის სიმდაბლით, სიზარმაცისა და დაუდევრობის გარეშე, უნდა იღებდეს ყველა რჩევასა და დარიგებას ეპიტროპთაგან, მათ შესახებ ქვემოთ იხილავთ, რათა მონასტერში სუფევდეს უფრო მეტი წესრიგი და სამართლიანობა. როგორც მაცხოვარი იესო ქრისტე ბრძანებს: „ერთი კარგია, მაგრამ ორი-უკეთესი“.

### **თ ა ვ ი 3. ეპიტროპთათვის**

ილუმენის დასახმარებლად, მონასტრისა და მისი შემოსავლების კეთილად მართვისათვის, ვადგენთ ჩვენი კეთილი ნებით შერჩეულ და დადგენილ ხუთ ეპიტროპს ვაჭართა ფენიდან. ესენი არიან: ყოფილი მამასახლისი ჟუპანი<sup>2</sup> ნეკუმული, ჟუპანი ნიკა - მევახშე, ჟუპანი მანული აპოსტოლის ძე, ჟუპანი გეორგე ვასილის ძე - აბაგი<sup>2</sup> და ჟუპანი შერბანი გროზის ძე - მათ ღვთისა და ეკლესიის სიყვარულით უნდა იღვაწონ, წელიწადში ორჯერ წმინდა გიორგისა და წმინდა დიმიტრის ხსენების დღეებში უნდა მიაკითხონ ილუმენს და მოსთხოვონ ანგარიშის ჩვენება სახლის ( იგულისხმება-მონასტერი) შემოსავლებისა და გასავლების შესახებ. ეს ყოველივე - მთელი შემოსავალი და გასავალი - მოკლედ და გასაგებად უნდა ჩაიწეროს დიდ წიგნში, იმისათვის რომ ყოველწლიური ჩანაწერებიდან ჩანდეს მონასტრის მოგება, თუ წაგება. ხოლო თუ ეპიტროპები დაინახავენ, რომ ილუმენის ცუდი მმართველობის გამო სახლს დანაკარგი აქვს, ვთხოვ მათ, რომ უფლის სახელითა და ძმური სიყვარულით დაეხმარონ და ასწავლონ ილუმენს, გამოასწოროს საქმე, რათა სახლს აღარ ჰქონდეს დანაკარგი, არამედ მოგება ნახოს.

---

ხოლო თუ ეპიტროპები დაინახავენ, რომ ილუმენი არ დაემორჩილა სამართლიან მოთხოვნას, არც დარიგებას და შემდგომ წელს მისი დაუდევრობის გამო სახლმა ისევ ზარალი ნახა, ეპიტროპებს უფლება აქვთ ქვეყნის მთავარსა და მიტროპოლიტს შეატყობინონ ეს ამბავი ( რედ.), გაადააყენონ ის ილუმენი და მის ადგილას დააყენონ ის, ვინც დაემორჩილება სამართალს და თავიდან ბოლომდე დაუჯერებს მათ. ხოლო ის დანაკარგი, რომელიც მონასტერს ილუმენის ცოდნითა თუ არცოდნით მიადგა, უნდა დაუბრუნდეს მონასტერს ამ ილუმენის მიერ, მას შემდეგ, რაც ქვეყნის მთავარი და მღვდელმთავარი გაიგებენ ამის შესახებ. დაისაჯოს უნდა ისე, როგორც დაისაჯა ზარმაცი და ბოროტი მონა, რომელმაც დამალა თავისი ბატონის ტალანტი. ასევე დაისაჯოს როგორც სიწმინდეთა ქურდი და ლატაკთა დამყაჩაღებელი, რათა სხვებმა დაინახონ და გამოსწორდნენ, სახლის ეს შემოსავალი ეკუთვნით უპოვართ, როგორც ამას ქვემოთ აღწერილში ნახავთ.

ეპიტროპები მთელი ყურადღებით უნდა აკვირდებოდნენ, გასცემს თუ არა ილუმენი ამ მოწყალებებს. ილუმენი კეთილი მწყემსი უნდა იყოს და არა დაქირავებული.

ამიტომ, როგორც საყვარელ შვილებს, შეგთხოვთ, რომ შეასრულოთ თქვენზე დაკისრებული მოვალეობა და მთელი ძალისხმევით აღასრულოთ ჩვენ მიერ დადგენილი, რისთვისაც ღვთისაგან მიიღებთ კუთვნილ საზღაურს საკუთარი შრომისათვის.

#### **თავი 4. ბერთათვის**

მონასტრის პირველ ეზოში ღვთისმსახურების აღსასრულებლად მუდმივად უნდა ცხოვრობდნენ შემდეგი პირები: ილუმენი, ორი ბერძენი მღვდელმონაზონი, რომლებიც დიდ კლიროსში იმსახერებენ და იგალობებენ ბერძნულ ენაზე, ერთი დიაკონი, ერთი ბერი, ან შესაძლებელია

---

მღვდელმონაზონიც, ეკლესიარქი, ერთი პარაკლისიარქი, ერთი -სენაკის მწე, ილუმენის დასახმერებლად და ერთი მგალობელი, ბერი ან უცოლო ერისკაცი.

და თუ რომელიმე პატიოსან ქრისტეს მოყვარე ქრისტიანს, თავადთა ან ვაჭართა წრის წარმომადგენელს, საკუთარი ნებით გაუჩნდება ბერ-მონაზვნური მოღვაწეობისა და მონასტერში ცხოვრების სურვილი--მიიღონ!

მეორე-- ეზოში უნდა იმყოფებოდნენ: ერთი ბერი, მეკლიტე, ერთი ხაბაზი, ორი უცოლო ჭაბუკი, მსახურებისათვის, ორი მოჯამაგირე, ერთი მებაღე, ერთი მეჯინიბე და ერთი ბოშა მამაკაცი ბავშვთან ერთად, სამზარეულოში საქმიანობისათვის. თუ ილუმენი, ან ეპიტროპნი დაინახავენ, რომ მონასტერს მსახურთა ეს რაოდენობა არ ყოფნის, დაუმატონ იმდენი, რამდენიც იქნება საჭირო, თან გაითვალისწინონ, რომ თითოეულმა მონასტერში უნდა იტრაპეზოს და მიიღოს ისეთი ჯამაგირი, რომელიც დააკმაყოფილებს.

### **თავი 5. მღვდელთათვის**

გვნებავთ, რომ ეკლესიის მცირე კლიროსში ორი დაოჯახებული მღვდელი მსახურობდეს და გალობდეს რუმინულად, რადგან ტაძრის ამ ადგილზე ადრე ხის ძველი სამრევლო ეკლესია იდგა. არ გვინდა, რომ ეს ორი, ქალაქის გარეუბანში მცხოვრები მღვდელი, ხელცარიელი დარჩეს და თანაც, რომ ამ გარეუბნის მოსახლეობას მოძღვრის ყურადღება მოაკლდეს. ვადგენთ: თითოეულს ოც-ოცი ტალერი მიეცეს ჯამაგირად და საკვებად ექვს-ექვსი კილო პური; ხოლო ეკლესიის შემოსავლიდან და არც მონასტერში შესრულებული წესებიდან მათ არაფერი ეკუთვნით, გარდა თითო ტალერისა, რომელსაც გადახდილი პანაშვიდებიდან მიიღებენ.

### **თავი 6. ბავშვთა განათლებისათვის**

---

სამ ღატაკ ბავშვს, რომელთაც სურთ სწავლა ყოველწლიურად კვებისათვის მიეცეთ ექვს-ექვსი ბანი; ასევე სააღდგომოდ მიეცეთ ორზღოტიანი ჩოხა, თითო პერანგი, თითო წყვილი წაღები. და ეს სამი ბავშვი ასაკით არ უნდა იყოს არც ათ წელზე უმცროსი, არც თხუთმეტ წელზე უფროსი. ეს მოწყალება მათ უნდა ეძლეოდეთ ოთხი წლის განმავლობაში; რადგან ამ დროის განმავლობაში ბავშვმა შესაძლებელია სღავურიცა და ბერძნულიც შეისწავლოს, ხოლო შემდეგ მათ ადგილზე მიიღონ სხვები. თუ რომელიმე ბერად გახდომა და მონასტერში დარჩენა მოისურვა-- მიიღონ!

განათლების დასრულების შემდეგ იღუმენმა ყველას უნდა გადასცეს თითო წერილი: თუ ვინმე დააპირებს დაოჯახებას, შეძლოს მოსვლა და ქორწილისათვის დახმარების, 15 ტალერის, მიღება. ხოლო თუ რომელიმე მღვდლად გახდომას დააპირებს, მას მიეცეს ცალკე სხვა--13 ტალერი; აქედან 8 ტალერი დიაკონად და მღვდლად კურთხევისათვის, 5 ტალერი კი დარჩეს ხელზე იმისათვის, რომ თავად გადაიხადოს პანაშვიდი<sup>2</sup> და მოიხსენიოს მთავარი, რომელიც იმჟამად ქვეყანას მართავს და კიდევ ეს ხუთი სახელი: იოანე, მარია, მღვდელმინაზონი მაკარი, მღვდელმთავარი თეოდოსი და ცოდვილი მღვდელმთავარი ანთიმოზი; ყველაფერი ეს ჯამში შეადგენს 54 ტალერს.

ამ ორი დაოჯახებული მღვდელიდან ერთ-ერთმა, რომელიც უფრო განათლებული იქნება, ბავშვებს ასწავლოს საგნები და საეკლესიო წესები ისე, როგორც ეს სწავლა-განათლების გეგმითაა დადგენილი. ყოველ სამ მოსწავლეზე მიეცეს 20 ტალერი მონასტრის შემოსავლებიდან. იმისათვის რომ ამ ბავშვებმა ისწავლონ ღვთის შიში და ეკლესიური ცხოვრების წესი, ისინი ყოველდღე უნდა მოდიოდნენ ეკლესიაში: მწუხრზე, ცისკარზე და წირვაზე. სასწავლო წიგნები ბავშვებს გადასცეს მონასტერმა.

ესეც იყოს ცნობილი: სწავლების ორი წლის გასვლის შემდეგ მასწავლებელმა მღვდელმა, უნდა ჰკითხოს ბავშვებს, ხომ არ აპირებს



---

რომელიმე მომავალში გახდეს მღვდელი და თუ მსურველი აღმოჩნდება, იმას მღვდელმსახურების წესიც შეასწავლოს.

ხოლო თუ ოთხი წლის დასრულებამდე რომელიმე ბავშვმა არ მოისურვა სწავლის გაგრძელება, მას აღარ მიეცეს ის მოწყალება, რომელიც ზემოთ დავადგინე, ანუ არ მიეცეს ხელზე ხელწერილი, რომლითაც იგი შეძლებს მომავალში მოსვლას და 15 და 13 ტალერის მოთხოვნას. მიატოვეთ თუ არა ბავშვი სწავლას, მაშინვე მის ადგილზე სხვა მიიღონ.

### **თავი 7. მიცვალებულთა დაკრძალვისათვის**

იმ ბოროტი ჩვეულების მოსაშლელად, რომელსაც უცხოელებიც დასცინიან, როდესაც მიცვალებული ღარიბი ქალისა თუ კაცის ცხედარს ქუჩა-ქუჩა დაატარებენ და მისი დასაფლავებისათვის მოწყალებას ითხოვენ, ვადგენ: მონასტრის შემოსავლებიდან გამოიყოს 300 ბანი; 200 ბანით შეიძინონ სანთლები, სუდარა და დასაფლავებისათვის საჭირო სხვა ნივთები, ხოლო 100 ბანი გადაეცეს იმ მღვდელს, რომლის ეკლესიაშიც დაასვენებენ იმ ლატაკ ადამიანს. მანვე გადაუხადოს სამი შეკვეთილი წირვა: ერთი გარდაცვალებიდან მესამე დღეს, მეორე-მეცხრე, და მესამე- მეორმოცე დღეს.

იმ მღვდელს, რომელიც არ გადაიხდის შეკვეთილ წირვებს, პასუხი საშინელი სამსჯავროს წინაშე მოეთხოვება.

### **თავი 8. პატიმართა და გაჭირვებულთათვის მოწყალების გაღებისათვის**

მთელი წლის განმავლობაში, ორმოცდათორმეტივე შაბათ-კვირის ყოველ შაბათს, საპყრობილეში მყოფთათვის გამოიყოს 20 ბანი, ყოველ კვირა დღეს - უპოვართათვის 13 ბანი. ოღონდაც ეს უკანასკნელნი რიგის მიხედვით სხვადასხვა კვირადღეს უნდა მოდიოდნენ, რათა ერთმა და იმავე ადამიანმა არ

---

მიიღოს დახმარება, ხოლო სხვები კი ხელცარიელები დარჩნენ. უწესრიგობის თავიდან ასაცილებლად ცალკე ფურცელზე აღინუსხოს ყველა უპოვარი და დატაკი; ყოველ კვირა დღეს დაიბარონ 13-13 ადამიანი, რათა თითოეულმა მიიღოს თავისი კუთვნილი ბანი. მთლიანობაში ეს შეადგენს 12 ტალერსა და 16 ბანს.

### **თავი 9. შიშველთა შემოსვისათვის**

ყოველ დიდ ხუთშაბათს სამ გაჭირვებულ ვაჟს მიეცეს ერთი ლეის ღირებულების მატყლის თითო ჩოხა, ასევე სამ გაჭირვებულ გოგონას მიეცეს ტალერ- ნახევრის ღირებულების კაბა და ტალერ- ნახევრის ღირებულების წაღები, რაც სულ 9 ტალერს შეადგენს.

ეს მოწყალეობა ერთსა და იმავე ადამიანებზე არ უნდა გაიცეს, არამედ ყოველწლიურად მიეცეს სხვადასხვა ადამიანს იმავე წესით, როგორც ეს უპოვართა მიმართ დავადგინეთ.

### **თავი 10. ქალიშვილის გათხოვებისათვის**

ყოველ წელიწადს, წმინდა დიმიტრის (თესალონიკელის) ხსენების მეორე დღეს, ერთ გაჭირვებულ გოგონას, რომელიც დააპირებს გათხოვებას, ქორწინებისათვის მიეცეს 15 ტალერი. მაგრამ ეს გოგონა არ უნდა იყოს ერთ-ერთი იმ სამიდან, რომლებზეც ზემოთ დავწერეთ. გოგონას გამორჩევა შემდეგნაირად უნდა მოხდეს: წმინდა დიმიტრის დღესასწაულამდე სამი კვირით ადრე, კვირის წირვის შემდეგ, იღუმენმა საჯაროდ უნდა გამოიხმოს გაჭირვებული გასათხოვარი გოგონა და სთხოვოს საკუთარი სახელის თქმა. თუ ასეთი სამი ან ოთხი გოგონა აღმოჩნდება, უთანხმოების თავიდან ასაცილებლად და მიკერძოების მცირეოდენი ეჭვიც რომ არ აღიძრას, უნდა იყაროს წილი. წილისყრით გამორჩეულ გოგონას იღუმენმა გადასცეს წერილი.

---

ქორწინების ჟამს ამ გოგონამ მიაკითხოს ილუმენს და მიიღოს კუთვნილი თანხა.

### **თავი 11. უცხოელთა მიმართ ზრუნვისათვის**

სხვა ქვეყნიდან ჩამოსული სამი უცხოელი, რომლებიც ამ ქვეყანაში გაჭირვების გამო ჩამოვლენ, სამი დღის განმავლობაში შეინახოს მონასტერმა, ანუ მათ მიეცეთ საჭმელ-სასმელი, მესამე დღეს თითოეულს მიეცეს 30-30 ბანი; ხოლო ერთდროულად თუ სამზე მეტი უცხოელი მიაკითხავს მონასტერს - ნუ მიიღებთ. სამი დღის შემდეგ მათ უნდა დასტოვონ მონასტერი და სხვაგან სცადონ მოწყალეების მიღება. მთლიანობაში ყველა ეს ხარჯი წელიწადში შეადგენს 78 ტალერს.

### **თავი 12. კანდელთათვის**

სამი კანდელი დღე და ღამე მუდმივად იყოს დანთებული: ერთი წმინდა ტრაპეზზე, წმინდა ტარიგის წინ; მეორე-ყოველთა წმინდათა ხატთან და მესამე-ოთხი წმინდანის: წმინდა ნიკოლოზის, წმინდა ანთიმოზის, წმინდა ალექსისა და წმინდა აგატას ხატთან.

### **თავი 13. ოთხი წმინდანისა და პანაშვიდებისათვის**

გვსურს და ვადგენთ: მუდმივად, ყოველ წელს ჩატარდეს წირვები ოთხი წმინდანის საპატივცემულოდ, რომლებიც გამოსახულნი არიან მცირე კლიროსთან არსებულ ხატზე. ასევე ამ დღეებში გაიცეს მოწყალეობა უპოვართათვის.

სამ სექტემბერს წმინდა ანთიმოზ (ნიკომიდიელის. რედ.) პატივსაცემად გაკეთდეს დიდებული კოლიო და ხატის წინ დიდი სანთელი დაინთოს. 40

---

ეკლესიაში სათითაოდ დარიგდეს ლეის მეოთხედი, რათა იქაურმა მღვდლებმა შეკვეთილი წირვები ჩაატარონ და მოიხსენიონ იმჟამინდელი მთავარი, მღვდელმთავარი და ასევე კიდევ ხუთი სახელი: იოანე, მარია, მღვდელმონაზონი მაკარი, მღვდელმთავარი თეოდოსი და ცოდვილი მღვდელმთავარი ანთიმოზი. რადგან ჩვენი მფარველისა და მოსახელის , წმინდა ანთიმოზის, პატივსაცემად ყოველ წელიწადს ჩვენ (ტრადიციულად) გამშვენებულ წირვას ვატარებთ.

ყოველ 6 დეკემბერს წმინდა ნიკოლოზის პატივსაცემად მომზადდეს დიდებული კოლიო და მისი ხატის წინ დიდი სანთელი აინთოს. გაჭირვებულებს დაურიგდეთ 40 ბანი. ამას ვადგენთ, რადგან ამ ადგილის მოუხერხებლობის გამო, ჩვენ მისი სახელობის ეკლესიის დაშლა და სხვაგან აშენება მოგვიწია.

ყოველი წლის 5 თებერვალს, წმინდა მოწამე ალათიას (სიცილიელის. რედ.) ხსენების დღეს, ერთი ღარიბი გოგონა შეიმოსოს პერანგით, კაბით, წაღებითა და სარტყლით და მას ხელზე მიეცეს 30 ბანი. მაგრამ ეს გოგონა არ უნდა იყოს ერთ-ერთი იმ სამიდან, რომლებიც დიდ ხუთშაბათს უნდა შემოსონ და არც ის, რომელსაც მოწყალება უნდა მიეცეს ქორწინების ჟამს. ამ საქმისათვის დაიხარჯოს სამ -ნახევარი ტალერი. ამას ვადგენთ, რადგან ამ წმინდანის ხსენების დღეს, ღვთის შთაგონებით, გადავწყვიტეთ ამ ეკლესიის აშენება.

ყოველი წლის 17 მარტს, წმინდა ალექსი ღვთისკაცის ხსენების დღეს, ერთი ლატაკი ვაჟი შეიმოსოს პერანგით, საცვლებით, ჩოხით, შარვლით, წაღებით, ძვირფასი ბეწვის ფაფახითა და ქამრით და მას ხელზე მიეცეს 30 ბანი. ოღონდაც ეს ყმაწვილი არ უნდა იყოს ერთ-ერთი იმ სამიდან, რომელიც დიდ ხუთშაბათს უნდა შემოსონ. ამ საქმისათვის დაიხარჯოს ოთხი ტალერი. ამას ვადგენთ იმიტომ, რომ ამ წმინდანის ხსენების დღეს მაკურთხეს მღვდელმთავრად.

---

ამიტომაც დავაწესეთ, რომ ყოველი ზემოთ ნახსენები წმინდანისათვის შესაბამის დროს ჩატარდეს ხოლმე ჩვენი სულის საცხოვნებლად მოსახსენებელი ღვთისმსახურება.

#### **თავი 14. წირვებისათვის**

თუ ნოემბრის თვის პირველი დღე არ დაემთხვა ორშაბათს, არამედ სამშაბათი, ოთხშაბათი, ან სხვა რომელიმე დღე იქნა, ის კვირა გამოვტოვოთ და წირვების ჩატარება მომდევნო კვირის ორშაბათიდან დაიწყო.

ჩატარდეს შეკვეთილი წირვები:

**ორშაბათს:** ყველა ჩემი ყოფილი მასწავლებლისა და დამრიგებლისათვის. ამავდროულად, უპოვარებს დაურიგდეთ 40 ბანი.

**სამშაბათს:** ყველა ჩემი სულიერი მამისათვის, რომლებიც მთელი ჩემი ცხოვრების მანძილზე ჩემი მოძღვარნი იყვნენ. უპოვარებს დაურიგდეთ 40 ბანი.

**ოთხშაბათს:** ყველასათვის, ვინც მთელი ჩემი ცხოვრების მანძილზე ჩემი ნაცნობი, მეგობარი და კეთილისმყოფელი იყო. უპოვარებს დაურიგდეთ 40 ბანი.

**ხუთშაბათს:** ყველა მსახურისათვის, იყო ის ერისკაცი თუ ბერი, ვინც მთელი ჩემი ცხოვრების მანძილზე მემსახურა. უპოვარებს დაურიგდეთ 40 ბანი.

**პარასკევს:** ყველასათვის, ვისაც ჩემი ცხოვრების მანძილზე ვაწყენინე, უსამართლოდ მოვექეცი ან ბოროტად დაველაპარაკე. უპოვარებს დაურიგდეთ 40 ბანი.

წყევლას ვაყოლებ ამ ანდერძს მათთვის, ვინც ხსენებულ წირვებსა და მოწყალებას არ შეასრულებს ყოველწლიურად, ვიდრე ეს ტაძარი იარსებებს.

#### **თავი 15. მოსამხურეთა საზღაური და მათი მართვა**

---

დიდი წყევლას ვაყოლებ ამ ანდერძს მათთვის, ვინც ამ სავანეში მსახურების პერიოდში მონასტრის მომსახურე პირს, კეთილს, გინდაც ავადამიანს, დაუკავებს ჯამაგირს. ხოლო როდესაც იგი თავისი ნებით შეთანხმებულ დროს ან იმაზე უფრო ადრე დატოვებს სავენეს, ან იმ შემთხვევაში, თუ მას ილუმენი დროზე ადრე გააგდებს [სამსახურიდან] - მიეცეს სრული ჯამაგირი და დამატებით კიდევ ერთი ტალერი და 3 პიტი - სამგზავრო ფულად.

ხოლო თუ მოხდება ისე, რომ მოსამსახურე პირი გარდაიცვლება, მონასტერი ვალდებულია მისი დასაფლავებისათვის დახარჯოს 300 ბანი და უსასყიდლოდ გადაუხადოს სამი შეკვეთილი წირვა: გარდაცვალებიდან მესამე, მეცხრე და მეორმოცე დღეს. იმ შემთხვევაში, თუ მას ასაღები დარჩება ჯამაგირი, ან რაღაცა ტანსაცმლი, ან სხვა რამე მისი კუთვნილი ნივთი დარჩება, ბევრი იქნება ის თუ მცირე, წყევლით ვტოვებ ამ ანდერძს, რომ მონასტერმა არაფერი დაიტოვოს. ყველაფერი გადაეცეს ან მის მშობლებს, თუ იმ დროს ეყოლება, ან სხვა ნათესავს და მათ გადაწყვიტონ თუ როგორ განკარგავენ იმ ნივთებს. ხოლო თუკი არც ერთი ნათესავი არ ეყოლება, მისი ყველა ნივთი, რაც კი დარჩება, დაურიგდეს უპოვართ მისი სულის მოსახსენებლად, გარდა იმ შემთხვევისა, როცა იგი თავად, საკუთარი ნებით, მოისურვებს ყველა საკუთარი ნივთის მონასტრისათვის შეწირვას. თუმცა ამ შემთხვევაში, ავი საუბრების თავიდან ასაცილებლად, ამ ნივთების ნაწილი მაინც გადაეცეს მის მშობლებს, ან ნათესავებს.

### **თავი 16. ნაყოფის შემომწირველთათვის**

იმ ადამიანთა სახელები, ვინც მოწყალებას გაიღებს ამ მონასტრისათვის ადგილ-მამულით, ფულით, ვერცხლით, საქონლით, ანდა სხვა რამით, ჩაიწეროს მოსახსენებელში და მთელი წლის განმავლობაში, ყოველ შაბათ დღეს, გადახდით იქნეს პანაშვიდი კოლიოთი და მოიხსენიონ

---

შემომწირველების ყველა მიცვალებული. პანაშვიდის დროს იგალობონ მიცვალებულთა მე-8 ხმის კანონი: „სიკვდილითა სიკვდილისა დამთრგუნველი...“. ამავდროულად, ყოველი თვის ერთ-ერთ ხუთშაბათს ჩატარდეს ხოლმე შეკვეთილი [საჯანმრთელო] წირვა ცოცხალი შემომწირველებისათვის, რადგანაც ისინი ტაძრის კეთილისმყოფელნი არიან და ქტიტორებად ითვლებიან. ხოლო, როდესაც რომელიმე ნაყოფისშემომწირველთაგანი გარდაიცვლება, იმ დღეს უსასყიდლოდ გადაუხადონ მას სულის მოსახსენებელი შეკვეთილი წირვა.

### თავი 17. სტამბისათვის

რამდენ ხანსაც მონასტერში იმუშავენ ბერძნულენოვანი და რუმინულენოვანი სტამბები, იქნება ეს გარედან შემოტანილი თუ მონასტრის ფულით, აწყობილ ერთ სტამბურ ფურცელში უშუალოდ მესტამბემ და მისმა შეგირდებმა, რამდენიც არ უნდა ჰყავდეს, საზღაურად მიიღონ 3 ტალერი და ასევე მესტამბემ ათი, ხოლო მისმა შეგირდებმა თითო-თითო წიგნი წაიღონ. აწყობილი სტამბური ფურცელის ღირებულება 6 ტალერი იყოს, აქედან ნახევარი ჯამაგირად აიღონ მესტამბეებმა და ნახევარი დარჩეს მონასტერს.

თუ სტამბას გაუფუჭდება რამე, მონასტერი ვალდებულია გაიღოს ხარჯი მისი შეკეთებისათვის.

ხოლო თუ არც მონასტრის ფულით და არც გარედან შემოსული დაკვეთით მესტამბე თავად, საკუთარი ფულით, მოინდომებს წიგნის დაბეჭდვას, მას შემდეგ, რაც ის ამის შესახებ შეატყობინებს ილუმენსა და ეპიტროპებს, მიეცეს მას ამის უფლება. მესტამბე ვალდებულია წიგნის გამოცემით მოგებული ფულის ერთი მეოთხედი გადასცეს მონასტერს.

მესტამბემ არ გაბედოს ჩვენი რჯულის საწინააღმდეგო რაიმე წიგნის დაბეჭდვა, მაშინაც კი, თუ ერთ აწყობილ ფურცელში 100 ოქროს მონეტას დაპირდებიან. თუ ამ ბრძანებას არ დაემორჩილება--- მიეცეს ანათემას. თუ

---

ცნობილი გახდება, რომ მან მსგავსი რამ მაინც ჩაიდინა, მაშინვე ეცნობოს მთავარს, რათა მან უმკაცრესად დასაჯოს, ისე როგორც მან თავად იცის.

ამ ბრძანებასაც წყევლას ვაყოლებ: მესტამბე ვალდებული უნდა იყოს, რომ თავისი ცოდნა მომავალ თაობებს გადასცეს, რათა ამ ქვეყანაში ეს ხელობა არ დაიკარგოს და არ მოისპოს წიგნების ბეჭდვის საქმე.

### **თავი 18. ბიბლიოთეკისათვის**

წყევლას ვაყოლებ ამ ანდერძს, რომ არავინ გაბედოს რომელიმე იმ წიგნის გასხვისება, რომელსაც ვტოვებ ჩემს ბიბლიოთეკაში - ბერძნული იქნება ის თუ რუმინული და რომლებიც ჩამოწერილი მაქვს ეკლესიის იადგარში. იმ შემთხვევაში, თუ ვინმეს რომელიმე წიგნი (რედ.) დროებით დასჭირდება წასაკითხად, გადასაწერად, ან მასში რაიმეს მოსაძებნად - აიღოს ხელწერილით, სადაც პირობას დადებს, რომ დააბრუნებს წიგნს დადგენილ დროს. ხელწერილის გარეშე არ მიეცეს. მონასტერმა იზრუნოს წიგნის უკან დაბრუნებაზე.

### **თავი 19. დავთართა განახლებისათვის**

იღუმენი ვალდებულია, რომ მომავალში ყველა ჩვენ შემდგომ მღვდელმთავარსა და მთავარს სთხოვდეს წყალობასა და იმ სიგელ-გუჯართა განახლებას, რომლებითაც მტკიცდება ამ მონასტრისათვის დადგენილი ეს ტიპიკონი. ყველა წერილი, საბუთი, რომელშიც აღრიცხული იქნება ადგილ-მამულები, ვენახები, ბოშები (იგულისხმება ყმები. რედ.) და სხვა ქონება, რომელიც ღვთის წყალობით და მორწმუნე ქრისტიანთა შემოწირულობებით შეიძლება შეეძინოს ამ სავანეს, ყველაფერი, დიდი იქნება ის თუ მცირე, უნდა ჩაიწეროს მონასტრის დიდ დავთარში, რომელსაც ვტოვებთ ამ საქმისათვის, რათა არაფერი დაიკარგოსა და არ გაიფანტოს.



---

იღუმენი უნდა სთხოვდეს მთავარს, რომ დიდ დავთარში გაკეთებული ყველა ჩანაწერი თავისი მცირე ბეჭდით დაამტკიცოს და თუ რომელიმე შემოწირულობის ხელწერილი დაიკარგება, დავთარში აღრიცხული დარჩება ის დაკარგული შემოწირულობაც. ამიტომაც აუცილებელი ყველა ჩანაწერის მთავრის ბეჭდით დამტკიცება.

### **თავი 20. მღვდელმთავართა დავანებისათვის**

როდესაც ამ ქვეყნის რომელიმე მიტროპოლიტი, ან რომელიმე ეპარქიის ეპისკოპოსი მოხუცდება და დაუძღვრდება და სურვილი გაუჩნდება დაბინავდეს ამ მონასტერში - მიღებულ იქნეს და მიეგოს შესაბამისი პატივი ყველაფერში. მონასტერმა იზრუნოს მისი ოთხი მსახურისა და ორი ცხენის შენახვისათვის. მაგრამ ის მღვდელმთავარი არ უნდა ეხებოდეს მონასტრის წესებსა და ტრადიციებს, არ უნდა ცვლიდეს მათ და არ უნდა ერეოდეს მონასტრის მართვა-გამგეობაში. მისთვის ზრუნვას ვაწესებთ არა იმიტომ, რომ მისი რაიმე ვალი ჰქონდა მონასტერს, არამედ სიკეთის ქმნისა და ღვთისმოსაობის გულისთვის.

### **თავი 21. შესაწირავი მიტროპოლიტისათვის**

ყველა ძმას, რომელსაც ღმერთი ამ ქვეყნის მწყემსმთავრად დაადგენს, ღვთის სახელითა და ძმური სიყვარულით შევთხოვ: წყალობა იქონიეთ ამ სავანის მიმართ და ყოველთვის ყველაფერში მისი მხარდამჭერნი და მცველნი იყავით, რომ არ დაირღვეს ჩემ მიერ დადგენილი წესები და კანონები, რომ ყველაფერი შეუცვლელად რჩებოდეს, რომ ყოველთა წმინდათა მეოხებით ღმერთმა დაგლოცოთ და მოგმადლოთ მშვიდობა სამოციქულო ტახტზე მწყემსობისას. ასევე გთხოვთ, რომ იქონიოთ წყალობა და ღვაწლი, რომ ყოველ წელიწადს დააყენოთ ხოლმე ორი წირვა ტაძრის დღესასწაულის დღესა და მეორე დღესაც, და მიიღოთ დღესასწაულის დღეს შესაწირი 10 ტალერის

---

ღირებულების ხალიჩა, მეორე დღეს - 10 ტალერი და 5 ტალერის ღირებულების სირმის ძაფებით ნაქარგი ნაჭერი. მიტროპოლიტის ერთ მღვდელსა და ორ დიაკონს დღესასწაულის დღეს და მეორე დღესაც მიეცეთ: მღვდელს - ერთი ლეი, ერთ დიაკონს - ერთი ზლოტი და მეორეს - ერთი ტულტი.

მაგრამ თუ მის ყოვლადუსამღვდელოესობას არ ექნება ხელშეწყობა, რომ ჩაატაროს ზემოთ ხსენებული წირვები, ეკლესიასაც შესაბამისად არ ექნება ვალდებულება, მისცეს ეს საჩუქრები და თანხა.

ილუმენი ვალდებულია, რომ წელიწადში ოთხჯერ ქვეყნის მიტროპოლიტს მიართვას ხოლმე შესაწირი: ქრისტესშობას, აღდგომას, წმინდა კონსტანტინეს ხსენების დღეს და როდესაც მას ტაძრის დღესასწაულზე მიიწვევენ. ყოველ ჯერზე უნდა მიართვას ერთი ოყა ყავა და ერთი ოყა შაქარი: მაგრამ ეს პროდუქტები თუ არ აღმოჩნდება, მაშინ მათი ღირებულების სხვა რამე საქონელი უნდა მიართვას. ილუმენმა მიტროპოლიტს ასევე უნდა მიართვას შესაწირი წმინდა დიმიტრის ხსენების დღესაც. ასევე ორ ცოლიან მღვდელს, რომლებიც იმ დღეს იმორიგეებენ ეკლესიაში, მიეცეთ ორი ოქროს მონეტა.

## **თავი 22. ავადმყოფთა ზრუნვისათვის**

ილუმენი, მღვდელმონაზონნი და მღვდელნი, როგორც კი შეიტყობენ რომელიმე ადამიანის: შინაურისა თუ უხცოს, ქალისა თუ კაცის, ამ, თუ სხვა უბნის მაცხოვრებლის ავადმყოფობის შესახებ, ვალდებულებნი იქნებიან, რომ მიაკითხონ თვითონ, ან გაუგზავნონ ვინმე გამოცდილი მღვდელი, რომელიც შეძლებს ავადმყოფს ნუგეში სცეს და დაარწმუნოს, რომ აუცილებელია აღსარების თქმა, შვიდგზის ზეთისცხება, ზიარება და ანდერძის შედგენა იმ მცირე თუ დიდი ქონების თაობაზე, რომელიც ავადმყოფის მფლობელობაში იქნება. ხოლო ანდერძი უნდა შედგეს ჩვენ მიერ დადგენილი წესისა და რიგის

---

მიხედვით, რათა ავადმყოფის სული არ დამძიმდეს და არც მისი ნათესავები დარჩნენ უკმაყოფილონი. და ეს ანდერძი არ უნდა შედგეს მომხვეჭელობის, შურისა და თვალთმაქცობის სულისკვეთებით, როგორც ამას სამწუხაროდ ბევრი აკეთებს.

იმ მღვდელმა ყველანაირი საშუალებით სცადოს დაარწმუნოს ავადმყოფი, რომ საკუთარი ქონების რაღაცა ნაწილი შესწიროს მიტროპოლიტსაც. ის ნაწილი, რასაც იგი თავად ჩათვლის საჭიროდ, რადგან ასეთი შესაწირის გაკეთებას ითხოვს სამართალი და წესი. რადგანაც მიტროპოლია არის ყველა ტაძრისა და ქალაქის დედა. ავადმყოფების მოკითხვა და მათ სულებზე ზრუნვა ბოშებისა და მათი შვილების შემთხვევაშიც არის საჭირო, რადგანაც დაისჯება ის მღვდელი, რომელიც არ მიაკითხავს მათ, რამეთუ ისინიც მონათლულნი არიან წმინდა სამების სახელით და ჩვენსავით ქრისტიანები არიან.

### **თავი 23. ილუმენის დაკრძალვისათვის**

ჩემ შემდეგ ყველა დადგენილ ილუმენს თუ ექნება ამ მონასტერში მოსვლამდე სხვაგან ნაშოვნი ცოტა, ან ბევრი ფული და იგი საკუთარი კეთილი ნებით საჭიროდ ჩათვლის, გარდაცვალების შემდეგ ეს დანაზოგი სავანეს დარჩეს - კარგი იქნება. რადგან ამ სავანეში ყოფნისას ის მშვიდად ცხოვრობდა და თანაც მონასტრის ტიპიკონში დადგენილია მისი სულის ცხონებისა და გაპატიოსნებისთვის შესაბამისი ლოცვებისა და წესების აღსრულება. მაგრამ თუ გადაწყვეტს, რომ ის ფული მოწყალებაში სხვაგან გასცეს, ან დაუტოვოს ნათესავებს, თუ ასეთები ეყოლება, მას თავისი ქონების განკარგვის სრული უფლება აქვს. მაგრამ ეს არ უნდა იყოს მონასტრის ფული, რადგან ამ შემთხვევაში იგი ცოდვას ჩაიდენს და სასჯელს დაიმსახურებს. მით უმეტეს, რომ ტაძარს მისთვის არაფერი ცუდი, არანაირი ბოროტება არ გაუკეთებია არც ამ ცხოვრებაში და არც მერე, მისი გარდაცვალების შემდეგ, რამეს დააკლებს: ის

---

ილუმენი, თუ იქნება პატიოსანი და კარგი ქრისტიანი ადამიანი, ამაში თვითონაც დარწმუნდება მის მერე, რაც გაეცნობა ამ ტიპიკონს.

ხოლო ილუმენის დაკრძალვის მზადების დროს ხუთივე ეპიტროპს ჰქონდეთ ვალდებულება, ეახლონ მიტროპოლიტს და სთხოვონ, რომ მოზრძანდეს თორმეტ მღვდელსა და ორ დიაკონთან ერთად, რომლებსაც თვითონვე შეარჩევს, რათა შეასრულონ მიცვალებულის წესის აგება. ხოლო ამ შრომისათვის მის ყოვლადუსამღვდელოესობას მონასტრის თანხიდან მიეცეს ოთხი ოქროს მონეტა და სირმით ნაქარგი ნაჭერი, ყველა მღვდელს - თითო ზლოტი და დიაკვნებს - ორ-ორი ორცი. ასევე ეპიტროპებს ჰქონდეთ ვალდებულება, ვიდრე არ დადგინდება სხვა ილუმენი, დანიშნონ ადმინისტრატორი, რომელიც იზრუნებს მონასტრის საქმეებზე.

ეპიტროპებმა დაავალონ მღვდლებს, რომლებიც იმსახურებენ ეკლესიაში, შეასრულონ გარდაცვლილი წინამძღვრის სულის მოხსენებისათვის ყველა აუცილებელი წესი, ანუ პანაშვიდები გადაიხადონ სრულად: კოლიოთი და ხუთი ოყას<sup>2</sup> რაოდენობის სანთლების დარიგებით. წესისამებრ, პანაშვიდები უნდა გადაიხადონ გარდაცვალებიდან მესამე, მეცხრე და მეორმოცე დღეს, ექვსი თვისა და ერთი წლის თავზე. ხოლო სამი წლის გასვლის შემდეგ ეპიტროპებმა მიაკითხონ ქვეყნის მღვდელმთავარს და სთხოვონ ოთხ მღვდელსა და ორ დიაკონთან ერთად ჩაატაროს შეკვეთილი წირვა კოლიოთი, პანაშვიდის გადახდით და ათი ოყას ოდენობის სანთლის დარიგებით. მიტროპოლიტმა გარდაცვლილს ასევე წაუკითხოს შენდობის ლოცვა.

ამ შრომისათვის მიტროპოლიტს მიეცეს შესაწირი 4 ოქროს მონეტა და სირმით ნაქარგი ნაჭერი, ხოლო ოთხ მღვდელს - თითო ზლოტი და ორ დიაკონს- ორ-ორი ორცი.

#### **თავი 24. ეპიტროპთა საქმიანობისათვის**

---

იმისათვის, რომ დადგენილი წესი უცვლელად გაგრძელდეს, ვიდრე ეს ტაძარი იარსებებს, ჩვენი მონასტრის ყველა ეპიტროპი ვალდებული იყოს გარდაცვალების წინ დაასახელოს თავისი შემცვლელი ადამიანი, რომლის შესახებაც თავად ეცოდინება, რომ არის კეთილი და ღვთის მოშიში;

ხოლო თუ მოხდება ისე, რომ რომელიმე ეპიტროპს დაავიწყდება თავის ადგილზე შემცვლელის დასახელება, დანარჩენმა ოთხმა აირჩიოს მეხუთე ეპიტროპი, რათა არასდროს იყოს ხუთზე ნაკლები.

ასევე ვთხოვ მათ, იქონიონ ამ მონასტრის მიმართ წყალობა და ყოველთვის იზრუნონ მისი აღორძინებისათვის: არ გაბედოს რომელიმე მათგანმა ამ ეკლესიისათვის დადგენილი რომელიმე წესისა და კანონის დარღვევა, რომ არ ჩავარდნენ მსოფლიოს ოთხი პატრიარქისა და ჩემი სიგელით დამტკიცებული წყევლისა და შეჩვენების ქვეშ. არამედ თითოეულმა მათგანმა, თავისი ძალებისა და გულმოწყალების შესაბამისად, იშრომოს ღვთის ვენახში ამ წმინდა სალოცავის აღორძინებისა და ღარიბ–ღატაკთა დახმარებისა და ნუგეშისცემისათვის. ხოლო უფალი ჩვენი იესო ქრისტე, (რომელმაც თქვა: როდესაც სიკეთეს უკეთებთ ერთ–ერთ მცირეთაგან ჩემს ძმას, ამით მე მიკეთებთ იმ სიკეთეს), რომელიც არის ყოვლადმოწყალე და თქვენ მიერ გაღებული ღვაწლის დიდად დამფასებელი, გიბოძებთ ყოველგვარ სიკეთეს, სულის ცხოვნებას და მომავალ ცხოვრებაში ყოველთა წმინდათა მეოხებით ცათა სასუფეველში დამკვიდრებას.

## **თავი 25. შემოსავლების მეთაუდისათვის**

წყევლას ვაყოლებ ამ ბრძანებას, რომ ჩემ შემდეგ ყველა მომავალი იღუმენი ვალდებულია: რა თანხაც არ უნდა შემოუვიდეს მონასტერს, რა წყაროდანაც არ უნდა იყოს ის: პანაშვიდებიდან, სხვადასხვა საეკლესიო წესების შესრულებიდან, მორწმუნეების მიერ გაღებული შემოწირულობებიდან, ღვინისა თუ თაფლის გაყიდვებიდან, ან სხვა

---

ნებისმიერი წყაროდან, შემოსული თანხის ერთი მეათედი გადაიდოს ხოლმე სპეციალურ ყულაბაში. შემოსავალი მხოლოდ 10 ბანიც რომ იყოს, ერთი ბანი ჩაიდოს იმ ყულაბაში, რომ მონასტრისათვის განსაცდელის, გაჭირვებისა და დიდი უბედურების ჟამს, როდესაც სხვა საშუალებით შეუძლებელი იქნება მდგომარეობის შველა, მაშინ გაიხსნას ეს ყულაბა და აიღონ და გამოიყენონ ეს ფული. ხოლო თუ გარკვეული დროის შემდეგ გამოჩნდება რამე სხვა დახმარება ან შემოწირულობა, ის თანხა, რომელიც იქნა დახარჯული, დაბრუნდეს ყულაბაში და შემოწირული ფულის მეათედი ასევე ჩაიდოს იქ, რადგან, როგორც უკვე ვთქვი, გაჭირვებისა და უბედურების ჟამისათვის ყოველთვის უნდა არსებობდეს თანხა.

ამ უბედურებებსა და გაჭირვებაში, რომლებზეც ვწერთ ამ თავში, ვგულისხმობთ: (ღმერთმა დაგვიფაროს) მიწისძვრას, ხანძარს, ქარიშხალსა და სხვა მსგავს სტიქიებს, რომლებსაც შეუძლიათ დიდი ზიანისა და ნგრევის მიყენება და მონასტერს უნდა ჰქონდეს საშუალება აღადგინოს განადგურებული.

## **თავი 26. ილუმენის არჩევისათვის**

ის ხუთი ეპიტროპი ვალდებული უნდა იყოს, რომ მონასტრის ილუმენის გარდაცვალების შემდეგ, თუ ამ მონასტრის ორ მღვდელმონაზონთაგან ერთ-ერთი კეთილი, ღვთისმოშიში და წინამძღვრობის ღირსი აღმოჩნდება, მართოს ეს სავანე (რადგან კეთილი და ღვთისმოშიში ადამიანი ბევრია, მაგრამ ყველა არ არის ღირსი მართოს მონასტერი), ის მღვდელმონაზონი უნდა აირჩიონ და გარდაცვლილის ადგილზე დააყენონ წინამძღვრად, რათა პატიოსნად ემსახუროს მონასტერს.

---

იმ შემთხვევაში, თუ ამ ორ მღვდელმონაზონთაგან არც ერთი არ აღმოჩნდება წინამძღვრობის ღირსი, უნდა მონახონ სხვა მღვდელმონაზონი, იქნება ის ბერძენი,<sup>2</sup> თუ რუმინელი. მაგრამ არც ერთ შემთხვევაში არ უნდა იყოს უცხოელი, შურით სავსე ადამიანი, ანუ ვგულისხმობ ვინმე მთაწმინდელს, სინაიტელს ან იერუსალიმელ ბერს, რადგანაც ეს შესაძლებელია მომავალში ბევრი ცუდი რამის მიზეზი გახდეს.

ხოლო იმ პიროვნებამ, რომელსაც ილუმენად შეარჩევნენ, კურთხევამდე<sup>2</sup> ჯერ ეპიტროპებს უნდა მისცეს ფიცის წერილი, რითიც აღუთქვამს, რომ სიცოცხლის ბოლომდე იღვაწებს ამ მონასტრის კეთილდღეობისათვის, რომ სამართლიანობითა და მონდომებით იმუშავეს, ხოლო აღსრულების შემდეგ იქვე, მონასტერში, დაიმარხება. მხოლოდ ამის შემდეგ აკურთხონ იგი წინამძღვრად. ამგვარად დადებული პირობა სამართლიანია და სასიკეთოა თავად მისივე სულისა და ხორცისათვის. რადგან, თუ იგი მონასტრისათვის სასარგებლოდ და სასიკეთოდ იღვაწებს, მისი ცხოვრებაც უზრუნველყოფილი იქნება ყველაფრით; ეს მონასტერი საკუთარ სახლადაც იქცევა მისთვის და გარდაცვალების შემდეგ მას აქვე მოიხსენებენ მანამდე, ვიდრე მონასტერი იარსებებს.

## **თავი 27. ეკლესიის შემოსავლებისათვის**

როგორც ტიპიკონის მესამე თავში ითქვა, ილუმენის მიერ წარმოდგენილი მონასტრის შემოსავლებისა და გასავლების ანგარიშების შემოწმებისას თუ ზედმეტი თანხა აღმოჩნდება, არა აქვს მნიშვნელობა დიდი, თუ მცირე რაოდენობის და ამასობაში აღმოჩნდება, რომ სასწრაფო საქმისათვის გარკვეული თანხაა საჭირო, ეპიტროპებმა ილუმენს, საჭიროებისამებრ, ამ თანხის გამოყენების უფლება უნდა მისცენ. ხოლო მორჩენილი თანხა

---

ეპიტროპებმა ბეჭდებით უნდა დალუქონ და ეკლესიის ყულაბაში შეინახონ იქ, სადაც ინახება მეთედები. როდესაც ილუმენს მონასტრის რაღაცა საქმისათვის დასჭირდება გარკვეული თანხა, ეპიტროპების ნებართვით, მას შეუძლია ამოიღოს იგი ყულაბიდან, მაგრამ მეთედების თანხა ხელუხლებლად უნდა დარჩეს.

როდესაც ეპიტროპები მონასტრის შემოსავლებს დათვლიან, მეთედების თანხა ცალკე გადათვალონ და ისე დალუქონ ცალკე ქისაში და შეინახონ იმავე ყულაბაში. ეპიტროპებმა ორ ცალად შეადგინონ დოკუმენტი, სადაც ყოველწლიურად ცალ-ცალკე აღინიშნება მეთედების თანხა და მონასტრის შემოსავლებიდან მორჩენილი ზედმეტი ფული. დოკუმენტის ერთი პირი შეინახონ ყულაბაში, მეორე ერთ-ერთ ეპიტროპთან, სხვა ეპიტროპთან ინახებოდეს ბეჭედი, რომლითაც დაილუქება ქისები, მესამესთან - ყულაბის გასაღები.

### **თავი 28. სკიტებისათვის**

თუ მომავალში ქრისტესმოყვარე ადამიანები შესწირავენ ამ მონასტერს ადგილ-მამულებს და იქ სკიტები დაარსდება, მომავალი წინამძღვარი ეპიტროპებთან ერთად ვალდებული იქნებიან, რომ ისეთივე ღვთაებრივი მოშურნეობითა და ღვაწლით იზრუნონ სკიტების განვითარებისა და კეთილდღეობისათვის, როგორც ამ მონასტრისათვის. ილუმენი და ეპიტროპები ვალდებული იქნებიან წელიწადში ორჯერ მოიკითხონ სკიტები და შეამოწმონ მათი მდგომარეობა, და თუკი აღმოაჩენენ რაიმე სახის უწყესრიგობას ან დანაკარგს, მათ ამ ბოროტების აღმოსაფხვრელად მთელ ძალისხმევას უნდა მოუხმონ. ამ მოშურნეობისთვის ღმერთი მათ სულიერ საზღაურს მიუზღებს.

### **თავი 29. მოსახსენებლისათვის**



---

გვსურს, რომ მთელი წლის განმავლობაში ახლაც და მომავალშიც, ყოველ კვირა დღესა და დღესასწაულებზე ტაძრის შუაგულში ხმამაღლა მოიხსენიონ ცოცხალთა და მიცვალებულ ქრისტესმოყვარულ ქრისტიანთა სახელები, ანუ ამ წმინდა ადგილისათვის შემოწირულობათა გამღებნი, იმ წესით, როგორც ეს არის დაწერილი მონასტრის დავთარში და ყოველდღიურ მოსახსენებლებში, ასევე უნდა წაკითხულ იქნეს იქ დაწერილი შენდობის ლოცვა.

### **თავი 30. ეპიტროპთა პატივისცემისათვის**

გარდა მონასტრის მოსახსენებელში დადგენილი მოხსენიებისა, იმ ღვაწლისათვის, რომელსაც ეპიტროპები გაიღებენ, ისინი ყოველ წირვაზე ხმამაღლა მოიხსენიონ შემდეგნაირად: “მერმეცა გევედრებით წყალობისა, სიცოცხლისა, მშვიდობისა, დღეგრძელობისა, კეთილად წარმატებისა, ცხონებისა და ცოდვათა შენდობისათვის მონათა ღვთისათა, ეპიტროპთა ამ წმინდა მონასტრისა (სახელები), რათა შეენდნეთ მათ ყოველნი შეცოდებანი მათნი ნებსითნი და უნებლიეთნი“.

წელიწადში ორჯერ - წმინდა გიორგისა და წმინდა დიმიტრის ხსენების დღეს, როდესაც ეპიტროპები ანგარიშების შესამოწმებლად მობრძანდებიან, იღუმენი ვალდებულია მათ საპატივცემულოდ გაშალოს 5 ტალერის ღირებულების ტრაპეზი. იმავე დღეს, ტრაპეზის შემდეგ, თითოეულს დალოცვის სახით გადასცეს ორ-ორი ოქროს მონეტა.

### **თავი 31. მოწყალების გაორმაგებისათვის**

მაღალი ღმერთი, რომელიც ხან გლახაკად გაქცევს და ხან გაგამდიდრებს, ხან დაგამდაბლებს და ხან აღგამაღლებს, თავისი დიდი წყალობით ამ მონასტერს თუ გამდიდრებასა და ამაღლებას უბოძებს და

---

მონასტერს გაუჩნდება ბევრად დიდი შემოსავალი, ვიდრე ღვთისწყალობით აქვს ამჟამად, ამ შემთხვევაში, ლატაკათავის და სხვათათვის მოწყალების გაცემის ყველა წესი, რომელიც აღნიშნულია ამ ტიპიკონის თავებში, უნდა გაორმაგდეს. ამას ვუბრძანებთ იმას, ვინც ჩვენ შემდეგ დადგება ილუმენად. ამას ვადგენთ, რომ ღვთის ყოვლად წმინდა სახელი უფრო მეტად იქოს და იდიდოს.

### **თავი 32. თავების წაკითხვისათვის**

ასევე გვნებავს, რომ ჩვენ შემდეგ დადგენილმა ყველა წინამძღვარმა, რათა არ დაიმსახურონ წყევლა, წელიწადში ოთხჯერ, ყოველ დიდ მარხვაში თითო ჯერ, ტიპიკონის ყველა თავი ხელახლა გადაიკითხონ ხოლმე და იზრუნონ მათი შესრულებისათვის იმგვარად, როგორც დაწერილია ჩემ მიერ.

ხოლო მოწყალე ღმერთმა, ზეციური მადლით, შეეწიოს ილუმენს, რომ ყველაფერი სიყვარულითა და მოშურნეობით ადასრულოს და გაიღოს მოწყალეობა ღარიბ-ლატაკათავის, იღვაწოს ჩვენი და ამ სავანისათვის შემომწირველთა სულების ცხოვნებისათვის და ასევე იღვაწოს ამ წმინდა სალოცავის აღშენება- კეთილდღეობისათვის.

\*

ამ წიგნაკში ეს 32 თავი დაიწერა ყოველთა წმიდათა სახელობის მონასტრის კეთილდღეობისათვის, ღარიბ-ლატაკათავის მოწყალების გაღებისათვის, ჩემი ცოდვილი სულის ცხოვნებისა და ამ წმინდა სავანის ნაყოფის შემომწირველთა საუკუნო მოხსენიებისათვის.

თუ რომელიმე პირი: საეკლესიო თუ საერო დასთაგანი, დიდგვაროვანი, თუ უბრალო, ადგილობრივი თუ უცხოელი, შეცვლის ან დაარღვევს რამეს, რაც ჩემი კეთილი ნებით დავაწესე - შეჩვენებულ იქნეს

---

მამისა და ძისა და წმინდისა სულისა მიერ და საშინელი სამსჯავროს ჟამს ყველა წმინდანი იყოს მისი მამხილებელი.

ანთიმოზ უნგრო-ვლახელი.

გარდა დაწერილი ამ 32 თავისა, აქ ჩამოვწერთ კიდევ რამოდენიმე საჭირო სწავლებას მონასტრის მეტი კეთილდღეობისა და პატივის მიგებისათვის და ამიტომ გვსურს, რომ ეს ქვემოთ ჩამოწერილი მუხლებიც მომავალი ილუმენების მიერ ყოველთვის შესრულებულ იქნეს ისევე, როგორც ზემოთ დაწერილი თავები. წინააღმდეგ შემთხვევაში, წინამძღვარი ჩავარდება მძიმე და გაუხსნელი შეჩვენების ქვეშ.

1

როდესაც მღვდელს ავადმყოფი ქრისტიანის საზიარებლად დაუძახებენ, გვნებავს, რომ მღვდელი ოლარითა და ფილონით შემოსილი წაბრძანდეს და თან წაიღოს წმინდა ტარიგი მისთვის დაწესებულ ჭურჭელში ისე, რომ დიდი მოკრძალებითა და პატივით ის ჰქონდეს მკერდზე დაკიდებული. ამ დროს მის წინ წინასწარ გამზადებული და ანთებული სანთლებით ხელში ორმა ბავშვმა იაროს. მღვდელს უკან მოჰყვებოდეს კიდევ ორი ბავშვი, რომლებიც მორიგეობით იგალობებენ 144 ფსალმუნს: “აღგამაღლო შენ, ღმერთო ჩემო” . ეს ბავშვები უნდა იყვნენ იმათგანი, ვინც მონასტრის მოწყალებით სწავლობენ ამ სავანეში.

2

თუ რომელიმე ქრისტეს მოყვარე მორწმუნე, ვინც არ უნდა იყოს ის, მოისურვებს და თავისი სიცოცხლის ბოლოს, ყოველთაწმინდათა სახელობის მონასტერს შესწირავს დიდ თანხას, რომლის სანაცვლოდაც ამ მორწმუნეს ექნება სურვილი, რომ სანამ იარსებებს ეს ეკლესია, იქამდე მონასტერი უკეთებდეს რაიმე წყალობას მისი სულის საცხოვნებლად, წინამძღვრებმა, რომლებიც ჩვენ შემდეგ იქნებიან, ყველანაირი დაზარების გარეშე უნდა შეასრულონ ყველაფერი მთელი წლის განმავლობაში ისე, როგორც მოისურვებს ეს ადამიანი, რომელმაც შესწირა ეს დიდი თანხა. ფული, რომ არ იყოს გაჩერებული სარგებლის გარეშე და თუ რომელიმე ხელობისა და საქმის ადამიანი მოისურვებს აიღოს სესხი იმ პირობით, რომ წელიწადში 100 ტალერზე გადაიხადოს 7 ტალერი, მიეცეს მოთხოვნილი თანხა ხელწერილით და მოგებული ფულიდან ილუმენი

---

უნდა ასრულებდეს გარდაცვლილი შემომწირველის სულის მოსახსენებელ ანდერძს.

3.

წინამძღვრებმა, რომლებიც იქნებიან ჩემ შემდეგ, არ გაბედონ და რაიმე ხერხით არ დამალონ მონასტრის ქონებაში შინაური თუ უცხო ადამიანების საკუთრება იმ მიზნით, რომ იმათმა თავი დაიხსნან გადასახადებისაგან. არ დამალოს სხვისი ცხვარი, ღორი, ფუტკრის სკები, ღვინო, პური ან ნებისმიერი სხვა რამ. ეს იმოტომ, რომ სავანეს არ გაუტყდეს სახელი, რის გამოც თავად მონასტერს შეიძლება დიდი ზიანი მიადგეს. ხოლო თუ რომელიმე იღუმენი გაბედავს მსგავსი რაიმეს ჩადენას, მის თავს ანათემა დაატყდება.

4

თუ ვინმე ადამიანს ექნება მამული მონასტრის მამულთან ახლოს, ან ვენახი მონასტრის ვენახთან ახლოს, სათიბი მინდვრები, ხილის ბაღები ან ბუჩქნარი არც ერთ შემთხვევაში სხვისი ადგილი არ უნდა იყოს დაჩაგრული, მიტაცებული ან დაზიანებული მონასტრის ადგილით.

5

შიგნით ტაძარში არ გაკეთდეს მაღალი და წარწერიანი საფლავეები. ასევე, არ დაუშვან, რომ შიგნით ტაძარში ხისა ან ქვის შანდლებზე ანთებდნენ სანთლებს, როგორც ეს იციან ხოლმე, არამედ ტაძარში მუდმივად ენთოს მხოლოდ ის კანდელები და იმ ადგილებში, რომლებიც სპეციალურად ამისათვის არის დადგენილი. ასევე ტაძრის შიგნით არ დაიდოს სკივრები გასაყიდი ტანსაცმლით, რადგან ღვთის სახლი არ უნდა გადაიქცეს ვაჭრობის სახლად, არამედ ეკლესიაში ყველა ადგილი უნდა იყოს სუფთა და ნათელი.

6

მონასტრის პირველ ეზოში, ანუ ტაძრის გარშემო არ დაიმარხოთ არავინ, ვინც არ უნდა იყოს და არ გაკეთდეს საფლავეები გარდა იმ შემთხვევისა, როდესაც გარდაცვლილი ძალზედ საპატივცემულო ადამიანი იქნება, მაგრამ საფლავის ქვები მაინც არ დაედოს, რადგან ეზო არის ვიწრო და კიდევ უფრო დავიწროვდება. ხოლო ქრისტიანები დაიმარხოთ საავადმყოფოს ეზოში, სადაც ყოველ შაბათ დღეს ერთმა

---

მღვდელმა ჩაატაროს ხოლმე წირვა და წესისამებრ საზოგადოდ მოიხსენიოს ყველა მიცვალებული ქრისტიანი. ასევე არანაირი ჯიშის პირუტყვი არ შევიდეს ხოლმე პირველ ეზოში, არც კელიებში მიიღონ შესანახად ვაჭართა ან თუნდაც მონასტრის საქონელი, რადგან მონასტერში და კელიებში მუდმივად უნდა იყოს სისუფთავე. მაგრამ თუ მოხდება და ვინმე მოიყვანს შესანახად საქონელს, მაშინ ეს საქონელი მეორე ეზოში შეინახონ.

7

მომავალმა ილუმენმა დაავალოს მონასტრის მღვდლებსა და მღვდელმონაზვნებს ჩემი სულის მოსახსენებლად გადაიხადონ ხოლმე 40 დღიანი პანაშვიდები, დაიწყონ ხოლმე აღდგომას და დაასრულონ ამალლებას. ამ საქმეში წინამძღვარმა გადაიხადოს 10 ტალერი შემდეგი სახით: მღვდლებმა მიიღონ ორ-ორი ტალერი, დიაკონმა - ერთი ტალერი და მგალობელმაც - ერთი ტალერი. ხოლო წინამძღვარმა არ დაუკავოს ამ თანხიდან არც ერთი ბანი.

8

თუ მოხდება ისე, რომ ვინმე ილუმენს ჩააბარებს შესანახად ფულს, სამუშაო იარაღებს, ან ტანსაცმელს, გაუფრთხილდეს მას, როგორც თვალის ჩინს მთელი სამართლიანობით და პატიოსნებით, ყველანაირი ბოროტი განზრახვის გარეშე. და როდესაც მას მოსთხოვენ იმ საგნების დაბრუნებას, ყველაფერი სრულად დააბრუნოს, რათა მონასტერს სახელი არ გაუტყდეს და მასზე ბოროტად არ ილაპარაკონ.

ცალკე თავი, რომელიც ჩვენმა სიმდაბლემ დააწესა დღეს, 7224 [1716] წლის 15 მარტს, და გვნებავს, რომ იყოს საუკუნოდ დაცული შეუცვლელად, ხოლო ამისი დამრღვევი მძიმე და მოუხსნელი შეჩვენებით დაისაჯოს.

მის შემდეგ, რაც ყოვლად მოწყალე მამამ, ყოვლის ნუგეშინისმცემელმა ღმერთმა, მისი გამოუთქმელი სიკეთიდან გამომდინარე მოიყვანა ღვთივკურთხეული დიდი უფალი, იონ ნიკოლაე ალექსანდრუ ვოევოდი, ვლახეთის მთავრად, ღვთისმოშურნეობითა და მოწყალებით სავსემ გვიბოძა სიგელ-გუჯარი, რომლითაც გაამდიდრა ამ წმინდა ადგილის შემოსავალი. ამიტომ ვადგენთ, რომ ღარიბებისათვის წლის განმავლობაში ყველა ის გასაცემი მოწყალება, რომელიც დადგენილია ამ ტიპიკონის 32 თავში, ყველა გაორმაგდეს. ეს ყველაფერი გაკეთდა მისი დიდებულების იონ ნიკოლაე ალექსანდრუ ვოევოდის ვლახეთის მთავრისა და მისი განსვენებული მშობლების მოსახსენებლად.

---

ასევე ვადგენთ, რომ ჩვენთვის გაღებული ამ დიდი მოწყალებისთვის, წინამძღვრები, რომლებიც იქნებიან ჩვენ შემდეგ, ვალდებულნი იყვნენ ყოველ წელიწადს, სანამ იარსებებს ეს მონასტერი, 40 ეკლესიას შესწირონ 40 ორცი, რომ ერთ დღეში ყველგან გადაიხადონ პანაშვიდი და მოიხსენიონ მთავრის მიცვალებულთა მოსახსენებელში დაწერილი ყველა სახელი, რომელიც დართულია მონასტრის ყოველდღიურ მოსახსენებელსა და მონასტრის დავთარში. და ეს შესრულდეს ყოველი წლის 10 მაისს, როდესაც აღმოსავლეთის მართლმადიდებელ ბევრ ქვეყანაში აღინიშნება წმინდა ნიკოლოზის ნაწილების გადასვენების დღე. ასევე ამ დღეს მონასტრის მცირე ეკლესიაში ცალკე გადაიხადონ პანაშვიდი და მოიხსენონ მისი უდიდებულესობის, მთავრის, მოსახსენებელში ჩაწერილი ყველა სახელი

## საეკლესიო სწავლება

*მღვდელთა განათლებისათვის ყველაზე საჭირო და სასარგებლო სწავლება, ახლა ამ სახით დაბეჭდილი [ქალაქ] ტირგოვიშტეში წმინდა მიტროპოლიის მიერ ქრისტეს შობიდან 1710 წელს. გადაეცეს მღვდლებს საჩუქრად.*

ღვთის წყალობით ყოვლად უსამღვდელოესი უნგრო-ვლახეთის მიტროპოლიტი და მთიანეთის ეგზარქოსი.

ჩვენს ეპარქიაში მყოფ ყველა პატიოსან მღვდელს ღვთისგან ვუსურვებთ წყალობას, მშვიდობას, ჯანმრთელობას, წმინდა ცხოვრებასა და სულიერ ცხოვნებას, ხოლო ჩემი უღირსობისაგან გითვლით კურთხევას, დალოცვასა და ცოდვათა შენდობას.

---

მღვდელმთავრობის ამ მაღალ ხარისხში ყოფნისას, რომელზეც ჩემი აყვანა ინება ღმერთმა, ყველაზე დიდი და საპასუხისმგებლო მისია, რომელიც მაკისრია არის ეკლესიის მართვა–გამგეობა და ჩვენი პირმეტყველი სამწყსოს სულიერ ცხოვნებაზე ზრუნვა. ამისთვის ვალდებულები ვართ ვიფხიზლოთ დღე და ღამე, რადგან ღვთის წინაშე პასუხს ვაგებთ პავლე მოციქულის სიტყვებისამებრ: მწყემსთა დასაბამის იესო ქრისტეს მსგავსად, რომელმაც სული თვისი დასდო ჩვენთვის, ჩვენც უნდა დავსდოთ ცხოვრება ჩვენი სამწყსოს დასაცავად.

მაგრამ ამ კეთილ მსახურებას ვერ შევასრულებ მე მარტო როგორც საჭიროა, თუ ჩემს გვერდში არ მეყოლება თანამოღვაწე და თანამსახური ადამიანები, რომლებიც დამეხმარებიან ამ დიდ საქმეში, რადგან სადაც სამკალი ბევრია, იქ ბევრი მომკალიცაა საჭირო. როდესაც სამწყსო დიდია, ხოლო მწყემსი კი ერთი, ის მწყემსი როგორი გამორჩეული, ღირსეული, გამოცდილი მართვაში და განათლებულიც არ უნდა იყოს, ვერ შეძლებს ვერც ყველაფრის დანახვას და ვერც ყველაფრის ცოდნას. ამიტომ მას ჭირდება მღვდლები და სულიერი მოძღვრები, როლებიც დაეხმარებიან ყოვლად უსამღვდელოეს მწყემსს თვალეზივით, რომ დაინახოს ყველაფერი, ხელებივით, რომ გააკეთოს საჭირო და აუცილებელი საქმეები და ფეხებივით, რომ სისწრაფით მივიდეს ყველას დასახმარებლად.

ამიტომაც ამ დიდ საქმეში დამხმარენი ხართ თქვენ, პატიოსანნო მღვდელნო, რომლებსაც მუდმივი ვალდებულება გაქვთ სიტყვით და საქმით იშრომით და იღვაწით დღე და ღამე თქვენს მწყემსმთავართან ერთად ამ პირმეტყველი სამწყსოს ცხოვნებისთვის, რომელიც ჩავვაბარა ჩვენ მაღალმა ღმერთმა. მაგრამ რა იმედი უნდა მქონდეს მე თქვენი? ან რა დახმარებას უნდა ველოდო მე თქვენი შრომისაგან?

რადგან სხვა მწუხარებებთან ერთად, რომლებიც მწარედ მტკენს გულს და სევდას მგვრის, არის ის, რომ ჩემს მღვდლთა შორის არიან გაუნათლებელი

---

და უმეცარი მსახურები, რომლებიც, როგორც მე ვიცი, საწყალ სამწყსოს ვერ უწევთ ვერც დახმარებასა და ვერც სწორ დაკვალიანებას. ამიტომ, ღვთის შიშით შეპყრობილმა, დავინახე რა თქვენი უმეცრება და უცოდინარობა, გადავწყვიტე გაგანათლოთ ამ პატარა წიგნით, რომელიც დავყავი სამ ნაწილად.

პირველ ნაწილში ძალზედ მოკლედ განვმარტე ზოგიერთი აუცილებელი საეკლესიო სწავლება და წმინდა საიდუმლოებები, რომელთა ცოდნაცა და შესრულებაც გევალებათ თქვენც და თქვენ გარშემო მყოფ საწყალ მორწმუნეებს.

მეორე ნაწილში დავწერე სწავლება აღსარების შესახებ, რომ ყველა მოძღვარმა იცოდეს, როგორ ჩაიბაროს აღსარება და როგორ დაარიგოს და გამოასწოროს მასთან მისული აღმსარებლები.

მესამე ნაწილში დავწერე დარიგებები იმ უწესოებებისა და დანაშაულებების შესახებ, რომლებიც ჩვენ აქამდე გვსმენია და რომ ამის შემდეგ აღარ უნდა მოხდეს მსგავსი რამ.

პატიოსანნო მოძღვარნო, დალოცვასთან ერთად გიშლით ამ უსასყიდლო სულიერ სუფრას იმ იმედით, რომ ამ მცირე სწავლა-დარიგებებით დანაყრდებით ცოდნის ნათელით და ამით დაეხმარებით გაჭირვებაში მყოფ ქრისტიანებს.

ხოლო თუ ასე მოკლედ, ძალზედ გასაგები და მარტივი ენით დაწერილი სწავლების მიმართ გამოიჩინთ დაუდევრობას, გამოჩნდება, რომ არ გინდათ იღვაწოთ არც ქრისტეს სიყვარულისთვის, არც ეკლესიის გამტკიცებისთვის, არც ქრისტიანთა დახმარებისათვის, არც თქვენი პატივისათვის და განსაკუთრებით არც იმ საზღაურისთვის, რომელიც მოგეცემათ ღვთისგან თქვენ მიერ გაწეული შრომისათვის. ამიტომაც პასუხს აგებთ თქვენ ქრისტეს საშინელ სამსჯავროზე, რადგან მე შევასრულე ჩემი მოვალეობა და გასწავლეთ, რაც აუცილებელი და საჭიროა, როგორც ამას ამბობს მაცხოვარი იესო ქრისტე



---

იოანეს სახარების მე-15 თავში: „უკეთუმცა არა მოვედ და ვეტყოდე მათ, ცოდვაიმცა არა აქუნდა; ხოლო აწ მიზეზი არა აქუს ცოდვათა მათთათვის.“

მაგრამ თუ თქვენს გულეში იმას იტყვით, რომ დაკავებულობისა და ბევრი საქმეების გამო არ შეგვიძლიაო ამ ყველაფრის შესრულება, ეს არაფერს გარგებთ და უზენაესი მსაჯულის წინაშე ვერ გაიმართლებთ თავს. რადგან, მათეს სახარების 22-ე თავში, უფალი იესო ქრისტე ამბობს შემდეგ სიტყვებს: „მიეცით კეისრისა კეისარსა და ღმრთისაი ღმერთსა“. რადგან, როგორც მეფე ითხოვს თავისი ქვეშევრდომებისაგან ხარკს, ასევე ღმერთიც ქრისტიანებისაგან და განსაკუთრებით მღვდლებისაგან ითხოვს რწმენასა და კეთილ საქმეებს. ზოგიერთისაგან მეტს და ზოგიერთისაგან ნაკლებს, ანუ თითოეულისაგან თავისი ნიჭისა და შესაძლებლობების შესაბამისად, რაც მიეცა.

ამიტომაც შეეშვით მიზეზებსა და საბაბებს, რადგან ამაოა ყველაფერი. ნუ გაურბიხართ შრომას და არ იზარმაცოთ, რადგან წყევლის ქვეშ მოიქცევით, როგორც ეს ნათქვამია წმინდა წერილში იერემია წინასწარმეტყველის წიგნის 48-ე თავში: „წყეულ იყოს, ვინც მცონარებით ასრულებს ღვთის საქმეს.“

მამასადამე, მთელი ძალით, მონდომებითა და სიყვარულით იღვაწეთ ქრისტიანი ერის ცხოვნებისათვის, რომ თითოეულმა თქვენგანმა ღირს იქმნას, გაიგოს სამართლიანი ამნაზღაურებელი ქრისტეს ნეტარი ხმა: „მონაო სახიერო და სარწმუნო! მცირესა ზედა სარწმუნო იქმენ, მრავალსა ზედა დაგადგინო შენ; შევედ სიხარულსა უფლისა შენისასა.“<sup>2</sup> ამ სიხარულის ღირსები გაგხადოთ თქვენ ღვთის მადლმა და ჩემი უღირსობის ლოცვამ.

### ამ წიგნის კიბისაღმწერი

1. რა ძალა აქვს ჯვარს და როგორ უნდა გადავიწეროთ პირჯვარი?
2. უფლის ლოცვა და მისი განმარტება.
3. მრწამსს რამდენი მუხლი აქვს და რას ნიშნავს თითოეული?

- 
4. ეკლესიის შვიდი საიდუმლო, რა ძალა და მადლი აქვს თითოეულს?
  5. რას გვასწავლის ეკლესიის ცხრა დიდი მცნება?
  6. ღვთის ათი მცნება, რომელთა დაცვაც გვევალება ყველას; წინამდებე შემთხვევაში ვერ აღვასრულებთ სჯულს.
  7. რომლია და რამდენი სულიწმიდის ნიჭი?
  8. სამი საღვთისმეტყველო სათნოება.
  9. სულის ოთხი სათნოება.
  10. ხორცის ოთხი სათნოება
  11. შვიდი მომაკვდინებელი ცოდვა.
  12. მოწყალების თორმეტი ნაყოფი
  13. სწავლება აღსარების შესახებ.
  14. სხვა აუცილებელი სწავლებანი.

ჯვარი არის ნიშანი და იარაღი ბოროტის წინააღმდეგ, რადგან, როგორც ამბობს პავლე მოციქული კორინთელთა მიმართ ეპისტოლის პირველ თავში, ჯვარი ღვთის ძალა და სიბრძნეა. ხოლო მართლმადიდებელ ქრისტიანს პირჯვრის წერა მართებს შემდეგი წესით:

ჯერ შეაერთოს მარჯვენა ხელის სამი თითი (ანუ დიდი და მის გვერდზე ორი მომდევნო თითი), მიიღოს შუბლზე და თქვას: სახელითა მამისათა, შემდეგ დაიდოს ჭიპზე და თქვას: და ძისათა, შემდეგ მიიღოს მარჯვენა მხარეზე და თქვას: და სულისა წმიდისათა, შემდეგ მიიღოს მარცხენა მხარეზე და თქვას: ამინ.

**ლოცვა, რომელიც ასწავლა მოციქულებს უფალმა ჩვენმა იესო ქრისტემ:**

**„მამაო ჩვენო, რომელი ხარ ცათა შინა“**

---

ეს სიტყვები გვასწავლის, რომ არ გვყავს სხვა მამა გარდა ღმერთისა, როგორც ეს ნათქვამია მათეს სახარების 25–ე თავში: ამ ქვეყნად ნურავის ნუ უწოდებთ მამას, რადგან ერთი გყავთ მამა ზეციერი.

*წმიდა იყავნ სახელი შენი.* ღვთის სახელი არის წმიდა სათნოებებითა და კეთილი საქმეებით, როგორც ეს ნათქვამია მათეს სახარების მე–5 თავში: „ეგრეთ ბრწყინავდინ ნათელი თქუენი წინაშე კაცთა, რაითა იხილნენ საქმენი თქუენნი კეთილნი და აღიდებდნენ მამასა თქუენსა ზეცათასა“.<sup>2</sup>

*მოვედინ სუფევა შენი.* ამ სიტყვებით სული ლოცულობს, რომ ღმერთმა დაამყაროს თავისი სუფევა, ანუ უბოძოს მას შეწევნა, სიმართლე და ცოდვის ძალისაგან დაცვა, როგორც ნათქვამია ეს რომაელთა მიმართ მე–6 თავში: „ნუ უკუე სუფევნ ცოდვაი მოკუდავთა მაგათ ხორცთა თქუენტა მორჩილებად მისა გულის თქუმათა შინა მისთა“.

*იყავნ ნება შენი, ვითარცა ცათა შინა, ეგრეცა ქვეყანასა ზედა.* ამ სიტყვებით ჩვენ ვთხოვთ ღმერთს, რომ მისი ნება სრულდებოდეს ამ ქვეყნად ისევე, როგორც ის სრულდება ზეცაში, ანუ, როგორც ანგელოზები ყველაფერში და ყველანაირი ეჭვის გარეშე ემორჩილებიან ღვთის ნებას, ასევე ამქვეყნადაც ადამიანები, რომ ვემორჩილებოდეთ მას. ამის შესახებ პავლე მოციქული ფილიპელთა მიმართ ეპისტოლეს მე–2 თავში ამბობს შემდეგს: „რაითა სახელისა მიმართ იესო ქრისტესისა ყოველი მუხლი მოდრკეს ზეცისათანი და ქუეყანისათანი და ქუესკნელთანი“.<sup>2</sup>

*პური ჩვენი არსობისა მომეც ჩვენ დღეს.* ამ სიტყვებით, უპირველეს ყოვლისა, ღვთისგან ჩვენ ვითხოვთ ზებუნებრივ სულიერ საკვებს, რომელიც ღვთის სიტყვას ნიშნავს. ამის შესახებ ნათქვამია მათეს სახარების მე–4 თავში: „არა პურითა ხოლო ცხოვნდების კაცი, არამედ ყოვლითა სიტყვითა, რომელი გამოვალს პირისაგან ღმრთისა“.

*და მომიტევენ ჩვენ თანანადებნი ჩვენნი, ვითარცა ჩვენ მიუტევებთ თანამდებთა მათ ჩვენთა.* ეს სიტყვები შთაგვაგონებენ, რომ მეტს ვპატიობდეთ

---

ხოლმე ადამიანებს ჩვენ მიმართ ჩადენილ შეცდომებს, რომ ღმერთმაც შეგვინდოს ჩვენი ყოველდღიური ცოდვები, როგორც ნათქვამია ეს მათეს სახარების მე-6 თავში: „უკეთუ მიუტევნეთ თქვენ კაცთა შეცოდებანი მათნი, მოგიტევნეს თქვენცა მამამან თქვენმან ზეცათამან“.

*და ნუ შემიყვანებ ჩვენ განსაცდელსა.* ამ სიტყვებით ჩვენ ვთხოვთ ღმერთს, რომ არ შეგვიყვანოს არც ამ ქვეყნის, არც ეშმაკის და არც ჩვენი ხორცის განსაცდელში, რადგან ეს სამი განსაცდელი მოიცავს ყველა სხვა განსაცდელს. ამიტომ, თუ თავს დავიცავთ ამ სამისაგან, შესაბამისად დაცული ვიქნებით ნებისმიერი სხვა განსაცდელისაგანაც.

*არამედ მიხსენ ჩვენ ბოროტისაგან.* ამ სიტყვებით ჩვენ ვთხოვთ ღმერთს, რომ გვიხსნას ყველანაირი ბოროტებისა და ცოდვისაგან; და განსაკუთრებით, რომ გარდაცვალების ჟამს დაგვიცვას ყველანაირი ბოროტი სულისაგან.

*რამეთუ შენი არს სუფევა, ძალი და დიდება უკუნისამდე. ამინ.* ეს სიტყვები გვარწმუნებს, რომ რამდენჯერაც ვილოცებთ მამა ღმერთზე სუფთა რწმენითა და სასოებით, ყოველჯერზე შეგვისრულებს თხოვნასა და გვიხსნის გაჭირვებისაგან, როგორც ყოვლადმღიერი მეუფე. ასეა ნათქვამი იოანეს სახარების მე-14 თავში: „რაიცა ითხოვოთ სახელითა ჩემითა, იგი ვყო“.

### **რწმენის სიმბოლო, რომელიც იყოფა 12 მუხლად**

*მრწამს ერთი ღმერთი, მამა, ყოვლისა მპყრობელი, შემოქმედი ცათა და ქვეყანისა, ხილულთა ყოველთა და არა ხილულთა.*

ეს მუხლი გვასწავლის, რომ ერთია ღმერთი – მამა, როგორც ნათქვამია ეფესელთა მიმართ ეპისტოლის მე-4 თავში: „ერთ არს და მამაი ყოველთაი, რომელი ყოველთა ზედა არს და ყოველთა მიერ და ჩუენ ყოველთა შორის“. ასევე გვასწავლის, რომ მან შექმნა ყველაფერი, რაც ხილულია და რაც უხილავი, არაფრისგან-- მხოლოდ სიტყვით.

---

და ერთი უფალი იესო ქრისტე, ძე ღვთისა მხოლოდშობილი, მამისაგან შობილი უწინარეს ყოველთა საუკუნეთა. ნათელი ნათლისაგან, ღმერთი ჭეშმარიტი ღვთისაგან ჭეშმარიტისა, შობილი და არა ქმნილი, ერთარსი მამისა, რომლისაგან ყოველი შეიქმნა.

მეორე მუხლი გვასწავლის ვირწმუნოთ, რომ უფალი იესო ქრისტე, ძე ღვთისა, არის ჭეშმარიტი საუკუნო ღმერთი, არა ქმნილი, არც აგებული, არამედ შობილი უწინარეს ყოველთა დროთა, მამის ბუნებიდან და მამასთან ერთად თანასწორად დიდებული, როგორც ნათქვამია ეს იოანეს სახარების მე-17 თავში: „და აწ მაღიდე, მამაო, თავისა შენისა თანა დიდებითა მით, რომელი მაქუნდა წინაშე შენსა უწინარეს სოფლის დაბადებისა“.

ასევე გვასწავლის რწმენას, რომ იესო ქრისტე არის ყველა საგნისა და დროს შემქნელი, როგორც ეს ნათქვამია იოანეს სახარების პირველ თავში: „სოფელი მის მიერ შეიქმნა, და სოფელმან იგი ვერ იცნა“.

*რომელი ჩვენთვის, კაცთათვის და ჩვენისა ცხოვრებისათვის გარდამოხდა ზეცით, და ხორცი შეისხნა სულისაგან წმიდისა და მარიამისაგან ქალწულისა, და განკაცნა.*

მესამე მუხლი გვასწავლის, რომ უფალი ჩვენი იესო ქრისტე გარდამოხდა ზეციდან ჩვენი ცხოვრებისათვის, ჩაისახა სულისაგან წმიდისა ქალწული მარიამის საშობი და იშვა მეტყველი სულით სრულყოფილი ადამიანი კაცობრივი ბუნების ყველა თვისების მქონე (გარდა ცოდვისა), ისე, რომ არც ღვთაებრიობა შეიცვალა კაცობრიობაში და არც კაცობრიობა ღვთაებრიობაში, არამედ ორივე ბუნება შეერთებულად სრულყოფილად შენარჩუნდა: ღმერთი სრული და კაცი სრული.

*და ჯვარს ეცვა ჩვენთვის პონტოელისა პილატეს-ზე, და ივნო, და დაეფლა.*

ეს მუხლი გვასწავლის, რომ უფალი ჩვენი იესო ქრისტე ჯვარზე ეცვა პილატეს მიერ (რომელიც იყო პონტოდან), დასთხია თავისი ყოვლადპატიოსანი სისხლი ჯვარზე, რომ გვიხსნას ცოდვის მონობისაგან;

---

უცოდველი ივნო, მაგრამ არა ღვთაებრიობით, არამედ კაცობრიობით. და როგორც ჭეშმარიტად ივნო ჯვარზე, ასევე ჭეშმარიტად მოკვდა, როგორც ეს ნათქვამია ლუკას სახარების 23-ე თავში: „და ხმა-ყო ხმითა დიდითა იესო და თქუა: მამაო, ხელთა შენთა შევჰვედრებ სულსა ჩემსა. და ესე რაი თქუა, განუტევა სული“. ხოლო, დამარხვის შემდეგ მისი საფლავი დაბეჭდეს, როგორც ნათქვამია მათეს სახარების 27-ე თავში: „ჰრქუა მათ პილატე: გაქუს თქუენ დასი; წარვედით და დაჰკრძალეთ, ვითარცა იცით. ხოლო იგინი წარვიდეს და დაჰკრძალეს საფლავი იგი და დაჰბეჭდეს ლოდსა მას დასისა თანა“.

*და აღსდგა მესამესა დღესა მსგავსად წერილისა.*

ამ მუხლიდან ვსწავლობთ, რომ უფალი ჩვენი იესო ქრისტე მისი ღვთაებრიობის ძალით აღსდგა მკვდრეთით იმავე სხეულით, რომლითაც იშვა და დაიმარხა *წერილისამებრ*; ანუ როგორც ეს იყო ნაწინასწარმეტყველები ძველი აღთქმის *წმინდა წერიში* და როგორც თავად იესო ქრისტე ამბობდა მარკოზის სახარების მე-17 თავში: “მე სამე კაცისაი წარვალს, ვითარცა წერილ არს მისთვის“.

*და ამაღლდა ზეცად, და მჯდომარე არს მარჯვენით მამისა.*

ეს მუხლი გვასწავლის, რომ იესო ქრისტე იმ სხეულით, რომლითაც იშვა, დაიმარხა და მკვდრეთით აღსდგა, ამაღლდა ზეცად და დაჯდა მარჯვენით მამისა, როგორც ნათქვამია ეს მარკოზის სახარების მე-16 თავში: „ხოლო უფალი შემდგომად სიტყუათა ამათ მათდა მიმართ ამაღლდა ზეცად და დაჯდა მარჯუენით ღმრთისა“.

*და კვალად მომავალ-არს დიდებით, განსჯად ცხოველთა და მკვდართა, რომლისა სუფევისა არა არს დასასრულ.*

აქედან ვსწავლობთ, რომ იესო ქრისტე მეორედაც მოვა, რომ განსაჯოს ცოცხლებიცა და მიცვალებულებიც, რომ თითოეულს აუნაზღაუროს მისი ქმედებების მიხედვით, როგორც თავად მაცხოვარი ამბობს ამას მათეს

---

სახარების 25-ე თავში: „ხოლო [რაჟამს] მოვიდეს მე კაცისაი დიდებითა თვისითა, და ყოველნი ანგელოზნი მისნი მის თანა“. ასევე იოანეს სახარების მე-5 თავში ნათქვამია: „და გამოვიდოდინ კეთილის-მოქმედნი აღდგომასა ცხორებისასა, ხოლო ბოროტის-მოქმედნი აღდგომასა სასჯელისასა“.

*და სული წმიდა, უფალი და ცხოველს-მყოფელი, რომელი მამისაგან გამოვალს, მამისა თანა და ძისა თანა თაყვანის-იცემების და იდიდების, რომელი იტყოდა წინასწარმეტყველთა მიერ.*

ეს მუხლი გვასწავლის, რომ სული წმიდისაც უნდა გვწამდეს, რომ ის თანაარსია მამისა და ძისა, და რომ ის იდიდება მამასთან და ძესთან ერთად. და რომ ის მამისაგან გამოვალს, როგორც ამას მოწმობს თავად მაცხოვარი ჩვენი იესო ქრისტე იოანეს სახარების მე-15 თავში: „ხოლო რაჟამს მოვიდეს ნუგეშინიმცემელი იგი, რომელი მე მოვავლინო თქუენდა მამისა ჩემისა მიერ, სული ჭეშმარიტებისაი, რომელი მამისაგან გამოვალს“. ასევე ეს მუხლი გვასწავლის, რომ სული წმიდა იყო ის, ვინც მეტყველებდა წინასწარმეტყველების მიერ.

*ერთი, წმიდა, კათოლიკე და სამოციქულო ეკლესია.*

ეს მუხლი გვასწავლის, რომ უნდა ვემორჩილებოდეთ საყოველთაო და სამოციქულო ეკლესიის დადგენილებებს, როგორც გვასწავლის ამას თავად იესო ქრისტე მათეს სახარების მე-18 თავში: „ხოლო უკეთუ კრებულისაიცა არა ისმინოს, იყავნ იგი შენდა, ვითარცა მეზუერე და წარმართი“

*აღვიარებ ერთსა ნათლისღებასა მოსატევებელად ცოდვათა.*

ეს მუხლი გვასწავლის, რომ უნდა ვაღიარებდეთ ერთ ნათლობას ცოდვების მოსატევებელად, ანუ ჩვენ ქრისტიანები უნდა ვინათლებოდეთ სახელითა მამისა და ძისა და სულისა წმიდისა, წყლითა და სულით, რომ მოგვეტეოს თავდაპირველი და სხვა ცოდვები, როგორც ამას ამბობს თავად მაცხოვარი იესო ქრისტე იოანეს სახარების მე-3 თავში: „უკეთუ ვინმე არა იშვეს

---

წყლისაგან და სულისა, ვერ ხელ-ეწიფების შესვლად სასუფეველსა ღმრთისასა“.

*მოველი აღდგომასა მკვდრებით.*

ეს მუხლი გვასწავლის, რომ ჭეშმარიტად იქნება ადამიანების ხორციით აღდგომა იოანეს სახარების მე-5 თავში მაცხოვრის ნათქვამი სიტყვებისამებრ: „მოვალს ჟამი, და აწვე არს, ოდეს მკუდართა ისმინენ სიტყუანი მისა ღმრთისანი; და რომელთა ისმინენ, ცხონდნენ“.

*და ცხოვრებასა მერმისა მის საუკუნესასა. ამინ.*

ეს მუხლი გვასწავლის, რომ მომავალში ღვთის კურთხევა იქნება მის რჩეულებზე და მათ ექნებათ სულიერი სიხარულით სავსე დაუსრულებელი და მარადიული ცხოვრება, როგორც ამას მოწმობს *წმიდა წერილი* კორინთელთა მიმართ პირველი ეპისტოლეს 2-ე თავში: „რომელი თუალმან არა იხილა, და ყურსა არა ესმა, და გულსა კაცისასა არა მოუხდა, რომელი განუმზადა ღმერთმან მოყუარეთა თვისთა“.

### **წმინდა ეკლესიის შვიდი საიდუმლო**

1. წმინდა ნათლისღება. – 2. მირონცხება. – 3. ევქარისტია. – 4. მღვდლობა. – 5. აღსარება, ანუ სინანული. – 6. სჯულიერი ქორწინება. – 7. ზეთის კურთხევა.

### **რა ძალა და მადლი აქვს ამ შვიდ საიდუმლოს**

ნათლისღება არის საფუძველი ყველა დანარჩენი საიდუმლოსი და პირველია შესრულების რიგში. ამ საიდუმლოს აქვს დიდი მადლი და ძალა და ნათლისღების გარდა არც ერთ სხვა საიდუმლოს არ შეუძლია ადამიანი გახადოს ქრისტიანი. ნათლისღება დააწესა თავად უფალმა იესო ქრისტემ, როდესაც უბრძანა თავის მოციქულებს მისი შესრულება, როგორც ეს არის ნაჩვენები მათეს სახარების 28-ე თავში: „წარვედით და მოიმოწაფენით



---

ყოველნი წარმართნი და ნათელ–სცემდით მათ სახელითა მამისაითა და ძისაითა და სულისა წმიდისაითა, და ასწავებდით მათ დამარხვად, ყოველი, რაოდენი გამცენ თქუნ“. ამ საიდუმლოს, ასევე, როგორც დანარჩენ ექვს საიდუმლოს აქვს ოთხი მიზეზი.

პირველი არის მოქმედების მიზეზი. მეორე არის მატერია. მესამე არის ფორმა და მეოთხე არის შესრულების მიზეზი.

წმინდა ნათლისღების, ისევე როგორც ყველა დანარჩენი საიდუმლოს, მოქმედების მიზეზი არის ღმერთი, რომელიც მღვდლის მეშვეობით საღვთო მადლით მოქმედებს საიდუმლოში.

მატერია არის სუფთა, ყველანაირი შენარევების გარეშე წყალი.

ფორმა არის წმიდა სამების მოხმობა, როგორც ეს უკვე ზემოთ ითქვა, ანუ: ნათელ იღებს მონა ღვთისა სახელითა მამისათა და ძისათა და სულისა წმიდისათა. ამინ.

შესრულების მიზეზი არის თავდაპირველი ცოდვის და [დაცემული] კაცობრივი ნების წაშლა და რომ ნათელღებული ადამიანი გახდეს ნეტარი, სრულყოფილად წმინდა, ცოცხალი და მადლისმიერი ძე ღვთისა.

### **წმინდა მირონცხებისათვის.**

ნათლისღების შესრულებას მოყვება მირონცხება, როდესაც მღვდელი ახალ მონათლულს სცხებს წმინდა მირონს. მირონის მასალა არის ზეთი სხვა მრავალრიცხოვან სურნელოვან მატერიებთან ერთად. ფორმა არის სიტყვები და ლოცვები, რომლებსაც [მირონის კურთხევისას] ამბობს მღვდელმთავარი და მხოლოდ მღვდელმთავარს შეუძლია მისი კურთხევა, ამის შემდეგ უკვე მღვდლის მიერ ნათელღებულ ადამიანს ეცხება მირონი სიტყვების წარმოთქმით: ბეჭედი მადლისა სულისა წმიდისა. ამინ. და დასასრული არის ქრისტიანის გამტკიცება რწმენაში და ბოროტის წინამდღევ ძალის მიღება.

---

## სადეთო ევქარისტის საიდუმლო

ევქარისტის საიდუმლოში ხდება პურისა და ღვინის გადაქცევა ქრისტეს სისხლად და ხორცად. ამ საიდუმლოს მატერია არის სუფთა ხორბლის პური, სუფთა ღვინო და სუფთა წყალი. მღვდლის მიერ მაცხოვრის სიტყვების წარმოთქმისას აღესრულება ამ საიდუმლოს ეპიკლეზისი: "და ჰყავ უკვე პური ესე პატიოსან ხორც ქრისტეს შენისა. ამინ. ხოლო ბარძიმსა ამას შინა, პატიოსან სისხლ ქრისტეს შენისა. ამინ. შესცვალე სულითა შენითა წმიდითა. ამინ". მიზანი ევქარისტის საიდუმლოსი არის ღვთის ტარიგის შეწირვა კაცობრიობის ცხოვნებისათვის.

## მღვდლობის საიდუმლო

მღვდლობა არის მაცხოვარი იესო ქრისტეს მიერ დაწესებული საღმრთო საიდუმლო, რომელშიდაც ადამიანთა მეშვეობით მოქმედებს ადამიანთა მაცხოვრებელი საღმრთო მადლი. ამ საიდუმლოს მატერია არის ის, ვინც ღებულობს ხელდასხმას, ხოლო ეპიკლეზისი აღესრულება მღვდელმთავრის სიტყვებით: "საღმრთო მადლი, უძღურთა ყოველთა მკურნალი და ნაკლულევანთა აღმავსებელი, ხელდასხმულ-ჰყოფს (და დანარჩენი)" და სამღვდლოდ გამზადებული ადამიანისათვის თავზე ხელების დადებით.

საიდუმლოს მიზანი არის ხელდასმულ ადამიანთა სულში ისეთი საღმრთო მადლისა და ძალის აღბეჭდვა, რომ მან შეძლოს საიდუმლოებების შესრულება. მღვდლობის საიდუმლოს შესრულება შეუძლია მხოლოდ მღვდელმთავარს.

## აღსარების ანუ სინანულის საიდუმლო

სინანული არის ღვაწლით, მოშურნეობითა და თვისუფალი ნებით ადამიანის მობრუნება ბოროტებიდან სიკეთისაკენ და ეშმაკიდან ღვთისაკენ.

---

სინანულის საიდუმლოს მატერია არის აღსარება ზაგით, გულის შემუსვრა და კანონის შესრულება. ამ საიდუმლოს ეპიკლეზისი<sup>2</sup> არის ის ძალა, რომელიც მაცხოვარმა მხოლოდ თავის მოწაფეებსა და მოციქულებს მისცა, როგორც ეს არის ნათქვამი, მათეს სახარების მე-8 თავში. "რაოდენი შეჰკრავთ ქუეყანასა ზედა, კრული იყოს იგი ცათა შინა; და რაოდენი გაჰხსნათ ქუეყანასა ზედა ხსნილ იყოს იგი ცათა შინა". და სხვა. [ამ საიდუმლოს შესახებ დაწვრილებით ვისაუბრებთ. აღსარების შესახებ სწავლებაში]. ხოლო ამ საიდუმლოს მიზანი არის ადამიანის განწმედა ცოდვებისაგან და ღვთის მადლის ხელახლა მიღება.

### **სჯულისმიერი ქორწინების საიდუმლო**

ქორწინება არის მამაკაცისა და დედაკაცის შეერთება, რათა აღსრულდეს ღვთის სიტყვები: "გამრავლდით და აღორძინდით".

ამ საიდუმლოს მატერიას წარმოადგენენ მამაკაცი და დედაკაცი, რომლებიც მოდიან მტკიცე გადაწყვეტილებით იცხოვრონ ერთად განუშორებლად. ამ საიდუმლოს ეპიკლეზისი სრულდება მაშინ, როდესაც მეფე-პატარძალი ერთმანეთს ეუბნება: „გინდივარ მეუღლე?“ და პასუხი: „მინდიხარ!“ ქორწინების საიდუმლოს სრული აღსრულებისათვის, ამ სიტყვების შემდეგ მღვდელი კითხულობს შესაბამის ლოცვებსა და კურთხევებს. მიზანი ამ საიდუმლოსი არის კაცობრიობის გამრავლება და ხორციელი სურვილის დაცხრომა, როგორც ამას ამბობს პავლე მოციქული კორინთელთა მიმართ I ეპისტოლეს მე-7 თავში: "ხოლო სიძვისათვის, კაცად-კაცადსა თვისი ცოლი ესვინ, და თითოეულსა თვისი ქმარი ესვინ" (კორ. I. 7:2).

### **ზეთის კურთხევის საიდუმლო**

ზეთის კურთხევის საიდუმლო არის ავადმყოფებზე სუფთა ზეთის ცხება, რომელსაც მღვდლის კურთხევის შედეგად აქვს ძალა ცოდვებისგან მობრუნებულ ადამიანებს მიანიჭონ სულიერი და ხორციელი ჯანმრთელობა,

---

როგორც ეს ნათქვამია იაკობ მოციქულის კათოლიკე ეპისტოლეს მე-5 თავში: "უძლურ თუ ვინმე არს თქუენ შორის, მოუწოდენ ხუცესთა ეკლესიისათა და ილოცონ მის ზედა და სცხონ მას ზეთი, სახელითა უფლისაითა და ლოცვამან სარწმუნოებისამან აცხოვნოს სნეული იგი და ადადგინოს იგი უფალმა დაღაცათუ ცოდვაი რამე ექმნეს, მოეტეოს მას" (იაკობ. V: 14-15).

ამ საიდუმლოს მატერია არის სუფთა ზეთი, ეპიკლეზისი სრულდება მღვდლის მიერ წარმოთქმული ლოცვით: "შენ, მეუფეო, განსწმიდე ზეთი ესე, რათა იქმნეს, რომელთა იცხონ ამისგან, საკურნებელად (და დანარჩენი)". ხოლო საიდუმლოს მიზანი არის დარჩენილი ცოდვების შენდობა და ავადმყოფისათვის სულიერი და ხორციელი ჯანმრთელობის მოპოვება.

### **ეკლესიის ცხრა დიდი მცნება**

1. გვმართებს გულის შემუსვრითა და თავმდაბლობით ვილოცოთ ღმრთის მიმართ.
2. დავიცვათ დადგენილი ოთხი მარხვა: ქრისტეს შობის, აღდგომის, მოციქულებისა და ყოვლადწმიდა ღვთისმშობლის.
3. პატივს უნდა ვცემდეთ სულიერ მოძღვრებს, რომელნიც, როგორც ღვთის მსახურნი ლოცულობენ ღვთის წინაშე ჩვენთვის და ასევე მათ რჩევებს უნდა ვეკითხებოდეთ სულიერ საკითხებთან დაკავშირებით.
4. ქრისტიანული სჯულის მიხედვით ხელდასხმულ სულიერ მოძღვართან წელიწადში ოთხჯერ დიდი მარხვების დროს უნდა ვთქვათ ხოლმე აღსარება. ხოლო თქვენ შორის უფრო ღვთისმოსავებმა აღსარება ჩააბარონ წელიწადში თორმეტჯერ, ხოლო ყველაზე დაუდევრებმა წელიწადში ერთხელ მაინც.

ავადმყოფებმა აღსარება თქვან უფრო ხშირად, შვიდგზის ზეთისცხებაც მიიღონ ხოლმე და ხშირად ეზიარონ. და ასე დაიმკვიდრებენ მარადიულ ცხოვრებას.

---

5. არ წაიკითხოთ მწვალებელთა ღვთისმგმობელი წიგნები, მოძღვრებანი და სწავლანი. არ მოუსმინოთ წმინდა წერილის უცოდინრებს, გაუნათლებლებს: არც იმეგობროთ და არც ესაუბროთ მათ.

6. ილოცეთ ყველა ადამიანის განსამტკიცებლად: პირველად-სამღვდელო დასისათვის და ტაძრის სხვა მსახურებისათვის; მეორედ-მთავრობისა და მხედრობისათვის;

შემდგომ ეკლესიის კეთილისმყოფელთა და შემომწირველთათვის და ჭემმარიტი, საყოველთაო სარწმუნოების განმტკიცებისათვის.

7. უნდა შესრულდეს მღვდელმთავრის მიერ მისი ეპარქიისთვის ნაბრძანები ყველა მარხვა და ღოცვა, რომ უბედურების ჟამს ერს მოსცილდეს ღვთის რისხვა და ხალხი გადაურჩეს ნებისმიერ გაჭირვებასა და ძნელბედობას.

8. ერისკაცთათვის აკრძალულია ეკლესიიდან თვითნებურად და ძალმომრეობით რაიმეს წაღება და გამოყენება; მხოლოდ მღვდლებსა და ეკლესიის მსახურებს აქვთ უფლება ეკლესიიდან მიიღონ სარჩო და მოწყალება და გასცენ გაჭირვებულებზე და უცხოებზე.

9. ეკლესიის მიერ აკრძალულ დღეებში არ გაიმართოს ქორწილები და ქრისტიანებს ამ დღეებში არ მართებთ ცეკვა-გართობა, როგორც ამას წარმართები აკეთებენ, არამედ შეძლებისდაგვარად მაქსიმალურად თავი შეიკავონ ამგვარი საქციელებისაგან.

### **ღვთის ათი მცნება, მეორე სჯულთა წიგნის მე-5 თავი**

1. არ გყავდეს სხვა ღმერთი თვინიერ უფლისა ჩვენისა.
2. არ ამოვიღოთ სახელი უფლისა ამასა ზედა.
3. აღვნიშნოთ და დავიცვათ [საეკლესიო] დღესასწაულები.
4. პატივს მივაგებდეთ ჩვენს მშობლებს.

- 
5. არ მოვკლათ.
  6. არ ვიმრუშოთ.
  7. არ მოვიპაროთ.
  8. ცილი არ ვწამოთ.
  9. არ მოვისურვოთ სხვისი ცოლი.
  10. არ მოვისურვოთ სხვისი ქონება.

### სულიწმიდის შვიდი ნიჭი, ისაია, 11:2

1. სული სიბრძნისა, 2. სული გონიერებისა, 3. სული მეცნიერებისა, 4. სული ზრახვისა, 5. სული კეთილმსახურებისა, 6. სული სიმამაცისა, 7. სული ღვთის შიშისა.

### ღვთისმეტყველების სამი სათნოება. 1. კორ. 13:13

1. რწმენა, 2. სასოება, 3. სიყვარული

რწმენა, როგორც ამბობს პავლე მოციქული, ებრაელთა მიმართ ეპისტოლეს მე-11 თავში, არის "მოსავთა მათ ძალ, საქმეთა მამხილებლად არა - ხილულთა".

სასოება არის ღვთის მიმართ ჭეშმარიტი გამბედაობა, რომელიც ღვთისაგან აქვს ნაზოდები ადამიანის გულს, რომ არასდროს არ დაკარგოს ღვთის მადლის იმედი, არამედ იყოს დარწმუნებული, რომ სინანულით მიიღებს ცოდვათა შენდობას და რომ ღმერთი შეუსრულებს ამქვეყნიურ ან მარადიულ თხოვნებს.

---

სიყვარული, როგორც პავლე მოციქული ამბობს, არის უფრო მეტი, ვიდრე რწმენა და ვიდრე სასოება. სიყვარული არის ყველა სათნოების დასაბამი და მწვერვალი, რომელიც ყველას აერთიანებს და ღვთის გზაზე მიუძღვის.

### **სულის ოთხი სათნოება**

1. სიმამაცე, 2. სიბრძნე, 3. სამართლიანობა და 4. სიწმინდე.

### **შვიდი მომაკვდინებელი ცოდვა**

1. ამპარტავნება, 2. ვერცხლისმოყვარეობა, 3. სიძვა, 4. მრისხანება, 5. ნაყროვანება, 6. შური, 7. მცონარება კეთილი საქმეებისა მიმართ.

### **მათი საწინააღმდეგო შვიდი სათნოება.**

1. თავმდაბლობა, 2. მოწყალება, 3. უმანკოება, 4. სიმშვიდე, 5. მარხვა, 6. სიყვარული, 7. ღვაწლი.

### **მოწყალების თორმეტი ნაყოფი, როგორც ეს წერია მათეს სახარების მე-15 თავში**

მშვიერი დააპურე. მწყურვალს დააღვინე. უცხო მიიღე შენს სახლში. შიშველი შემოსე. ავადმყოფს მოუარე. პატიმარი შეიწყალე.

კიდევ ესენიც არსებობენ: მიცვალებულები დაასაფლავე. მწუხარენი ანუგეშე. სულის მაცხოვრებელი რჩევები მიეცი. ასწავლე უმეცართ. დამნაშავეთ შეუნდე. მაღლიერებით მოითმინე ყველა განსაცდელი, რომელიც გემართება ღვთისგან თუ ადამიანებისგან და ილოცე ღვთის წინაშე არა მხოლოდ შენთვის, არამედ ყველასათვის."

### **სხვა საჭირბოროტო სწავლებანი**

---

1. ნებისმიერი მღვდელი, რომელიც თავისი სამრევლოს საზღვრებს გარეთ თუ ჩაატარებს წირვას, სახლის კურთხევას, ჯვრისწერას ან ჩაიბარებს აღსარებას, ან აზიარებს ვინმეს, ან მიცვალებულს აუგებს წესს, ან ჩაატარებს ნებისმიერ სხვა საეკლესიო წესს ადგილობრივი სამრევლოს მღვდლის ნებართვის გარეშე - ასეთი მღვდელი, წმინდა მამების კანონების მიხედვით, უნდა განიკვეთოს და ჩვენც მას განვკვეთოთ.

2. ასევე არც ერთმა თქვენგანმა არ გაბედოს ჯვარი დაწეროს სხვა ქვეყნიდან ჩამოსულ უცხო მამაკაცს ან უცხო დედაკაცს, ან ამ ქვეყანაში მცხოვრებ, მაგრამ უცნობ მამაკაცს ან უცნობ დედაკაცს, სანამ კარგად არ გამოიკვლევთ მათ შესახებ. რადგან ბევრი ჩამოდის აქ, ზოგი უნგრეთიდან და ზოგი თურქეთიდან ან სხვა შორეული ქვეყნებიდან და აქ ქორწინდებიან. არადა თავიანთ ქვეყნებში მამაკაცებს ჰყავთ ცოლები ან ქალებს - ქმრები, რომლებიც მიატოვეს და გამოიქცნენ აქ; ან უკვე არიან მესამეჯერ ჯვარდაწერილები და ჩამოვიდნენ აქ, რომ მოიყვანონ მეოთხე ცოლი ან ქალი რომ გაყვეს მეოთხე ქმარს, რაც არის მრუშობა და უსჯულო საქმე.

ასეთ ხალხს ჯვარი არ დაწეროთ, თუ თან არ ექნებათ, საიდანაც წამოვიდნენ იქაური მღვდლის წერილი, სადაც ეწერება, რომ არ არიან ქორწინებაში, ან რომ იყო ქორწინებაში და ამჟამად ქვრივია, ან რომ ეს იქნება მეორე ქორწინება და შესაბამისად შეუძლია ახალი ცოლის მოყვანა. ეს იმიტომ, რომ არ მოხდეს უსჯულო საქმე, როგორც ბევრჯერ მომხდარა და ამიტომაც გადავწყვიტეთ ასე.

3. მაგრამ თუ შეუძლებელი იქნება, რომ წერილი მოიტანონ იმ ადგილის მღვდლისაგან, საიდანაც ჩამოვიდნენ, ამ შემთხვევაში, უპირველეს ყოვლისა, თითოეული მათგანი დააფიცეთ და თუ დაიფიცებენ, რომ თავიანთ ქვეყნებში მამაკაცს არ ჰყავს ცოლი და დედაკაცს არ ჰყავს ქმარი, ან რომ ჰყავდათ ადრე ერთი ან ორი მეუღლე, მაგრამ ორივე გარდაეცვალა და იმ შემთხვევაში თუ მათი ფიცით დამტკიცდება, რომ ახლა ესენი პირველად, მეორედ ან მესამედ ქორწინდებიან, მხოლოდ ამ შემთხვევაში დაწერეთ ჯვარი. მაგრამ თუ



---

რომელიმესათვის იქნება მეოთხე ქორწინება, არც ერთ შემთხვევაში ჯვარი არ დაწეროთ.

4. ასევე გიბრძანებთ მღვდლებს, რომ არც ერთმა თქვენგანმა არ გაბედოს განაქორწინოს ქმარი ცოლისაგან ან ცოლი ქმრისაგან და არც შეეკრათ მათ მსგავს უსჯულოებაში, რადგან გავიგე, რომ მსგავსი უღირსი საქმე კეთდება ბევრ ადგილას; რადგან ჩამოვარდება რა მტრობა ქალსა და მამაკაცს შორის, მაშინვე მიდიან ხოლმე ან მხარის მმართველთან, ან ხელისუფლების სხვა წარმომადგენელთან, ან სოფლის მღვდელთან, ან ბატონთან და წერილობით განქორწინდებიან კიდევაც, რაც არარისტიანული საქმეა, რომელსაც წარმართებიც კი არ სჩადიან ხოლმე. რადგან ნათქვამია: რაც ღმერთმა შეაერთა, კაცი ნუ განაშორებს. და თუ იქნება მართლა ვინმე განსაქორწინებელი, გამოგზავნეთ აქ მღვდელმთავართან, რომ განქორწინება მოხდეს სჯულის კანონის მიხედვით.

5. არც ერთმა მღვდელმა, რომელსაც არ ექნება ნება მიცემული თავისი მღვდელმთავრისაგან, არ გაბედოს და ხალხისაგან არ დაიწყოს აღსარებების მიღება (თუ ვინმე არ აღმოჩნდება სიკვდილის საშიშროების წინ). გაგვიგია, რომ ბევრი მღვდელი შემოსავლის მიღების მიზნით, ნებართვის გარეშე, იწყებს აღსარებების მიღებას.

6. ასევე მათ, ვისაც აქვთ აღსარების მიღების ან ნებისმიერი სხვა შვიდთაგანი საიდუმლოების შესრულების უფლება, არ გაყიდონ სიწმინდე და მადლი ამ საიდუმლოებებში სარგებლის მიღებით. რადგან ეს იუდას საქმეს ემსგავსება და გაგვიგია, რომ ამას ბევრი სჩადის. როდესაც ეძახიან ხოლმე ავადმყოფის საზიარებლად, ან ავადმყოფი ბავშვის სასწრაფოდ მოსანათლად ზოგიერთ მღვდელს არ უნდა ხოლმე წასვლა, ეზარება, ითხოვენ დიდ თანხას და იგონებენ ბევრ მიზეზს ადგილის სიშორისა ან თითქოს დროის უქონლობის გამო.

---

7. თითოეულმა მღვდელმა თავის სამრევლოში დაარიგოს თავის მორჩილებაში მყოფი მორწმუნეები, რომ მთელი წლის განმავლობაში ყველა კვირა დღეს, ყველა საუფლო და ღვთისმშობლის დღესასწაულებზე და ყველა დიდი წმინდანის ხსენების დღეს მოვიდნენ ხოლმე ეკლესიაში სადამოს მწუხრზე, დილით ცისკარზე და განსაკუთრებით წირვაზე, რადგან ესენია ყველაზე მაღლიანი, ვიდრე სხვა ნებისმიერი ღვთისმსახურება თუ ლოცვა.

და ასეთ დღეებში არც იშრომონ, არც იყიდონ და გაყიდონ რამე გარდა საკვებისა, რადგან ამ დღეებში შრომა არის აკრძალული და შეჩვენებული. ხოლო მარხვების დროს თქვან ხოლმე აღსარება და ეზიარონ [ქრისტეს სისხლსა და ხორცს საეკლესიო] წესის მიხედვით.

და ნებისმიერ თქვენგანს თუ ეყოლება სახლში ავადმყოფი ადამიანი, არ გადადოს მისი ზიარება გარდაცვალების საათამდე, როდესაც ავადმყოფს აღარ შეუძლება ლაპარაკი, არამედ დროზე, სანამ საღ გონებაზე იქნება, დაუძახეთ მღვდელს, რომ ჩაიბაროს აღსარება და აზიაროს. და თუ რომელიმე თქვენგანი არ იზრუნებს ამაზე და აზიარებთ ავადმყოფს, რომელსაც აღარ შეუძლება აღსარების თქმა, გარდა იმ შემთხვევისა თუ სიკვდილის ჟამი არ მოუწია უცაბედად, რაც ზოგიერთს ემართება, ასეთ შემთხვევაში გეწევთ ღვთის სასჯელი და მღვდლობისგანაც განიკვეთებით.

8. არც ერთმა მღვდელმა არ გაბედოს და ადგილობრივი მღვდელმთავრის კურთხევის გარეშე, არ გადავიდეს სხვა სამრევლოში, რადგან ნებისმიერი მსახურება, რომელსაც იგი ჩაატარებს, იქნება უმაღლო და მღვდელიც დაისჯება.

9. თითოეული თქვენგანი და განსაკუთრებით მთავარხუცესები, იყავით ხოლმე ყურადღებით, რადგან სოფელ-სოფელ დადიან ხოლმე თვითმარქვია მღვდლები და ბერები, ატარებენ სამღვდლო მსახურებებს და ატყუებენ მორწმუნეებს. ასეთები გამოგზავნეთ ხოლმე ჩვენთან, რომ ჩვენ გავარკვიოთ

---

არიან თუ არა ნამდვილი მღვდლები. მოკლედ რომ ვთქვათ, არ მიიღოთ არც ერთი უცხო მღვდელი, თუ ჩვენგან არ ექნება წერილობითი ნებართვა.

### **რა მიზეზებით შეუძლია ნებისმიერ მღვდელს ჩაატაროს მსახურება სხვის სამრევლოში**

1. თუ ვინმე აღმოჩნდება სიკვდილის საშიშროების წინაშე და იმ სოფლის მღვდელი არ აღმოჩნდება ადგილზე, იქნება წასული სადმე შორს, ან თვითონვე იქნება ავად, მაშინ სიკვდილის მოახლოების საშიშროების გამო, უახლოესი მეზობელი სამრევლოს მღვდელს ჰქონდეს უფლება, მივიდეს, ჩაიბაროს აღსარება, აზიაროს და თუ ის ავადმყოფი გარდაიცვლება, წესი აუგოს კიდევაც, რომ არ მოხდეს ისე, რომ ვინმე წავიდეს ამქვეყნიდან სულიერი მომზადების გარეშე, როგორც ეს ქრისტიან ადამიანს შეშვენის. იგივე წესი ძალაშია გადაუდებელი ნათლობის შემთხვევაშიც.

2. ასევე იმ მიზეზით, რომ ვინმეს მოულოდნელად არ მოუწიოს გარდაცვალების ჟამი, ყველა მღვდელმა, როდესაც დააპირებს თავისი სამრევლოდან წასვლას რაღაცა დროით, შეატყობინოს ხოლმე მეზობელი სამრევლოების მღვდელმსახურებს, რომ საჭიროების შემთხვევაში, მისი არყოფნის დროს, მოვიდნენ მის სამრევლოში და მომაკვდავი ავადმყოფისაგან ჩაიბარონ აღსარება და აზიარონ.

3. სამრევლოში ადგილობრივი მღვდლის არყოფნის ჟამს, თუ დაუძახებენ მეზობელი სამრევლოს მღვდელს მძიმე ავადმყოფის აღსარებისათვის და ზიარებისათვის და ის უარს იტყვის იმ მიზეზით, მაგალითად, რომ არ სცალია, რომ ადგილობრივ მღვდელთან აქვს მტრობა და მოხდება ისე, რომ ის ავადმყოფი გარდაიცვლება მოუმზადებელი, მაშინ ის სასულიერო პირი სრულად დაკარგავს მღვდლობას, რადგან დასაღუპად მიატოვა ადამიანი – ადამიანი, რომლის ცხონებისთვისაც თავად ღმერთი განკაცდა და ჯვარზე ეწამა.

---

4. ასევე იმის გამო, რომ ბევრი ადამიანი გარკვეული საჭიროებების გამო, მოგზაურობს ხოლმე სხვა სოფლებში და მხარეებში, გიბრძანებთ შემდეგს: სადაც არ უნდა იმყოფებოდეს ადამიანი, არ აქვს მნიშვნელობა, იქნება ის სიკვდილის პირას, თუ არა და მოისურვებს აღსარების თქმას და ზიარებას მანამ, სანამ დაბრუნდება თავის მშობლიურ მხარეში, აუცილებლად ჩაიბარეთ ასეთი ადამიანის აღსარება და აზიარეთ, რადგან ეს ორი რამ აუცილებელია ყოველი ქრისტიანისათვის. ხოლო თუ ასეთი, უცხო მხარეებიდან ჩამოსული ადამიანი, მოისურვებს დაქორწინებას, ჯვარს ნუ დაწერთ, სანამ არ ჩატარდება გამოძიება: ხომ არ არიან მექორწინები სისხლით ახლო ნათესავები, ან ადგილი ხომ არ აქვს სხვა რამე დამაბრკოლებელ მიზეზს, რომელშიც ჩვენ ზემოთ აღვნიშნეთ. რადგან აღსარების და ზიარების გარეშე ადამიანი ვერ ცხონდება, ხოლო ქორწინების გარეშე ადამიანის ცხონება შესაძლებელია.

5. ასევე გიბრძანებთ, რომ აღარ დართოთ ნება და აღარ ხდებოდეს ჯვარზე დაფიცებით დაძმობილება. რადგან ბევრი უღირსი საქმე კეთდება ხოლმე ასეთი ძმობის მეშვეობით. ხოლო თუ რომელიმე მღვდელი გაბედავს და შეკრავს ასეთ ძმობას, დაისჯება თვითონაც და ის დაძმობილებიც, როგორც ეს ნაბრძანებია სჯულისკანონში - 198 გვერდზე, 210 თავში.

6. ასევე გაფრთხილებთ ბოშებთან დაკავშირებით, რომ ამას იქეთ აღარ ხდებოდეს ის, რაც აქამდე ხდებოდა ხოლმე მათ შორის; ანუ თუ ქორწინების მიზნით მოვლენ თქვენთან ბოშა მამაკაცი და დედაკაცი, სანამ დაწვრილებით და მთელი გულდასმით არ გამოიძიებთ, ხომ არ გააჩნიათ ქორწინებისათვის რაიმე დამაბრკოლებელი მიზეზი, როგორც ეს ეხება ყველა ქრისტიანის შემთხვევაში, მანამდე ჯვარს ნუ დაწერთ.

განსაკუთრებით, თუ ჯვარდასაწერი ბოშები იქნებიან სხვადასხვა ბატონის მფლობელობაში, სანამ თითოეული მათგანი არ მოიტანს თავისი ბატონისგან ქორწინების თანხმობის წერილს, და სანამ ორივე მხარე არ შეთანხმდება, რა პირობით აქორწინებენ ამ წყვილს, ქვეყნის ტრადიციის მიხედვით, სული

---

სულზე გაცვლით ან ერთ–ერთის ფულით გამოსყიდვით, მანამდე ჯვარს ნუ დაწერთ. არც ერთ შემთხვევაში: არც ძალადობის და არც დაშინების შემთხვევაში.

და ის ნებართვის წერილი, ყოველი შემთხვევისათვის, საგულდაგულოდ შეინახეთ. ისე არ მოხდეს, რომ დაქორწინებული ბოშების რომელიმე ბატონმა აღარ დაიცვას თავისი სიტყვა და მტრობის და ბოღმის მიზეზით, მოინდომებს მათი დაშორება, მაშინ თქვენ გქონდეთ პასუხის გასაცემი საბუთი, სხვა შემთხვევაში გეწევთ ღვთის სასჯელი. რადგანაც ბოშებიც არიან ქრისტიანები და მონათლულები წმინდა სამების სახელით. ასევე გვაქვს ვალდებულება, ყველა საშუალების გამოყენებით, ბოშები დავაყენოთ ქრისტიანობის გზაზე. ხოლო თუ არ ვასწავლით მათ, რაც არის აუცილებელი, ყველანი პასუხს ვაგებთ უზენაესი და საშინელი სამსჯავროს წინაშე მათი სულებისათვის. ეს ეხება მათ ბატონებსაც, თუ ისინი არ დაემორჩილებიან ეკლესიის სწავლებასა და სამართალს.

7. ასევე იცოდეთ, როდესაც ადამიანს ერთი მღვდელი ნათლავს, მომავალში დასაშვებია, რომ უკვე სულ სხვა მღვდელმა დაწეროს ჯვარი. ეკლესია ამას არ კრძალავს. ამას ვწერთ, რადგანაც ამ მიზეზით აღარ ხდებოდა არეულობა და დაპირისპირება, როგორც ბევრჯერ მომხდარა აქამდე: მოსულან ჩვენთან საჩივრებითა და საქმის განსახილველად.

8. ასევე გაფრთხილებთ, რომ არავინ გაბედოს ადგილობრივი მღვდელმთავრის ლოცვა-კურთხევის გარეშე სადმე ახალი ეკლესიის აშენება და არც სხვას მისცეთ ამისი ნება, ვიდრე ამის შესახებ ეპისკოპოსს არ ეცნობება და მისგან არ მიიღებთ შესაბამის კურთხევას, როგორც ამას სჯულის კანონი ითხოვს. ამ მიზეზის გამოც ხდება ბევრი დაპირისპირება და სულიერი ზიანის მიყენება, ამისგან საჭიროა თავის დაცვა.

9. ამით გასწავლეთ, რაც ჩავთვალეთ, რომ აუცილებელი და სასარგებლოა იმ შემთხვევებიდან გამომდინარე, რასთანაც საქმე გქონია, როდესაც ჩვენ

---

მოგვმართავდნენ საჩივრებითა და სხვადასხვა საქმეების განსახილველად და ასევე, რის შესახებაც გაგვიგია პატიოსანი და სარწმუნო წყაროებიდან. ამიტომაც ყველას გიგზავნით ამ დარიგებებს დაბეჭდილი სახით, რათა თავადაც ისწავლოთ და სხვებსაც ასწავლოთ, თუ რა ვითარებაში, როგორ უნდა მოიქცეთ, რას უნდა ასწავლიდეთ და რისგან უნდა დაიცვათ თავი.

თუ რომელიმე თქვენგანი ამ წიგნში დაწერილის საპირისპიროდ მოიქცევა, ან დაიზარებს და არც კი წაიკითხავს აქ დაწერილს და არ ეცოდინება, თუ როგორ უნდა დამოძღვროს ქრისტიანთა სულები, ასეთმა მღვდელმა კარგად უნდა იცოდეს, რომ მას სრულად განვკვეთთ, როგორც ამას ითხოვს წმინდა მოციქულებისა და საეკლესიო კრებებზე მიღებული კანონები. რომ არც საკუთარი სული დაიზიანოს თავისი უმეცრებით და არც სხვები შეიყვანოს ცოდვაში.

ხოლო თუ დაიცავთ ამ წესებს მაშინ იქნებით ჭეშმარიტი ღვთის ჭეშმარიტი მღვდლები და მისი მცნებების დაცვისათვის ამქვეყნად ღმერთი გიბოძებთ სიკეთეს, ხოლო იმქვეყნად - ცათა სასუფეველს.

შეასრულეთ ისე, როგორც გწერთ და მაღლო უფლისა ჩვენისა იესო ქრისტესი და ჩემი უღირსობის ლოცვა-კურთხევა მარადის იქნება თქვენთანა.

**დაიბეჭდა ტირგოვიშტეს წმინდა მიტროპოლიაში სამყაროს შექმნიდან 7219 (1710) წელს, 8 ნოემბერს გიორგი რადოვიჩის მიერ.**

**დასასრული და ღმერთს დიდება!**

---

# კანონთა თავები

*კანონთა თავები ყველა საეკლესიო დასისათვის -ყველა მღვდლისა და დიაკონისათვის, რათა მათ მოვალეობა სრულად და ღირსებით დაიცვან. დაბეჭდილია ტირგოვიშტეს მიტროპოლიაში სრულიად ვლახეთის უფლისა და უზენაესი მმართველის იო სტეფან კანტაკუზინო ვოევოდას მმართველობის დროს, 7022 (1714)წელს.*

ყოვლადუსამღვდელოესი ანთიმოზი, ღვთის წყალობით უნგრო-ვლახეთის მთავარეპისკოპოსი, რუმინული მიწების ეგზარქოსი.

ღირსნო მღვდელნო და დიაკონნო უნგრო-ვლახეთისანო, ყოვლადმღიერმა ღმერთმა გიბოდოთ თქვენ წყალობა, მშვიდობა, ჯანმრთელობა, წმინდა ცხოვრება და სულის ცხოვნება, ხოლო ჩემი მხრიდან სიმდაბლით გიგზავნით ლოცვას, კურთხევასა და ცოდვათა შენდობას.

ყოვლად მოწყალე ღმერთმა, როგორც კეთილმა განმგებელმა მამამ, ყველა იმ ადამიანის მაცხოვრებელმა, ვისაც მის მიმართ სასოება აქვს, დაინახა რა თქვენი, საკურთხეველის მსახურთა, გაჭირვება და სიმდაბლე, სიყვარულითა და წყალობით შთააგონა კეთილმორწმუნე და აღმატებული მთავრის, უნგრო-ვლახეთის მმართველის იო სტეპეფანე კანტაკუზინო ვოევოდას გულს კეთილი აზრი ეკლესიისა და მთელი სამღვდელოებისათვის.

ჩვენს დროში ღვთის ნებით შთაგონებულმა მისმა უდიდებულესობამ სიკეთითა და კაცთმოყვარეობით განახორციელა წმინდა და ღვთისათვის

---

ისეთი სათნო საქმე, რომელიც ჩვენი ქვეყნის არც ერთ მთავარს ჯერ არ რგებია პატივად, რომ მსგავსი რამე გაეკეთებინა უხსოვარი დროიდან მოყოლებული დღემდე. ქრისტეს მოყვარე მთავარმა და ჩვენი აღმოსავლეთის წმინდა ეკლესიის შვილმა თავისი სამთავრობო სიგელით სამღვდელო დასს მოუხსნა გადასახადები. ჩვენ ამ წერილით გაცნობებთ ყველა მღვდელსა და დიაკონს ამ განუზომელი წყალობისა და სიკეთის შესახებ, რომელიც გაკეთდა თქვენთვის, რომ დიდება აღავლინოთ ყოვლადმოწყალე და კეთილისმყოფელი ღვთის მიმართ და განუწყვეტლივ ილოცოთ, საღამოს, დილით და შუადღეს, ჩვენი მთავრის მშობლების და წინაპრების სულების ცხოვნებისათვის და თავად მისი ჯანმრთელობისათვის, მთავრის ტახტზე მტკიცედ ყოფნისათვის, და რომ ღმერთმა დაიცვას იგი მტერთა მხრიდან ბოროტ საქმეთაგან და მის ფეხქვეშ დაემხოს ყველა მის წინააღმდეგ მებრძოლი .

ამასთან ერთად ღვთის სახელით მოგმართავთ, გასწავლით და გიბრძანებთ:

პირველი- როგორც ამბობს დავით წინასწარმეტყველი: სდექით სახლსა შინა უფლისასა ყოველთა დღეთა ცხოვრებისა თქვენისათა, რომ ემსახუროთ წმინდა ეკლესიას, ატაროთ დაწესებული ღვთისმსახურებები ღვაწლით, მონდომებით, ღვთის შიშითა და შემუსვრილი გულით სწირავდეთ უსისხლო მსხვერპლს, რომ დიდად მომთმენი ღმერთი იყოს მოწყალე ქვეყნისა და ერის მიმართ.

მეორე- ყოველ წელიწადს თითოეულმა ჩაატარეთ ხოლმე პარაკლისი მთავრისთვის, ყველა თავადისთვის და მთელი ქვეყნისთვის, როგორც ეს წერია სამთავრო სიგელ-გუჯარში; პარაკლისის გადახდა დაიწყეთ თომას



---

კვირიაკედან და აკეთეთ ეს თქვენთვის გაკეთებული მოწყალებისთვის მადლიერების ნიშნად.

ხოლო ვინც არ გადაიხდის, ის პასუხს აგებს ღვთის საშინელი სამსჯავროს წინაშე, ხოლო თუ ეს საქმე გაცხადდება თავისი მღვდელმთავრის მიერაც, ძალიან მკაცრად დაისჯება.

მესამე - რადგან ყველა ადამიანი ვალდებულია იყოს საკუთარი კეთილისმყოფელის მიმართ მადლიერი, გავალდებულებთ, რომ ყოველ წელს ჩაატაროთ ხოლმე ორი წირვა: ერთი წმინდა სტეფანეს ხსენების დღეს, 27 დეკემბერს, და მეორე- 2 აგვისტოს, ამ წმინდანის წმინდა ნაწილების გადმობრძანების დღეს. ეს წირვები აუცილებლად ჩაატარეთ თქვენც და იმ მღვდლებმაც, ვინც იქნებიან თქვენ შემდეგ, ნიშნად მადლიერებისა და იმ წყალობის მარადიული ხსოვნისათვის, რომელიც გიბოძათ თქვენ მისმა უდიდებულესობამ იო სტეფანე ვოევოდამ; ხოლო თუ რომელიმე თქვენთაგანი იზარმაცებს და არ შეასრულებს, ის წყეულ იქნება.

მეოთხე - დღეის ამას იქით, თუ ოდესმე რომელიმე ერისკაცი მოისურვებს, მიიღოს მღვდლობის ხარისხი, იგი უნდა წავიდეს საკუთარ მღვდელმთავართან და გაჩერდეს მასთან ერთი წლის განმავლობაში, ხოლო თუ ვინმე უკვე გამოცდილი და ნასწავლი გამოჩნდება, მას მოუწევს ნახევარი წელი გაჩერება მაინც იმისათვის, რომ ისწავლოს მღვდლობის ყველა წესი ისე, როგორც ამას ითხოვს წმინდა ეკლესია, და არ გაბედოს სხვა რაიმე ხერხითა თუ ეშმაკობით მიიღოს მღვდლობა, გარდა იმ შემთხვევისა, როდესაც რომელიმე სოფელში აღარ იქნება მღვდელი და იქ გაჩნდება განსაკუთრებულად დიდი საჭიროება მღვდლის დანიშვნისა; ღვთის წყალობით გამოჩნდება კიდევ გამოცდილი და ნასწავლი ადამიანი.

---

თუ ის მღვდელმთავრები, რომლებიც ჩვენ შემდგომ იქნებიან ღვთის სადიდებლად, ეკლესიისადმი პატივის მისაგებად და მრევლის სასარგებლოდ არ დაიცავენ ამ წესს, ღმერთმა განსაჯოს ისინი.

მეხუთე - გიბრძანებთ თქვენ, მღვდლებსა და დიაკვნებს, ნუ ჩაერევით საერო საქმეებში, ანუ სიცრუეში, ცბიერებაში, მლიქვნელობაში, ფიცში, ცრუ დაპირებებში და სხვა მსგავს საქმეებში, რომლებსაც ხალხში შემოაქვთ შფოთი და ეჭვი; განსაკუთრებით მოერიდეთ ვაჭრობას, რადგან მისგან სასჯელს მიიღებთ.

თითოეულს ჰქონდეს შემოსავალი საკუთარი ქონებიდან, რასაც ღმერთი უბოძებს. იქიდან დაიტოვოს თავისთვის იმდენი, რაც დასჭირდება, ხოლო დანარჩენი, ნებისმიერი რამ, რაც არ უნდა იყოს, აუცილებლად გაყიდოს.

მეექვსე - რადგანაც მღვდლები არ იხდიან გადასახადს და ამის გამო, თუ ვინმე მოინდომებს მღვდლობას ქრთამით, დაპირებებით, ან რომელიმე გავლენიანი თავადის დახმარებით რომ მხოლოდ თავის სახლში მშვიდად იჯდეს სამრევლოს გარეშე და არაფერს აკეთებდეს, მან უნდა იცოდეს, რომ მასაც დაევალება გადასახადი გლეხებთან ერთად.

მეშვიდე - თუ რომელიმე მღვდელზე ან დიაკონზე გახდება ცნობილი, რომ იგი არ ატარებს მღვდლობის პატივს ისე, როგორც ამას წესი მოითხოვს, არამედ დადის დუქნებში და ხელს მიჰყოფს მემთვრალეობას, მან უნდა იცოდეს, რომ პირველი და მეორე გაფრთხილების შემდეგ მას საერთოდ წაერთმევა მღვდლობის მაღლი და გლეხებთან ერთად დაეკისრება გადასახადი.

---

მან არ იფიქროს, რომ გარკვეული დროის გავლის შემდეგ ქრთამით, ან ვიღაცის დახმარებით ისევ დაიბრუნებს მღვდლობას, არამედ ბოლომდე დარჩება ამ სასჯელის მატარებელი და პატივყრილი.

მერვე - თუ რომელიმე სოფელს დასჭირდა მღვდელი, არავინ იკუთხოს ვიდრე იმ სოფლიდან არ მოვა ხუთი მკვიდრი მოსახლე, რომლებიც დაიფიცებენ, რომ ნამდვილად არ ჰყავთ მღვდელი. მხოლოდ ამის შემდეგ შეიძლება, რომ მღვდელმთავარმა დაუნიშნოს ამ სოფელს მღვდელი. ზოგი სოფლიდან შესაძლებელია უფრო ნაკლები-სამი, ან ოთხი ადამიანიც მოვიდეს და მღვდელმთავარმა მათთვის აკუთხოს, როგორც ადრე ითქვა, პატიოსანი, განათლებული, მშვიდი და უბოროტო ადამიანი.

მეცხრე - არც ერთმა მღვდელმა არ გაბედოს თავისი სახლიდან ღვინის გაყიდვა, არც ცოლსა და არც მსახურებს დაავალოს ეს საქმე. ხოლო, თუ ვინმე დაარღვევს ამ ბრძანებასა და ჩაიდენს ამ უღირსსა და უსჯულო საქმეს, სამუდამოდ წაერთმევა მღვდლობის მაღლი და უბირი გლეხების რიგში განწესდება.

მეათე - არც ერთმა მღვდელმა არ გაბედოს და არ გადავიდეს სხვა ადგილას (იგულისხმება სხვა სამრევლო. რედ.), არ მიატოვოს საკუთარი სამრევლო საპატიო მიწეზისა და თავისი მღვდელმთავრისაგან მიღებული დასტურის წერილის გარეშე. მსგავს შემთხვევაში მას არსად არ მიიღებენ.

მეთერთმეტე - ყველამ პასუხისმგებლობითა და გულდასმით იკითხოს ის წიგნაკი, საეკლესიო სწავლების შესახებ, რომელიც ქრისტეს შობიდან 1710 წელს დაიბეჭდა და ყველას დაურთავს საჩუქრად. ყველამ უნდა შეასრულოს ყველაფერი, რაც იმ წიგნში წერია. წინააღმდეგ შემთხვევაში იგი დაისჯება.

---

თუ ვინმეს არ აქვს ეს წიგნი, მან უნდა მიმართოს თავის მღვდელმთავარს და მიიღებს მას.

ასევე ეს წიგნიც, რომელიც ამ თორმეტ კანონს შეიცავს, თითოეულმა თქვენგანმა თვალის ჩინივით შეინახოს და რაც მასში წერია მთელი მონდომებით შეასრულოს. არავინ თქვას, რომ წიგნი დაეკარგა, ან სახლში დაეწვა, ან ვიღაცამ მოჰპარა, რადგან ვერაფრით გაიმართლებს თავს და უბირ გლახთა რიგში ჩამოქვეითდება.

მეთორმეტე - ხალხში არსებული ზოგიერთი სულის წარსაწყმედელი პრაქტიკის გასაუქმებლად: იმისი, რასაც ყოველდღიურად ვხვდებით დიდგვაროვნებშიცა და უბრალო ხალხშიც, ვადგენთ ორ წესს და ღვთის სახელით გიბრძანებთ მთელი მოშურნეობით აღასრულოთ ისინი, რათა არ წარწყმდნენ ადამიანთა სულები და დაისვენონ საეკლესიო და საერო მოსამართლეებმა.

პირველი- მოსაწესრიგებელია ანდერძების შედგენის წესი, რომლებსაც სიცოცხლის ბოლოს წერენ ქრისტიანები. რადგან თქვენ შორის ბევრია გაუნათლებელი მღვდელი, არც თქვენ იცით მათი შედგენა და არც რიგითმა ქრისტიანებმა იციან, თუ როგორ გასწავლონ მათი დაწერა. ამის გამო ჩნდება ამდენი ჩხუბი, სასამართლო, დავა, ფიცის დადება, შეჩვენების წერილების წერა და ბევრი სხვა ბოროტება. ამიტომ ვადგენთ ანდერძების შედგენის წესს, რომელიც უნდა შესრულდეს.

მეორე - მზითვის დავთრები ქვემოთ მოცემული ნიმუშის მიხედვით უნდა შედგეს.

---

## წესები, რომელთა დაცვითაც უნდა შედგეს მტკიცე და შეუცვლელი ანდერძი

პირველი- ანდერძი ღვთის შიშით, შურისა და ცბიერების გარეშე უნდა შედგეს როგორც ანდერძის ავტორის, ასევე მისი შემდგენლის მხრიდან.

მეორე - ანდერძი უნდა შედგეს მაშინ, როდესაც ადამიანი არის საღ გონებაზე და არა უშუალოდ გარდაცვალების წინ. რადგან ამ დროს მისი გონება არეულია და მან არ იცის, რასა იქმს მისი გონება.

მესამე - უნდა გაუქმდეს ის ბოროტი ჩვევა, როდესაც ზოგიერთი ადამიანი არაფერს უტოვებს საკუთარ ნათესავებს იმ მიზეზით, რომ იმათმა თავის დროზე არ მოიკითხეს გაჭირვების, ან ავადმყოფობის ჟამს, ან იმის გამო, რომ მათ შორის იყო მტრობა. მაგანი, ამ ბოლმის გამო მთელ ქონებას უტოვებს უცხო ადამიანებს, ნათესავებს კი შემკვიდრეობის გარეშე ტოვებს.

მეოთხე - იმ შემთხვევაში, თუ ანდერძი არ იქნება ზემოთ დაწერილი წესებით შედგენილი, იცოდეს ყველამ, რომ ღვთისგან საზღაურს ვერავინ მიიღებს და მათი ანდერძი შემდგომში დაირღვევა და ნათესავები მაინც მიიღებენ მის შემდეგ დარჩენილ ქონებას. სასჯელი შეჩვენების სახით, არ ასცდება ანდერძის ასეთ შემდგენელსაც.

მეხუთე - ანდერძის დასაწერად მიწვეული ნებისმიერი მღვდელი, რომელიც დაინახავს, რომ ანდერძის დაწერის მსურველი ადამიანი ბოლმითა და შურით არის აღვსილი საკუთარი ნათესაობის მიმართ, ვალდებულია, დაარწმუნოს იგი, რათა ანდერძი სამართლიანად შეადგინოს; სხვა შემთხვევაში მღვდელმა არ უნდა დაწეროს ანდერძი, რადგან თავადაც დაისჯება. ანდერძის ბოლოს მღვდელმა უნდა დაწეროს საკუთარი სახელი და მიუთითოს რომელი სოფლიდანაა; მასთან ერთად დოკუმენტს ხელი უნდა მოაწეროს შვიდმა, ან

---

ხუთმა, გაჭირვების შემთხვევაში სამმა მოწმემ მაინც, როგორც ამას სჯულის კანონი მოითხოვს.

მეექვსე - I) ანდერძში, უპირველეს ყოვლისა, გაწერილი უნდა იყოს ქალის მზითვეი იმგვარად, როგორც ეს მისი მზითვეის დავთარშია აღნუსხული. ასევე უნდა ჩაიწეროს ყველა ის საჩუქარი, სამკაული, რომელიც მან ქორწილამდე და ქორწილის მეორე დღეს მიიღო, როგორც ამას სჯულის კანონი ბრძანებს.

II) თუ ადამიანს აქვს ვალები, ანდერძში უნდა დაწეროს მათი განკარგვის თაობაზე.

III) ანდერძში უნდა გამოიყოს ყველა ის ხარჯი, რომელიც თან მოჰყვება დაკრძალვასა და წესის მიხედვით ეკლესიაში მის მოხსენიებას ერთი წლის განმავლობაში, და დამატებით კიდევ სხვა ხარჯები: მოწყალეები, პანაშვიდები, რისი გაღების და გადახდის საშუალებაც ექნება ადამიანს მისი სურვილისამებრ. ხოლო, დარჩენილი ქონება შესაძლებელია უკვე დაურიგდეს მემკვიდრეებს, თუკი ამას საჭიროდ ჩათვლის ანდერძის შემდგენელი. ამ წესით შედგენილი ანდერძი იქნება სამართლიანი.

*ანდერძის ნიმუში.* რადგან უცნობია, თუ რა გველის მომავალში და ეს არც ანგელოზებმა იციან, არამედ მხოლოდ ღმერთისთვისაა ყველაფერი ცნობილი; ამიტომაც მე, (სახელი), ძე (მამის სახელი, საცხოვრებელი ადგილი), ვიდრე გარდაცვალების ჟამი არ დამდგომია და ვიდრე ჯანმრთელი ვარ და საღ გონებაზე ვიმყოფები, გადავწყვიტე ანდერძის შედგენა. ამით მსურს, დავადასტურო ჩემი ნება მემკვიდრეების მიმართ- თუ ვინ უნდა განაგოს ჩემი უძრავი და მოძრავი ქონება.

---

უპირველეს ყოვლისა, ვევედრები მრავალმოწყალე ღმერთს, რათა შემინდოს ჩემი მრავალი ცოდვა, რომელიც, როგორც ამ სოფელში მკვიდრმა ჩავიდინე. ასევე შევთხოვ ყველა ქრისტიანს, შემინდოს, თუკი ვინმეს რამე დაუშავე. ასევე ჩემგანაც იყოს შენდობილი ყველა ადამიანი, ვინც რამე დამიშავა, ან რამე ბოროტება ჩაიდინა ჩემ მიმართ.

ამის შემდეგ ვბრძანებ, რომ უპირველეს ყოვლისა, ჩემმა კანონიერმა ცოლმა (სახელი) მიიღოს მზითევი იმგვარად, როგორც ეს მისი მზითევის დავთარშია აღნუსხული და ყველა ის საჩუქარი, სამკაული, რომელიც მან ქორწილამდე და ქორწილის მეორე დღეს მიიღო ჩემგან. ესენია: ესა და ეს (აქ ნივთები უნდა ჩამოითვალოს. რედ.).

მეორე- ყველა ჩემი ვალი იქნეს გადახდილი (ამას და ამას: სახელები და ვალები, რომლებიც ხელწერილებით და ხელწერილების გარეშეა აღებული).

მესამე- დასაფლავების შემდეგ შეასრულონ ყველა წესი მიღებული და აუცილებელი ჩემი სულის მოხსენებისათვის ერთი წლის განმავლობაში. ასევე გაიცეს მოწყალეები; პანაშვიდები იქნეს გადახდილი სრულად, როგორც ვბრძანებ. ამის შემდეგ, ჩემმა შვილებმა და ჭემმარიტმა მემკვიდრეებმა ამათ (სახელი, სახელი და სახელი) ძმურად და მშვიდობით გაიყონ ჩემი ქონება. ხოლო ამან (სახელი) მიიღოს თავისი წილი: ესა და ეს. ხოლო ამან (სახელი) მიიღოს: ესა და ეს. და ამან (სახელი) მიიღოს: ესა და ეს.

ასევე მონობიდან<sup>2</sup> ვათავისუფლებ ჩემს ერთგულ მონას (სახელი) და ერთგულ მხევალს (სახელი). ჩემი სულის ცხონებისათვის ამას (სახელი) ვუტოვებ: ამას და ამას.

ჩემი ნება ასეთია: ჩემმა მემკვიდრეებმა შეასრულონ ეს ყოველივე ჩემი გარდაცვალების შემდეგ, რაც ჩემი საღი გონებით განვაწესე, ჩემმა ენამ თქვა და

---

ჩემმა ხელმა დაწერა ამ სარწმუნო მოწმეების წინაშე, რომლებიც სახეზე არიან: (სახელი, სახელი, სახელი, სახელი, სახელი, სახელი, სახელი).

ხოლო თუ რომელიმე ჩემი მემკვიდრე, რომელიც ვახსენე, ან მოსამართლე, ან თავადი, ან საეკლესიო, თუ საერო პირი მოისურვებს ამ ანდერძის დარღვევას ან გაუქმებას, მან პასუხი აგოს უზენაესი და ყოვლად სამართლიანი მოსამართლის უფალი ჩვენი იესო ქრისტესა და ჭეშმარიტი ღვთის საშინელ სამსჯავროზე. წელი, თარიღი.

მე (სახელი) ჩემი ხელით შევადგინე და ჩემი ბეჭდით დავამტკიცე ეს ჩემი ანდერძი ამ სანდო მოწმეების თანდასწრებით, რომელთა სახელებიც ქვემოთ წერია.

მე (სახელი) ვადასტურებ ღვთისა და ადამიანთა წინაშე იმას, რაც თავისი პირით თქვა და ჩემ წინაშე დაწერა ამ ანდერძის შემდგენელმა და ვამოწმებ ჩემი ბეჭდით.

ამგვარად, დაადასტუროს დანარჩენმა შვიდამდე მოწმემაც.

### **წესები, რომელთა დაცვითაც უნდა შედგეს მტკიცე და შეუცვლელი მზითვის დავთარი**

პირველი - დიდი გულისხმევით გამოიძიონ დაქორწინების მსურველი წყვილი, დაადგინონ, ხომ არ არის მათ შორის ხორციელი ან სულიერი ნათესაობა და რომ ნამდვილად ორივეს სურვილია შეუღლება, როგორც ამას სჯულის კანონი ითხოვს. ორივეს შესახებ გამოძიება იყოს საფუძვლიანი და სამართლიანი, რათა შემდგომში არ მოხდეს მათი დაშორება. ხოლო უფრო



---

მეტი სიმტკიცისა და ნამდვილობისათვის, სოფლის მღვდელმა სამ მოწმესთან ერთად ფურცელზე ხელმოწერებით დაადასტუროს დადგენილი ამბავი.

მეორე - ჩამოიწეროს დაწვრილებით ყველა ის ნივთი, რომლის ჩუქებასაც მშობლები ისურვებენ თავისი ქალიშვილისათვის, იქნება ეს ვერცხლის, ოქროს, ან სპილენძის ნაკეთობა, ტანსაცმელი, პირუტყვი, ან ნებისმიერი სხვა ნივთი, ასევე მიეთითოს დავთრის ბოლოს ყველა მათგანის ღირებულება. იმ შემთხვევაში, თუ სია სრულად არ დაიწერება, მაშინ არცაა საჭირო, რომ დაიწეროს, რათა შემდგომში არ აღიძრას ეჭვი, შური და არ ჩამოვარდეს მტრობა.

მესამე - თუ ქალი გარდაიცვლება და მას არ დარჩება შვილები, მის ქმარს არ აქვს უფლება დახარჯოს მისი მზითევის ერთ მესამედზე მეტი მისი დასაფლავებისა და გაპატიოსნებისათვის. დანარჩენი ორი წილი დარჩეს ხელშეუხებლად, ვიდრე ქალის ნათესავები არ წაიღებენ. ისე როგორც ამას სამართლიანობა ითხოვს და როგორც ეს ნაბრძანებია სჯულის კანონში. თავისი ცოლის მზითევიდან ქმარს არაფრის აღების უფლება არ აქვს, გარდა თეთრეულისა.

***მზითვის დავთრის ნიმუში.*** იყავნ უფალო წყალობაი შენი ჩვენს ზედა, ვითარცა ჩვენ შენ გესავთ, რაჟამს ვადგენთ ჩვენი ქალიშვილის (სახელი) მზითევის დავთარს.

რასაც ვწერთ ქვემოთ და ვადასტურებთ ჩვენი და მოწმეების ხელმოწერით, რომლებიც ესწრებიან ამ დავთრის შედგენას, საჭიროების შემთხვევაში მომავალში გამოყენებულ იქნეს, როგორც მამტკიცებელი საბუთი. წელი, თარიღი.

---

როგორც ანდერძის, ასევე მზითვის დავთრის შედგენის შემთხვევაში, თუ რომელიმე მღვდელი დავთარს ღვთის შიშით, სიყვარულით, საღი გონებითა და იმ წესით, რომელსაც აქ ვადგენთ, არ შეადგენს, მას ღვთის სამართალს ვანდობთ, რადგან ჩვენ ჩვენი მოვალეობა შევასრულეთ და გავაფრთხილეთ. ხოლო თუ შემდგომში აღმოჩნდება, რომ ვინმე ამ ღვთის სათნო საქმეს დაუდევრად მოექცა და მას მზაკვრობით მიუდგა, ის მღვდელი მკაცრად დაისჯება თავისი მღვდელმთავრის მიერ.

გიბრძანებთ, გააკეთოთ ყველაფერი, რათა ქვემოთ დაწერილი სამი რამ თავიდან ავიცილოთ.

პირველი - აღმოიფხვრას ქალიშვილების მოტაცების ბოროტი ჩვეულება, როდესაც ზოგიერთი ახალგაზრდა მშობლების ნებართვის გარეშე მასთან (მოტაცებულთან. რედ.) ერთად გარბის. ზოგს იტაცებენ საკუთარი ნებით, ზოგს - ნების გარეშე, შემდეგ კი აგზავნიან შუამავლებს და მათი მეშვეობით ცდილობენ შემოირიგონ მშობლები. ასეთ წყვილს არც ჯვარი დაწეროთ და არც ეკლესიაში მიიღოთ, ხოლო მთავარხუცესს მიეცეს უფლება დააჯარიმოს ქალიშვილი 200 ბანით, ხოლო ვაჟი 400 ბანით. და ვიდრე არ მიაკითხავენ მღვდელმთავარს შენდობის სათხოვნელად და არ მიიღებენ მისგან ჯვრისწერის ნებართვას, მანამდე ჯვარს ნუ დაწერთ.

მეორე - თუ რომელიმე რუმინელმა მამაკაცმა მოისურვა ბოშა ქალის ცოლად მოყვანა, ან რუმინელი ქალი მოინდომებს ბოშას გაჰყვეს ცოლად - არც ერთ შემთხვევაში არ დაწეროთ ჯვარი, რადგან ეს ხალხში იწვევს მითქმა-მოთქმას, ჭორს, უკმაყოფილებას, განსაკუთრებით იმიტომ, რომ ამით თავისუფალი ერი მონობაში ექცევა.

---

მესამე- თუ ბატონი ნებას არ დართავს რუმინელს<sup>2</sup> მღვდლობაზე, არც ერთ შემთხვევაში არ აკურთხონ, ხოლო თუ ნებას დართავს წერილობით - მაშინ მღვდლად იკურთხოს. ხოლო მღვდლად კურთხევის შემდეგ რამდენი შვილიც ეყოლება არავის ჰქონდეს უფლება მათი გარუმინელებისა, რადგან უკვე თავისუფლები არიან. რაიონი... ამა და ამ ეკლესიის მღვდელი...

## სწავლება სინანულის საიდუმლოს შესახებ

*მოკლე სწავლება სინანულის საიდუმლოს შესახებ ამჟამად ამ სახით დაბეჭდილი მისი ბრწყინვალეების, მთავარ კონსტანტინე ბრინკოვიანუ ბასარაბ ვოევოდას, სიცოცხლეში, კეთილშობილი და პატიოსანი, ყოფილი მეჭურჭლეთუხუცესის, შერბან კანტაკუზინოს შემოწირულობითა და მისი ყოვლადუსამღვდელოესობის, მიტროპოლიტი თეოდოსისა და ღვთისმოყვარე რიმნიკუს ეპისკოპოსის, მეუფე ანთიმოზის, ლოცვა-კურთხევით ქრისტეს შობიდან 1705 წელს.*

## სინანულის შესახებ მოკლე გადმოცემა და სულისთვის სასარგებლო სწავლება

მრავალი და უთვალავი წყალობათაგან, რომელებიც გვიბოძა ყოვლად ბრძენმა და სულთა მკურნალმა მაცხოვარმა იესო ქრისტემ ღმერთმა ჩვენმა,

---

ერთ-ერთი არის სინანულის საიდუმლოც. გვიბოძა იმისთვის, რომ მოვწყდეთ ადამიანის სულის მტრის, ეშმაკის ბოროტების ყველა სათავეს. და რომ ამ სინანულის მეშვეობით ცოდვის შემდეგ, ისევ გავხდეთ უცოდველი და თავისუფალი მარადიული ტანჯვისაგან.

ხოლო მე ვფიქრობ იმ მიზეზებზე, რომლების გამოც ჩვენ ქრისტიანები მივემხრეთ ხორციელ ვნებებს, გავხდით ცოდვისა და ეშმაკის მონები, მყრალი ჭურჭლები და ჭეშმარიტად მარადიული ტანჯვათა ღირსები. ამავდროულად იმდენად შეგვიპყრო ბოროტებამ და ცოდვამ, რომ მივბაძეთ პირუტყვებს და სრულად მივემსგავსეთ მათ, იმდენად რომ ბოროტება სიკეთედ მიგვაჩნია. და თუ რომელიმე დღე ისე გაივლის, რომ ცოდვას არ ჩავიდნეთ, გვგონია რომ ამის გამო მნიშვნელოვანი რამ დაგვაკლდა. ჩვენ გვიყვარს, ვიცხოვროთ ჩვენი მტრის – ეშმაკის კარნახით, ვიდრე ყოვლის მპყრობელისა და ყოველთა სიკეთეთა გამგებლის – ღვთის ნებით. მივდივარ დასკვნამდე რომ ამ ყველაფრის მიზეზი არის გაუნათლებლობა და უვიცობა, რადგან არ გვიყვარს კითხვა და განათლება, არც ჩვენი მოძღვრებისა და მასწავლებლების მოსმენა გვიყვარს, რომლებიც ღვთის სიტყვას, ღვთის მცნებებს, რწმენასა და ცხოვნების გზას გვასწავლიან. ადამიანი, რომელსაც არ წაუკითხავს წმინდა წერილი, სხვა საეკლესიო წიგნები, წმინდა კანონები დაკითხვა თუ არ ისწავლის სხვებისგან, რომლებსაც აქვთ ამის ცოდნა, ემსგავსება პირუტყვს-საქონელს, რომლებმაც არ იცის რას აკეთებენ, რადგან არა აქვს გონება. ემსგავსება ბრმას, რადგან როგორც ბრმა ვერ ხედავს მზის სინათლეს და არ იცის, სად მიემართება და რა ელის მას წინ, ამიტომ ხშირად ვარდება ორმოებში და უფსკრულებში და ასე იღუპება, ზუსტად ასეა ადამიანის გონებაც, რომელსაც არა აქვს მართალი სიტყვის, ანუ ჭეშმარიტი ნათელის ცოდნა. ასეთი ბრმა ვერ გრძნობს და ვერ იგებს ვერაფერს, კარგავს ღვთაებრივ და პირმეტყველ კეთილშობილებას და საკუთარი თავის მართვის თავისუფლებას და ხდება პირუტყვი, ვნებების მონა.

---

მაშასადამე, ამ სამარცხვინო გაუნათლებლობის გამო ღვთის შიშისა და ადამიანთა სირცხვილის გარეშე ჩავდივართ მაგდენ ბოროტებასა და მომაკვდინებელ ცოდვას: მთელი დღეები ვლოთობთ, ვჩხუბობთ დუქნებში, ვმრუშობთ და ყველანაირ უსამართლობას ჩავდივართ. ადამიანებს ვაყენებთ ტკივილებს, ვცრუობთ, ვდებთ ცრუ ფიცს, ცრუ მოწმობებს ვიყენებთ, ვამბობთ გმობის სიტყვებს, ჩავდივართ მკვლელობებს, ცილისწამებებს, ვართ შურიანები, მტრულად განწყობილი და სხვათა მდევნელი და სხვა უთვალავ ცოდვას ჩავდივართ. ეს ყველაფერი სასიკვდილოდ აავადყოფებს ჩვენს საცოდავ სულს.

და თუ უცოდინარი და საცოდავი ადამიანი სინანულისა და აღსარების გარეშე გარდაიცვლება, მისი სული ეშმაკის ხელში ანუ მარადიულ ცეცხლში და უკუნით სიბნელეში ვარდება, სადაც დაუძინებელი მატლი, კბილთა ღრჭენაა და სადაც ის მოკლებულია ღვთის დიდებას, ანგელოზთა სიხარულს, სამოთხის მშვენიერებას, წმინდანთა ნეტარებას და მარადიულ ცხოვრებას.

ჰოი, ქრისტიანენო, ჰოი, მამანო და ძმანო, როდემდე ვიყოთ ბოროტებასა და ცოდვაში, როდემდე უნდა გვეძინოს მცონარებისა და სიზარმაცის სარეცელში? როდემდე უნდა ვიყოთ სიკვდილის მომტან მძიმე ძილში? და ამ ყველაფერს რის გულისთვის ჩავდივართ? იმისთვის, რომ მივიღოთ დასათრობად მცირეოდენი ღვინო; იმისთვის, რომ მყრალი მრუშობის მწარე სიტკბო მივიღოთ; ფული, რომელიც მიწის ნაცარია; ამას ჩავდივართ ამპარტავნების გამო, ამაოებისათვის, ამა სოფლის დიდებისათვის, სადაც ყველანაირი უწმინდურობაა, და ამით ჩვენს ზეციურ შემქმნელსა და მამა ღმერთს მტრად ვიხდით და ჩვენივე ნებით გადავდივართ ღვთისა და ჩვენი მტრის – ეშმაკის მხარეს, რათა მან უმოწყალოდ და მარადიულად გვტანჯოს. როდემდე არ დავდგებით საღ აზროვნებაზე, როდემდე არ უნდა ვითხოვოთ სიკეთე? როდემდე არ უნდა მოვიხანით? როდემდე არ უნდა ვუმკურნალოთ ჩვენი სულის ვნებებს? როდემდე უნდა ვამბობდეთ უარს ცოდვის

---

შეძლებოდა და სიკეთის შეყვარებაზე? რატომ ვართ ჩვენი კეთილის მყოფელი მაცხოვრის მიმართ ასეთი უმადურნი?

ვევედრები ღმერთს და თქვენც მოგმართავთ მე, რომელიც მთელ მსოფლიოში არსებულ ადამიანებზე მეტად ცოდვილი ვარ, ყველამ ჩემთან ერთად მოვინანიოთ ჩვენი ბოროტებები, ვიტუროთ ოხვრითა და მწარე ცრემლებით, და კაცთმოყვარე ღმერთს მივმართოთ მებაჟის სიტყვებით: „ღმერთო, შემიწყალე მე ცოდვილი“, ასევე მივმართოთ უძღვები შვილის სიტყვებით: „მამაო, შევცოდე ზეცასა და შენს წინაშე“.

ხოლო ჩვენი ზეციერი მამა დაინახავს რა ჩვენს ნამდვილ სინანულსა და ცრემლებს, როგორც მოწყალე და მრავალმომთმენი ღმერთი, ჭეშმარიტად შეგვინდობს ჩვენს ცოდვებს. მაშასადამე, თუ სინანული არ იქნება ისეთი, როგორიც საჭიროა, იგი ადამიანს არაფერში არგებს. ამიტომ მოკლედ აგიხსნით სინანულის გზას.

ჩემი სიტყვა იყოფა ორ ნაწილად: პირველ ნაწილში ნათქვამია, რა უნდა გააკეთოს მონანულმა ადამიანმა, რომ ღვთისაგან მიიღოს შენდობა; ხოლო მეორე ნაწილში ახსნილია მოძღვრება, თუ როგორ უნდა ჩაიბაროს მოძღვარმა აღსარება და როგორ უნდა დააყენოს მონანული ადამიანი გამოსწორების გზაზე.

### **ნაწილი პირველი**

## **სინანულისთვის. რა არის სინანული, რა საშუალებით მოიპოვება და როგორ უნდა განხორციელდეს.**

ჭეშმარიტი სინანული სამი ნაბიჯით მიიღწევა. პირველი-- ეს არის გულის შემუსვრა, მეორე-- ცოდვების აღიარება, ანუ აღსარება სულიერ მოძღვართან და მესამე-- სინანულის კანონის შესრულება. ამ სამ რამეს უნდა

---

ასრულებდეს ადამიანი, ვისაც სულის ცხოვნება სურს. პირველად, მოკლედ ვიტყვით, თუ რას ნიშნავს გულის შემუსვრა, რადგან სინანულის გზა ამითი იწყება.

ვისაც მთელი გულით სურს, რომ ღმერთს დაუბრუნდეს და როგორც უძლები შვილი მამის სახლში შევიდეს, იცოდეს, რომ პირველი კარი, რომელშიც უნდა შევიდეს, არის გულის შემუსვრა, რაც დიდ მსხვერპლს წარმოადგენს ღვთის წინაშე: „გული შემუსვრილი და დამდაბლებული ღმერთმა არა შეურაცხოს“.

გულის შემუსვრა ასევე იყოფა ორ ნაწილად: პირველი-- არის სინანული და წარსულ ცოდვებთან სრული განშორება და მეორე-- არის მტკიცე გადაწყვეტილება და ჭეშმარიტი პასუხისმგებლობა იმის თაობაზე, რომ დანარჩენი ცხოვრების განმავლობაში აღარ ჩავიდნეთ ცოდვებს.

მაშასადამე, პირველი რაც უნდა გააკეთოთ, თუ ჭეშმარიტი სინანული გაგაჩნიათ, მთელი სულით უნდა შეიძულოთ და შეიზიზღოთ თქვენი ცოდვები; ეს უნდა გააკეთოთ უღრმესი შინაგანი გულისტკივილითა და მწუხარებით: პირველი-- უნდა იცოდე, რომ ცოდვით დაიმკვიდრებ მარადიულ ტანჯვას და დაკარგავ ცათა სასუფეველს; მეორე-- უნდა იცოდე, რომ საძულველი ცოდვით მწუხარება და ტკივილი მიაყენე ყოვლად კეთილ ღმერთს. რამდენადაც გვმართებს ყველაფერზე მეტად, რაც არის ამ სამყაროში, გვიყვარდეს და თაყვანს ვცემდეთ მაღალ ღმერთს. მით უმეტეს, უნდა გვტკიოდეს და ვწუხდეთ, როდესაც ვცოდავთ მის წინაშე და ამით ვკარგავთ მის სიახლოვეს. ჩვენ, საცოდავები, მთელი სიმწრითა და ცრემლებით უნდა დავსტიროდეთ ღვთის მაღლის დაკარგვას უფრო მეტად, ვიდრე რომ დაგვეკარგა რამე უძვირფასესი ნივთი, რადგან, რაც მეტია დანაკარგი, მით უფრო მეტია მწუხარებაც. ამიტომაც გამოუთქმელი სიძულვილით უნდა ვმტროდეთ ცოდვას, რადგან იგი აღუწერელ დანაკარგს გვანიჭებს.

---

თუ გსურს, რომ მიაღწიო გულის შემუსვრილობასა და სიმდაბლეს, რომლის მეშვეობითაც გვებოძება ღვთის წყალობა, ამისთვის ბევრი დამაფიქრებელი და შთამაგონებელი მიზეზი არსებობს, ოღონდ გულწრფელად და მტკიცე ნებით უნდა იფიქრო მათზე.

პირველი- იმაზე იფიქრე, რომ ცოდვის შედეგი ღვთისაგან გამოირებს ისე, რომ ვეღარ ხედავ ღვთის სახესა და დიდებას. ბრძენი კაცისათვის გასაგებია, რომ არ არსებობს საკმარისი სინანული, რომ ღვთის სიახლოვე დაიბრუნოს. რადგან ადამიანისთვის არ არსებობს იმაზე მეტი საშინელება, ბოროტება და დანაკარგი, ვიდრე ის, რომ გარდაცვალების შემდეგ ვერ იხილოს წმიდა სამების დიდება და [სასუფევლის] აღუწერელი მშვენება და ნეტარება, რომელსაც წმინდა ანგელოზები მარადიულად განიცდიან და ვერასოდეს სწყინდებათ ეს. რადგან ასეთი ნეტარი განცდისა და ღვთის სახის ხედვისათვის შექმნა ღმერთმა ადამიანი, მაგრამ ღვთის ნებას დაშორებული ადამიანი კარგავს ცხოველსმოფელ მადლს და იხრწნება.

მეორე-- იფიქრე, რომ ღვთის არც ერთი მცნება და სწავლება არ დაგიცავს; იფიქრე, როგორ წაბილწე შენი სული და ხორცი მრუშობით, სიძვით, მამათმავლობით, ცდუნებებით, ლოთობით და გემოთმოყვარეობით. შენი ხელები გაწვდილია სიამოვნებათა მისაღებად, უკუღმართობებისკენ, მტაცებლობისკენ, მკვლელობისკენ და სხვა; სასმენელნი შენნი სავსეა ბინძური სიმღერებით, სიტყვებით და სხვათა ცილისწამებით; თვალნი შენნი მიმართულია მრუშობისაკენ და ვნებების დაკმაყოფილების გზების მოსანახად. შენი ენა სავსეა შენი ქრისტიანი ძმების გინებით, დასმენით და ცილისწამებით, ასევე ცრუმორწმუნეობებით, ფიცით და გმობით. ამ ყველაფრის თქმას მიჩვეულია ბევრი ბილწი პირი - აგინებენ რჯულს, ჯვარს, საეკლესიო კანონებს და საიდუმლოებებს, მღვდლებსა და თვით ღვთის სახელსაც კი. ჭკმმართად გაკვირვებული ვარ ამ ეშმაკთა ხრიკებითა და წარმართობით, რადგან ასეთ ხალხს ადამიანებს ვერ ვუწოდებთ. ჰოი, როგორ



---

არ გადმოდის ზეციდან ცეცხლი და არ წვავს მათ! დიდად მომთმენია ღმერთი და ელოდება მათ სინანულს!

ხოლო თუ არ გამოსწორდებიან, ბოროტებას დაამატებენ ბოროტებას და როდესაც მოუწევთ თავისი დრო, ეშმაკებთან ერთად მარადიული ტანჯვით უმოწყალოდ დაიტანჯებიან. ზოგიერთები კი თავისი სისხლისმიერი მშობლების დასმენითა და გინებით არიან დაკავებულნი და ხშირად სცემენ კიდევაც მათ, ამას უკეთებენ მშობელ და გამზრდელ დედ-მამას, რომელთა პატივისცემას გვიბრძანებს ღმერთი: „პატივი ეც მამასა შენსა და დედასა შენსა, რათა კეთილი გეყოს შენ და დღეგრძელ იყო ქვეყანასა ზედა“. და ჩვენ გვაკისრია ვალდებულება, მოვუაროთ მშობლებს მათი სიბერის ჟამს; ჭეშმარიტად, ასეთი ადამიანები არც ამქვეყნად ეწევიან ბედნიერებას და იმქვეყნად ჯოჯოხეთის ტანჯვას დაიმკვიდრებენ.

მოკლედ, იფიქრე, რამდენჯერ წაიხილწე ხორციელი ვნებებით სული და ხორცი დაიბინძურე, მათი სიმყრალე ზეციური მამის სავანესაც კი აღწევს.

მესამე-- იფიქრე იმ ზიანზე, რომელსაც სასიკვდილო ცოდვა გაყენებს: გისჯის მარადიულ სატანჯველს; გშლის სიცოცხლის წიგნიდან, სადაც ღვთის შვილნი არიან ჩაწერილი, ეშმაკის მონად გაქცევს, და ნაცვლად იმისა, რომ სული შენი იყოს წმიდა სამების სავანე, მას ცოდვა აქცევს ავაზაკთა და გველთა ბუნაგად; და რაც ყველაზე დიდი ბოროტებაა, გაკარგვინებს ღვთის სახის ხედვის უნარს.

ადამიანო, უთხარი შენს სულს: ჩემო საბრალო სულო, აიხილე თვალები და დაინახე რა იყავი და რად გადაიქეცი ცოდვის შედეგად; მაღალთა შინა მყოფის სძალი იყავი, ცოცხალი ღმერთის სავანე და გამორჩეული ფასდაუდებელი ჭურჭელი, ასევე ჭეშმარიტი სოლომონის ანუ ქრისტეს ტახტი; ისააკის ტახტი სიბრძნისა, ანგელოსთა ძმა და მარადიული ნეტარების მემკვიდრე.

---

იტირე და მწუხარე იყავ სულო, რადგან აღარ გაგაჩნია ის ღირსებები, რადგან სიწმინდე დიდ უწმინდურებაში გაცვალე, რადგან ღვთის სძალი იყავი და გადაიქეცი ეშმაკის მეძავად, იყავი სულიწმიდის სავანე და გადაიქეცი ქვაბ-ავაზაკთა, იყავი გამორჩეული და წმინდა ჭურჭელი და გახდი უწმინდურობის ჭური, ქრისტეს სასახლე - იქეცი მყრალ საღორედ, ღვთის კაცი, გადაიქეცი წაწყმედილების საჯდომად, ანგელოზთა მეგობარი იყავი და გადაიქეცი ეშმაკების მორჩილად, გაიხსენე როგორ მიფრინავდი მტრედივით ზეცისკენ, ხოლო ახლა გველივით მიხობავ მიწაზე.

იტირე და იგლოვე, ჰოი, უბადრუკო სულო ჩემო, და დაუფიქრდი შენს დიდ დაცემას; იტირე, რადგან შენ დაგტირის ზეცა; იტირე, რადგან შენ გგლოვობს ეკლესია და ყველა წმინდანი; ცრემლები ღვარე, რადგან შესცოდე; იტირე, რადგან შენ დაგტირიან წინასწარმეტყველნი, რომლებიც აქედანვე ხედავენ შენზე დაშვებულ ღვთის სამართლიან მრისხანებას; იტირე, რადგან იერემია შენთვის უფრო მეტად ღვრის ცრემლებს, ვიდრე ოდესღაც იერუსალიმის დანგრეული კედლებისთვის; იტირე, უბადრუკო სულო, სანამ არ განიბანები შენი ცოდვებისაგან და არ დაუბრუნდები შენს თავდაპირველ ღირსებას.

მეოთხე-- იმისთვის, რომ გაიჩინო ცოდვის მიმართ სიძულვილი და წმინდა მწუხარება, იფიქრე, რამდენად სძულს ყოვლად კეთილ ღმერთს ცოდვა, და რადგან ის სძულს, რამდენჯერ მოუვლინა კაცობრიობას საშინელი სასჯელები ცოდვების გამო; გამოუგზავნა წარღვნა და წარწყმიდა ყველა ცოდვილი; გაანადგურა სოდომი, დასცა ეშმაკი ზეციდან ჯოჯოხეთში; და ადამი და ევაც განაგდო ედემიდან. სიტყვის შემოკლებისათვის ვტოვებ ბევრი სხვა მაგალითის მოყვანას.

მეხუთე-- ცრემლებით გაიხსენე სიკვდილი, როდესაც სცილდება ცოდვილი სული ხორცს და მას გარშემო ეხვევიან საშინელი და ველური სახეების მქონე ეშმაკები, რომელნიც მოსულან სულის გასატაცებლად. ასევე

---

გაიხსენე სამართლიანი მოსამართლის საშინელი სამსჯავროს დღე და უფლის ის შემამფოთებელი სიტყვები, რომლებსაც სამართლიანობითა და ბრძანებით ეტყვის ცოდვილებს: წარვედით ჩემგან, წყეულნო, მარადიულ ცეცხლში, რომელიც გამზადებულ არს ეშმაკისა და მისი მსახურებისათვის. გაიხსენე მარადიული ჯოჯოხეთის საშინელი ტანჯვა, სადაც შთავარდნილი მთელი შენი სხეული აუტანელი ტკივილებით დაიტანჯება, გაიხსენე უნუგემო მწუხარება, რომლითაც შეპყრობილია იქ მყოფი ყველა ცოდვილი, ტანჯვისაგან გათავისუფლების იმედის გარეშე მყოფნი.

მეექვსე-- იფიქრე მაცხოვარ იესო ქრისტეს სიკეთეების უთვალავ სიმრავლეზე, რადგან, რაც უფრო მეტად ფიქრობ ყოვლად კეთილი ღვთის მიერ შენთვის ბოძებულ სიკეთეებზე, მით უფრო გრცხვენია მის მიმართ გამოჩენილი შენი უმადურობისა და მზაკვრობის გამო.

მამასადამე, ამ ყველაფერზე დაფიქრებით შეძლებ გაიჩინო ცოდვის მიმართ სიძულვილი და გულის შემუსვრილება, რაც სინანულის გასაღებს წარმოადგენს. იმარხულე, ცრემლებით ილოცე და მარადის გახსოვდეს შენი ცოდვები. გაიღე ხოლმე მოწყალება და სხვა კეთილი საქმეებიც გააკეთე, რომ შეგინდოს ღმერთმა შეცოდებანი შენი.

საკმარისია უკვე, რამდენიც ვთქვი გულის შემუსვრილების შესახებ, რომელიც სინანულის კეთილ დასაწყისსა და პირველ ნაბიჯს წარმოადგენს და ახლა გადავდივართ მეორე ნაბიჯზე, ანუ აღსარებაზე.

## **აღსარებისათვის**

აღსარება ძალიან უყვარს ღმერთს და მის გარეშე შეუძლებელია ვინმეს ცხონება, რამდენი კეთილი საქმეც არ უნდა ჰქონდეს გაკეთებული ადამიანს. ამიტომაც არსებობს მრავალი გზა იმისთვის, რომ ადამიანმა შეიცნოს თავისი ცოდვა და მდაბალი გულით თქვას აღსარება. ამიტომაც

---

მოუწოდა მაღალმა ღმერთმა ურჩობის ცოდვაში დაცემულ ჩვენს წინაპარ ადამს, რომ შეიცნოს თავისი ცოდვა და უთხრა: ადამ სად ხარ? ანუ, სად დაეცი, რამხელა ბოროტება ჩაიდინე, მოტრიალდი სინანულისკენ და აღიარე შენი ცოდვა, რომ მიიღო შენდობა. იგივე უთხრა ევასაც, კაენსაც და ძველი აღთქმის წმინდა წერილის სხვა ადგილებშიც ჩანს, რამდენად სასარგებლოა აღსარება.

სოლომონი ბრძანებს: “ადამიანი, ვინც ფარავს თავის ცოდვებს, ვერ ცხონდება, ხოლო, ვინც აღიარებს მათ, ის წყალობას მოიხვეჭს”.

ასევე მეფე და წინასწარმეტყველი დავითი აქებს აღსარებას ბევრ სხვა და სხვა ფსალმუნში, მაგალითად: “აღვიარებ, უფალო, ყოვლითა გულითა ჩემითა”. შემდეგ: “ კეთილ არს აღსარება უფლისა”, და სხვა მრავალი მსგავსი.

წინასწარმეტყველი ისაია ამბობს: “თუ გაქვს რაიმე ცოდვა, გამოაცხადე ის, რომ მიიღო შენდობა”. სიტყვის შემოკლებისათვის, წმინდა სახარების სხვა მრავალ ადგილსაც გამოვტოვებ.

მაშასადამე, ამ მცირე მაგალითებიდან დავინახეთ, თუ რამდენად სასარგებლო და აუცილებელია აღსარება ჩვენი ცხონებისათვის და რომ გვმართებს ხშირად ვამბობდეთ ხოლმე აღსარებას. მაგრამ იმისათვის, რომ აღსარება ჩაბარებული იყოს ისე, როგორც საჭიროა, ანუ ისე, როგორც გვასწავლიან ამას ჩვენი ეკლესიის წმინდა მამები, შემდეგი ნაბიჯები უნდა გადადგას იმან, ვინც ემზადება აღსარებისათვის. პირველი-- აღსარებამდე ორი-სამი დღით ადრე უნდა დაიწყოს მომზადება და ფიქრი, რამდენი დრო გავიდა მისი ბოლო აღსარებიდან; გულისყურით, დაკვირვებითა და შეგნებით უნდა გამოიძიოს საკუთარ თავში რამდენი ცოდვა ჩაიდინა იმ წუთიდან დღევანდლობამდის, ღმერთის ათი მცნებიდან რომელი არ დაიცვა; რომელი მომაკვდინებელი ან სხვა სახის ცოდვა ჩაიდინა, რა გრძნობით სცოდავდა; ჭეშმარიტად და სწორად თუ სწამს მრწამსის 12-ვე

---

მუხლი ისე, როგორც ამას ასწავლის აღმოსავლეთის მართლმადიდებელი ეკლესია, ასევე ჩვენი ეკლესიის რომელი მცნება ან წესი არ დაიცვა; რამდენჯერ ჩაიდინა ცოდვა, ან რამდენი ხანია, რაც იმყოფება ამ ცოდვაში, და სხვა ბევრ რამეზე უნდა დაფიქრდეს, რომლის შესახებაც ვისაუბრებთ მეორე ნაწილში.

მას შემდეგ, რაც ასეთი სახით მოემზადება, ადამიანმა უნდა სცადოს გამოცდილი, ღვთისმოსავი და მცოდნე მოძღვრის მოძებნა, რომ მან შეძლოს მისი გამოსწორება; მოძღვარი უნდა იყოს განათლებული, ღვთის წმინდა კანონებისა და წესების მცოდნე და არა ვინმე გაუნათლებელი და ღვთისმგმობელი, ან ისეთი, ვისგანაც თითქოსდა სარგებელს მიიღებს, ანუ ვინც იოლად შეუძლობს და არ დაადებს სინანულის სასჯელს, რაც აუცილებელია გამოსწორებისა და განკურნებისათვის. ვინც ეძებს ასეთ უწესო მოძღვარს, უაზრობას სჩადის, რადგან არაფერს არგებს ასეთი ცუდი აღსარება; და ვინც აბარებს და ვინც იბარებს ასეთ აღსარებას, ორივე მომაკვდინებელ ცოდვას სჩადის და ორივე დაისჯება. რადგან ამბობს მაცხოვარი იესო ქრისტე: “როდესაც ბრმა ხდება სხვა ბრმის წინამძღოლი, ორივე ორმოში ჩავარდება”. ხოლო მის შემდეგ, რაც ადამიანი ნახავს კარგ მოძღვარს, ყოველთვის სულ მასთან უნდა იაროს აღსარებაზე და არა ხან ერთთან და ხან მეორესთან და ასეთნაირად ვაჭრობდეს სინანულის საიდუმლოს, როდესაც რცხვენია მას აღიაროს, რომ მეორედ და მესამედაც ჩაიდინა ადრე უკვე ნათქვამი ცოდვა და რომლისთვისაც მოძღვარმა დაარიგა, რომ დაანებოს და აღარ ჩაიდინოს ის. ამის მაგივრად, ქრისტიანმა ადამიანმა მთელი ღვთისმოსაობითა და სიმდაბლით უნდა აღიაროს მოძღვართან თავისი ცოდვები სხვა ადამიანებზე, ან ეშმაკზე გადაბრალების გარეშე, არამედ საკუთარ თავს უნდა აღიარებდეს დამნაშავედ. ამავდროულად, ყველაფერი უნდა აღიაროს და არ დამალოს

---

არც ერთი ცოდვა; რადგან თუნდაც ერთი დამალული ცოდვა ყველა დანარჩენსაც შეუნდობელს ხდის.

ხოლო თუ დაავიწყდება რომელიმე ცოდვა, მერე, გახსენებისთანავე უნდა წავიდეს და მოინანიოს ის; ხოლო აღსარებისა და მოძღვრის კურთხევის გარეშე არავინ გაბედოს ზიარება, რადგან დაისჯება ის საწყალი.

რაც შეეხება აღსარებას, სიმოკლისათვის მეტ წილს ვტოვებ, რადგან ვთვლი, რომ ესეც საკმარისია. ახლა გადავიდეთ მესამე ნაბიჯზე, ანუ სინანულის სასჯელის შესრულებაზე.

### **სინანულის კანონის შესრულებისათვის**

რადგან სასჯელის კანონის დადების თაობაზე საუბარი გვექნება ჩვენი სიტყვის მეორე ნაწილში, რადგან იქ არის მისთვის უფრო შესაფერისი ადგილი, ამიტომაც აქ ავხსნი მხოლოდ იმას, რა არის სინანულის კანონი და როგორ უნდა დავიცვათ ის და ამით დავასრულებ.

კანონის შესრულება გულისხმობს სინანულის გამოხატვის ნიშად, გარკვეული საქმეების აღსრულებას, როგორც ამას ამბობს წმ. იოანე ნათლისმცემელი, წინასწარმეტყველი და წინამორბედი: „მაშ, შეიქმენით მონანიების ღირსი ნაყოფი“. კანონის შესრულება, ასევე გულისხმობს მოძღვრის მიერ ცოდვებისათვის დადებული კანონის შესრულებას, ხოლო თუ აღმსარებელი არ შეასრულებს იმ კანონს, ის დაკარგავს აღსარების საზღაურს (შენდობას, რედ.). როგორც ავადმყოფ ადამიანს არაფერს არგებს, თუ ექიმს მხოლოდ მოუყვება თავისი ავადმყოფობის შესახებ და მისთვის დანიშნული სამკურნალო ბალახეულობას არ მიიღებს; ასევე ცოდვილსაც არ შეენდობა მხოლოდ აღსარებით, არამედ მოძღვრის მიერ დანიშნული კანონი უნდა

---

შეასრულოს, რომელიც არის ცოდვის განადგურებისა და გამოსწორების საშუალება.

აქ ვასრულებთ პირველ ნაწილს, სადაც ვისაუბრეთ სინანულის შესახებ და სამ ნაბიჯზე, რომლითაც მიიღწევა ჭეშმარიტი სინანული და შენდობა: პირველი ნაბიჯი არის გულის შემუსვრა, რომელსაც პავლე მოციქული ეძახის ღვთიურ მწუხარებას, მეორე-- აღსარება და მესამე-- კანონის შესრულება. თუ ამ სამთაგანს რომელიმე გამოაკლდება, სინანული არ შედგება.

### ნაწილი მეორე

#### როგორი უნდა იყოს მოძღვარი, როგორ უნდა ჩაიბაროს აღსარება და გამოსწორის ადამიანები

აქ, ჩვენი სიტყვის მეორე ნაწილში ჩაფიქრებული გვაქვს მოკლედ ვისაუბროთ სხვა საკითხებზეც, რომლებიც აუცილებელია სინანულისა და აღსარებისათვის. ჩვენ საჭიროდ ჩავთვალეთ, უპირველეს ყოვლისა, ვთქვათ იმის თაობაზე, თუ როგორი უნდა იყოს მოძღვარი, რადგან ეს საკითხიც ძალიან მნიშვნელოვანია.

ის მღვდელი, რომელიც ისურვებს მიიღოს აღსარების მძიმე და ძნელი ტვირთი, ასაკით უნდა იყოს მოხუცი, სულ მცირე 40 წლის, იყოს ღირსი, პატიოსანი, ზნეკეთილი, სიტყვასა და საქმეში გამოცდილი, არ უნდა იყოს ლოთი; არ უნდა იყოს დუქნებში მოსიარულე, მრისხანე, მგმობელი და ენაბილწი. მოკლედ რომ ვთქვათ, მაქსიმალურად უნდა ერიდოს, რომ ხალხს არ აძლევდეს სკანდალისა და ბოროტი ლაპარაკის მიზეზს.

მეორე-- განათლებითა და კეთილი საქმეებით უნდა იყოს შემკული, უნდა იცოდეს ჩვენი ეკლესიის წმიდა წიგნები და კანონები, რომლებითაც შეძლებს მასთან აღსარებაზე მისული ხალხის გამოსწორებას და ამ საქმეს უნდა აკეთებდეს ღვთის შიშით და არა რაიმე ბოროტი გამორჩენის მიზნით.

---

აღსარებაში არ უნდა ითხოვდეს ფულს და არც სხვა რომელიმე საიდუმლოს შესრულებაში, რადგან ასეთი მღვდელი იუდასთან ერთად დაისჯება, მხოლოდ იმ შემთხვევაში მიიღოს ფული, თუ აღმსარებელი თავისი ნებით შესწირავს.

აღსარების დროს არავისი რიდი არ უნდა ჰქონდეს, ვინც არ უნდა იყოს ის. არ უნდა იყოს პირფერი, არამედ ჩადენილი ცოდვიდან გამომდინარე ყველას უნდა დაადოს სწორი სასჯელი წმინდა საეკლესიო კანონების შესაბამისად. აღსარების მიღების უფლება მღვდელმა უნდა მიიღოს ადგილობრივი მეუფე მღვდელმთავრისაგან.

### **რა უნდა ჰკითხოს მოძღვარმა აღმსარებელს და როგორ დაიწყოს აღსარების მიღება**

როდესაც ვინმე მღვდელთან მივა აღსარებაზე, ორივენი მაცხოვარი იესო ქრისტეს ხატის წინ დადგნენ ფეხზე და მოძღვარმა თქვას: კურთხეულ არს ღმერთი ჩვენი....., შემდეგ: „მეუფეო ზეცათაო“, „ყოვლადწმიდაო სამებაო“, „მამაო ჩვენო“, „უფალო შეგვიწყალენ“ 12-ჯერ და 50-ე ფსალმუნის „მიწყალე მე ღმერთო“. შემდეგ, მოძღვარი დაბრძანდეს ღირსებით ისე, რომ ქრისტეს სახეს განასახიერებდეს, ხოლო აღმსარებელი იდგეს თავმოხდილი, მკერდზე გადაჯვარედინებული ხელებით, თავდახრილი, ღვთის შიშითა და ღირსებით.

შემდეგ მოძღვარმა ჰკითხოს: პირველი, ბოლოს როდის თქვა აღსარება, როდის ეზიარა და თუ შეასრულა მოძღვრის მიერ მიცემული კანონი. ამის შემდეგ ჰკითხოს: დაოჯახებულია თუ არა და რა ხელობის კაცია, აზნაურია თუ არა? ეს იმისთვისაა საჭირო, რომ გაიგოს, თუ რა კითხვები დაუსვას და როგორ გამოასწოროს ის. შემდეგ ჰკითხოს: ექვ შეუვალად სწამს თუ არა ჩვენი აღმოსავლეთის ეკლესიის დოგმატები და სარწმუნოების სიმბოლოს 12-ივე მუხლი ანუ მრწამსი, ასევე ჰკითხოს: თუ იცავს ღვთის 10-ივე მცნებას და თუ არა, რომლებში სცოდავს. ამ ათი მცნებიდან პირველში ნათქვამია: გიყვარდეს



---

ღმერთი შენი ყოვლითა სულითა და ყოვლითა გულითა და ყოვლითა ძალითა შენითა და რომ სიყვარულითა და მოშურნეობით უნდა ასრულებდეს ღვთის მცნებებს, როგორც კეთილი შვილი ასრულებს მამის ნებას და გონებაში სხვა არაფერი უნდა ჰქონდეს, გარდა იმისა, როგორ მოაწონოს თავი ღმერთს. ასევე უნდა უყვარდეს თავისი მოყვასი ძმა ქრისტიანი და სიკეთე უსურვოს მას ისევე, როგორც საკუთარ თავს.

მეორე-- ყველა სიტყვასა და საქმეზე არ უნდა იფიცებდეს ღვთისა და წმინდანების სახელს ან სხვა რამე ფიცით, არც სიმართლეზე და არც სიცრუეზე.

მესამე-- იცავდეს შაბათს, ანუ კვირა დღეს და წლის განმავლობაში ყველა დღესასწაულს, რომელსაც აღნიშნავს ჩვენი ეკლესია, ამ დღეებში უნდა იუქმოს ხორციელ საქმეთაგან და მხოლოდ სულიერი და საღვთო საქმეებით იყოს დაკავებული: ანუ ლოცვით, საღვთო მოძღვრებებისა და წმინდათა სამაგალითო ცხოვრებების მოსმენით. უნდა ეცადოს მაქსიმალურად მიემსგავსოს მათ, რათა განდიდებული იქნენ ღმერთის მიერ ისევე, როგორც ისინი.

ღვთისმოსაობით მოისმინოს მწუხრი, ცისკარი და არ ეძებოს მიზეზები, რომ დღესასწაულებზე ეკლესიაში სიარულის ნაცვლად სჩადიოდეს ბევრ ცოდვას: სიმთვრალით, უპოატიო ქცევით, სიმღერით, ცეკვა-თამაშით, მრუშობით და ტალახში ამოგანგლილი ღორის მსგავსად იქცეოდეს, რადგან ღმერთი მსგავსი ქმედებებისთვის მეტად მკაცრად დასჯის ადამიანს, ვიდრე უქმის გატეხვისა და დღესასწაულის დღეს შრომისათვის.

მეოთხე-- პატივი სცეს დედასა და მამას და იზრუნოს მათზე, მოხუცებულობასა და გაჭირვების ჟამს; პატივისცემით დაემორჩილოს მათ ბრძანებებს, გარდა იმ შემთხვევებისა, თუ ისინი უბიძგებენ წარმართული და უსჯულო საქმისაკენ. ასევე პატივი სცეს სხვა ნათესავებსაც და ყველას, ვინც არის მასზე უფროსი. ასევე ადგილობრივ თავადებსა და ხელისფალთ და განსაკუთრებით სასულიერო პირებს, რადგან მღვდლები და

---

მღვდელმთავრები ღვთისმსახურნი არიან, მიუხედავად იმისა, ცოდვილები არიან ისინი, თუ პატიოსანნი; და თუ ვინმე მასხარად იგდებს ან სცემს და აგინებს [ღვთის]მსახურს, ეს შურაცხყოფა და დამცირება ბატონსაც ეხება, ანუ ამ შემთხვევაში ღმერთს. ქრისტიანო! ერიდეთ ამ დიდ ცოდვას, რადგან განგირისხდებათ ღმერთი და მარადიული ტანჯვით დაისჯებით.

მეხუთე-- არც თვითონ ჩაიდინოს მკვლელობა და არც სხვას დაავალოს ან ურჩიოს.

მეექვსე-- არ იმრუშოს, არ ისიძვოს, არ იმამათმავლოს, არ აცდუნოს ვინმე და არც რომელიმე ცხოველთან დაეცეს.

მეშვიდე-- არ მოიპაროს, არ შეჭამოს ის, რაც სხვისია, დაქირავებულ მუშებს ყოველთვის მისცეს ჯამაგირი, და დროულად დააბრუნოს ვალი.

მერვე-- არ იცრუოს და ასეთნაირად ადამიანს, მის სიცოცხლეს, მის ქონებასა თუ ღირსებას რაიმე ზიანი არ მიაყენოს.

მეცხრე-- გულმა არ უზრახოს მეზობლის, ან სხვა ნებისმიერი უცხო ადამიანის ცოლზე, არამედ ლტოლვა მხოლოდ თავისი ჯვარდაწერილი ცოლის მიმართ ჰქონდეს.

მეათე-- არა გული უთქმიდეს და არც მოეწონოს და უსამართლოდ არა ხელჰყოს თავისი მეზობლის, ან სხვა ადამიანის სახლზე, ვენახზე, მამულზე ან მონაზე.

ესაა ღვთის ათი მცნება, რომლებიც სხვა წიგნებში უფრო ფართოდ არის განმარტებული, ხოლო ჩვენ ბევრი რამ გამოვტოვეთ, რადგან ვიცნობთ ადამიანების სიზარმაცეს და ამა სოფლის ზრუნვისაკენ მიდრეკილებას, რის გამოც ამ მოკლე სიტყვებსაც ბევრი არ წაიკითხავს, რაც უთვალავი ცოდვის მიზეზი გახდება.

ამ მცნებების გარდა მოძღვრებმა ჰკითხონ აღმსარებელს სხვა მომაკვდინებელი, თუ შედარებით მსუბუქი ცოდვების შესახებ: ანუ თუ დაგმო ღმერთი, ან წმინდანები, ან საეკლესიო საიდუმლოებები ან სხვა რამე, ან თუ

---

ემშაკით დაწყევლა ვინმე, ან შეაჩვენა ვინმე ცოცხალი, ან მკვდარი, ან თუ გაუკეთებია ჯადო, ან თუ ნაკვერცხალში ჩაუყრია ლობიოს მარცვლები; ან თუ სხვას გააკეთებინა ესენი; თუ სწამს ჯადოების, თან ატარებს თილისმებს, აკეთებს შელოცვებს და სხვა ემშაკეულ საქმეებს. ამ ცოდვების გამო აღმსარებელს უნდა დაედოს მძიმე კანონი (ეპიტიმია. რედ.) რადგან ამ ჯადოებით ის უარს ამბობს ღმერთზე და ემშაკის მორწმუნე ხდება. ჰკითხე თუ უყვარს სხვა ადამიანისათვის ზიანის, დანაკარგის მიყენება და სხვისი უპატივისმცემლობა, ან რომელიმე ადამიანის დაფარული შეცდომის საჯაროდ ხმამაღლა გამხილება, რომ ამით შეარცხვინოს ის, ან ხომ არ დაარღვია რომელიმე აღთქმა, ან შეთქმული მოწყალების გაღება არ შეასრულა, ცილი ხომ არ დასწამა, ან სიხარულით მოისმინა სხვებზე ბოროტი ლაპარაკები, ან ხშირად არ დადის ეკლესიაში ღვთისმოსაობით, ან არ ლოცულობს სახლში დილას და საღამოს ისე, როგორც საჭიროა; [უნდა ჰკითხოს] ხომ არიგებს სახლეულებს - ცოლს, შვილებს, მოჯამაგირეებს არ გააცდინონ წირვა-ლოცვა კვირაობით და დღესასწაულებზე, ხომ ასწავლის მათ ლოცვას და ღვთისმოსავ ქრისტიანულ ცხოვრებას, წარსულში ხომ არ ჰქონდა და ახლაც ხომ არ აქვს უთანხმოება და მტრობა ვინმესთან, ან ხომ არ გაამხილა მისთვის განდობილი რამე საიდუმლო, ხომ არ ფიქრობს სიტკბოებით დამამცირებელ საქმეებზე და ხორციელ ვნებებზე, ხომ არ იამპარტავნა და იტრაბახა, ან მასხარად აიგდო გაჭირვებულები; თავისი ავადმყოფობისა, ან სიღარიბის გამო, ხომ არ გამოხატა უმადურობა ღვთის მიმართ და დაგმო იგი, სიზმრებისა ხომ არ სწამს, ხომ არ გააბრუნა და არ მიიღო თავის სახლში მოსასვენებლად მასთან მისული უცხო მგზავრი, ან არ შემოსა შიშველი, არ აჭამა მშვიერს, არ მოინახულა და არ ანუგეშა სიტყვით და საქმით ვინმე საპყრობილეში, არ იზრუნა ავადმყოფზე, ღარიბ-დატაკზე და უცხო ტომელზე; ან თუ ბოროტებაზე ბოროტებით უპასუხა, ან თუ არ უყვარს თავისის მტრები, ან თუ ჰქონდა საშუალება დახმარება გაეწია რომელიმე გაჭირვებულებისათვის და

---

გადაერჩინა ის და არ მოინდომა: ამ ყველაფრის შესახებ მოძღვარმა უნდა ჰკითხოს ღვთისმომში აღმსარებელს, რომ მან ყველაფერი დაუფარავად აღიაროს.

მის მერე, რაც მორწმუნე იტყვის ყველაფერს, მოძღვარმა კარგად უნდა დაარიგოს, რომ აღარ ჩაიდინოს ცოდვები, შეიძულოს ვნებები და დღედაღამე ლოცულობდეს ჩვენს უფალ იესო ქრისტეზე თავმდაბლობითა და მხურვალე ცრემლებით, რომ ღმერთმა შეუნდოს მას მისი ლოცვები და აწი დაიცვას იგი დაცემისაგან. აღირსოს ცათა სასუფეველს და ყოვლად სამართლიანმა და მოწყალემან ღმერთმან არ დასაჯოს ის და რომ არ მოვიდეს მასზედ მოულოდნელი სიკვდილი და მოუნანიებელი, გამოუსწორებელი და უბადრუკი არ დაისაჯოს.

სწავლა-დარიგების შემდეგ მისცეს სინანულის კანონი, რომელიც ეკუთვნის: არც ძალაინ მკაცრი, არც ნამეტნავად მსუბუქი. გაითვალისწინოს მონანულის ასაკი - ახალგაზრდაა თუ მოხუცი, დაოჯახებულია თუ არა, მდიდარია თუ გლახაკი, მღვდელია, ერის კაცი თუ ბერი, ნასწავლი თუ უსწავლელი, ასევე ჰკითხოს რამდენჯერ ჩაიდინა ცოდვა, ან რამდენი ხანი და როდის ეწეოდა ცოდვილ ცხოვრებას, მარხვაში თუ ხსნილში, რა ადგილას, ეკლესიაში თუ სხვაგან, რა ხერხით, ცხადად თუ ფარულად, ვინმე ნათესავთან თუ უცხო ადამიანთან. მოძღვარმა სხვა მსგავსი კითხვებიც უნდა დაუსვას, რომ გაიგოს რა ხერხებით, რანაირად ჩაიდინა კაცმა მძიმე თუ მსუბუქი ცოდვა და შემდეგ დაადონ სწორი სასჯელი.

მოძღვარმა უნდა გადახედოს აღმსარებლის ყველა ცოდვას და რომელიც იქნება ყველაზე მძიმე იმაზე დაადოს კანონი. მაგალითად, კაცმა ჩაიდინა მრუშობის ცოდვა და მკვლელობაც. მკვლელობა უფრო დიდი ცოდვაა და შესაბამისად კანონი მკვლელობისათვის უნდა დაედოს.

ასევე მოძღვარმა უნდა დაარიგოს, რომ მთელი ცხოვრების მანძილზერა კანონი შეასრულოს, უნდა ახსოვდეს თავისი ცოდვები -ოხვრითა და

---

ცრემლებით უნდა წუხდეს მათ გამო, დავით წინასწარმეტყველის მსგავსად უნდა ლოცულობდეს ღვთის მიმართ, რომ მან შენდობა უბოძოს; ყოველ ღამე უნდა ასველებდეს სინანულის ცრემლით სარეცელს და მრავალჯერ აღავლენდეს ლოცვას დღისა და ღამის განმავლობაში.

კანონი იმ წესით უნდა შეასრულოს, რაც ჩვენი ეკლესიის მამებმა დაადგინეს, ანუ მარხვით, ლოცვით, მოწყალების გაღებით და ღვთისათვის სათნო სხვა საქმეების კეთებით. კანონის სახით მოძღვარმა არ უნდა დაავალოს ქრისტიანებს ჭამონ მიწა და ნახშირი და სხვა მსგავსი რამ, როგორც ამას გაუნათლებელი ადამიანები ასწავლიან ხოლმე.

ეს იყო მოკლედ ნათქვამი მცირე სწავლებანი, ხოლო ღმერთმა და წმინდა სამებამ გიბოძოთ თქვენ ყველაფრის შეგნება, საკუთარი ცოდვების მუდმივი გახსენება და მათი გამოსწორება. ასევე მაღალმა ღმერთმა დაგიცვათ სატანის ყველა მზაკვრობისაგან და გაგხადოთ ცათა სასუფევლის მკვიდრნი, მეოხებითა ყოვლად კურთხეულისა დედოფლისა ჩვენისა ღვთისმშობელისა და მარადის ქალწულისა მარიამისა და ყოველთა წმინდათა, ამინ.

აღსრულდა ღვთის დიდება.

## თავდასაცავად დაწერილი უსტარები

სამყაროს დასაბამიდან  
7220 წლის 13 იანვრის წერილი

კვირა დღეს, საღამო ჟამს, ყოვლადგანათლებულმა უფალმა და მთავარმა კონსტანტინე ბასარაბ ბრინკოვიანუმ მოძებნა დრო ზოგიერთი საქმის

---

განსახილველად, რომელნიც თითქოსდა აღსრულდა ჩვენი შთაგონებითა და სწავლებით. მისმა უდიდებულესობამ, შურითა და ბოროტებით სავსე ზოგიერთი საეკლესიო თუ საერო პირის მიერ შთაგონებულმა, გამოგვიგზავნა ჩვენ თავისი მოძღვარი, ეპისკოპოსი ნისისი, მეუფე მიტროფანე თასიტელი, რომელიც იყო მთაწმინდელი და ჩამოსული დიონისიუს მონასტრიდან. მან გვითხრა, რომ გადავდგე ჩემივე ნებით, დავტოვო კათედრა, თუ არადა მისი უდიდებულესობა გადამაყენებს ძალით და მისწერს წერილს კონსტანტინეპოლში, რათა განმკვეთონ კიდევაც. ამის გამო სამშაბათს, საღამოს, მივედი მასთან სასახლეში, პირისპირ ვესაუბრე მის უდიდებულესობას და ვუთხარი, რომ უარს ვიტყვი ჩემივე ნებით მღვდელთმთავრობაზე და მაშინვე გადავეცი ეს თორმეტ- მუხლიანი წერილი, რომელსაც აქაც წარმოგიდგენთ, რათა მან, ვინც ჩვენ შემდეგ იქნება, გაიგოს და იცოდეს ჩვენი უდანაშაულობის შესახებ.

„უფალი არს ნათელი ჩემი და მაცხოვარ ჩემდა,“ ფსალმუნი 26. ეს წერილი, რომელსაც ვწერ თქვენი უდიდებულესობის სიბრძნის იმედით, გვედრებით, როგორც მოწყალე და ქრისტეს მოყვარე მთავარს, წაიკითხოთ სიმშვიდით, როდესაც დრო გექნებათ, ყოვლადსახიერი ქრისტეს სიყვარულის გულისთვის. და რაც დაწერილია, გთხოვთ, შეისწავლოთ დაწვრილებით, მართალი სიმართლით და გაიგებთ ჭეშმარიტებას, ამოიღეთ თქვენი უდიდებულესობის გულიდან ის ხიჭვი, რადგან (იცის უფალმა) არ ვარ ისეთი, როგორადაც მთვლის თქვენი უდიდებულესობა და როგორ ცილსაც მწამებენ ჩემი მტრები და, ღვთის იმედით, მალევე დამტკიცდება ჩემი სიმართლე; რამეთუ უბრალოებასა შინა ჩემსა ვიდოდი, ხოლო შენ უფალო წყალობა მიყავ მე. ვიცი რომ ჩემმა მტრებმა უსჯულო სიტყვები მოგიტანეს თქვენ, ჩემს კეთილის მყოფელს, ჩემ წინააღმდეგ და ამ ყველაფერზე განა რა პასუხის გაცემა შემიძლია გარდა შემდეგისა:

- 
- 1) თუ როდესმე ვეცრუე თქვენს უდიდებულებობას, ან თქვენს სახელს, ან თუ მქონდა რაიმე ბოროტის ჩადენის ფიქრი (სანამ ღმერთი თავისი მრავალის მომთმენლობიდან გამომდინარე გამიგრძელებს ცხოვრებას ამ დედამიწაზე), თქვენი უდიდებულებობის ცხოვრებაშიც და თქვენი ხანგრძლივი ცხოვრების შემდეგაც ვიყო მე შეჩვენებული და კრული; ხოლო თუ არა! დაე, ეს წყევლა იმ უსჯულოებზე ახდეს, ვინც უდანაშაულოს წინააღმდეგ ამპარტავნებითა და შურით ილაპარაკა.
  - 2) მეორე, (ღვთის სიტყვის ქადაგებისას) ეკლესიაში, მის გარეთ, ჩუმად, ან თქვენი უდიდებულებობის წინაშე თუ ოდესმე ვთქვი რამე სიტყვა ისეთი, რომელიც არ იყო თქვენი უდიდებულებობის მოსაწონი, მე ის ვთქვი ჩემი მოვალეობიდან გამომდინარე, როგორც სულიერმა მოძღვარმა და არა რაიმე ცბიერებით, რომ დამეზიანებინეთ სულიერად ან ხორციელად.
  - 3) აქ, ამ ქვეყანაში, მე არ მოვსულვარ ჩემი ნებით, ან რაიმე გაჭირვების, ან სიღარიბის გამო; არც სნაგოვოს მონასტრის წინამძღოლობა მიმიღია ძალით. და რასაც მივალწიე მანდ შვიდი წლის განმავლობაში, ყველაფერი, რაც იქ გავაკეთე (არა იმდენად სახლის შემოსავლიდან, არამედ ჩემი შრომითა და ოფლით), ის საქმენი, რომელნიც იქ მე გავაკეთე, თვითონვე ლაპარაკობენ თავიანთ თავზე. თუმცა თქვენს უდიდებულებობას არ სურდა, რომ იქიდან წამოვსულიყავი. ხოლო ისინი, ვინც გახდნენ ჩემი იქიდან წამოსვლის მიზეზი, ღვთის წინაშე აგებენ პასუხს. მაგრამ იქიდან წამოვედ ღირსებით და არავის ჩემთვის არავითარი ბრალი არ წამოუყენებია, რადგან ამკარად ჩანდა, რაც გავაკეთე და შევმატე მონასტერს. არაფერი დამიკლია და დამიშავებია მისთვის.
  - 4) რაც შეეხება რიმნიკუს ეპარქიას, მოწმედ მოვიხმობ ღმერთს, რომელიც გულთა მხილველია. ოცნებაშიც არასდროს წარმომიდგენია, რომ

---

როდესმე გავმხდარიყავი მღვდელთმთავარი, რადგან მივიჩნევ ჩემს თავს დედამიწაზე მცხოვრებ ყველა ადამიანზე მეტად ცოდვილად და უღირსად. მაგრამ რა ჟამს ღმერთმა, რომელიც ყოველივეს განაგებს სასიკეთოდ, ინება ასე: უნაყოფო მიწისაგან და ნაგვისაგან აამაღლოს მდაბიო, რომ დასვას ერის დიდებულების გვერდით, მე რა უნდა მექნა? მე ვილოცე ღვთის წინაშე და მივენდე მას.

იქაც გავჩერდი, რომ არ ჩავთვალოთ ორი თვე, სამი წელი. და რაც აქაც ვიშრომე არა სახლის შემოსავლიდან, არამედ ჩემი შრომითა და ოფლით; ვილოცე ღვთის წინაშე და მივენდე მას.

ჩემი წამოსვლა იქიდან არ იყო ჩემი ნებით. ვიყავი წყნარად და მყოფნიდა ჩემი გაჭირვება; ხოლო შემდეგ წამოვედი ღირსებით და არავის დაუდია ჩემთვის რაიმე ბრალი, არც რაიმე ვალი დამიტოვებია. ასე ვმსახურობდი მე.

5) მიტროპოლიტის ტახტი არ მიმიღია ძალით, არც ქრთამით, არც თხოვნით. ღმერთმა დამსაჯოს, თუ ჩავიდინე რომელიმე მათგანი, არამედ ასე ღვთის ნებით და ასე შთაგაგონათ ღმერთმა თქვენს უდიდებულესობას და ვიყავი გადაყვანილი ერთი ტახტიდან მეორეზე. ვაცნობიერებდი რა, რომ ეს გადაყვანა არის სულიერი (ღვთის ნებით), ვიღვაწე დაუზოგავად, დღე და ღამე ვიშრომე, რათა გამემრავლებინა ღვთისაგან მოცემული ტალანტი და არ აღვრიცხულიყავ მცონარე მსახურთა შორის. და ჩემი მცირე ქონების შესაბამისად ვიღვაწე, რაც შემემძლო. რადგან ვიღვაწე არა მხოლოდ მე-9 ჟამს მოსული მუშაკი, მე იმედი მაქვს თუნდაც მე-11 ჟამს მოსული მუშაკი მივიღებ სრულ საზღაურს „რადგან უფალია იმისა, რაც მისია“ და რაც ვიშრომე ჩემი ხელებით და რაც ვიქადაგე ჩემი ენით, ვისაც უნდა შეაფასოს სწორი გონებით, მიუკერძოებლად და ღვთით, ვერაფერს ვერ ნახავს ისეთს, რაც არ იყოს ღვთის სადიდებლად,



---

თქვენი უდიდებულესობის საპატივცემულოდ და ქვეყნის სასარგებლოდ.

- 6) ბოროტება და შური არ მოჰკლებია ამ სოფელს და არც როდესმე მოაკლდება, რადგან ადამიანი თავისი ყრმობიდანვე არის მიდრეკილი ცბიერებისაკენ და არ ეშვება სხვისი ღირსებისა და სიკეთის შურს. ამიტომაც ვიცი, ბევრი ცდილობს, თავისი ლაპარაკით მოშხამოს თქვენი კეთილი ზნეობა და ეშმაკობით ცდილობენ, გაიძულონ ჩაიდინოთ ის, რაც ყმაწვილობიდან არ ჩაგიდენიათ, ანუ გიბიძგებენ ადამიანთა ცილის წამებისაკენ და თქვენი სულის დაღუპვისაკენ.
- 7) იმათ, ვინც არის მონდომებული ჩემ მიმართ აღძრას ბოროტების მიზეზი, ვიცნობ ისევე კარგად, როგორც ისინი მიცნობენ მე: ერთნიც და მეორენიც უცვლელნი არიან; დიდად მსურს მათთან ერთად დავდგე თქვენი უდიდებულესობისა და ხალხთა სიმრავლის წინაშე პირისპირ და ვამხილო მათი ცილისწამებანი, რომლებსაც დღემდე უშედეგოდ ვებრძვი. თუმცა მე, როგორც მღვდელმთავარს, არ შემეფერის ვინმეზე ვისაუბრო უკეთურად, არც ამბის მიტანა. ღვთის შეწევნით, ასე მგონია, რომ ფრიად შერცხვებით.
- 8) სხვა დანარჩენ ცილის წამებასა და გაცემას შორის, რომლებსაც მიმზადებენ ჩემი მტრები ისე, როგორც იუდა--- ქრისტეს, არის ის, რომ თქვენს უდიდებულესობასთან მიიტანეს ამბავი, თითქოსდა მე დავწერე ოცდაოთხმუხლიანი წერილი თქვენ წინააღმდეგ. ჰკითხეთ მამა ნისისს და მან გითხრათ იმ წერილის შესახებ, რადგან მე თავად წავუკითხე ის მუხლები, რომელიც ამ წერილში იყო ჩამოყალიბებული. იმ შეხვედრას ესწრებოდა ოდრიანეც. მე ვაპირებდი ის წერილი მაშინვე თქვენთვის მეჩვენებინა და ამელო ნებართვა, რათა შემეჩვენებინა ისინი, ვინც ის დაწერა; მაგრამ ზოგიერთებმა არ ისურვეს ეს. და თუ თქვენს უდიდებულესობას

---

სურს, გადმოგვცეს ის წერილი, ნახავთ, „რა პატივს მცემენ“ ჩემი სულიერი შვილები და რას ლაპარაკობენ ჩემზე. ვინც თქვენ მოგიტანათ ამბავი ამ წერილის შესახებ, როგორც ყველა სულიერად სუსტი ადამიანი, დაეცა. და რადგან არც სურვილი და არც საამისო დრო მქონდა, რომ მისთვის წამეკითხა ის წერილი, მან სრულად საპირისპირო ამბავი მოგიტანათ თქვენ. ღმერთმა თითოეულს მიუზღოს საქმეთა მათთაებრ; მე უდანაშაულო ვარ.

- 9) სხვათა შორის იმასაც ლაპარაკობენ, რომ ვარ უცხოელი და არ მეკუთვნის ვიყო მიტროპოლიტი. ქრისტეში ყველანი ერთნი ვართ. თანაც ვლახეთში მხოლოდ მე არ ვყოფილვარ უცხოელი ეპისკოპოსი და მიტროპოლიტი, არამედ სხვა ბევრიც, როგორც ეს ჩანს დიპტიხებიდან და როგორც ეს არის მსოფლიო ეკლესიის მმართველობის წესი. ამ ქვეყანაში მთავრებიც ყოფილან უცხოელები, ისევე როგორც მთელ მსოფლიოში, რადგან ღმერთმა ეს სამყარო შექმნა თავისუფალი ყველასთვის. და რაც არ ხდება არასდროს: გადაყვანა უბრალო ეკლესიაში, ან რომელიმე მონასტერში რაიმე მიზეზის გამო; ერთი და იმავე მიზეზით ორჯერ დასჯა. ყველამ იცის, რომ მსგავსი რამ დანაშაულია. მით უმეტეს, რომ იქნას გადაყვანილი ეპარქიის წინამძღოლი და ამით არ დაზიანდეს მრავალი ადამიანის სული და არ მოჰყვეს ბევრი დანაშაული, როგორც ამის მაგალითი ბევრ ადგილას გვაქვს. და ის, რომ თქვენს უდიდებულესობას შეუძლია გააკეთოს ყველაფერი საკუთარი ნების შესაბამისად. ეს მართალია, მაგრამ მე ვიტყვი, რომ იმოქმედოთ ქრისტეს ნების შესაბამისადაც. და თუ მაინც მთელი თქვენი არსებით დამნაშავედ მთვლით თქვენი უდიდებულესობის წინაშე, გეტყვით: „მიუტევეთ და მიგიტევებთ თქვენ“.

ეს ყველაფერი სიმართლითა და ჭეშმარიტებით დავწერე ჩემს გასამართლებლად. და რაც ვთქვი, იმას აღარ უარვყოფ; იყავნ ნება შენი და ღმერთი მშვიდობისა იყავნ შენ თანა.

---

## კვირა, 3 თებერვალი, პასუხი რომელიც გავეცი მეორე ჯერზე

ყველა შენს სიტყვებში გაიხსენე, რაც მოგელის და არასდროს არ ჩაიდენ შეცდომას. ამბობს წინასწარმეტყველი ზირაქი. ხელახლა უკვე მეორეჯერ ვაწუხებ თქვენს დიდებას ამ მცირე და მდაბალი წერილით და ვამბობ დავით წინასწარმეტყველის სიტყვას: „განრისხდებოდით და ნუ სცოდავთ იმით, რასაც ამბობთ თქვენს გულებში“. (ქრისტეს სიყვარულისთვის) მიაქციეთ ყურადღება ამ წერილს მართალი ფიქრით. თუ გნებავთ, რომ თქვენი უდიდებულებობა იყოს მშვიდი და სულიერი ზიანის გარეშე და მეც რომ ასე ვიყო, გთხოვთ სამართლიანად განსაჯოთ და თქვენს სასმენელთ ნუ მიანდობთ მავანთ, რომ წაგიბილწონ შხამიანი ლაპარაკით, რადგან ამბობს დავით წინასწარმეტყველი: „ცრუნი არიან ძენი კაცთანი და მზად არიან ბოროტების ჩასადენად“.

თქვენო უდიდებულებობავ, როდესაც გამოგზავნეთ ჩემთან მამა ნისისი, მან პირდაპირ მითხრა, რომ მოვიქცე ისე, როგორც მიბრძანა თქვენმა უდიდებულებობამ და ჩემივე ნებით გადავდგე კათედრიდან, თუ არა და 15 დღის შემდეგ მოიმოქმედებთ: გამაგდებთ სირცხვილითა და ზარალით. ხოლო მე, რომ არ გამოვჩნდე თქვენი დიდების წინაშე სკანდალის მოყვარე და რომ დავაცხრო თქვენი დიდების მრისხანება, ვუპასუხე მამა ნისისს, რომ მოვიქცევი ისე, როგორც მიბრძანებთ და თვითონ მოვალ თქვენი დიდების წინაშე, როგორც მოვედი კიდევაც და იმ ჟამს სიმდაბლით მოვუხმე მთელ ჩემს ნებას და მოგმართეთ ცოცხალი სიტყვითა და წერილობით. ვიფიქრე რა, რომ იმის შემდეგ, როდესაც წაიკითხავთ დაწერილ თორმეტ თავს თქვენთვის მირთმეულ წერილში, თქვენ გადაიფიქრებთ და ჰეროდეს (რომელიც

---

გიბიმგებს ამის გასაკეთებლად) გამოაშკარავებთ ცრუდ, რადგან მან არ იცის ალილუიას გალობა და თქვენც არ შემოხვალთ ჩემთან ცოდვაში და მთელი ხალხის სალაპარაკოდ არ გაიხდით თავს. მაგრამ, რადგანაც ვხედავ, რომ მთელი ძალით განგიზრახავთ შეასრულოთ ჩანაფიქრი, კიდევ ერთხელ ვიმეორებ, რომ დავემორჩილები თქვენს ბრძანებას, ოღონდ ვევედრები თქვენს დიდებას, რომ შეიწყალოთ ჩემი ხანდაზმულობა და უძლურება; და როგორც გაგინათლა ღმერთმა გონება (და როგორც მითხრა მამა ნისისმა), გაგიგიათ, სად დაიხარჯა სამი ქისის თანხა, ასევე გაიგეთ სხვა ოთხი ქისის ამბავიც, ნახე მოვალეთა ხელწერილში, ისევ დამიბრუნეთ ჩემს ხელში. ამის შემდეგ მეც დავწერ ჩემი ხელით გადადგომის წერილს. და ეს იმიტომ, რომ დასრულდეს სკანდალები, რომლებიც, როგორც თვლის თქვენი დიდება, ჩემგან გამომდინარეობენ; ასე თქვენი დიდებაც არ იქნება ამ საქმის არსის ცოდნის გარეშე და მეც დავრჩები კმაყოფილი და დასვენებული. და ვინც მოვა ჩემ შემდეგ, იქნება კანონიერი და არა უკანონო მღვდელმთავარი, რადგან გადავდგები ჩემი ნებისთვე. თუ სხვანაირად მოხდება ჩემი გადაყენება, არცერთი ჩემი მემკვიდრე არ ჩაითვლება კანონიერად. და რომც მოხდეს ჩემი (სასულიერო ხარისხიდან) განკვეთა, როგორც ეს მოხდა ალექსანდრიის შემთხვევაში, ეს განკვეთად არ ითვლება, არამედ ეს არის ღვთის ეკლესიისა და წმინდა საიდუმლოებების მასხრად აგდება, რის გამოც ზეცაში მყოფი ღმერთი დასცინის და მასხრად აიგდებს მათ (ვინც მიიღო განკვეთის განჩინება).

თქვენო დიდებულებავ, მოიქეცით როგორც ქრისტიანი და მოწყალე მთავარი და ნუ დამტოვებთ დაჩაგრულს და სახეზე ცრემლმუშურობელს, რამეთუ ცოდვა იქნება. და რადგან ქვეყნის მართვის საქმეში უკან არ იხევთ, რომ ქმნა სამართალი თქვენი ბატონობის პატივსაცემად, ასევე ნუ დაიხევთ უკან საეკლესიო საქმეში, რომ იდიდოს ღვთის სახელმა: რადგან ბოროტების ქმნა იოლია, ხოლო მისი გამოსწორება ძნელი.

---

დაუფიქრდით ამ ყოველივეს და ღმერთმა განგინათლოთ გონება, რომ მოიმოქმედოთ ის, რაც ღირსეულია და მართალი; და მე შევვედრი ღმერთს, რომ მისი წყალობა მარადის იყოს თქვენთანა.

თქვენი დიდებულების ჩაგრული მვედრებელი,  
ანტიმოზ უნგრო-ვლახელი.

ჯანმრთელობა და კეთილდღეობა საყვარელ მკითხველს!

იგავში ნათქვამია, რომ მცენარეთა შორის გამორჩეულად საქებარი აბზინდაა. ასევე მეც, საყვარელნო მკითხველნო, მცოდნე, გამოცდილი და მოღვაწე მესტამბეების წინაშე წარვსდგები ამ წმინდა სახარებით, ანუ ღვთაებრივ სამ ტონალობაზე მუღერი, ტკბილხმოვანი ოთხსიმიანი ვიოლინოთი, რომელიც ჩვენი წმინდა სარწმუნოების ღვთისმეტყველების მთავარ და საწყის ინსტრუმენტს წარმოადგენს. საღმრთო საიდუმლოთა მჭვრეტელი მოციქულების მიერ ნაქადაგები ამ სახარების მეშვეობით ჩვენც შევიცანით განუყოფელი, დაუტევნელი და სრულყოფილი წმინდა სამება, ანუ არშობილი მამა, მამისაგან შობილი ძე და ასევე მამისაგან გამომავალი სულიწმიდა - სამპიროვანი ერთი ღვთაება და ერთარსება.

მე, მდაბალმა, დავინახე რა ღვთისმეტყველების ეს სიღრმე, შევეცადე და ხელი მოვკიდე ამ წიგნის დაბეჭდვის საქმეს. მე აღვივსე ტკბილი ქრისტეს მიმართ წმინდა სარწმუნოებითა და სასოებით, რომელმაც მათეს სახარების 21-ე თავში ბრძანა: „თუ რწმენა გექნებათ და არ დაეჭვდებით, ამ მთასაც რომ

---

უთხრათ აიწი და მთაში ჩავარდიო, ასეც მოხდება. ყველაფერს, რასაც ლოცვაში რწმენით ითხოვთ, მიიღებთ.“

დიდი შრომითა და ღვაწლით მოვკიდე ხელი ამ სულისათვის სასარგებლო საქმეს, რომელიც შესრულდა პირველ რიგში ღვთის ნებითა და განგებით და ასევე მისი ბრწყინვალეების ყოვლადპატიოსანი მართლმადიდებელი ქრისტიანის, სრულიად უნგრო-ვლახეთის კურთხეული მთავრის, იოან კონსტანტინ ბასარაბ ვოევოდას, შემოწირულობით და ჩემი, მღვდელმონაზონთა შორის უმცირესის, ივერიიდან მოსული, მესტამბე ანთიმოზის, შრომით.

მაშასადამე, გთხოვთ ძმური და კეთილი ნებით, შეჩვენების გარეშე, ჩემი უცოდინრობის და უყურადღებობის გამო დაშვებული შეცდომების გამოსწორებას. ასევე გთხოვთ ილოცეთ ღვთის წინაშე ჩემი მდაბალი და უღირსი სულისათვის.

ჩემს კეთილისმყოფელსა და მოწყალე მბრძანებელს, სრულიად რუმინეთის კურთხეულ, დიდებულ, ბრწყინვალე, ყოვლადკეთილ, საქებელ მართლმადიდებელ და ქრისტეს მოყვარე მთავარს, იოანე კონსტანტინე ბასარაბ ვოევოდას, ჩემგან ვუთვლი მეტანიით დადასტურებულ თაყვანისცემას, ხოლო ღვთისგან ვუსურვებ მადლსა და კურთხევას.

დიდო და ყოვლადბრწყინვალეო ბატონო, მთელი ქმნილება: ხილული და უხილავი, პირმეტყველი და პირუტყვი, რომელიც მაღალი ღმრთის სიბრძნითაა შექმნილი და რომელიც მისწრაფვის, რომ შეასრულოს მისთვის დავალებული მისია. ასევე ყველა სტიქიონი, როგორც ხილული სამყაროს პირველმიზეზნი, აიძულებენ ბუნებას, რომ მოისხას და გასცეს თავისი ნაყოფი შესაბამის ჟამს.

---

მაგრამ ყველაზე მეტად ადამიანი, რომელიც ყველაზე გამორჩეული და პირმეტყველი ქმნილებაა, ცდილობს გამოიღოს მრავალი სახის ნაყოფი როგორც ხორციელი, ასევე (უფრო მეტად) სულიერიც, რადგან თვითონაც ორივე ნაწილისაგან – სულისა და ხორცისაგანაა შედგენილი. და ყველაფერი მისთვისაა შექმნილი, მისთვისაა მოცემული მთელი ეს გრძნობიერი სამყარო თავისი მშვენიერებითა და სილამაზით, როგორც მრავალი ყვავილის დამტვევი ბაღი, რომლისგანაც ადამიანი ირჩევს ყველაზე კეთილსა და მშვენიერს და მისით იმკობს საკუთარ თავს. ასევე ღვთის შთაბერვით მას მიეცა ზეციური სამყაროც, რომლისგანაც, თუ ინება, მიიღებს მადლს საკუთარი სულიერი ხატის შესამკობად და ამით მიემსგავსება თავისი შემოქმედი ღმრთის ხატებას.

მიუხედავად იმისა, რომ ადამის მოდგმის ბევრმა შვილმა მეტად ხორციელის მიმართ ლტოლვა გამოავლინა, რითიც ჭეშმარიტების გზას აცდა და დაიკარგა. ბევრმა სხვამ კი სულიერი შეიყვარა და ამით გადიდდა ამქვეყნად და იმქვეყნადაც დაიმკვიდრა მარადიული ცხოვრება. მათ შორის შენც, დიდებულო და კურთხეულო მთავარო, გამოჩნდი ვითარცა სულიერ საქმეთა მოშურნე და აღმსრულებელი და მთელი ღვაწლით ცდილობ გამოიღო მრავალფერი სულიერი ნაყოფი, რომ შენს მწყურვალე მართლმადიდებელ ერს მისცე სულიერი წყარო. როგორც ამბობს დავით წინასწარმეტყველი, ყველაფერზე მეტად შენ შეიყვარე ღვთის სახლის მშვენება, ანუ წმინდა ეკლესია და, მიუხედავად იმისა, რომ სხვა მრავალი შემოწირულობებითა და ძღვენით ამშვენებ შენ ღვთის სახლს, ყველაზე მეტად მეტყველი სამკაულით, წმინდა წერილის დაბეჭდვა–გავრცელებით, გამოიღე ყველაზე დიდი ნაყოფი სხვა ყველა შენს წინამორბედთან შედარებით და ამით გამოაჩინე ყოველთა მართლმადიდებელთა მიმართ შენი კურთხეული სიყვარული. ამიტომაც სულისათვის სასარგებლო სხვა მრავალრიცხოვან დაბეჭდილ წიგნებთან ერთად შენ, დიდო მთავარო, ეს სულიწმინდით შთაგონებული და დავით

---

წინასწარმეტყველის მიერ ნაგალობი წიგნიც შეიყვარე, რომელსაც საზოგადოდ *ფსალმუნს* ვეძახით.

თუ ვინმეს სურს, ღირსეული ხოტბა შეასხას ამ წიგნს, უნდა შეხედოს სულიწმინდის ზებუნებრივ მოქმედებებს და იმ სიტყვებს, რომელსაც შეიცავს ყველა ფსალმუნი; და ასე შეიცნობს, რაოდენ დიდი ქების ღირსია ეს წიგნი. შენო უდიდებულესობავ, მიუხედავად იმისა, რომ იგი უწინ სხვებმაც დაბეჭდეს სხვადასხვა სახით, შენ დაინახე რა ამ წიგნში არსებული სულიერი საგანძური, ახლა მეტი ღვაწლით ხელახლა გამოაქვეყნე ის და სხვებთან შედარებით უფრო მეტად შეამკე, ანუ ამჟამინდელ გამოცემაში ყველა კანონი, ტროპარი და ლოცვა უშუალოდ რუმინულ ენაზე გადაითარგმნა და დაიბეჭდა, რათა ფსალმუნთა წიგნი ყველა მკითხველისათვის იყოს მეტად გასაგები და სასარგებლო.

თქვენო უდიდებულესობავ, შენ მიბრძანე, რომ მთლიანად შენი ხარჯით დავბეჭდო ეს წიგნი და საჩუქრად დავურიგო მართლმადიდებელ ქრისტიანებს. ისინი დღეის იქით ვალდებულნი იქნებიან, ევედრონ ყოვლადძლიერ ღმერთს შენი სიცოცხლისათვის, ძლიერებისათვის და ნეტარებისათვის, რომ დაცული იყო, როგორც შენთვის ღვთისაგან ბოძებული ერის მმართველი. და როგორც მოციქულთა სწორმა კონსტანტინემ გაამრავლა და გააძლიერა მართლმადიდებლობა, დაე, შენც გებოდოს ღვთის სასუფევლის დიდების გვირგვინი. ამინ.

შენი დიდებულებისათვის მლოცველი მღვდელმონაზონთა შორის, მდაბალი და მცირე ანთიმოზ ივერიელი მესტამბე.

მის მაღალ ღირსებას, დიდ ბრწყინვალებას, მზესავით დიდებულს და ღვთის ნებით სრულიად უნგრო-ვლახეთის ბატონსა და მბრძანებელს, იოან



---

კონსტანტინ ბასარაბ ვოევოდას, ღვთისაგან გებოდოს კეთილი ცხოვრება, წყალობა, ცხოვნება და სრული ნეტარება.

ნათქვამია, რომ ღმერთს და ეკლესიას არასდროს მოაკლდება ერთგული მეომრები (სინესიუსის მე-V ეპისტოლე); ანუ არასდროს და არცერთ შემთხვევაში უფალს არ მოაკლდება ღვთისგან მოვლენილი მებრძოლენი, არც ღვთის წმინდა ეკლესიის უშიშარი ჯარისკაცები, რომლებიც ჭეშმარიტებით ანთებულნი, მცოდნენი, ნებისმიერი მწვალებლური ფალანგის მძლენი და ნებისმიერი ელინური თუ ათეისტური მცდარი სწავლების წინააღმდეგ გაწვრთნილნი არიან, რომლებიც მხოლოდ წმინდა წერილის დამარწმუნებელი სიტყვებითა და მტკიცებულებებით შეიარაღებულნი კი არ არიან, არამედ, უფრო მეტიც, აზროვნებენ შეუმცდარად და ლოგიკურად, რასაც იყენებენ ჭეშმარიტების იარაღად ხან თავდაცვისათვის, ხან კი მოგერიებისათვის.

მათეს სახარების ოცდამეორე თავში ნათქვამია: „აჰა, ესერა მე თქვენთანა ვარ აღსასრულამდე სოფლისა“ შესაბამისად ღმერთმა განაწესა, რომ სოფლის აღსასრულამდე ჭეშმარიტება ყოველთვის მართლმადიდებელ მორწმუნეებთან იქნება. ამავდროულად, როგორც გვასწავლის თავად უფალი წმინდა სახარებაში, ჩემ გარეშე არაფრის კეთებას შეძლებთო, ანუ ეს იმას ნიშნავს, რომ ღვთის დახმარების გარეშე არაფრის მაქნისები ვართ.

ამიტომ ჩვენს დროშიც არიან მართლმადიდებლობისათვის და რწმენისათვის უშიშარი მებრძოლები და დამცველები. შესაბამისად ღვთის განგებით დიდმა სუფრაჯმა კონსტანტინე კანტაკუზინომ, თავადთა შორის უკეთილშობილესმა და უპატიოსნესმა კაცმა, დაინახა რა, რომ ბევრი კეთილი მართლმადიდებელი ადამიანი, აგრეთვე ზოგი უმეცარი და გაუნათლებელი პიროვნება ბრკოლდებოდა ზოგიერთი ბერძნული დოგმატის გამო, როგორცაა მაგალითად: ბედისწერისა და იღბლის საკითხი და განსაკუთრებით კალვინისტური და ათეისტური სწავლებები, ასევე სხვა რამდენიმე საჭირბოროტო პრობლემა, ინება და სთხოვა ყოვლად ბრძენსა,

---

ყოვლად აღმატებულსა და ყოვლად პატიოსანს, მაცხოვრის დიდი ეკლესიის დიდ ლოგოფეტს, მეუფე იოანე კარიოფილს, რომელიც მანამდე ნამყოფი იყო ბუქარესტში ღვთისმსახურების ჩასატარებლად, რომ თავისი სიბრძნითა და ცოდნით გაეცა პასუხი მსგავს საკითხებზე. მით უმეტეს, მას ეს სიბრძნე და ცოდნა მიღებული აქვს ღვთის მადლით, რომელიც დაფუძნებულია წმინდა მამების კანონებზე, ჩვენი წმინდა და კათოლიკე ეკლესიის სწავლებაზე მართლმადიდებელი ქრისტიანების განსამტკიცებლად, მწვალებელთა და ურწმუნოთა სამხილებლად და შესარცხვენად. უფრო მეტიც, კონსტანტინ კანტაკუზინოს თხოვნით მეუფე იოანეს მიერ მომზადებული პასუხები უნდა ყოფილიყო დაწერილი მარტივი ენით, ადვილად გასაგები და ზემოთ ხსენებული საეკვო საკითხებისათვის ნათელის მომფენი.

ამიტომაც ყოვლადბრძენმა მოძღვარმა, როგორც კი ხსენებული თავადის შეთავაზება მიიღო, დაინახა, თუ რა სარგებელი ექნებოდათ ამ შრომის შედეგად მორწმუნეებს და დიდად იღვაწა იმისათვის, რომ ეს სწავლებანი ჩამოეყალიბებინა. ამ მიზნით მან მთელი სიცხადით ახადა ფარდა და განაზნა ცრუ და უგუნური სწავლებანი ისევე, როგორც ობობის ქსელები, ამავედროულად, ჩვენი წმინდა ეკლესიის სწავლება და სახარებისეული ჭეშმარიტება დაიცვა და განმარტა.

ჩამივარდა რა ხელში ეს ნაშრომი, მე ის სიღრმისეულად და დიდი ყურადღებით წავიკითხე, დავინახე, რომ იგი ძალზედ სასარგებლოა თითოეული მართლმადიდებელი მორწმუნესათვის ცრუ დოგმატების დასამხოვად და ჭეშმარიტი სწავლების დასამტკიცებლად. უდიდესი სიხარულითა და ღვთაებრივი მოშურნეობით გამიჩნდა სურვილი, რომ დამებეჭდა ეს წიგნი მორწმუნეთა სულიერი საჭიროება–სარგებლობისათვის და ასევე იმ გმირების სახელების უკვდავსაყოფად და მათი სულების საცხოვნებლად, რომლებმაც დიდად იღვაწეს მართლმადიდებელი სარწმუნოების დასაცავად.

---

მაგრამ, თქვენო ყოვლადუმალღესობავ, ბატონო ჩვენო, ვერ გავბედე მისი დაბეჭდვა გარკვეული შესწორებისა და გამართვის გარეშე. ამ საქმისთვის ვთხოვე და დავიხმარე ყოვლადბრძენი, უგანათლებულესი და ყოვლად პატიოსანი ბატონი- კომინიტეს ტრაპეზუნელი, რომელსაც ჭეშმარიტი დოგმატების საკითხში მას აქვს დიდი ცოდნა და გამოცდილება. იგი არამარტო მართლმადიდებელი დოგმატების კარგი მცოდნეა, არამედ აქვს განსაკუთრებული სასოება სიწმინდეთა მიმართ, არის ღვთისმოსავი, ყოვლად პატიოსანი და მხურვალე მუშაკი.

მე მას მივმართე, როგორც აქაური განთქმული სკოლის ერთ-ერთ მოღვაწეს; ეს სკოლა ღვთის სიყვარულითაა დაარსებული, შენი უბრწყინვალესობის მიერ შეწირული დიდი თანხის მეშვეობით, რომელიც თანამემამულეთა და აქ ჩამოსულ უცხოელთა სწავლის მოყვარეთათვის არის გახსნილი.

მისმა უგანათლებულესობამ იშრომა რა ღირსეულად და თავდადებულად, გაასწორა არა მხოლოდ ის ადგილები, რომლებიც შეცდომით, ან დავიწყების გამო უყურადღებოდ იყო დარჩენილი, არამედ სხვა ადგილებიც, რომლებიც ძნელად გასაგები იყო, ისინი განმარტა და ზოგი რამ დაამატა, რათა უფრო გასაგები გამხდარიყო იმათთვის, ვისაც მანამდე არ ესმოდა. ღვთის შეწევნით დაგვირგვინებულ ამ ნაშრომს გიძღვნი, როგორც შენი მადლიერი ადამიანი და შენი მზრუნველობის ქვეშ მყოფი ქვეშევრდომი. ეს ღირსეული წიგნი საამაყო და, ამავდროულად, სულისათვის ძალზედ სასარგებლო ნაშრომი იქნება, ერთი მხრივ, მართლმადიდებლების განსადიდებლად, მეორე მხრივ, მოწინააღმდეგეთა სამხელად და შესარცხვენად; წიგნი ზომით არის მცირე, მაგრამ შინარსით არის ძალზედ დიდი.

ამიტომაც ღვთის მიერ დიდებულო და უბრწყინვალესო კეთილისმყოფელო ბატონო, მიიღე კეთილგანწყობით ძალზედ სასარგებლო

---

სულიერი სახელმძღვანელო. შეხედე მას და შეაფასე არა სიდიდის, არამედ შინაარსის მიხედვით და განსაკუთრებით იფიქრე შენი მსახურების მადლიერებაზე, შენ მიერ ყოველდღიურად აღსრულებული მრავალ კეთილ საქმეზე.

ამ გულუხვი შემოწირულობების გამო, რომელთაც ვლებულობთ შენი უმაღლესობისაგან, მარადის ვრჩებით შენს მევალედ. განუწყვეტლივ ვევედრებით მოწყალე და ყოვლადკეთილ ღმერთს, რომ დაიცვას და დაიფაროს ღვთის მადლით შენი უდიდებულების ბრწყინვალეობა მისი ყოვლადმღიერი მარჯვენით და თავისი ფრთების ჩრდილის ქვეშ შეგიფაროს და დაგიცვას ნებისმიერი მტრის თავდასხმისაგან, მტკიცედ და ბედნიერად გამყოფოს შენს მაღალ ტახტზე ხანდაზმულობამდე, იმისათვის, რომ გააერთიანო და მართო შენთვის ჩაბარებული ქრისტეს სამწყსო და გააძლიერო მსოფლიოში ყველგან მყოფი მართლმადიდებელი ქრისტიანი. ამინ!

მღვდელმონაზონთა შორის ყოვლადმდაბალი და შენი ბრწყინვალე უდიდებულების უმორჩილესი მსახური, მესტამბე, ანთიმოზ ივერიელი.

ღვთისმოსავობაში ყოვლადბრწყინვალეს, კეთილშობილს და კეთილისმყოფელს, ყოვლადბრწყინვალე მთავარს, იო კონსტანტინე ბასარაბ ვოევოდას, სრულიად უნგრო-ვლასეთის მბრძანებელს, ამა ცხოვრებასა შინა ვუსურვებთ ჯანმრთელობას, დღეგრძელობას, წარმატებას და მარადიულ ცხოვნებას.

---

თქვენი მმართველობის ჟამს, აჰა, ნაყოფი გამოიღო უცხო თესლმა, ანუ სლავურმა გრამატიკამ – ცნობილმა კეთილმა და საჭირო ხელოვნებამ. ყველასათვის საკვირველი და სასიხარულო ამბავია, როდესაც მის მამულში სხვა ენის თესლი გამოიღებს ნაყოფს, რადგან ხედავს ახალ და უცნობ ხილს, რომელიც მისთვის მანამდე არ იყო ცნობილი. გასაოცარია, რომ ჩვენს ერს აქამდე არ გააჩნდა ეს თესლი, ანუ ვერ ახერხებდა სლავურ ენაზე დაწერილი წიგნების სწორად წაკითხვას და არც მისი ნაყოფი იყო ცნობილი ანუ წაკითხული ტექსტის სწორი გაგება. თქვენი ღვაწლის შედეგად, დიდო მთავარო, დადგა ბედნიერი ჟამი, როდესაც უკვე შესაძლებელი გახდა სლავური ენის სწორი გაგება.

და თუ სლავური ენა თავიანთ შინაურებში, ანუ სლავებში არის დიდად განდიდებული და პატივცემული, ანუ იქ, სადაც ის გამოიყენება, როგორც მშობლიური ენა, მით უმეტეს ჩვენ, რომლებიც ვიყენებთ მას არა როგორც მშობლიურს, არამედ როგორც უცხოსა და ნათხოვარს, აღფრთოვანებით უნდა ვადიდებდეთ და ვაფასებდეთ მას, რომ შეგვეძლოს მისი სწორი გამოყენება.

მაშასადამე, რომელია და რას წარმოადგენს ის კეთილი ნაყოფი, რომელიც გვეძლევა სულიწმიდის მადლით? ესაა, მაგალითად, სული ადამიანის სხეულში და ნათელი მზისგან გამოსული, ასევე მარილი საკვებისათვის. როგორც სხეული სულის გარეშე მკვდარია, როგორც მზე სინათლის გარეშე არ ანათებს და როგორც საკვები უგემურია უმარილოდ, ასევეა კითხვა და წერა გრამატიკის გარეშე უშინაარსო.

თუ ვინმეს სურს, იცოდეს ასო-ბგერების და მარცვლების ბუნება და თუ სურს, რომ სიტყვები სწორად გამოთქვას და სწორი მახვილი დაუსვას, მან უნდა შეისწავლოს გრამატიკის პირველი ნაწილი, ანუ ორთოგრაფია.

თუ სურს ვინმეს, მეტყველება დაჰყოს სწორ ნაწილებად, მან უნდა ზედმიწევნით შეისწავლოს მეორე ნაწილი, ანუ ეტიმოლოგია.

---

თუ ვინმეს სურს, გამართული მეტყველება შეძლოს, მან უნდა აითვისოს სინტაქსის წესები. ვისაც სურს მელექსეობის წყობილსიტყვაობას დაეუფლოს, მან უნდა შეისწავლოს პროსოდია<sup>2</sup>.

პირდაპირ რომ ვთქვათ, იმავე გონების წესებმა, რომლებმაც წარმოშვეს ბერძნული, ლათინური, თუ ნებისმიერი სხვა ენა, შექმნეს სლავური ენაც. და ამ წესების ცოდნა საშუალებას გვაძლევს ენა გრამატიკულად განვასხვავოთ მისი შემადგენელი ნაწილებისაგან, ვიცოდეთ სახელების ბრუნვა და ზმნების უღლება მათი შინაარსისა და დაბოლოების მიხედვით და მივხვდეთ ხოლმე სიტყვებისა და მეტყველების უზუსტობას, ანომალიას, ზედმეტობას ან ცვლილებას. ერთი სიტყვით, გრამატიკას ითვისებს ის, ვინც მას გულმოდგინედ სწავლობს და უნდა სწორედ მეტყველება და წერა. ეს ყველაფერი გვაკლდა ჩვენ, რადგან არ გაგვაჩნდა მეტყველების მომწესრიგებელი გრამატიკა.

ამიტომაც ბევრს და, მით უმეტეს, ჩვენ მიგვაჩნია, რომ სლავური გრამატიკის შესასწავლად ეს სახელმძღვანელო წიგნი არის ძალზედ სასარგებლო, რადგან ჩვენს ეკლესიებში მიჩვეულები ვართ სლავურენოვან ღვთისმსახურებას; მაგრამ, რადგანაც არ ვიცნობთ ჩვენთვის ამ უცხო ენას, ხშირად ვუშვებთ შეცდომებს. თქვენო უდიდებულესობავ, თქვენ იცოდით გრამატიკის მნიშვნელობა, ხოლო ჩვენ, მკითხველებს, ღვთის იმედი გვქონდა, რომ გვეღირსებოდა ასეთი წიგნი. და ამ იმედმა გაამართლა თქვენი მმართველობის დროს, რადგან ვხედავთ, რომ ამ თესლმა ჩვენს ქვეყანაში გაიდგა ფესვი და თქვენს შრომას ღვთის დახმარებაც ეწევა, რადგან ქრისტეს სიყვარულით სხვა კეთილ საქმეებთან ერთად თქვენ მცირეწლოვანი ბავშვებისათვის სლავური ენის შემსწავლელი სკოლაც დაარსეთ.

მაგრამ დავანებოთ თავი გრამატიკის თაობაზე ზედმეტ ლაპარაკს; თუ რამდენად მნიშვნელოვანი და ფასეულია იგი, ამას დრო გამოაჩენს. მუხლი მოვიდრიკოთ ლოცვით და გულმოდგინედ ვევედროთ ღმერთს, რომ მისი

---

ნებით ეს წიგნი კეთილად იქნეს გამოყენებული ღვთის, ყოვლადწმიდა ღვთისმშობლის და ყოველთა წმიდათა სადიდებლად და, რა თქმა უნდა, მართლმორწმუნე ერისთვის სულიერი და ხორციელი სარგებლის მისაღებად.

ხოლო თქვენი უდიდებულესობისათვის, რომელმაც იზრუნეთ ამ წიგნის გამოცემისათვის, ღვთისაგან ვითხოვოთ დღეგრძელი ცხოვრება, ხორციელი ჯანმრთელობა, მეცნიერება და ყველაფერში წარმატება, ხოლო ზეცაში ყველანაირი ნეტარებისა და სიკეთის მიღება. ამიტომაც ამ მცირე წიგნით ხელში, რომელიც თქვენი ბრძანებით ახლა დაიბეჭდა, მუხლს ვიდრეკთ თქვენი ბრწყინვალე უდიდებულესობის წინაშე და გვედრებით, იყავით მოწყალე ჩვენდამი, ვინც ვიმუშავეთ მისი გამოცემისათვის.

ღვთის წინაშე ყველაზე უღირსი მლოცველი, მღვდელმონაზონთა შორის ყველაზე მდაბალი და თქვენი უდიდებულესობის ერთგული, ანთიმოზი, მესტამბე.

ყოვლად სათნოს, ყოვლად ბრწყინვალეს, ყოვლად ნათელს და ღვთივგვირგინოსან მთავარსა და სრულიად უნგრო-ვლახეთის მმართველ ბატონს, იოან კონსტანტინ ბასარაბ ვოევოდას, ვუსურვებთ ცხოვნებას, დღეგრძელობას, ღვთის მფარველობას და ყველაზე დიდ ბედნიერებას. ყველა მგრძნობიარე და მოაზროვნე არსების საწყისი, შუა და დასასრული, უფალი და მბრძანებელი არის ყოველთა შემოქმედი ღმერთი. ხოლო მთვარისქვეშეთში არსებული ყველა არსების მეუფე და გვირგვინი არის ადამიანი. ხოლო ადამიანის დანიშნულება, რისთვისაც არის ის ღვთისაგან შექმნილი, არის ნეტარება და თავად ღმრთის მოპოვება, რადგან ადამიანისათვის შეიქმნა მთელი ეს სამყარო, ხოლო, როგორც ნათქვამია, ადამიანი ღვთის მიერ შეიქმნა, რომ მოიპოვოს ღმერთი.

---

ღმერთს მოიპოვებენ ის ადამიანები, რომლებსაც მართლა სწამთ ის და ზედმიწევნით ასრულებენ მცნებებს. ხოლო ყველა მცნება ამ ორ მთავარშია გამოხატული: გიყვარდეს ღმერთი და შენი მოყვასი. მაშინ მიიღწევა ღვთის სიყვარულის შეცნობა, როდესაც, როგორც ვთქვი, ზედმიწევნით სრულდება წმინდა მცნებები, რადგან თავად უფალი ბრძანებს სახარებაში: თუ გიყვარვართ, დაიცავით მცნებანი ჩემი.

მოყვასის მიმართ სიყვარული მაშინ მიიღწევა და სრულდება, როდესაც გვიყვარს საქმით, მთელი სულით, როგორც საკუთარი თავი. ისე როგორც ამას ბრძანებს ღმერთი. ნათქვამია: გიყვარდეს უფალი ღმერთი შენი მთელი გულით, მთელი სულით და მთელი შენი ძალით; ხოლო მოყვასი შენი, როგორც საკუთარი თავი. ასევე ნათქვამია: ამას გიბრძანებთ, რათა გიყვარებოდეთ ურთიერთას, რადგან მაშინ მიიღწევა ასეთი სიყვარული, როდესაც სიტყვით და საქმით სიკეთეს ვუკეთებთ ერთიმეორეს როგორც ხორციელში, მაგრამ განსაკუთრებით სულიერ და მაცხოვრებელ საქმეებში თითოეული ჩვენი ძალებისა და შესაძლებლობების შესაბამისად.

ხოლო მე, მესტამბეობის საქმიანობის გარდა, სხვა საშუალება არ გამაჩნია ჩემი მოყვასების დასახმარებლად და ამიტომაც არასდროს მოკლებიათ და არც როდესმე მოაკლდებათ, შეძლებისამებრ, ჩემს ქრისტესმიერ ძმებს სულისათვის სასარგებლო და მაცხოვრებელი წიგნები.

ამიტომაც ვიპოვე რა ეს წიგნი, რომელიც არის ყოვლად ბრძენი და უგანათლებულესი პროფესორის, ბატონ სევასტოს ტრაპეზუნელი კიმენიტის, ნაშრომი, წავიკითხე ის და, ჩემი აზრით, ჩავთვალე ძალზედ სასარგებლოდ და საჭიროდ ნებისმიერი მართლმადიდებელი ადამიანისათვის, განსაკუთრებით ეკლესიის სასულიერო პირთათვის, განათლებისა და სწავლის მოყვარულთათვის და ზოგადად ყველა განათლებული ადამიანისათვის. მით უმეტეს, ის დაწერილია მარტივი ენით და გასაგებად ადვილია. ამიტომაც ვინებე მისი დაბეჭდვა მკითხველების სასარგებლოდ.



---

წიგნის მბეჭდავებში არსებობს ტრადიცია, რომ წიგნის დაცვისა და მკითხველთათვის მისი რეკომენდაციის მიზნით თითოეული წიგნი მიეძღვნება რომელიმე მნიშვნელოვან საეკლესიო თუ პოლიტიკურ პირს. ამიტომაც თქვენზედ მლოცველი და მსახური, ყველაზე მცირედთაგანი [მღვდელმონაზონი ანთიმოზი], გწირავთ ამ წიგნს თქვენს აღმატებულებას, ღვთისაგან დიდებულსა და დაცულ ბატონ მთავარს იმ უთვალავი სიკეთეებისათვის, რომელიც გაგიკეთებიათ ჩემთვის მცირედთაგანისათვის და იმისთვის რომ ეს წიგნი თქვენ მიერ იყოს დაცული და მკითხველთათვის რეკომენდირებული. მიიღებთ რა ამ წიგნს, გთხოვთ, მაღლიერების ნიშნად ხელი შემოწყოთ კეთილი და სასარგებლო საქმეების გაკეთებაში.

ხოლო ღვთის ყოვლისმპყრობელი, ყოვლისათვის ყოვლადმზრუნველი და ყოვლის მხედველი განგება ყოფილიყოს თქვენთვის მაცხოვრებელი და თქვენი ღვთივგვირგვინოსანი ნათელის მფარველი ყოველი ავისა და ბოროტისაგან. გაგამლიეროთ ღმერთმა თქვენს ტახტზე ბატონობისას დღეგრძელობით, ბედნიერებით და ყველაზე ღრმა და ყველაზე სრულ ხანდაზმულობამდე მიღწევით, რომ გეშრომოთ ქრისტე ღმრთის მიერ თქვენთვის ბოძებული სისავსის დასაცავად და განსავითარებლად და ყველა მართლმადიდებელი ერისთვის კეთილი სახელის, დიდებისა და ქების მოსახვეჭად.

ხოლო ამ წუთისოფლიდან გასვლის შემდეგ გიბოძოთ თქვენ ყველას ცათა სასუფეველი აწ და მარადის და უკუნითი უკუნისამდე. ამინ.

ქრისტესშობიდან 1701 წელი ივნისის თვე.

თქვენი ღვთივდაცული ბრწყინვალეებისთვის მდაბალი მლოცველი და მსახური ანთიმოზ მღვდელმონაზონი, მესტამზე ივერიიდან.

---

ყოვლად ბრწყინვალეს, დიდებულს და კეთილმორწმუნე მთავარს, სრულიად რუმინეთის მბრძანებელს, იო კონსტანტინ ბასარაბ ვოევოდას ჩვენგან მდაბალი თაყვანისცემა.

ცნობილია, რომ მაგნიტი ყოველთვის ჩრდილოეთისაკენ იყურება, ცეცხლი ყოველთვის ზეცისკენ მიემართება, ქვა ყოველთვის დედამიწის შუაგულისკენ ვარდება, წყლები ყოველთვის ზღვებისკენ მიედინებიან; მოკლედ რომ ვთქვათ, ყველა საგანი თავისი სტიქიისაკენ მიემართება.

ამიტომაც არაა გასაკვირი, რომ ყველაფერი, რაც შენს ქრისტესმოყვარე, მორწმუნე და ქრისტიან სულში არსებობს, მიემართება ახალ აღთქმაში დაწერილი ღვთის სიტყვებისაკენ, როგორც თავისი ბუნებრივი სტიქიონისაკენ. რატომ? იმიტომ, რომ სიწმინდე სიწმინდისაკენ მიილტვის, რაც ნაკურთხია ნაკურთხისაკენ, ასევე რაც ქრისტიანულია ქრისტიანულისაკენ.

ბევრი ჭეშმარიტად ქრისტიანული, ღვთისთვის სათნო და სულისთვის სასარგებლო წიგნი შენი უდიდებულესობის ხარჯებით ხალხის სასარგებლოდ დაბეჭდილა, მაგრამ ყველაზე მეტად სასარგებლო და მაცხოვრებელი სულისათვის არის ეს, ახალი აღთქმა. რადგან, წმინდა პავლე მოციქული ამბობს, რომ სახარება ყველასათვის, ვისაც სწამს, ყველა მორწმუნესათვის არის მაცხოვრებელი ღვთის ძალა და ამით აჩვენებს, რომ ყველა საეკლესიო წიგნთა შორის იგი არის სულისათვის ყველაზე სასარგებლო და მაცხოვრებელი.

სახარება არის მახვილი, რომელიც ამსხვრევს ბოროტის ყველა იარაღს, რომლითაც ვძლევთ ყველა განსაცდელს, სიმამაცით ვითმენთ ყველანაირ წინააღმდეგობას, დევნას, მწუხარებას, სიდუხჭირეს, სიკვდილს და ამით ვემსგავსებით მრავალვნებულ მაცხოვარ იესო ქრისტეს. სახარების მეშვეობით ვამარცხებთ იუდეველებს, ვარცხვენთ ამა სოფლის ცრუ ბრძენთა უგუნურ სიბრძნეს. სახარებით დაამდაბლა რომის ამპარტავნება პავლე მოციქულმა და

---

ქრისტიანობაში მოაქცია ის; იოანე მოციქულმა სახარების ნათელით გაანათლა დაბნელებული საბერძნეთი; პეტრე მოციქულმა მოაქცია მთელი იუდეა და ყველა მოციქულმა ერთად აღაშენა სულიერი ვენახი, ანუ ეკლესია; დაიმორჩილეს აღმოსავლეთი, დაამარცხეს ტირანები ისე, რომ არც ვითომც გონიერ შეგონებებს დაუჯერეს, რომ თავი დაენებებინათ ქადაგებისთვის, არც წამებას, არც დევნას, არც სიკვდილს გაექცნენ, არამედ სიხარულით მიდიოდნენ ხალხში საქადაგებლად.

სახარება გვიცხადებს მას, ვინც ჩვენთვის ხორცი შეისხა, ივნო და ჯვარზე აღესრულა, გვიცხადებს მის სრულ ღვთაებრიობას და სრულ კაცობრიობას; გვიცხადებს მაცხოვრის ძალაუფლებას სიცოცხლეზე და სიკვდილზე. სახარებით ჩვენ შევურიგდით ღმერთს, ნათლობის საიდუმლოს მეშვეობით [უძღვები] შვილებისაგან, ზეციური მამის შვილებად ვიქვეცით. „რამეთუ ქრისტე იესუს მიერ სახარებისა მისგან მე გშვენ თქვენ“ – [ნათქვამია პავლე მოციქულის კორინთელთა მიმართ პირველ ეპისტოლეში].

მამასადამე, ყოვლადბრწყინვალეო მთავარო, როგორ ფიქრობ, რა საზღაურს მიიღებ გულუხვი ღმრთისაგან ამ ღვთივშთაგონებული და სულისთვის სააარგებლო ახალი აღთქმის წიგნის დაბეჭდვისათვის? ჭემმარიტად დიდი ქება და უკვდავი პატივი მიიღო ეგვიპტის იმპერატორმა პტოლემეუსმა ბერძნულ ენაზე ბიბლიის გადათარგმნისათვის, ხოლო შენი უდიდებულესობა უფრო მეტ პატივსა და საზღაურს მიიღებ ორთავე სოფელსა შინა, რადგან მაცხოვარ იესო ქრისტეს ეს ახალი აღთქმა მშობლიურ ენაზე გადათარგმნილი შენი ხარჯებით დაბეჭდე და გაავრცელე ყველას სასარგებლოდ.

ამიტომაც ვადასტურებ, რომ უექველად უხვად მოიმკი შენი ქრისტიანული კეთილი საქმეების ნაყოფს: ამ ცხოვრებაში გექნება მშვიდი სიმტკიცე შენს მაღალ ტახტზე მართველობისას, ასევე დღეგრძელი ცხოვრება, მტრებზე გამარჯვება და შენს ბრწყინვალე ოჯახში ღვთის წყალობა და შეწევნა;

---

ხოლო მომავალ ცხოვრებაში გექნება ყველა ის სიკეთე და მადლი, რომელიც სამყაროს დასაბამიდან მომზადებულია ქრისტიანი და რწმენის ერთგული ხელმწიფებისათვის.

მაშასადამე, მიიღე ეს წიგნი კეთილი თვალთ და გვეყოლე ჯანმრთელი, დღეგრძელი მართლმადიდებელი ქრისტიანების გასამტკიცებლად და სულისათვის სასარგებლო, მსგავსი საქმეების გასამრავლებლად.

შენი უდიდებულესობისთვის მლოცველი და ყველა მღვდელმონაზონთა შორის ყველაზე მცირე და მდაბალი, ანთიმოზ ივერიელი.

სწავლისმოყვარულნო, დიდად საყვარელნო მკითხველნო, ანთიმოზ მღვდელმონაზონი ივერიიდან და ბუქარესტის სამთავრო სტამბის მესტამბე, ღვთისგან გისურვებთ ჯანმრთელობას და სურვილების აღსრულებას.

სწავლისმოყვარულნო მკითხველნო, განათლების მიმართ მომუშინებით სავსე სიყვარული მავალდებულებს, რომ ყოველთვის ვიზრუნო და დაუღლელად ვეძებო ისეთი წიგნები, რომლებითაც თქვენს შიმშილს, ცოდნის მხრივ, მივაწოდო ნოყიერი საკვები.

ამიტომ როდესაც შევიტყვე, რომ ყოვლადბრწყინვალე და ქრისტესმოყვარე ჩვენი მთავრის, ბატონ იოანე კონსტანტინ ბასარაბ ბრინკოვიანუს ერთ-ერთმა ღვთივდაცულმა, ყოვლადბრწყინვალე, უგანათლებულესმა, მჭერმეტყველმა და ღრმად მოაზროვნე შვილმა, ბატონმა კონსტანტინემ პლუტარქეს „პარალელური ბიოგრაფიები“ [ძველი] ბერძნული და რომაული (ლათინური) ენებიდან ჩვეულებრივ თანამედროვე ბერძნულ ენაზე გადათარგმნა, ასი და ათასი ხერხი გამოვიყენე, რათა დამერწმუნებინა ის, რომ ჩემთვის გადმოეცა ეს წიგნი დასაბეჭდად.

[ბატონი კონსტანტინე], როგორც თავმდაბალი, ბრძენი, ჭკვიანი და გონიერი ადამიანი, რომელიც არაფრად აგდებს თავისი განსაკუთრებული ნიჭიერების ამო ქებასა და პირმოთნე განდიდებას, როგორც ეს ზოგადად

---

დამახასიათებელია ჭეშმარიტად ბრძენი და განათლებული ადამიანებისთვის და არა როგორც უმეცართათვის, ვისაც ხალხის წინაშე სურთ ბრძენ ადამიანებად თავის წარმოჩენა. ჩემი მრავალი და განუწყვეტელი თხოვნის შემდეგ დამთანხმდა ამ წიგნის გადმოცემაზე. აჰა, [საყვარელნო მკითხველნო], ახლა თქვენი სიბრძნის წინაშე წარდგენილი ყოვლად გენიალური და ყოვლად უჭკვიანესი გააზრებანი.

ხოლო იმისთვის, რომ უფრო მეტად დააფასოთ ყოვლადბრწყინვალე მთარგმნელის სიზუსტე და ფართო განათლება, გთხოვთ ჩახედოთ პლუტარქეს ბერძნულ ტექსტსაც და ნახავთ, რომ მან პლუტარქეს ტექსტში არსებული ნაკლოვანი ადგილი არ უგულვებელყო, არამედ დიდი რუდუნებითა და მონდომებით ფართოდ აღწერა ის ისტორია, რომელსაც ავტორი გაკვირით, თითქოსდა ნაჩქარევად ეხება.

ვადიარებ, რომ ამ ნაშრომის წაკითხვის შემდეგ მთელი გულით მივულოცე ჩვენს ყოვლად ბრწყინვალე მთავარს, რომ იმ მრავალ საჩუქარს შორის, რომელიც მას ღმერთმა უბოძა, ყოვლად გამორჩეულნი მისი ვაჟებია, რომლებიც მათი მცირეწლოვანების მიუხედავად, შესაშური ღირსებებით არიან შემკულნი და სწორედ ამის გამო მათ აქებს კიდევაც ხალხი. ეს იმ უცხოელი, თუ ადგილობრივი ადამიანების დამსახურებაა, რომლებიც ამ ბავშვებთან იმყოფებიან, უვლიან მათ, ესაუბრებიან. მაგალითად, ქების ღირსია დიდ ეკლესიაში წმინდა სახარების ყოვლადბრძენი მასწავლებელი, მაღალღირსი, ბატონთა ბატონი, მღვდელი გეორგე მაიოტა; ეს ადამიანი ხალხში ქებულია იმიტომ კი არა, რომ მთავრის ასეთი კეთილშობილი და დიდებული შვილების მასწავლებელია, არამედ იმიტომ, რომ მას ღმერთმა აღირსა ჰყოლოდა ტალანტებით უხვად შემკული მოწაფეები, რომლებიც იმისათვის, რომ თავისი ყოვლად ბრძენი პროტოტიპის სულიერ ხატებად ქცეულიყვნენ, დაუღალავად, საკუთარი მარტივი და ლოგიკური აზროვნებით, განსაცვიფრებლად იოლად იზიდავდნენ ცოდნის ყვავილს ისევე, როგორც

---

ქარვა მსუბუქი გასმისას იმწუთასვე აჩენს ბუნებრივი მიზიდულობის თვისებას.

მაშასადამე, საყვარელნო მკითხველნო, სიხარულით მიიღეთ თქვენთვის დაბეჭდილი ეს წიგნი, როგორც მოწმობა იმისა, რაზეც ზემოთ გესაუბრეთ; იგია მცირედი გამოხატულება თქვენ მიმართ ჭეშმარიტი, გულწრფელი და არაცბიერი სიყვარულისა. გისურვებთ ჯანმრთელობას.

მის ბრწყინვალეობას, კეთილ ქრისტიანს და მის აღმატებულებას, სრულიად უნგრო-ვლახეთის ხელმწიფეს და მთავარს იო შტეფან კანტაკუზინოს ვოევოდას ღვთისგან ვუსურვებთ მშვიდობას, ხოლო ჩვენი უღირსობისაგან ვუთვლით მღვდელმთავრულ კურთხევას.

ყოვლადაღმატებულო მთავარო, ეს „ჟამნი“, რომელიც მოიცავს დღისა და ღამის საეკლესიო ღვთისმსახურების წესს, არ შეიძლება იყოს მიძღვნილი სხვა პირისთვის, გარდა თქვენი ღვთივკურთხეული უდიდებულესობისთვის, რომელიც ეკლესიის გამორჩეული შვილი, სახელმწიფოს ყოვლადქებული მმართველი, მართლმადიდებელთა ბრწყინვალე დიდება და ქრისტიანობის საკვირველი მხარდამჭერი ბრძანდებით.

ჭეშმარიტად ეს თხოვნა, რომ ძღვნად მიიღოთ ეს წიგნი, არის გულწრფელი და თქვენ მიმართ თქვენ მიმართ თაყვანისცემის გამომხატველი, რადგან, როგორც სტამბიდან ამ წიგნზე მეტად გამშვენებული და რუმინულად სრულად გადათარგმნილი წიგნი ჯერ არ გამოსულა, ასევე არც უნგრო-ვლახეთის ტახტზე ჯერ არ ყოფილა ესოდენ დიდი და გამორჩეული ნიჭით შემკული, ურიცხვი სიკეთით დაჯილდოებული და თქვენისთანა გაბრწყინებული ქრისტიანული და სამეფო სულის მქონე მთავარი.

თქვენამდე სხვებიც ყოფილან ქებული მბრძანებლები, ზოგი დიდებული გვარიშვილობის გამო, სხვები - მრავალი სიქველის, ანდა გამორჩეული

---

სიბრძნის, ზოგი კი საყოველთაოდ საკვირველი გულადობისა და სიმამაცის გამო.

ხოლო თქვენ, თქვენო უდიდებულესობავ, კანტაკუზინების დიდებული სამეფო გვარის გამორჩეულო რტოვ, გადააჭარბე ყველას, რადგან ყველა სხვა თქვენამდე მყოფ მთავარში არსებულ სხვადასხვა ნიჭს ერთად თავმოყრილს ვხედავთ თქვენს ქრისტიანულ აღმატებულებაში. თქვენში ბრწყინავს დიდი სამეფო სამკაული მრავალი კეთილი საქმით გამშვენებული; სახელმწიფოებრივი სიბრძნე გაერთიანებულია ქრისტიანულ მოშურნეობასთან; [მეგობრული] რჩევა-დარიგების დიდი უნარი გაერთიანებულია კანონიერ სამართლიანობასთან; მართალი და წინასწარი მსჯელობა კი - სათნოებასა და დიდ მოთმინებასთან.

მაგრამ თქვენი უდიდებულესობის ყველა ჩამოთვლილი ღირსების გარდა, ყველაზე მეტი ღირსება ქრისტიანულ სულიერებაში გაგაჩნიათ. თქვენი კეთილი საქმეები განუწყვეტლივ ჭეშმარიტ ღმერთს ადიდებენ, თქვენი მორჩილებით ეკლესიას პატივს მიაგებთ, თქვენი კეთილი ქმედებებით სამღვდელო დასს ანუგეშებთ და თქვენი დიდი შემოწირულობებით ღვთის წმიდა სახლებს ამკობთ. ამავდროულად, თქვენი გულმოწყალება და კეთილგონიერება ბევრად წინ გაყენებთ თქვენს წინამორბედ მთავრებთან შედარებით! თქვენს ქვეშევრდომებს გულუხვი საჩუქრებით ამდიდრებთ და ქვეყანას, თავადებსა და ერს საკუთარ სამშობლოში ცხოვრებას უმსუბუქებთ, უცხოელებს სტუმართმოყვარეობით, ღარიბ-ღატაკებს სწყალობთ და მთელ ქვეყანას უთვალავი სიკეთით ამდიდრებთ.

ამიტომაც, როგორც ამბობს დავით წინასწარმეტყველი, ჭეშმარიტად გცხო შენ უფალმან ღმერთმან შენმან საცხებელი სიხარულისა უმეტეს მოყუასთა შენთა. შენი სამართლიანობით ღმერთმა მოგანიჭა კურთხეული სათნოებები და, როგორც ერისაგან გამორჩეული შვილი, სამართლიანად აღგამაღლა, ამ ღვთივდაცული ქვეყნის მთავრის ტახტზე დაგაყენა. თქვენი ქვეშევრდომები

---

ხედავენ რა თქვენს მშობლიურ სიყვარულს, მრავალ სიკეთეს, თქვენს ნათელ საქმეებს და ღვთისთვის სათნო ღვაწლს, რომელიც ნათელივით ბრწყინავს კაცთა წინაშე, ადიდებენ ზეციურ მამას, რომელმაც მოგვხედა თავისი სიმაღლიდან და აღგვიდგინა ერთიანობა და გვიბოძა თქვენისთანა კეთილი, მოწყალე, სამართლიანი, სტუმართმოყვარე, უბოროტო, კეთილისმყოფელი, სიკეთის მოყვარული და ბოროტების მდევენელი მთავარი.

აღმატებულო მთავარო, ამიტომაც ამ მრავალი და შემკობილი თვისებებისთვის და ღვთის წინაშე დიდი ღირსებებისთვის, დიდი სიყვარულით გზუქნით და გიძღვნიით ამ წმინდა წიგნს. და ყველანი ექვის გარეშე ვიმედოვნებთ, რომ ეს წიგნი იქნება მიღებული ღირსებით და სიხარულით არა მხოლოდ იმიტომ, რომ შეიცავს სამპიროვანი ღმრთისთვის დაწერილ სადიდებლებს, რომლის ცოცხალ ხატს ამქვეყნად წარმოადგენთ თქვენ თქვენი სამთავრო ხელისუფლებით, არამედ იმიტომაც, რომ იგი შეიცავს ყველა წმინდანის ტროპარ-კონდაკს, რომელთა თაყვანისმცემელი ხართ თქვენ და მუდმივად შესთხოვთ მათ შეწევნასა და დახმარებას. ყოველთა წმიდათა განუწყვეტელი მეოხება და ღვთის მაღლი, რომელიც იცავს მართლმორწმუნე ხელისუფალთ, გეწოდეთ თქვენც, ყოვლადბრწყინვალეო მთავარო, რომ თქვენი მმართველობა იყოს მტკიცე მშვიდობით, ქებული დიდებით, ჭემმარიტი წარმატებით ქვეყნის მართვაში, ერის გამტკიცებისა და მთელი სამთავროს გაძლიერებისათვის.

ღვთისგან პატივცემული თქვენი უდიდებულებისათვის ქრისტეს წინაშე მლოცველი უნგრო-ვლახეთის მდაბალი მიტროპოლიტი, ანთიმოზი.

ყოვლადმოწყალეო მთავარო, ეს წმინდა და ღვთივმთაგონებული სახარება, რომელიც თაყვანისცემით მიერთმევა თქვენს უმაღლესობას, არის ახალი ნაყოფი, რომელიც მოწეულ იქნა ივერიელთა მიწაზე და მოირწყა



---

თქვენი მეფური წყალობით. და ეს ქვეყანაც, რომელსაც მიენიჭა ამგვარი ბედნიერება და გამდიდრდა თავის ენაზე დაბეჭდილი წიგნებით ისევე, როგორც არაბულენოვანი დაბეჭდილი წიგნებით გამდიდრდა არაბეთი, ბერძნულენოვანი წიგნებით -საბერძნეთი და რუმინულენოვანი წიგნებით-უნგრო-ვლახეთი, მადლობას სწირავს თქვენს უდიდებულესობას ისევე, როგორც ხსენებული დანარჩენი სამი ქვეყანა. თქვენი კეთილმორწმუნე და ქრისტიანული დიდი კეთილმოსილება ერთგვარ ოქროს მდინარედ იქცა, რომლისგანაც გამოედინა ეს ოთხი წყარო: რუმინელების, ბერძნების, არაბებისა და ივერიელების მესტამბეობა. როგორც ნეტარების ბაღში არსებული თავდაპირველი მდინარიდან გამოედინებოდა ოთხი მდინარე: ფიზონი, გეონი, ტიგროსი და ევფრატი.

ხოლო იმ ოთხი მდინარის წყალობით მიწამ მოისხა წარმავალი და ხრწნადი ნაყოფი, ხოლო თქვენი კეთილი ნებით გამოდენილი მესტამბეობის მდინარენი ყველგან იძლევიან მტკიცე, უხრწნელ და მარადიულ ნაყოფს.

და რადგან ამ დიდი სიკეთის მიზეზი და წყარო ხართ, ამიტომაც თქვენს უდიდებულესობას დარჩება მარადიული დიდება და ხსენება.

[სამყაროს შექმნიდან] 7218 წლის 21 მაისი, თქვენი უდიდებულებისათვის ქრისტეს წინაშე მლოცველი, უნგრო-ვლახეთის მდაბალი მიტროპოლიტი, ანთიმოზი.

## კომენტარები:

ქადაგება №1

---

1. ანთიმოზ ივერიელი ამ ქადაგებაში ცდილობს წარმოიდგინოს თუ როგორი უნდა იყოს სულიერი მოძღვარი, რომლის უკვდავი მაგალითი იყო ქრისტე. როგორ უნდა უმკურნალოს ადამიანთა სულიერ და ხორციელ მანკიერებას და ვინ და როგორი უნდა იყოს სულიერი მოძღვარი და რა ევალება მრევლს, მართლმორწმუნე ქრისტიანს, რომ ღმერთის სადიდებლად ერთობლივად იმოღვაწეონ სულის გადასარჩენად.

“ადამიანი შეპყრობილია ურწმუნოების ვნებით, კერპთთაყვანისმცემლობის წყლულით, სოფლის ცთუნებებით.” (ანთიმი) ქრისტეს მიერ დადგენილია, “იზრუნოს ადამიანთა და სრულიად კაცთამოდგმის ცხოვნებისათვის. ეს არის მისი სიკეთის უპირველესი საქმე, რომ იხსნას ადამიანი ბოროტი ხელიდან და აიყვანოს თავდაპირველი მშვენიერების და ღირსების მდგომარეობაში.” (ანთიმი) ეს შესაძლებელი იყო გაკეთებულიყო ცეცხლის წვიმით, მტრის სპათა შემოსევით, სტიქიურ ძალათა აბოზოქრებით ურწმუნობის წინააღმდეგ. მაგრამ ყოვლად კეთილმა და უსასრულო სიყვარულმა აირჩია სხვა გზა “მხოლოდ კაცთმოყვარეობითა და სასწაულებით უხმობს ადამიანებს სიკეთის ქმედებით და ღვთაებრივი სიტყვებით გარდაქმნის კაცობრიობას და უშუშებს მას სულიერ ვნებებს.” (ანთიმი) ადამიანის ზნეობრივი ცხოვრების ჭეშმარიტება მორჩილებაში, თავდამბლობასა და სიყვარულშია. იგი ლაპარაკობს მრევლისა და მოძღვრის მოვალეობასა და პასუხისმგებლობაზე. არ უნდა დაივიწყო ღმერთის სიყვარული შენ მიმართ, მაგრამ არც შენი მოვალეობა მის მიმართ, რაც არსებითად ნიშნავს მოვალეობას საკუთარი სულის, ბუნების მიმართ.

“ღმერთს უნდა, რომ ყველა ადამიანი მოიყვანოს ჭეშმარიტ სარწმუნოებაზე და დააყენოს ცხოვნების გზაზე, რადგან ამაშია ღვთის კაცთმოყვარეობის დიდი წყურვილი, რომ ყველა ადამიანი ცხონდეს.” (ანთიმი) ჩვენთვის სამაგალითო უნდა იყოს თუ სად და ვის ეძებდა ამ საქმეში დამხმარედ და მსახურად? “არ უძებნია დიდ ქალაქებში, სადაც ხალხთა სიმრავლეა, არც მეფეთა სასახლეში, რადგან შეიძულა სიმდიდრე და მისი ძალაუფლება, არც რიტორთა დიდებას მიხედა და არც ფილოსოფოსთა სიბრძნეს, არც მეომართა იარაღსა და აბჯრის ძალას მოუხმო და არც სხვა რომელიმე ხერხს, რადგან არ ეთქვა რომელიმე ურწმუნოს, რომ მსგავსი საშუალებებით მიიზიდა ქრისტემ ხალხის სიმრავლე.” (ანთიმი) ადამიანებში ეძებდა სულის სიმართლეს და მორჩილებას, სიკეთეს და სიწმინდეს. თუ წინასწარმეტყველები არჩეული იქნა მწყემსებისაგან, ხოლო თავისი მოწაფეები მეთევზეებისაგან და “მათ ხელებს და ბაგეებს ანდო ცათა სასუფევლის ქადაგება და კაცობრიობის სამკურნალო სულიერი წამლების დარიგება. როგორ შეძლეს ეს მათ? “შეარცხვინეს ურწმუნო წარმართნი და ღვთისმეტყველების ბადეებით დაიჭირეს ხალხთა სიმრავლე, მოინადირეს სხვადასხვა ერის სმენა, დაიყოლიეს ტირანთა გულები და დაიმორჩილეს იმპერატორთა სულელები.” (ანთიმი) “ეს არის დიდი და მშვენიერი გამარჯვება, მსგავსისათვის არ მიუღწევიათ მთელი მსოფლიოს იმპერატორთ.” - ასე არის შეფასებული მის მიერ ქრისტიანობის გამარჯვება. ეს იყო

“ძლევადი საკვირველი”, რომელიც მოახდინეს” უიარალო და სამხედრო ხელობის არმცოდნეებმა, უპოვრებმა, უწიგნურებმა, მარხვისაგან დასუსტებულებმა, კეთილებმა და უმზაკვროებმა. სუსტი და უწიგნური ენით განავრცეს ჭეშმარიტი სარწმუნოება.”(ანთიმო) ეს გამარჯვება არის ნიშანი იმისა, რომ სიყვარულის და სიკეთეთის ძალა ყველა ძალაზე უძლიერესია. მოძღვარც, როგორც მწყემსი, უნდა დაემყაროს ჭეშმარიტ რწმენას და სიყვარულით და სიკეთით ემსახუროს ღმერთს. ამ გამარჯვების შედეგად “მოციქულებმა მოიარეს მსოფლიო, დაიმორჩილეს მთელი წარმართული სამყარო, სძლიეს ჯოჯოხეთს, დაამარცხეს თაღლითობა, გააძევეს ტყუილი და გაავრცელეს მთელ დედამიწაზე და სამყაროში ქრისტეს სახელი და ჭეშმარიტი სარწმუნოება.”(ანთიმო) მთავარია არა წარმოშობა, არამედ რწმენა და სუფთა სული, გიყვარდეს მოყვასი შენი. “ღმერთმა არ შეხედა ჩემს სიმდაბლეს და უღირსობას, არ შეხედა ჩემს სიღარიბეს და უცხოობას, არც ჩემს უვიცობას და უცოდინრობას და ამიყვანა მე უღირსი მღვდელმთავრობის ამ უდიდეს პატივსა და ხარისხში.”(ანთიმო) ანთიმოზს მის, როგორც მოძღვრის. დანიშნულებად მიაჩნია მწყემსად და სულიერ მამად ყოფნა. ეს ნიშნავს მლოცველად, მზრუნველად და ნუგეშისმცემელად ყოფნას. “მლოცველად ყოფნას თქვენი და თქვენი ოჯახების ჯანმრთელობისათვის და ცხოვნებისათვის. მზრუნველად თქვენი სულების სასიკეთოდ, რომ ვიყო თქვენთვის ნუგეშად ამა სოფლის ბაბილონური ტყვეობის ტანჯვის ჟამს.”(ანთიმო) მოძღვარი უნდა იდგეს თავისი სამწყოს გვერდით ყველგან და ყველაფერში. “ამ ცხოვრების განსაცდელის გამო თქვენთან ერთად უნდა ვიტანჯო და ვითმინო.”(ანთიმო) მოძღვრის უმთავრესი ვალი შემდეგში მდგომარეობს: “ჩემი ვალია, ვიყო მღვიძარე, მოშურნე, დაუზარავი დღე და ღამე და ყოველ ჟამს თქვენი სულების სასიკეთოდ და ყველას საცხოვნელად.”(ანთიმო) ეს მოვალეობა უპირველესად გათავისებული უნდა ჰქონდეს სასულიერო წოდებას. “იფხიზლეთ, ვინაიდან არ იცით არც დღე, არც საათი, როდის მოვა კაცის ძე.”(მათე 25. 13) მოძღვარმა ღვთის შიშით უნდა ასწავლოს ღმრთის ჭეშმარიტება. ქრისტეს ჯვარი არის ეკლესიის და მოძღვრის გზა, ძალა და დროშა. მოძღვრის დანიშნულება და პასუხისმგებლობაა, იტვირთოს პასუხისმგებლობა, იტვირთოს ბრალი ვითარცა ქრისტემ. ამიტომ ბრალის მტვირთველი არის სინდისის ხმა მრევლისათვის. მაგრამ ეს არ არის დამსჯელი ხმა როგორც სასამართლო(კანტი), არამედ სიყვარულით განმსჭვალული სინდისი, რადგან ვისაც არ უყვარს ღმერთი, მას არ შეუძენია ღმერთი, რადგან ღმერთი არის სიყვარული.”(იოანე 4.8)

ამავე დროს ანთიმოზი ლაპარაკობს ჭეშმარიტი მართმადიდებელი ქრისტიანის მოვალეობაზე, რაც მოძღვრისა და ეკლესიის მოწოდების წარმატებით შესრულების პირობაა. “თქვენც გაქვთ ვალდებულება, რასაც ისწავლით ჩემგან, თვალთმაქცობისა და მზაკვრობის გარეშე მიიღოთ და შეასრულოთ თქვენივე სულების სასარგებლოდ, გამოჩინოთ მორჩილება, რადგან ჩემ მიმართ მორჩილებით თქვენ ქრისტეს დაემორჩილებით.”(ანთიმო) ქრისტიანის სათნოებებია: სწავლა, მორჩილება და

---

მზაობა შეასრულო მოძღვრის მიერ ნასწავლი. ეს არის მორწმუნე ქრისტიანის სულიერი მოვალეობა. ეს არის მოვალეობა, რომელიც სიყვარულით არის გაჟღერებული და წმინდა სისხლით გამოსყიდული, ვალდებულება, რომელიც არის ვალდებულება საკუთარი თავის მიმართ, უკვდავი სულის მიმართ, რომელიც ქრისტეს გოლგოთით და ჯვარცმით იქნა გამოსყიდული. “ღვთის რწმენა და ეკლესიის მორჩილება, ამ ორზე არის დაფუძნებული და გამყარებული ეკლესია.”(ანთიმე) ანთიმე იმოწმებს მოციქულ პავლეს, რომელიც წერილში ებრაელთა მიმართ მე 13 თავში “რჩევა მორწმუნეთა ყოფაქცევაზე” წერს: “მოუსმინეთ თქვენს წინამძღოლებს და დაემორჩილეთ მათ, ვინაიდან ისინი ფხიზლობენ თქვენს სულებზე, როგორც პასუხისმგებელნი.”(წერილი ებრაელთა მიმართ 13, 17) ამ პასუხისმგებლობის ცნობიერებით იგი შესთხოვს ღმერთს: “გამონათოს გონება, რომ შევძლო ჭეშმარიტების სიტყვის ქადაგება, განმიმტკიცოს გული ღვთის შიშში, რომ დავმწყემსო მისი რჩეული სამწყსო, რომელიც ბოროტის ხელიდან გამოსყიდულია მისი უძვირფასესი სისხლით.”(ანთიმე) ბოლოს იგი ლოცავს მის სამწყსოს: “ გაგამლიეროთ ღმერთმა კეთილ და მართალ სარწმუნოებაში, ჭეშმარიტების შეცნებასა და მარადიული ცხოვრების სასოებაში, გიბოძოთ მშვიდობა, რომელიც აღემატება ყველანაირ გონებას.”(ანთიმე) ამით შესრულებული იქნება ქრისტიანის მოვალეობა- თავისი ცხოვრებით დაამოწმოს მისი ფერისცვალება სახარების და ქრისტეს რწმენის საფუძველზე.

2.მაცხოვარმა სახარების მქადაგებლად გამოარჩია მეთევზენი. ძველ აღთქმაში წინასწარმეტყველებად გამორჩეულნი არიან მწყემსნი. ესაია ამბობს: „ვით მწყემსი და მწყევსავს თავის ფარას; თავისი მკლავით შეკრებს და თავის უბეში ატარებს, წარუძღვება მეძუძურთ”. (40;11) იესო ქრისტე ღვთიური მესიაა -მწყემსი კეთილი. იესომ თქვა; „მე ვარ მწყემსი კეთილი” იოანე:14-15 „ჭეშმარიტად, ჭეშმარიტად გეუბნებით: ვინც კარიდან არ შედის ცხვრის სადგომში და სხვა მხრიდან გადის, ქურდია და ავაზაკი. ვინც კარიდან შედის, ცხვრის მწყემსიც ის არის. ცხვარს ესმის მისი ხმა, მწყემსი სახელით მოუხმობს თავის ცხვარს და გაიყვანს. თავის ცხვრებს რომ გაიყვანს, წინ მიუძღვის და ცხვრებიც მიჰყვებიან, რადგან იცნობენ მის ხმას. მე ვარ მწყემსი კეთილი. მწყემსი კეთილი თავის სულს გასწირავს ცხვრებისათვის.... მე სხვა ცხვრებიც მყავს, ოღონდ არა ამ ფარიდან. ისინიც უნდა მოვიდნენ ჩემთან, მოისმენენ ჩემს ხმას და იქნება ერთი ფარა და ერთი მწყემსი”. იოანე. 10, 11-36. არსებობს ხატი, სადაც იესო ქრისტეს მწყემსივით შემოუსვამს ცხვარი მხრებზე. ამ ხატს „მწყემსი კეთილი” ჰქვია. უფალი იესო ქრისტე ერთადერთი მწყემსია წინ რომ მიუძღვის თავის სამწყსოს, რომელიც მას მისდევს, ესმის და იცნობს მის ხმას. უფალმა მათ უთხრა: „მომდევდით მე და ადამიანთა მებადურებად გაქცევთო” და ისინიც გაყვნენ. იესო ქრისტე ასე მიმართავს მეთევზეებს, რომლებიც შემოუდგებიან ქრისტეს და იქცევიან მოციქულებად, ადამიანთა სულის მებადურებად.

---

3. იესოს სასწაულებმა საფუძველი შეუქმნეს თევზის სიმბოლოს წარმოშობას, ხოლო მისმა ბერძნულმა სახელწოდებამ 'ΙΧΘΥΣ ხელი შეუწყო მის დამკვიდრებას. თევზი ქრისტიანობის რწმენის სიმბოლოდ იქცა. განსაკუთრებით მას ადრეული ქრისტიანები იყენებდნენ. ის ერთგვარ რელიგიურ ენას წარმოადგენდა. ტერტულიანე მიუთითებდა „ჩვენ თევზები ვართ, რომელთაც 'ΙΧΘΥΣ მიგვიძღვის, წყალში ვიბადებით და მხოლოდ წყალში ყოფნით გადავრჩებით. (Tertullien 1852.#1)

კონსტანტინე დიდის მეფობის შემდგომი პერიოდიდან თევზის სიმბოლიკა თანდათან გაქრობას იწყებს. მკვლევარები აღნიშნავენ, რომ თევზის სიმბოლიკა მეოთხე საუკუნის შემდგომ არ გვხვდება. შეიძლება ეს აიხსნას ელენე დედოფლის ჯვართაღმართვის შემდგომ, ჯვრის სიდიადის წარმოჩენით. როგორც ჩანს, სიტყვა „თევზში“ ანუ „იხთუსში“ ძველი ქრისტიანები მთელი ქრისტიანობის არსს მოიაზრებდნენ.

შეიძლება აქვე აღვნიშნოთ, რომ თანამედროვეობის გამოჩენილი მოაზროვნე, მიმელ ფუკო ინდივიდუალიზმის ხელშემწყობ ხელისუფლებას უწოდებს პასტორალურ მთავრობას. როგორც ფარის მწყემსის მოვალეობაა, მოუაროს და დაიცვას თავისი ფარა და ის მიზნად ისახავს მოუაროს თითოეული ცხოველის სიჯანსაღეს, ასევე პასტორალურმა მთავრობამ, როგორც მწყემსმა კეთილმა, უნდა იზრუნოს თითოეული ადამიანისათვის. პასტორალური მთავრობა ფუკოსეული პოლიტიკურ-თეოლოგიური დისკურსია, რომელიც ცდილობს „მწყემსი კეთილის“ ცნება ხელისუფლების დეფინიციად გამოიყენოს.

## ქადაგება №2

1.ფერისცვალება ხდება ზუსტად განსაზღვრულ დროს და ადგილას და მას აქვს ღვთაებრივი ჩანაფიქრის სახე. ფერისცაველების სასწაული ხდება გოლგოთამდე 40 დღით ადრე. რატომ წარსდგა უფალი ჩვენი, თავისი ღვთაებრივი ბრწინვალებით მისი სამი მოწაფის წინაშე. “ექვსი დღის შემდეგ წაიყვანა იესომ პეტრე, იაკობი და მისი ძმა იოანე და აიყვანა ისინი მაღალ მთაზე განმარტობით. და ფერი იცვალა მათ წინაშე: გაბრწყინდა მისი სახე მზესავით, ხოლო მისი სამოსელი ნათელივით გასპეტაკდა.”(მათე, 17,1-2) ხდება მისი წარმოჩენა ღვთაებრივი ბრწინვალებით და კიდევ ერთხელ დამოწმება მისი ღმერთად ყოფნისა. ეს იყო წამი, როდესაც დრო გაჩერდა და ამავე დროს უდიდესი, გამოუთქმელი სიხარულის და იმედის წყარო.

ფერისცვალების საზრისის და მნიშვნელობის გასაგებად აუცილებელია რამდენიმე ამბავის გახსენება, რა მოხდა ექვსი დღით ადრე? იესომ იცის, რომ ახლოვდება გოლგოთის განსაცდელი და მისი ამქვეყნიდან გასვლა. მას სურს დაამოწმოს მისი მოწაფეების სულიერი მდგომარეობა და მზაობა. “იესომ ჰკითხა თავის მოწაფეებს: რას ამბობს ხალხი, ვინ არისო კაცის ძე? მათ უთხრეს: ზოგი ამბობს იოანე ნათლისმცემელიო, ზოგი-ელიაო და ზოგი იერემია ან ერთი

---

წინასწარმეტყველთაგანი” პასუხად ქრისტე კითხულობს: თქვენ კი რას იტყვით: ვინ ვარ მე?”(მათე 16,13-14-15) სიმონ პეტრე პასუხობს: “შენ ხარ ქრისტე, მე ცოცხალი ღვთისა.” მათე 16,16) ამის შემდეგ ქრისტე უყვება მოწაფეებს იერუსალიმში მოსალოდნელ მოწამეობრივ სიკვდილზე. რაზეც პეტრე შებედავს დაარწმუნოს, რომ” შეიწყალე უფალო თავი.” ამ თხოვნაში ჩანს ადამიანის რწმენის და აზროვნების სასრულო,ხასიათი. ქრისტე პასუხობს: “მოცილდი სატანავ! ჩემი საცდური ხარ, ვინაიდან ფიქრობ არა იმაზე, რაც ღვთიურია, არამედ იმაზე, რაც ადამიანურია.”(მათე 17, 23) მართლაც ეს ადამიანურია. პეტრეს სიკვდილის შიში ალაპარაკებს ყველაზე მეტად. ეს ყველაზე უფრო ადამიანურია,რაც ადამიანმა მიიღო სამოთხიდან განდევნის შემდეგ. მან არა მარტო სიკეთე-ბოროტების განსხვავება იცის,არამედ მან შეიძინა სიკვდილის ცნობიერებაც. ამიტომ ფრთხილობს პეტრე. ქრისტე კი არის “სიკვდილითა სიკვდილისა დამთრგუნველი”, მან უნდა გაიაროს გოლგოთა, როგორც ეშმაკზე,სიკვდილზე გამარჯვების აუცილებელი ეტაპი. ფერისცვალება უჩვენებს უფლის ღვთაებრივ ბრწყინვალეობას,რამაც ადამიანის სიკვდილი უნდა აქციოს გარდაცვალებად და მარად სიცოცხლედ,მისცეს სასოება. ამის დასტურია გარდაცვლილი მოსეს და ამაღლებული ელიას ხლება ღმერთთან ფერისცვალების სასწაულისას.

პეტრემ იცის, ქრისტე ღმერთია და მანაც ეჭვობს. აუცილებელი ხდება მოწაფეების რწმენაში განმტკიცება, რათა მათ გოლგოთის არსის სწორად გაიგონ. რათა გოლგოთაში არ დაინახონ მხოლოდ ტანჯვა წამება და არა ღმერთის უსაზღვრო სიყვარული, რის გამოც იგი თავისი ნებით მიიღებს ამ განსაცდელს ადამიანის ცოდვისაგან გამოსახსნელად. ამ რწმენის გარეშე ქრისტეს სასწაული შეუძლებელი იქნება, რადგან ადამიანის სასოების უდიდესი და ღვთაებრივი საფუძველი გაუგებარი დარჩება.

2. ფერისცვალების სასწაულს ესწრება ელია და მოსე, ქრისტეს სამი მოწაფე, რომლებიც გახდნენ ცოცხალი მოწმეები ქრისტეს ღვთაებრივი სიდიადისა. ეს იყო ღმერთის უდიდესი წყალობა, რადგან ცოცხალ ადამიანს მიეცა ღმერთის ბრწყინვალეების ჭკრეტის უფლება, და მამა ღმერთი, რომელიც ამოწმებს რომ ქრისტე ღმერთია. “ნათელმა ღრუბელმა დაჩრდილა ისინი და აჰა ამბობს ხმა ღრუბელიდან: ეს არის ჩემი საყვარელი ძე, რომელიც მოვიწონე მე. მას უსმინეთ.”(მათე,17-5) კიდევ ერთხელ დაამოწმა მამამ, რომ ქრისტე არის შვილი, პირველად ეს დაამოწმა -იოანე ნათლისმცემელთან ქრისტეს თავზე დაშვებული მტრედის სახით. “აჰა გაიხსნენ ცანი, და მან იხილა ღვთის სული, მტრედივით გარდმომავალი, მასზე რომ ეშვებოდა. აჰა ხმა ციდან მეტყველი: ”ეს არს ჩემი საყვარელი ძე, რომელიც მოვიწონე მე.”(მათე 3.16-17) ღვთის ხმის ეს ორი განსხვავებული შინაარსი მიანიშნებს, რომ ქრისტეს ამქვეყნიური მისია დასასრულს უახლოვდება და შესრულებულად უნდა მივიჩნიოთ. ამის დასტურია ქრისტეს საუბარი ელიასა და მოსესთან. წმინდა მამები მიიჩნევენ,რომ ამ საუბრის თემა იყო დამდეგი გოლგოთის წამება. ამიტომ მას მიეცა მეუფეობა ამ

---

ქვეყანაზე. ღმერთმა უჩვენა თავისი ღვთაებრივი ბუნება და გოლგოთის ნებაყოფილობითი ხასიათი. ეს კი მიუთითებდა ღმერთის უსაზღვრო და ადამიანისათვის მიუწვდომელ სიყვარულის ადამიანისადმი.

აუცილებელი იყო ღმერთის სიყვარულის ასეთი გამოხატულება. მას არ სურს მოწაფეებს მოუწყოს სასოწარკვეთილებით სავსე გამოცდა მათი რწმენისა გოლგოთის წამებით. უნდა გააგებინოს მისი ნებაყოფილობითი ხასიათი. ადამიანმა უნდა ნებით მიიღოს ის, რაც ღვთისგან დადგენილია. რადგან ამის მაგალითი მისცა ქრისტემ. ეს არის უდიდესი სიყვარულის გამოხატულებაც, რაზეც მისი ნებაყოფილობითი ხასიათი მიუთითებს. ადამიანის სასრულობა იმაშია, რომ მას ვერ გაუგია ასეთი სიყვარულის არსი, ვერ დაუჯერებია. რატომ უნდა გარდაქმნა გამოისყიდო სიყვარულით, როდესაც გაქვს უსაზღვრო ძლიერება და ამ ძლიერებით შეგიძლია მიაღწიო მიზანს?

3. ფერისცვალების დღესასწაულის ზეიმობის ტრადიცია იწყება ქრისტიანობის პირველსავე საუკუნეებში. მე-4 საუკუნეში დედოფალმა ელენემ თაბორის მთაზე, ფერისცვალების ადგილზე, აღმართა ტაძარი. მიუხედავად იმისა, რომ ფერისცვალება მოხდა თებერვლის თვეში, ჯვარცმამდე 40 დღით ადრე, მაგრამ ფერისცვალების დღესასწაული გადატანილი იქნა აგვისტოს თვეში, რადგან შეუფერებელი იყო ფერისცვალების დღესასწაულის ზეიმობა დიდმარხვის დროს. აგვისტოს მეექვსე დღე არჩეული იქნა, რომელიც 40 დღით არის დაშორებული ჯვართამაღლებას, როდესაც კვლავ ვიხსენებთ ქრისტეს ჯვარცმისეულ ვნებას.

ფერისცვალება არის ხილული სასწაული ღვთის ამქვეყნად მოვლინებისა. ამ სასწაულის მხილველი იყო პეტრე, იაკობი და იოანე, როგორც სულიერად ყველაზე მომზადებული ასეთი გამოცდისა. ისინი კაპერნაუმიდან გამოვიდნენ და თაბორის მთაზე ავიდნენ, რომელიც გალილეის მაღლობებს ზემოთ იყო. ფერისცვალების არსი ვლინდება სიმბოლოებში, თაბორი თარგმანში ნიშნავს სისუფავეს, სინათლეს. მთა არის სიწყნარე, სიმშვიდე, რაც აუცილებელია ლოცვისათვის, ღმერთთან საუბრისათვის. ნეტარ არიან მოციქულები, რადგან მათ იხილეს ეს ბრწყინვალე სასწაული. ძველი და ახალი აღთქმის მოციქულების სიხარული და სასოება უსაზღვროა. “განა რომელ პირს შეუძლია აღწერა იმ სიხარულისა და მხიარულების, რომლითაც აღივსო ეს ორი წინასწარმეტყველი.”(ანთიმე). ხოლო პეტრე იესოს ეუბნება: “ უფალო რა კარგია ჩვენთვის აქ ყოფნა.”(მათე 17,4) პეტრე მუდამ იესოს გვერდით არის და მან იცის რომ ღმერთთან არის, მაგრამ ეს სხვა სიხარული და ბედნიერებაა გრძნობს პეტრე. მაგრამ ჩვენ როგორ უნდა აღვიქვათ იგი? ანთიმე ამბობს განსაცვიფრებლად: “ ყველაფერი ეს აღმატება ჩვენს გონებას და გაგებას, ამიტომ გარკვეული ფრთხილი დუმილით, სიყვარულით და რწმენით უნდა მივაგოთ პატივი და თაყვანისცემა.”(ანთიმე) ეს ანთიმის დამოკიდებულების აღმატებულ ხასიათს მიუთითებს. იგი კითხულობს: ”ვინ არის ვისაც შეუძლია, როგორც შეესაბამება სრულყოფილად აღწეროს დღევანდელი დღის სიდიადე? რადგან

---

ყველაფერი, რაც იყო ყველაზე დიდებული ძველ და ახალ აღთქმაში, ზეცაში და დედამიწაზე დღეს გამოცხადდა, რადგან აქ მოავლინა ძველი აღთქმის ყველაზე დიდი წინასწარმეტყველნი და აქვე იყვნენ ახალი აღთქმის ყველაზე დიდი წინასწარმეტყველები, ზიციდან წმინდა სამება განცხადდა, ხოლო დედამიწაზე ქრისტეს წმინდა კაცობრიობა გამოჩნდა.” (ანთიმო) ყველაფერი გაერთიანდა, რადგან ღმერთი თავისი სისრულით მოვიდა ამქვეყნად. ამქვეყნიური და იმქვეყნიური აღარ არსებობს. ეს იყო მეორედ მოსვლის სახის გაელვება. მან დაანახა ამ ორი სოფლის ერთიანობის და მთლიანობის გაელვება. ანთიმოზი მორწმუნეთათვის “პატიოსან და საჭირო საქმედ მიიჩნევს ვიცოდეთ ამ დიდებულ ფერისცვალების ჟამს რა სიტყვებს ეტყოდნენ წინასწარმეტყველნი მაცხოვარ იესო ქრისტეს?” ამ სიტყვებში წარმოჩნდება ღმერთის უსაზღვრო სიყვარული ადამიანის მიმართ და ქრისტიანი მორწმუნეს მოვალეობა. მოსე და ელია ქრისტეს ესაუბრებიან გოლგოთის და ჯვარცმის თაობაზე. “არის ეს ის დიდებული და სასიხარულო სიტყვები, რომლებიც შეეფერებოდა სათქმელად ასეთ სასიხარულო მოვლენის დღეს?” ეს უნდა განვიხილოთ ღვთაებრივი აზროვნების განზომილებით და ადამიანური განზომილებით. ფერისცვალების სასწაული იყო ნიშანი მეორე სასწაულისა, ადამის და ევას ცოდვით დაცემისა და სამოთხიდან გაძევების შემდეგ ადამიანთა ბოროტებიდან გამოყვანისა და “ადამიანთა სულების ცხოვნება, სამყაროს გამოსყიდვა, ეშმაკის ძალის დამარცხება, რწმენის გამრავლება, ცოდვის შენდობა და სულების ხსნა.” (ანთიმო) ამ სასწაულს ვერ ხედავდა პეტრე თავისი ადამიანური გონებით და სასრულო აზროვნებით, მიუხედავად იმისა, რომ იცის ქრისტეს ღმერთობა და იცის მისი ამქვეყნად მოვლინების საზრისი და მიზანი. ადამიანმა უნდა სცადოს გაიგოს ღმერთის მიუწვდომელი მსხვერპლი. “იცოდეს ყოველმა ჩვენთაგანმა კაცთმოყვარე ღმერთის ენით აღუწერელი სიკეთე, უდიდესი წყალობა და სრულყოფილი სიყვარული.” (ანთიმო) რადგან არა თავისთვის, არამედ ჩვეთვის დაითმინა მაგდენი ტანჯვა, ტკივილი, ვნება და სიკვდილი. ადამიანმა არ უნდა დაივიწყოს ეს. ამ სრულყოფილი სიყვარულის სანაცვლოდ ადამიანისაგან მოითხოვა მოყვასის სიყვარული. ღმერთი არ ავალებს ადამიანს იტვირთოს მოყვასის ბრალი ღმერთის წინაშე, არამედ უყვარდეს მეორე ადამიანი.

ღმერთი იოანე ნათლისმცემელთან ბრძანებს, რომ მას უსმინეთ, რადგან იგი არის საყვარელი შვილი. მაგრამ ფერისცვალებისას მამა ღმერთი უფრო გარკვევით უმხელს ადამიანს თუ რატომ უნდა უსმინო ქრისტეს. “მას უსმინეთ, რადგან ის არის გზა, ცხოვრება და ჭეშმარიტება, ის არის ჩემი სიტყვა და სიბრძნე.” (ანთიმო) ეს არის ქრისტე ღმერთის არსის ყველაზე სრული დადასტურება.

ღმერთი ადამიანს ევლინება მხოლოდ განსაკუთრებულ შემთხვევაში. ასეთი იყო მოსეს თხოვნით მის წინაშე ღმერთის მოვლინება. ეს არის გაფრთხილება ანდა რწმენაში განმტკიცება. მაგრამ ფერისცვალების სასწაულის დროს ღმერთმა მეტად წარმოაჩინა საკუთარი ბრწყინვალება, რამდენადაც ეს მისაწვდომი იყო



---

ადამიანისათვის. ღმერთმა იცის ადამიანის ბუნება და გრძნობს, რომ ადამიანს უნდა დაეხმაროს, სუსტ და არასრულყოფილ არსებას, რადგან მაშინაც კი, როდესაც ადამიანს სურს ღმერთის ნების შესრულება თავისი ცოდვილი ბუნების გამო ვერ ახერხებს.

5. ანთიმი მინიშნებს, რომ როდესაც სულიერი მოძღვარი ქრისტიანს ესაუბრება სულიერი და ხორციელი განსაცდელების შესახებ ამით სურს გაახსენოს ფერისცვალების სასწაულის ძალა და საზრისი. მარადიულად უნდა ვადიდოთ, ვაქოთ და ვთხოვოთ დიდი შეწევნა და წყალობა. რადგან ფერისცვალება არის მინიშნება, რომ ქრისტიანს მუდმივი სულიერი შრომა და მოძღვრის დახმარება სჭირდება რათა შეახსენოს მისი ბრალეული ბუნება და ასევე ჩაუნერგოს ღმერთის და საუკუნო ცხოვრების იმედი. მორწმუნეს უნდა ქონდეს საკუთარი ცხოვრების გამოსწორების და იმქვეყნიური სახეცვლილების სასოება.

როგორი უნდა იყოს ქრისტიანის დამოკიდებულება ღმერთის სასაწაულებსადმი, ღმერთისადმი-ამ სრულყოფილი და უსასრულო სიყვარულისადმი. ანთიმი იმოწმებს მეორე ფსალმუნის შინაარსს: “ჰმონეთ უფალს შიშით და უგალობეთ მას ძრწოლით.” რადგან “ჰმვენის ადამიანს დიდ სიკეთეზე გახარება და დიდ დიდებულებაზე შიში და ძრწოლა. რადგან ეს ორივე გრძნობა ჰმვენის ღმერთს.”(ანთიმი)

ღმერთის ბრწყინვალე ფერისცვალებამ “ჩვენი ქვის გულების სანაცვლოდ უნდა მოგვცეს ცოცხალი გულები, რათა ვიქონიოთ ღვთის შიში და აღვასრულოთ მისი მცნებები”(ანთიმი)

6. და ექვსი დღის შემდეგ წაიყვანა იესომ პეტრე, იაკობი და იოანე, ძმა მისი და აიყვანა ისინი მაღალ მთაზე განმარტოებით (მათე. 17;1) როგორც წმ. მამები ამბობენ - ეს სამი მოციქული გარდაემატებოდა დანარჩენს, ისინი ადრევე გახდნენ ღირსნი იაროსის ასულის სასწაულებრივი აღდგინების ხილვისა. მეორე, მაცხოვარი მათთან ერთად წაბრძანდა გეთსამანიის ბაღში. მაცხოვარმა თაბორზე თან წაიყვანა სამი, რათა განედიდებინა ისინი ხილვით და დატოვა რვა, რათა ნეტრ-ექმნა რწმენით. პეტრე გამოირჩეოდა უფლის უსაზღვრო სიყვარულით, იოანე - ერთგულებით, იაკობი - გამოირჩეოდა იმ სიტყვის გამო, ძმასთან ერთად, რამ უთხრა იესოს: „მაღვიძს, შევსვათო შენი სასმისი“. იოანე დამასკელი სახარების ამ ადგილს ამგვარად ხსნის: მაცხოვარმა თან წაიყვანა პეტრე, რათა ეჩვენებინა, რომ მისი მოწმობა ქრისტეს ღვთაებრიობის შესახებ მამის მოწმობითაც მტკიცდებოდა და დაერწმუნებინა იგი, რომ თვით ზეციურმა მამამ განაცხადა ეს მოწმობა; იაკობი - რაკი სხვა მოციქულებზე ადრე ჰქონდა სურვილი, მომკვდარიყო უფლისათვის; და ბოლოს, იოანე - ქალწულობისა და ღვთისმეტყველების სიმბოლო, რათა ექვრიტა ღვთის ძის მარადიული დიდებისათვის და ეთქვა: „პირველითგან იყო სიტყვა და სიტყვა იგი იყო ღმრთისა თანა და ღმერთი იყო სიტყვა იგი.

---

რაც შეეხება მზეზე უფრო ნათელს, სინათლეს, ღვთაებრივ განათებას, ღვთისმეტყველებისათვის არ არის მეტაფორები, არამედ გამოხატავენ ღვთაებრიობის რეალურ მდგომარეობას.

7. „ღვთაების სხივები“, რომელთა შესახებ საუბრობს დიონესე არეოპაგელი, შემოქმედებითი ძალები, რომლებიც განჭოლავენ სამყაროს. „ღმერთს უწოდებენ ნათელს არა მისი არსებით, არამედ მისი ენერგიებით“, ამბობდა წმ. გრიგოლ პალამა. ღმერთი გამოვლინდება, შეცნობადია და შეიძლება შევიცნოთ, ის ნათელია. ღმერთს უწოდებენ ნათელს არა მხოლოდ მატერიალურ ნათელთან ანალოგიის გამო, ღვთაებრივ სინათლე რეალურია, მისტიკურ ცდაში მოცემული. ე.წ. „ტომოს ჰაგიორიტისკოსი“ - ათონელ ბერთა აპოლოგიაში ანსხვავებს 1. გრძნობად სინათლეს, 2. გონების სინათლეს, 3. შექმნილ სინათლეს. შექმნილი სინათლე აღემატება ორივეს, რადგან გრძნობადი სინათლე საგნებს გვიმხელს, გონების სინათლე გვიმხელს ჭეშმარიტებას, რომელიც აზრებში იმყოფება. წმიდა პალამა ამბობდა: ღმერთს უწოდებენ ნათელს არა მისი არსებით, არამედ მისი ენერგიებით. ეს ნათელი არის დაფარულის განფარვა. იგი შეგნებულ სულიერი ცხოვრებაა. „გნოსისი“ - არის ადამიანური პიროვნების მიერ მოხვეჭილი მადლის მატარებელად ყოფნა. ეს ნათელი მხედველობის დაბინდვაა, რადგან ხორციელი თვალის გარეშე ჭკრეტაა. ამ ცეცხლს უმზერდა წმ. მოსე წინასწარმეტყველი მაყვლოვანში. ამ ცეცხლმა ცეცხლოვანი ეტლის სახით აიტაცა წმ. ილია წინასწარმეტყველი.

8. მნიშვნელოვანია „თაბორის ნათლის“ შესახებ ღვთისმეტყველთა კომენტარები. მეთოთხმეტე საუკუნეში ამის თაობაზე დიდი დავა იყო. კალაბრიელი ბერი ვარლამი ამ მარადისობას და შეუქმნელობას უარყოფდა. მას დროში შექმნილად თვლიდა. გრიგოლ პალამა ამტკიცებდა, რომ თაბორის ნათელი არის ღვთაებრივი ძალა, ენერგია. მოციქულების მიერ ხილული ნათლის ბუნებაზე საუბრობენ წმ. გრიგოლ ღვთისმეტყველი, წმ. კირილე ალექსანდრიელი, წმ. მაქსიმე აღმსარებელი წმ. ექვთიმე ზოგაბენი. წმ. გრიგოლ პალამა ამბობს... (ადამიანი), რომელმაც მიიღო ღვთაებრივი მადლი, თვითონ არის თითქოსდა ნათელი და სინათლესთან იმყოფება და მისი მეოხებით ხედავს იმას, რაც ამგვარი მადლის გარეშე ყველასათვის დაფარულია. იგი მალდება არამართო ხორციელ გრძნობებზე, არამედ ყოველივეზე, რაც ჩვენ ვუწყით... რამეთუ გულით წმიდანი ხედავენ ღმერთს, რომელიც არის ნათელი, უსახლდება სულში და თავს უმხელს მის მოყვარულთა და მისგან შეყვარებულთ“. მადლი არის ღვთაებრიობის გამომამჩინებელი სინათლე. „იესო ქრისტეს ღმრთეება რწმენის თვალით იხილვებოდა და იხილავდა ბიბლიაში ადამიანის მიერ ღმერთის პირისპირ ხილვა შეუძლებელია. ეს კარგად ჩანს გამოსვლათა წიგნში (33.18.20). „თქმა მოსემ: მაჩვენე შენი დიდება. თქვა ღმერთმა... ვერც შეძლებ ჩემი პირის ხილვას. არ შეუძლია ადამიანს მიხილოს მე და ცოცხალი დარჩეს.“

9. მოციქულები, რომლებიც მისტიური საიდუმლოს - იესო ქრისტეს ფარისცვალების მომსწრენი გახდნენ, მარადიული ნეტარებით გამოწვეული

---

სიხარული განიცადეს, უფლის ბრწყინვალეების ღირსნი შეიქმნენ და იქ სამუდამო დარჩენა უნდათ. „მიუგო პეტრემ და უთხრა იესოს: უფალო, კარგია ჩვენთვის აქ ყოფნა. თუ გნებავს, გავაკეთებთ კარავს: ერთს შენთვის, ერთს მოსესთვის და ერთს ელიასთვის“. დიონისე არეოპაგელი ამის შესახებ წერდა: რომ ეს იყო წამიერი სამოთხე წუთისოფელში და მათ სურდათ ამ მარადიული ნეტარი სიხარულის განცდა არ დაეკარგათ. ასკეტი მამები, რომლებიც სულიერი ცხოვრებით ცხოვრობდნენ და უფლის მარადიულობას ჭვრეტდნენ, სწორედ ამ დიდი სიხარულისთვის ემზადებოდნენ. პატრიარქი ილია მეორე ბრძანებს: მაცხოვარმა მათ ისეთი ხილვა უბოძა, რაც მათ შეეძლოთ დაენახათ და ეტვირთათ. ეს ბრწყინვალეობა მუდამ ახლდა უფალსა ჩვენსა იესო ქრისტეს, მაგრამ თვალნი კაცთანი დახშული იყო. ეს ყოველივე ეხმიანება დიონისე არეოპაგელის სიტყვებს: რომელიც ამბობს: ღვთაებრივი ყველას ეცხადება მათი დატევნის უნარის მიხედვით, ღვთაებრივის გაგების უნარის მიხედვით.

10. წმ. მაქსიმე აღმსარებელი წერს: „უფლის ფერისცვალებისას თაბორის მთაზე ნაჩვენები იქნა ცხონების სამი გზა: სათნოების, შემეცნების და ღვთისმეტყველებისა, პირველი ორი გზა ელიასა და მოსეს სახით წარმოჩინდა, ხოლო ღვთისმეტყველებას თავად მაცხოვარი წამოადგენდა.

მოსე გამოჩნდა, როგორც მამამთავარი წინასწარმეტყველთა, პირველი, რომელმაც სჯული მისცა ერსა, გამოიხსნა ისრაელის ერი, ხოლო ილია, - როგორც ცნობილია, წინასწარმეტყველთა შორის, რომელსაც ხორციელი სიკვდილი არ განეცადა - ცოცხლად, ხორციელად იქნა ატაცებული ზეცად.

მოსე უდაბნოში აღესრულა, მან ხორციელი სიკვდილი განიცადა, მაგრამ ღვთის წინაშე ყველა ცოცხალია, როგორც თავად ბრძანებს სახარებაში: „არ არის ღმერთი მკვდართა და ღმერთი ცოცხალთა, არამედ - ღმერთი ცოცხალთა.“

მოსე - მხსნელი და სჯულისმდებელია ისრაელის ერისა და ილია უდიდესია წინასწარმეტყველთა შორის - ეს არის უდიდესი პიროვნება. მოვიდა და თაყვანს სცემდა იესოს, ქრისტედ წოდებულს. ამასთან მოციქულებმა იხილეს, როგორც გაბრწყინდა მაცხოვარი. აქედან დაასკვნეს, რომ მათი მიმდევარი იყო და არა უბრალო ადამიანი ან წინასწარმეტყველი, ან თუნდაც მესია, მხსნელი, რომელსაც ებრაელები მოელოდნენ, არამედ - განკაცებული ღმერთი.

თაბორის მთა საკმაოდ მაღალი და კლდიანია. როგორც აღწერენ, ვიდრე იქ მიხვალ, კარგა მანძილი უნდა გაიარო. თაბორზე ასვლა დიდ ჯაფას მოითხოვდა და მოწაფეები ფიზიკურადაც დაღლილები იყვნენ და სწორედ ამან მოჰგვარა ძილი, თუმცა, ეს საღვთო განგებულებითაც მოხდა. ადვილად რომ გადაეტანათ ეს ღვთაებრივი გამოცხადება, შემადრწუნებელი, რომ არ ყოფილიყო მოციქულებისათვის ფერისცვალების - ამ უდიდესი სასწაულის ხილვა, უფალმა ძილი მოჰგვარა, რათა მათი გონება შემზადებულიყო სასწაულის სახილველად. ძილით ხდება შიშის დაძლევა. რა შიშზეა ლაპარაკი. თაბორზე მოხდა ადამიანისა და ღმერთის წამიერი შეხვედრა. ეს ის წამია, რომელიც მარადისობას უტოლდება.

---

## ქადაგება № 3

1. ქადაგება ეხება რწმენის ადგილს ქრისტიანის ცხოვრებაში, რას ნიშნავს იყო ჭეშმარიტი ქრისტიანი და რას ნიშნავს ჭეშმარიტი რწმენა? როგორია ქრისტიანის ჭეშმარიტი რწმენა და რა როლი აკისრია რწმენის განმტკიცების საქმეში სულიერ მოძღვარს. ღვთისმშობლის გამორჩეული ადგილი ქრისტიანულ იერარქიაში ჩვენ მოგვიწოდებს მთელი გულით და სულიერი ძალებით გავიაზროთ ღვთისმშობლის ღვაწლი. მით უფრო შემთხვევითი არაა, რომ საეკლესიო წელი იწყება ღვთისმშობლის დაბადებით(სექტემბერი) და მთავრდება ღვთისმშობლის მიძინების(აგვისტო) დღესასწაულით. ღვთის გეგმა სამყაროს გადარჩენისა ღვთისმშობლის მეშვეობით უკვე გაცხადებული იყო დასაწყისში, როდესაც ევას მიმართ ითქვა, რომ “ მტრობას ჩამოვაგდებ შენსა და დედაკაცს შორის, შენს თესლსა და დედაკაცის თესლს შორის, ის თავს გაგიჭეჭედს” (დაბადება,3. 15) ნათქვამია დედაკაცის თესლზე, რაც ნიშნავდა, რომ არ იქნებოდა მამაკაცის თესლიდან დაბადებული. უკვე სამყაროს დასაწყისში ძველი აღთქმის ევას მეშვეობით გაცხადებული იყო ახალი აღთქმის ევაზე, ღვთისმშობელზე. “ როგორც ადამში კვდება ყველა, ასევე გაცოცხლდებიან ქრისტეში.”(კორინთელთა 15,22) ღვთისმშობელი არის მეორე ევა და მეორე მტრედი. როგორც წარღვნის დასასრულის და იმედის ნიშანი. ქრისტეს დაბადება იყო ახალი იმედი. პალესტინაში, ნაზარეთში ცხოვრობდა უშვილო მოხუცების წყვილი იოაკიმე და ანა. უშვილო წყვილი ითვლებოდა ღმრთის მიერ დაწყევლილად, “დაწყევლილია ყოველი, ვისაც არა აქვს თესლი სიონში და შთამომავალი იერუსალიმში”. ასეთი ადამიანებისაგან ყველას ეკრძალებოდა საკვების მიღება, მისგან არ იღებდნენ სამსხვერპლოს ღმრთის საპატივცემულოდ. ერთხელაც, როდესაც იოაკიმეს სურდა მსხვერპლის შეწირვა ღმრთისათვის, ღვთისმსახურმა არ მიიღო მისგან სამსხვერპლო და საყვედური უთხრა: თუ როგორ ბედავდა მსხვერპლის შეწირვას ღმრთისათვის. იოაკიმე და ანამ დატოვა ტაძარი და იოაკიმე გაემართა მთისაკენ სალოცავად, ხოლო ანა სახლში წავიდა და მხურვალე ლოცვას მიეცა. შესთხოვდა მიეცა შვილი, რომელსაც ღმერთს მიუძღვნოდა და მის სამსახურში განაწესებდა. ღმერთმა შეისმინა მათი

---

ლოცვა და მუდარა. სული წმინდა მოევლინა მათ ამ ლოცვისას და უთხრა: “ გიხაროდენ, იოაკიმე შესმენილია შენი ლოცვა და გეყოლება ქალიშვილი, რომელიც ქალწულობაში შობს ყოველთა მეფეს, ღმერთს.” ილოცე და მადლობა შესწირე ღმერთს. ხოლო ანას უთხრა: “ ანა შენი ლოცვა შესმენილი იქნა, შენ შობ ქალიშვილს, და უწოდებ მას მარიამს და განიხარებენ მასში დედამიწის ყველა ხალხი.” ღვთისმშობლის დაბადება ზებუნებრივია, რადგან იგი არის ლოცვების შედეგი. იგი არის უცოდველი და ჩვენ უნდა შევთხოვოთ მას თანადგომა და დახმარება.

2. მარიამი ნიშნავს დედოფალს. იგი უნდა გამხდარიყო ანგელოსთა დედოფალი და ადამიანთა ქალბატონი. სახელში მარიამი დაფარულია კიდევ ერთი საიდუმლო. სახელის თითოეული ასო გამოხატავს ძველი აღთქმის ხუთ დიდ დედაკაცს. “ მ ”- არის მარიამი, მოსესა და აარონის და, “ ა ” -ავიგეას ნავახას ცოლს, “ რ ”- აღნიშნავს რაქელს იაკობის მეუღლეს, “ ი “- ივდიტს. წმინდა ქვრივს. ამ დედაკაცების მთელი სათნოება და ღვაწლი გაერთიანდა ღვთისმშობელ მარიამში და უსასრულოდ ზეადმატებული იქნა მათ მიმართ. მოსეს და მარიამი გამოირჩეოდა ქალწულობით და წინასწარმეტყველების უნარით, ხოლო ღვთისმშობელ მარიამში ქალწულობა და წინასწარმეტყველების უნარი მარადჟამს არის. ავიგეა განთქმული იყო ქორწინებაში მორჩილებით, ღვთისმშობელ მარიამზე კი ნათქვამია: “ ვინაიდან მოხედა თავისი მხევლის სიმდაბლეს და ამიერიდან ნეტარად ჩამთვლის მე ყოველი თაობა.”(ლუკა 1, 48). რაქელი გამოირჩეოდა სილამაზით. იუდიტი კი სიბრძნით მოაკვდინებს ოლოფერნეს. ღვთისმშობელი მარიამი თვითონ არის სიბრძნის და ღვთის სიტყვის სავანე და დაამარცხა ეშმაკი. ანა კი იყო რა უშვილო და შუა დიდი სამუელი. (მეფეთა I, 1:20) ღვთისმშობელი მარიამი შეუდარებლად დიადია, რადგან არა უშვილო, არამედ ქალწული გახდა ემანუილი, რაც ითარგმნება როგორც “ჩვენთან არს ღმერთი”. ღვთისმშობელი მარიამი გამორჩეულია თავისი სიწმინდით, მოწიწებით და დედობრივი მოწყალებით. მისი შობით იშვა სიწმინდე და მორჩილება, რომელმაც შესაძლებელი გახადა ქრისტეს განკაცება და ამქვეყნად მოვლინება. ეს იყო უდიდესი სასწაული და იმედი.

---

ანთიმი თავის ქადაგებას ღვთისმშობელი მარიამის სიდიადის და გამორჩეულობის გამომხატველად მიიჩნევს თქმულს: “გიხაროდენ მიმადლებულო, უფალი შენთანაა”. მას სურს, გაიაზროს ამ მოწმობის ღვთაებრივი და ადამიანური შინაარსი.

ღვთისმშობელი მარიამის სიდიადე და გამორჩეულობა ადამიანის გონებისათვის ძნელი მისაწვდომია. “მცოდნენი და სულიერ სიკეთეებში წარმატებული ადამიანები ღუმლით დგანან და ამგვარად ადიდებენ ღვთისმშობელის სიდიადეს, მე უმეცარმა და ყოველნაირი სიკეთისაგან დაცლილმა რა უნდა ვთქვა.”(ანთიმი) ეს არის ღვთაებრივი იდუმალეობა და მიუწვდომელი ღვთაებრივი განზრახულობა. მის მიმართ შეიძლება გამოითქვას ის, რაც” განისაზღვრა მისთვის უფლისაგან და რომლითაც მას მიმართა გაბრიელ მთავარანგელოზმა “გიხაროდენ მიმადლებულო, უფალი შენთანაა”. ეს სიტყვები თავისი საკრალური მნიშვნელობით მიუწვდომელია ადამიანის გონებისა და გაგებისათვის. ამიტომ ეს სიტყვები უნდა გაიმეორო “დიდი შიშით”(ანთიმი) რადგან ვერ ჩაწვდები ამ სიტყვების არსს და მეორეც- “ ამაზე დიდი ქება და პატივის გამოსახატი სიტყვები სამყაროს დასაბამიდან ჯერ არ თქმულა არავისათვის, არამედ მხოლოდ მისთვის.”(ანთიმი) ანთიმი ამ სიტყვებს ადარებს წმინდა წიგნში გამოთქმულ საქებ სიტყვებს და ცდილობს დაინახოს მათ შორის არსებული განსხვავება, რათა სცადოს შეიცნოს ამ სადიდებელი სიტყვების შინაარსი. აბელისთვის ნათქვამია: მოიხილა ღმერთმან აბელს ზედა და ძღუენთა მისთა ზედა; ენუქისთვის კი ნათქვამია: “ნათქვამია, სათნო უყო ღვთისთვის, მაგრამ აღარ იყო, რადგან ამაღლებული იყო მასთან“; ნოესთვის კი ნათქვამია: „რადგან მოიპოვა მადლი ღვთის წინაშე და დაიცვა წარღვნისაგან“; აბრაამისთვის ნათქვამია: „იწამა ღმერთი და ეს შეერაცხა მას სიმართლედ და გახდა მამა მრავალთა“; იოსებისთვის ნათქვამია: „იყო უფალი მასთან და გადმოაფრქვია მასზე წყალობა და უბოძა მას მადლი“; მოსესთვის ნათქვამია: „ეს სიტყვა რომელიც თქვი, აღვისრულებ, რადგან მოიპოვე მადლი ჩემს წინაშე და შენ გიცნობ უფროს ყოველთა“; დავითისთვის ნათქვამია: „ვნახე კაცი ჩემი გულის სულვისამებრ ისეს ძე, რომელიც შეასრულებს ყველა ჩემს სიტყვას“. მათ ყველას მიენიჭა ღვთისაგან მადლი და წყალობა. ანთიმოზი ადასტურებს, რომ მათგან განსხვავებით წმინდა ქალწულს მიეცა:” ჭეშმარიტი ხარების სიტყვები, რომლებიც ყოველნაირ გონებაზე აღმატებულია, სიტყვები დიდების,

---

პატივის და სიხარულის, რომელიც აღმატება ყველა ნიჭს და წყალობას: “გიხაროდენ მიმადლებულო, უფალი შენთანა”. იგი იმოწმებს პავლე მოციქულს: “ და მიეცა მას სახელი აღმატებული ყველა სახელზე აღმატებული”. მართლაც ღვთისმშობლის სახელი იესოს სახელის შემდეგ ყველაზე აღმატებულია.

ანთიმი თვლის, რომ სახელშიც ჩადებულია ღვთაებრივი განზრახულობა. სახელი მარიამი მიგვანიშნებს სამ რამეზე: “რადგან სახელი შედგება სამი მარცვლისაგან, ამით ვიგებთ, რომ მან შვა წმინდა სამების ერთ-ერთი პირი, ძე და სიტყვა ღვთისა, თითოეული მარცვალი შედგება ორი ასო-ბგერისაგან, ამაში ჩანს მაცხოვრის ორი ბუნება, ღვთაებრივი და კაცობრივი, მთელ სახელში ექვსი ასო-ბგერაა, რომელშიც ვხედავთ ექვს საუფლო დღესასწაულს: ხარება, შობა, ნათლისღება, ჯვარცმა, აღდგომა, ამაღლება.”(ანთიმი) ანთიმის შთაგონება აქ არ ჩერდება. “გიხაროდენ მიმადლებულო, უფალი შენთანა”. დაფარულია ყოვლადწმინდა სამების სახელი. “სიტყვაში გიხაროდენ -- იგულისხმება ძე ღმერთი, რადგან ის სამყაროს სიხარულია. სიტყვაში მიმადლებულო – იგულისხმება სული წმინდა, რადგან ის ანიჭებს ყოველივეს მადლს. ხოლო სიტყვაში უფალი შენთანა, იგულისხმება მამა ღმერთი, რადგან ყოველივე ხილულის და უხილავის უფალია.”(ანთიმი)

ანთიმი მოიხმარს მთელ მის მჭერმეტყველებას, გონების უნარს. იგი ღვთისმშობლის სიწმინდის, სათნოების, ღვაწლის დასახასიათებლად იყენებს ბიბლიაში მოცემულ ყველა მხატვრულ შედარებას. მის გამორჩეულობას ადარებს” “შხეს, მთვარეს, ცისკრის ნათებას, წყაროს, კიპაროსს, შროშანს, ღრუბელს.” (ანთიმი) ესეც არ მიაჩნია საკმარისად და ღვთისმშობელს სხვაგვარად ადიდება: “ არის სათნოების სიღრმე, და ზეციური მშვენიერების ღვთივ სულიერი ხატი. არის ბაღი, რომლიდანაც აღმოცენდა დაუჭკნობელი ყვავილი, დაბეჭდილი წყარო, საიდანაც სათავეს იღებს ცხოვრების წყარო, მაცხოვარი იესო ქრისტე.”(ანთიმი)

“ის იხილა მოსემ სინას მთაზე, როგორც დაუწველი მაცვალი, ის იხილა აარონმა, როგორც აყვავებული და ნაყოფით სავსე კვერთხი, ის იხილა იაკობმა, როგორც კიბე დედამიწიდან ზეცამდე, რომელზეც ადიოდნენ და ჩამოდიოდნენ ღვთის ანგელოზები. ის იხილა ეზეკიელმა, როგორც დახშული კარი, რომელშიც არავის

---

გაუვლია. ის იხილა გედეონმა, როგორც საწმისი, აბაკუმმა, როგორც ჩრდილოვანი ხეივანი, დანიელმა, როგორც მთა და სოლომონმა, როგორც სარეცელი.”(ანთიმი)

ამ სადიდებელი სიტყვის კულმინაცია არის შემდეგი სიტყვები: “ღმერთი ვერ შექმნის, მისი ყოვლადძლიერების მიუხედავად, არსებას თავის ღირსებაში რომ აღმატებოდეს დედა ღვთისმშობელს. ისე როგორც შეუძლებელია წარმოვიდგინოთ მეტად აღმატებული, ვიდრე ღმერთი, ასევე ვერ წარმოვიდგენთ ქმნილებას მეტად აღმატებულს, ვიდრე ქმნილებას, რომელმაც იტვირთა განკაცებული ღმრთის დაბადება. რადგან ის აირჩია ღმერთმა, რომ იყოს მისი მარადიული სამყოფელი.” (ანთიმი)

ღვთისმშობლის მიძინებას, ცად ამაღლებას ანგელოზთა დასი გალობით და დიდებით ეგებება. იგი ამაღლდა ცად, როგორც სპეტაკი, უნაკლო, ქვეყნის დედოფალი. მისი ამქვეყნიური ღვაწლი მდგომარეობს იმაში, რომ “დედა მარიამმა შეარიგა ზეცა და დედამიწა, ღმერთი და კაცი. ის არის მართალთა სიხარული და ცოდვილთა სასოება.”(ანთიმი) ჩვენც ღვთისმშობლის ცად ამაღლებას უნდა შევხვდეთ “სულიერი სიხარულით” და შევსთხოვოთ: ნუ მიგვატოვებს ცოდვილთ, არამედ შეგვეწიე და დაგვიცავი მზაკვრობით ბოროტებისაგან, მოგვეც ხელი დახმარებისა, ყოვლადწმინდაო ქალწულო.

4. წმ. ანთიმოზ ივერიელი აგრძელებს აღმოსავლური ეკლესიის აპოფატკური თეოლოგიის ტრადიციებს, რომლის მეთოდური წესია გონების თვითშეზღუდვა შემეცნების იმ პრინციპულ ზღურბლზე, რისი გადალახვითაც ჭეშმარიტ ღვთისშემეცნებას ცვლის ღმრთის შესახებ იდოლების (ყალბი ცნობიერების) ხელოვნური კონსტრუირება.

5. წმ. ანთიმი აქ მიუთითებს ბიზანტიურ თეოლოგიაში ისიხასტურ, პალამიტურ ტრადიციაზე, სადაც დუმლით მედიტაციას ღვთისშემეცნებაში მნიშვნელოვანი როლი ენიჭება.

6. აქ ნაჩვენებია ტრინიტარული თეოლოგიის შინაგანი კავშირი მარიამის დოგმატთან და ღვთისმეტყველებასთან, რასაც ღმრთისა და ადამიანის პერსონული კორელატურობის კონცეფციასთან და ქრისტიანული ჰუმანიზმის საფუძვლებთან მივყავართ.



---

7. წმ. ანთიმოზ ივერიელი განმარტავს მარიამული დოგმატის ერთ-ერთ ასპექტს - ყველა საიდუმლოზე აღმატებულისა და დაფარულის გაცხადებას, რაც ადამიანისა და ღმრთის ურთიერთობის მთელი პროვიდენციური კონცეფციის გამომჟღავნებას მოასწავებს.

8. ამ ღრმა მედიტაციაში წმ. ანთიმი წარმოგვიდგება როგორც დიდი ღვთისმეტყველი, რომელიც ქმნის ფუძემდებლური მნიშვნელობის თეოლოგემას XVI-XVII საუკუნეების რელიგიის ფილოსოფიისათვის და აზროვნების მთელი ეპოქალური პარადიგმისათვის. ამ თეოლოგემით უარყოფილია განმანათლებლური კონცეპტი პრესტაბილური ჰარმონიის შესახებ, რომლის მიხედვითაც ღმერთმა შექმნა ყველა შესაძლო სამყაროთა შორის უკეთესი სამყარო, მათემატიკისა და მექანიკის უნივერსალური კანონების მიხედვით. ყოფიერების არსება წმ. ანთიმთან გაგებულია, როგორც უსასრულო შესაძლებლობათა ჰორიზონტი, რომელიც იმ ერთადერთ შეუძლებლობასაც შეიცავს, რომელსაც კირკეგორო რწმენის პარადოქსს უწოდებს- „ღმერთი ვერ შექმნიდა ღვთისმშობელზე აღმატებულ არსებას ღირსების თვალსაზრისით.“ ესაა ღმრთისა და ადამიანის პერსონული კორელატურობის საფუძველი. წმ. ანთიმი აგრძელებს ნეტარი ავგუსტინეს კონცეფციას ღმრთისა და ადამიანის „პირისპირ დიალოგის“ შესახებ, რომელსაც ემყარება ქრისტიანული ჰუმანიზმის ექსისტენციალური ვერსია.

9. წმ. ანთიმის ამ თეოლოგემაში გამოვლენილია XVI-XVII საუკუნეების აზროვნების ისტორიაში გარდატეხის პუნქტი. წმ. ანთიმი ახორციელებს ტრადიციული თეოლოგიის ჰუმანისტურ გააზრებას; მეორეს მხრივ, უპირისპირდება ემპირისტული და რაციონალისტური განმანათლებლობის ფილოსოფიას. წმ. ანთიმისათვის მიუღებელია როგორც „ღმერთი ადამიანის გარეშე“, ასევე „ადამიანი ღმრთის გარეშე“. ამ თვალსაზრისით, „უადამიანო ღმერთი“ და „უღმერთო ადამიანი“ ერთნაირად საშიში ცდომილებაა. ყოვლად წმინდა ღვთისმშობლის სახით, ადამიანს წილი უდევს თვით შესაქმნელში, ქმნილების შექმნაში.

წმ. ანთიმის მიხედვით, სწორედ ღვთისმშობლის წილხვდომილების თეოლოგემაზეა დამყარებული მთელი ქრისტიანული ჰუმანიზმი და კოსმოგონია. „უფალმა შემიძინა თავისი გზის დასაწყისში, თავის ქმნილებამდე, დასაბამით; უკუნითიდან დამადგინა,

---

თავიდანვე, ქვეყნის დასაბამიდან“ (იგავნი. 8,22-30). რელიგიის ფილოსოფიის ეს კონცეფცია სისტემატური სახით არის ჩამოყალიბებული XX საუკუნის გამოჩენილი რუმინელი რელიგიათმცოდნის მირჩე ელიადეს იმ კრიტიკული თეორიის ალტერნატივად, რომლის მიხედვით ერთმანეთს უპირისპირდება „კულტის რელიგია“ და „პრაქტიკული გონების“ რელიგია; ხოლო რელიგიის ჭეშმარიტი არსება ავტონომიური გონების ეთიკურ პოსტულირებაში მდგომარეობს. წმ. ანთიმის თეოლოგემა აშკარად გვაყენებს პიროვნების არსების გადააზრების გზაზე, რომელიც არც ემპირიულად დგინდება და არც აპრიორულად. ის ვლინდება გამოცხადების (ტრანსცენდირების) ხდომილებით თანაკრეატიულობაში.

## ქადაგება № 4

1. ქადაგება ეხება რწმენის ადგილს ქრისტიანის ცხოვრებაში, რას ნიშნავს იყო ჭეშმარიტი ქრისტიანი და რას ნიშნავს ჭეშმარიტი რწმენა? როგორია ქრისტიანის ჭეშმარიტი რწმენა, რა როლი აკისრია რწმენის განმტკიცების საქმეში სულიერ მოძღვარს და რა მოტივები და მიზნები უნდა ამოძრავებდეს მოძღვარს. “დიდმა სურვილმა და წმინდა სიყვარულმა და განსაკუთრებით თქვენ მიმართ ჩემმა სულიერ-მამობრივმა მოვალეობამ მაიძულა, მოვსულიყავი დღეს თქვენს დასამოძღვრად.”(ანთიმი) მოძღვრის მოვალეობაა ემსახუროს ქრისტეს საქმეს და ასევე მისი სულიერი და მამობრივი მოვალეობაა, ადამიანის სულიერი და ამქვეყნიური ცხოვრება სწორი გზით წარმართოს. ღმერთი ადამიანს ადგენს თავისი სამწყსოს წინამძღოლად “მოძღვრად, სულიერ მამად და მაცხოვრებელი ცხოვრების მასწავლებლად” (ანთიმი). მან არა მარტო უნდა უქადაგოს ქრისტეს სწავლება, არამედ გაუწიოს მამობრივი მზრუნველობა ამ ცხოვრების გზაზე, რომელიც ეშმაკის ცთუნებებით არის სავსე. ამისათვის იგი უნდა იყოს მასწავლებელიც. ანთიმოზი იქვე მიანიშნებს, რომ ამ მისიის შესრულებაში მას უნდა დაეხმაროს თვითონ მთელი მრევლი და თითოეული მორწმუნე ქრისტიანი. “თქვენი ყველასი, დიდის და პატარის მოვალეობაა, მომისმინოთ და შეასრულოთ, რასაც გასწავლით.”(ანთიმი) “რასაც დედამიწაზე შეკრავთ, ზეცაშიც შეკრული იქნება. ხოლო რასაც გახსნით დედამიწაზე, გახსნილი იქნება ზეცაშიც”(მათე. 18.18). ამიტომ მოძღვარს აქვს განსაკუთრებული პასუხისმგებლობა ღმრთის წინაშე თქვენ გამო და ხელი არ უნდა შეუშალოთ ამ მოვალეობის შესრულებაში. იგი თავის მოვალეობას უნდა ასრულებდეს სულიერი აღმაფრენით, რომელიც

---

უნდა გადაეცეს მრევლის თითოეულ წევრს. იგი მუდამ მზად უნდა იყოს თავისი მისიის შესასრულებლად.” თქვენი დამოძღვრა არასოდეს არ გადამიდია და არც დამზარებია”(ანთიმი).

2. ქრისტიანს უნდა გამოარჩევდეს “სამი დიდი სათნოება: რწმენა, სასოება და სიყვარული”(ანთიმი). ეს სათნოებანი არ არის შემთხვევითი და გარეგანი ქრისტიანისათვის, რადგან ისინი “დათესეს წმინდა ეკლესიის მიწაში, ანუ მორწმუნეთა გულებში.”(ანთიმი) მათი საფუძველი არის ღმერთი. ამდენად მათი შესრულება სავალდებულოა, რამეთუ იგი ყველა ქრისტიანის მოვალეობაა. ანთიმოზი მიიჩნევს, რომ ეს სამი სათნოება “ქრისტიანობის საფუძველს წარმოადგენენ, რწმენის, სასოების და სიყვარულის გარეშე შეუძლებელია არსებობა და ქრისტიანის ცხოვნება”(ანთიმი).

როგორია მიმართება ამ სამ სათნოებას შორის შეიძლება გწამდეს და არ გიყვარდეს, გიყვარდეს და არ გწამდეს, ანდა არ გწამდეს და გქონდეს სასოება?

“სასოება არის ნამდვილი კადნიერება ღვთის მიმართ, რომელიც ღვთის წყალობით მოცემული აქვს ადამიანის გულს, რომ არ ჩავარდეს სასოწარკვეთილებაში და არასოდეს არ დაკარგოს იმედი.”(ანთიმი) სასოება მართლაც არის კადნიერება, რადგან ის არის ღმრთის საჩუქარი, წყალობა, რომელიც არც კი დაუმსახურებია ადამიანს. “იგი დარწმუნებულია, რომ სინანულით ყოველთვის მიიღებს ცოდვის მიტევებას.”(ანთიმი) მაგრამ ადამიანი ამ საქმეშიც ცდება, როდესაც მას აქვს არა ღმრთის, არამედ მეორე ადამიანის იმედი. ასეთი სასოება ბოროტია. ანთიმოზი იმოწმებს დავით წინასწარმეტყველს: “ნუ გაქვთ სასოება მთავართა მიმართ ძეთა კაცთასა, რომელთა თანა არა არს ცხოვნება.” მართლაც, ადამიანი იმდენად კადნიერდება, რომ თავის წარმატებას მიაწერს ან საკუთარ თავს, ანდა სხვა ადამიანს, ბატონს, ხელისუფალს. ამ სახის სასოება არ ემყარება ღმრთის სიყვარულს.

სიყვარული არის მეორე სათნოება “სიყვარული გულისხმობს ადამიანთა ერთობას, გზას უფლისაკენ და ყველა სათნოების მწვერვალს.”(ანთიმი) ანთიმოზი იმოწმებს პავლე მოციქულის წერილს “ახლა კი რჩება რწმენა, იმედი, სიყვარული-ეს სამი, ხოლო მათგან სიყვარულია უმეტესი”(კორინთელთა მიმართ 13.13). შემდეგ ანთიმი განასხვავებს სიყვარულის სამ სახეს: “ღვთაებრივს, ბუნებრივს და ვნებიან და ბოროტს.”(ანთიმი) სიყვარულია სიბრძნის, ცოდნის და რწმენის ნამდვილობის საფუძველი. “წინასწარმეტყველებაც რომ მქონდეს, ყველა საიდუმლო და მთელი ცოდნაც რომ ვუწყოდე, სრული რწმენაც რომ მქონდეს ისეთი, მთების გადაადგილება რომ შემიძლოს, ხოლო სიყვარული არ გამაჩნდეს, არარაობა ვიქნებოდი”(კორინთელთა 13.2).

---

რაც შეეხება მესამე სათნოებას “სარწმუნოება თავისი არსით არის ის, რითაც ჩვენ გვაქვს სასოება და რწმენა საგნებისა, რომელთა დამტკიცებაც შეუძლებელია”(ანთიმი). რწმენა არის მეტაფიზიკური უნარი დაინახო ის, რისი ემპირიული დამტკიცება შეუძლებელია. ადამიანს რწმენა მიეცა როგორც სამოთხის ცოდნის მოგონება. მან იცის, რომ ჰქონდა ღმრთის, სამოთხის ცოდნა, მაგრამ არ შეუძლია მისი დამტკიცება. რწმენამ მოიპოვა ახალი ფუნქცია, რაზეც იმოწმებს პავლე მოციქულს: “სარწმუნოების გარეშე შეუძლებელია ვინმე ცხონდეს.” საკუთარი რწმენის დონე განსაზღვრავს იმას, რაც მიგეზღვევა“, სარწმუნოებისა თქვენისაებრ მოგეცეს თქვენ”. რწმენის დონე განსაზღვრავს იმას, თუ რას მიიღებ ღმრთისაგან. ამიტომ ღმერთს კი არ უნდა საყვედურობდე, არამედ საკუთარ თავს და რწმენის არასრულობაზე უნდა წუხდე და ცდილობდე ქრისტეს რწმენაში განმტკიცებას. ასეთი რწმენა თავისთავად არ მოდის იმის აღიარებით, რომ ქრისტიანი ხარ. რწმენა სულის სიწრფელეს, მორჩილებას და სულიერ შრომას მოითხოვს. უნდა გქონდეს სასოება სულისა და სიყვარული ღმრთისადმი. ასეთი ღვაწლის გარეშე ქრისტიანს ემართება სიყრუე და ხედვის სიბრმავე. ამიტომ ქრისტიანმა და მისმა სულიერმა მოძღვარმა ერთობლივად იზრუნოს სულიერი სიყრუის და სიბრმავის დასაძლევად. თითოეულს აქვს თავისი მოვალეობა და პასუხისმგებლობა. მრევლი მოვალეა უსმინოს და დაემორჩილოს მოძღვარს, ხოლო მოძღვარს ევალება დაუზარელად იზრუნოს მრევლის სულიერ სიფხიზლეზე და მდგომარეობაზე. ქრისტიანობა უდიდეს სულიერ შრომას და გულის სიწრფელეს გულისხმობს, რადგან იგი არის მუდმივი სიფხიზლე და მოლოდინი.

4. ანთიმი ადარებს მეზვერეს და ფარისევლის რწმენას და მიუთითებს რწმენის სიწრფელის აუცილებლობაზე, რადგან შენი რწმენით მოგეცემა. ფარისევლური რწმენა ჭეშმარიტი რწმენის დამახინჯებაა. იგი უფრო ხმაურიანი და ამპარტავნულია. ამ რწმენას აკლია მორჩილება, გულის სიწრფელე და სიყვარული. რას ნიშნავს ჭეშმარიტი რწმენა და ქრისტიანად ყოფნა? “შეიძლება ვთქვათ, რომ ჩვენ თავს ვიტყუებთ და რეალურად სარწმუნოება არ გვაქვს.” ასეთი მკაცრი საყვედურის გამოთქმის საფუძველია ის, რომ” არც ღმერთი გვიყვარს და არც მის მცნებებს არ ვიცავთ.” შეუძლებელია გიყვარდეს ღმერთი და არ გწამდეს. იგი მამობრივი სიყვარულით და წუხილით მიუთითებს იმ ცოდვებს, რითაც დამძიმებულია ადამიანის ყოველდღიურობა. “ჩვენ მას ვაგინებთ, დავცინით და მასხრად ვიგდებთ მის სიტყვებს, თითქოსდა ზღაპარი იყოს”(ანთიმი). მართლაც, სულიერი სიყრუის და სიბრმავის რა დონეზე უნდა დაეცეს ადამიანი, რომ ზღაპრად მიიჩნიოს, ეს არის სწორედ რწმენის არქონა, არქონა სასოებისა და რწმენისა იმ საგნებისა, რომელთა დამტკიცებაც შეუძლებელია.”

“ჩვენ ვერც სასოებით გამოვირჩევით წარმართისაგან”; უნდა გქონდეს რწმენა, რომ იქონიო სასოება, სასოება მოდის ღმრთის რწმენის და სიყვარულის შემდეგ. არა სასოებით, არა სიყვარულით გამოვირჩევით წარმართთაგან, არამედ ღმრთის რწმენით. “ღმერთი სიყვარული არს”(იოანე 4,16). ღმრთის სიყვარული არ არის როდესაც გძულს ძმა და ახლობელი. “რადგან ვამბობ, ჩვენ შორის თუ არა გვაქვს სიყვარული და ღვთის მცნებისამებრ არ ვუსურვებთ ხოლმე სიკეთეს ერთმანეთს, მაშინ არ გვაქვს არც სარწმუნოება, არც სასოება და არც სიყვარული”(ანთიმე). მუდმივი საყვედური, უმადურება, სულსწრაფობა, გულქვაობა არის ის, რაც ჩვენ გვაშორებს ღმერთს. მაგრამ საზოგადო ურწმუნოებას განა მართო ეს სჭირს. ამაზე კიდევ უფრო დამღუპველია, როდესაც “გვესმის ხოლმე თუ ვინმე აგინებს, რაც ჩამოვთვალე, იმის მაგივრად, რომ შენიშვნა და საყვედური მივცეთ, როგორც უგუნურ ადამიანს, ჩვენ გვსიამოვნებს და ვიცინით. განა ეს ქრისტიანული საქციელია? თქვით, თუ ღმერთი გწამთ”(ანთიმე). მისი ტონი კიდევ უფრო მკაცრდება: “მღვდელმთავრებს არაფრად ვაგდებთ, ბერებს ცილს ვწამებთ, მღვდლებს დავცინით. ეკლესიაში წირვა-ლოცვის მოსმენის, ლოცვისა და ღმრთისათვის ცოდვების შენდობის თხოვნის ნაცვლად, ვლაპარაკობთ, ვიცინით, თვალებს ვუპაჭუნებთ ერთმანეთს”(ანთიმე).

რატომ ხდება ასე? “აღარ ვართ არცერთი, ვინც ეძებს ღმერთს.” ამიტომ ადამიანი ჩაიძირა ამქვეყნიურობაში და დაკარგა რწმენა, როგორც უხილავის დანახვის უნარი. მით უფრო “არავინ ეძიებს სიკვდილს ღმრთისათვის”. “ამ ყველაფრის მიზეზი სხვა არაფერია, გარდა ჩვენი ურწმუნოებისა”(ანთიმე). ამის შედეგია სულის გაქვავება, სმენის დახშობა და ხედვის დაბნელება, გადაგვარება. ამიტომ ადამიანი კარგავს სირცხვილს ღმრთისა და საკუთარი თავის, როგორც ღმრთის ხატისა და მსგავსის წინაშე.

საზოგადოება ფარისეველი გახდა და გარეგნულად, სხვის დასანახად გარეთ და არაგულწრფელად მისდევს ქრისტიანობას “თვლით, რომ მართო იმით ვცხონდებით, რომ ქრისტიანები გვქვია”(ანთიმე). ნათლობა უმნიშვნელოვანესი ნაბიჯია, მაგრამ ის მხოლოდ პირველი ნაბიჯია, რომლითაც შედიხარ ღვთის სამეფოში, მაგრამ მასში რომ დარჩე, უნდა იშრომო სულიერად, მისდიო მცნებებს და გიყვარდეს. მონათვლა არ არის საკმარისი, შენ უნდა შენი ცხოვრებით დაადასტურო, რომ ჩვენი ცოდვების გამოსყიდვისათვის ქრისტეს ჯვარზე სიკვდილი ჩვენი ცხოვრების წარმმართველია, რადგან ის არის გზა, ჭეშმარიტება და ცხოვრება. ჩვენ ქრისტეს მიერ ნაწყალობევ იმედს არ დაგვარგავთ და არ ვემტყუნებით. გვიცნობს კი ღმერთი ჩვენ, რადგან ღმერთი ამბობს: “შეიყვარე უფალი ღმერთი შენი ყოვლითა გულითა შენითა და ყოვლითა სულითა შენითა და ყოვლითა გონებითა შენითა”(მათე. 22. 37), (იოანე 13. 34). ეს იყო

---

ახალი, დიდი მცნება. “ჩემი მოწაფეები რომ ხართ, იმით გაგებენ ყველანი, თუ სიყვარული გექნებათ ურთიერთს შორის”(იოანე 13. 35). ნათლობა არის წყალობა, რომელიც ავანსად არის გაცემული. “ცათა სასუფეველში არ შევლენ ისინი, ვინც მეუბნებიან უფალო, უფალო, არამედ ვინც ასრულებს ჩემს ნებას.” ადამიანი ფარისევლობის გამო აღარ ფიქრობს ღმერთზე და არც სწამს იგი. მისთვის რწმენა იქცა გარეგან, ფორმალურ მოქმედებად და ვერ ან არ ხედავს მის საკრალურ ხასიათს. ფარისევლობა სიბრმავეა, სულის სიზარმაცა და ნების უუნარობა. ფარისეველს უკვირს: “რადგან ქრისტიანები ვართ, რატომ არ გვისრულებს ღმერთი სურვილებს”(ანთიმე), მაგრამ უნდა გვიკვირდეს, თუ რატომ არ გვანადგურებს, “რადგან ცხადად ვხედავთ, როგორ გვშორდება ღმერთი”(ანთიმე). ამის მიზეზია ჩვენი ფარისევლობა, გულსგარეთა რწმენა, გულსგარეთა სიყვარული, გულსგარეთა სასოება. ღმერთი კი არის ჩვენი სულთამხილველი. ჩვენ კი ვცდილობთ მის მოტყუებას და მის ნებას კი არ ვასრულებთ, არამედ ჩვენი სურვილების ასრულებას ვთხოვთ.

ჩვენ აღარ ვაზროვნებთ ღმერთზე, ვკარგავთ ღმრთის რწმენას, არც სასოება გვაქვს. ღმერთი კი პასუხად გვშორდება ჩვენ. ეს არის უდიდესი ხიფათი და განსაცდელი. ამის ნიშანია ამდენი ავადმყოფობა, სიკვდილი, ტანჯვა, გაჭირვება და მაინც ვერ ვტოვებთ ჩვენს ბოროტებას.

4.ადამიანი მაინც ღმრთის უსაზღვრო სიყვარულის და მოწყალების იმედით ცოცხლობს. ამიტომ “გონს მოდით და შეინანეთ თქვენი უღირსი საქციელი”(ანთიმე). მოძღვრის მოვალეობაა, როგორც სინდისის ხმამ მიუთითოს მის ცოდვებზე, მაგრამ ამავე დროს იმედი ჩაუსახოს მრევლს. სინანულის და მოქცევის გზით ვიაროთ. მოძღვარი არ არის ქურუმი, რომელიც ღმერთთან ურთიერთობაშია; მოძღვარი არის შუა ქრისტიანსა და ღმერთს შორის. ამიტომ მრევლის, თითოეული წევრის, ყოველი ქრისტიანის ცხოვრება მისი მზრუნველობის და ყურადღების საგანია. “სანამ მე ვარ თქვენი მოძღვარი, ჩემს კისერზეა ჩამოკიდებული თქვენი სულები და ჩემგან მოგთხოვთ თქვენ ღმერთი”(ანთიმე). ანთიმოზი მრევლს აფრთხილებს, რომ ღმრთის უსაზღვრო სიყვარულით ბოროტად არ ისარგებლონ “არ იფიქროთ, ვითომ ღმერთს შევეცოდებით და შეგვინდობს მარტო იმიტომ, რომ გვიჭირს და შეძლებისდაგვარად არ შევასრულებთ მის მცნებებს”(ანთიმე).

იგი პასუხისმგებელია ღმრთის წინაშე მისი მრევლის ცხოვრების გამო, მან უნდა მიუთითოს თითოეულს ქრისტეს გზა. “იცოდეთ, თქვენი გაჭირვების მეც თანამონაწილე ვარ და მეც თქვენთან ერთად იმავე უღელს ვატარებ”(ანთიმე). მოძღვარი თავისი მრევლის ცხოვრებით ცხოვრობს და როგორც უფალმა, მანაც უნდა იცოდეს და იზიარებდეს მრევლის განსაცდელს. მაგრამ სულიერ მოძღვარს, “არ აქვს უფლება არ

უთხრას სიმართლე, როგორც მეფე ითხოვს ჩვენგან ხარკს, ასევე ღმერთი ითხოვს რწმენას და კეთილ საქმეებს”(ანთიმე).

ბოლოს როგორც ჭეშმარიტ მოძღვარს შეჰფერის “ღმერთს ვევედრები, აღბეჭდოს ეს სიტყვები თქვენს გულებში, რაც გესაუბრეთ, არ დაივიწყოთ და შეძლებისდაგვარად შეასრულოთ”(ანთიმე). ჩვენი ცხოვრება უნდა წარიმართოს სულიერი მცნებებით, ცხოვნების გზით, რომ “მარადის ვაქებდეთ და ვადიდებდეთ მის ყოვლადწმინდა და ყოვლად დიდებულ სახელს”(ანთიმე).

## ქადაგება № 5

<sup>2</sup> მირქმა (ბერძ. Η Ὑπαπαντή τοῦ Κυρίου , ასევე συστάσις-შეხვედრა. ლათ. *Praesentatio Domini* — უფლის წარდგინება) მირქმა 12 საუფლო დღესასწაულთაგან ერთ-ერთია. აღინიშნება იერუსალიმის ტაძარში ყრმა იესოს მიყვანება შობიდან მეორმოცე დღეს. იგი ქრისტიანული ეკლესიის ერთ-ერთი უძველესი დღესასწაული, რომელიც VI საუკუნემდე განსაკუთრებული ზეიმით არ აღინიშნებოდა. 528 წელს, იმპერატორ იუსტინიანეს (527-565) დროს, ანტიოქიას თავს დაატყდა საშინელი მიწისძვრა, რომელსაც მრავალი ადამიანი ემსხვერპლა. ერთ უბედურებას მეორე დაერთო – შავი ჭირის ეპიდემია, ყოველ დღე რამდენიმე ათასი კაცი იხოცებოდა. ამ განსაცდელის ჟამს ერთ კეთილმსახურ ქრისტიანს ეუწყა, რომ საჭირო იყო მირქმის დღესასწაულის უფრო საზეიმოდ აღნიშვნა, მართლაც, როგორც კი ამ დღეს ღამისთევის ლოცვები და ლიტანიობა აღასრულეს, ბიზანტიაში უბედურებათა წყება შეწყდა. ღვთისადმი მადლიერების ნიშნად, 544 წელს, ეკლესიამ განაჩინა, მირქმა (მიგებება) უფლისა ღვთისა და მაცხოვრისა ჩვენისა იესო ქრისტესი უფრო საზეიმოდ აღენიშნათ. ტაძარში მისი შეგებება სვიმეონ ღვთისმამრქმელთან განასახიერებს კაცობრიობის ღმერთთან შეხვედრის სიმბოლოს.

<sup>2</sup> მართალი სვიმეონ ღვთისმამრქმელი - იერუსალიმში მცხოვრები სწავლული, რომელიც ეგვიპტის მეფემ პტოლემეოს II ფილადელფოსმა მიიწვია ალექსანდრიაში წმინდა წერილის ბერძნულ ენაზე სათარგმნელად. ესაია წინასწარმეტყველის წიგნის თარგმნისას, როდესაც მივიდა ადგილამდე-“აჰა, მუცლად იღებს ქალწული და შობს ძეს, და უწოდებს სახელად ემანუელს”(ესაი. 7,14). ჩათვალა, რომ შეცდომა იყო გაპარული და დააპირა “ქალწულის” ნაცვლად “დედაკაცი” ჩაეწერა „, ამ დროს „იყო მისა უწყებულ სულისაგან წმინდისა არა ხილვად სიკვდილი, ვიდრემდე იხილოს ცხებული უფლისაი“. ამ დღიდან მოყოლებული იგი მოლოდინით ცხოვრობდა 360 დღე, ვიდრე შეხვედრის დღე არ შედგა..VI საუკუნეში მისი უხრწნელი ნაწილები კონსტანტინოპოლში დაასვენეს. მართალი სვიმეონ ღვთისმამრქმელის

---

სიტყვები-აჰა ესერა იესე დგას დაცემად და აღდგინებად მრავალთა ისრაელისა შორის და სასწაულად სიტყუის საგებელად./ და თვით შენსაცა სულსა განვიდეს მახუილი, რაითა განცხადნენ მრავალთაგან გულთა ზრახვანი (ლუკა. 2, 34-35). დაედო საფუძვლად ღვთისმშობლის იკონოგრაფიაში ერთ-ერთ შესანიშნავ ხატს“ზოროტ გულთა დამამშვიდებელი.“

<sup>2</sup> შდრ. და მან მიიწუა იგი მკლავთა თვისთა ზედა და აკურთხევდა ღმერთსა და თქუა:/ აწ განუტევე მონა შენი, მეუფეო, სიტყვისაებრ შენისა მშვიდობით,/ რამეთუ იხილეს თუალთა ჩემთა მაცხოვარება შენი,/ რომელ განუმზადე წინაშე პირისა ყოვლისა ერისასა,/ ნათელი გამობრწყინვებად წარმართთა ზედა და დიდებად ერისა შენისა ისრაელისა./ და იყვნეს იოსებ და დედა მისი დაკვირვებულ სიტყუათა მათ ზედა მისთვის./ და აკურთხნა იგინი სვიმეონ და ჰრქუა მარიამს, დედასა მისსა: აჰა ესერა იესე დგას დაცემად და აღდგინებად მრავალთა ისრაელისა შორის და სასწაულად სიტყუის საგებელად./ და თვით შენსაცა სულსა განვიდეს მახუილი, რაითა განცხადნენ მრავალთაგან გულთა ზრახვანი./ და იყო ანნა წინასწარმეტყუელი, ასული ფანოელისა, ტომისაგან ასერისა. ესე გარდასულ იყო დღეთა მრავალთა და ცხოვრებულ იყო ქმრისა თანაშვუიდ წელ სიქალწულითგან თვისით./ და ესე იყო ქურივ ვითარ ოთხმეოცდაოთხის წლის, რომელი არა განეშორებოდა ტაძრისა მისგან. მარხვითა და ვედრებითა და მსახურებითა ღამე და დღე./ ესე მასვე ჟამსა შინა მოიწია და აუვარებდა ღმერთსა და ეტყოდა მისთვის ყოველთა, რომელნი მოელოდეს გამოხსნასა იერუსალიმსა შინა,/ და ვითარცა აღასრულეს მის ზედა ყოველივე მსგავსად არს შჯულისა უფლისა, მოიქცეს და წარვიდეს გალილეად, ქალაქად თვისა-ნაზარეთად./ ხოლო ყრმა იგი აღორძინებოდა და განტკიცნებოდა სულითა და აღივსებოდა სიბრძნითა და მაღლი ღმრთისა იყო მის ზედა(ლუკა. 2,28-400). „მცხეთური ხელნაწერი“. თბ; 1986. მეცნიერება. გვ.208-09

<sup>3</sup> მართალი სვიმეონ ღვთისმომრქმელის სიტყვები“ აწ განუტევე მონა შენი, მეუფეო, სიტყვისაებრ შენისა მშვიდობით,/ რამეთუ იხილეს თუალთა ჩემთა მაცხოვარება შენი,/ რომელ განუმზადე წინაშე პირისა ყოვლისა ერისასა,/ ნათელი გამობრწყინვებად წარმართთა ზედა და დიდებად ერისა შენისა ისრაელისა.“ (ლუკა. 2, 29-34) იქცა ლოცვად, რომელსაც ეწოდება „ სვიმეონ ღვთისმეტყველის გალობა“.

<sup>4</sup> იგივე აზრია გატარებული თეოფანე დაყუდებულის მიერ., წმ. თეოფანე მირქმას მიიჩნევს ახალი და ძველი აღქმის შეხვედრის სიმბოლოდ. მართალი სვიმეონ ღვთისმომრქმელის სახით, წერს იგი, პირველცოდვით დალდასმული



---

კაცობრიობა მარადიულობაში მშვიდობით გადადის და ადგილს უთმობს ქრისტიანობას.

<sup>5</sup> *მამონა* – ძველ ბერძნულად μαμωνᾶς, ლათინურად *mammona* - სიტყვა, რომელიც სახარებაში გამოიყენება სახარებაში (პიროვნულად – მათე 6:24, ლუკა 16:13 და უპიროვნოდ – ლუკა 16:9, ლუკა 16:11) ამქვეყნიური სიმდიდრის, ქონების, სიამოვნების, ცოდვისა და მათდამი დამონების მნიშვნელობით: „ვერვის ხელ–ეწიფების ორთა უფალთა მონებად: ანუ ერთი იგი მოიძულოს და სხუი იგი შეიყუაროს, ანუ ერთისაი მის თავს–იდვას და ერთი იგი შეურაცხ–ყოს. ვერ ხელ–ეწიფების ღმრთისა მონებად და მამონაისა.

## ქადაგება № 6

<sup>1</sup> ყველიერის, მიტევების კვირიაკე. (ბერძ. Ἐβδομάς τῆς Τυριχῆς). ამ დღის ლიტურგიკული სახელწოდებაა: „ადამის ექსორობა“ (სამოთხიდან განდევნა ადამისა).

<sup>2</sup> შდრ. „და ორმოც დღე გამოიცადებოდა ეშმაკისაგან და არარა ჭამა მათ დღეთა შინა. და აღ–რა–ესრულნეს დღენი იგი, შეემშია“. (ლუკა. 4,2)

<sup>3</sup> ეკლესიის მამები ამ კონტექსტში მიტევების ხელოვნებასაც ამატებენ.. „უკუეთუ არა მიუტევნეთ კაცთა შეცოდებანი მათნი, არცა მამამან თქუენმან მოგიტევნეს თქუენ შეცოდებანი თქუენნი“ (მათე. 6,15). ცოდვის ზეიმი, მისი ამა სოფლად ბატონობის მთავარი ნიშანი არის მტრობა. უთანხმოება, ცილობა და სიძულვილი. ამიტომ ცოდვის სიმტკიცის პირველი შერყევაა მიტევება: უნდა დავუბრუნდეთ ერთობას, თანხმობასა და სიყვარულს. ღვთის გასხივოსნებული მიმტევებლობა ინათებს ჩემსა და ჩემს „მტერს“ შორის, თუ ვაპატიებ. მიტევება ადამიანური ურთიერთობის ყველა ანგარიშგების უარყოფასა და მისი ქრისტესადმი გადაბარებას ნიშნავს. მიტევება ღმრთის სასუფევლის ნამდვილი ძლევა მოსილი შეღწევაა ჩვენს დაცემულსა და ცოდვილ ქვეყნიერებაში, ამბობს პროტოპრესვიტერი ალექსანდრე შმემანი Father Alexander Schmemmann. *Great Lent*. —Crestwood (N. Y.), 1969.

## ქადაგება № 7

---

1. „მადლი სულისა წმიდისა, უძღურთა მკურნალი და ნაკლულებათა აღმავსებელი“ – ციტატა ეპიკლეზისის ლოცვიდან, რომელიც იკითხება ადამიანის სასულიერო პირად (დიაკვნად, მღვდლად, ეპისკოპოსად) კურთხევის დროს.

2. ებრაელთა. 9, 7

<sup>3</sup> ებრაელთა. 9, 24

<sup>4</sup> მართლმადიდებელი ეკლესიის ლიტურგიკულ ტექსტებში, კერძოდ ჩამოლოცვისას, წმინდა იოაკიმეც და ანაც ღვთის მშობლებად იწოდებიან.

## ქადაგება № 8

<sup>2</sup> ებრაელთა. 11, 6-7

<sup>2</sup> მათე. 22, 40

<sup>3</sup> შდრ.: .. ვამსგავსო იგი კაცსა გონიერსა, რომელმან ადაშენა სახლი თვისი კლდესა ზედა. მათე 7, 24

<sup>4</sup> 2 იოანე. 4, 20

<sup>5</sup> იოანე. 13, 35

<sup>6</sup> მათე. 7, 21

<sup>7</sup> 1 კორინთელთა. 13, 1-3

## ქადაგება № 9

<sup>2</sup> ანთიმოზ ივერიელი ამ ქადაგებაში თეოლოგიური ჰერმენევტიკის ბრწყინვალე ნიმუშს გვივლენს.

<sup>2</sup> ამ მონაკვეთში ანთიმო იყენებს ალეგორიის მეთოდს.

<sup>3</sup> საქმე 5, 15 შდრ.: „ვითარმედ უბანთაცა ზედა გამოაქუნდეს უძღურნი და დადგმიდეს ცხედრებითა და საკაცებითა, რაითა მოსლვასა მას პეტრესსა აჩრდილი ოდენ ვისმე მისი შეადგეს მათგანსა“.

<sup>4</sup> იერემია 17,9 შდრ.: „სიღრმითა გულისაითა უმეტეს ყოველთა, და კაცი არს, და ვინ იცნას იგი?“

<sup>5</sup> საქმე 8: 22–23.

<sup>6</sup> ანთიმოზ ივერიელი გულისხმობს უნგრო–ვლახეთის სამთავრო გერბს, რომლის ცენტრშიც გამოსახულია ფრთებგაშლილი არწივი, რომელსაც ნისკარტში ჯვარი უჭირავს, ხოლო ჯვრის აქეთ–იქით ოქროსფერი მზე და მთვარეა. ანთიმოზი ასევე ცნობილია, როგორც უნიჭიერესი ჰერალდიკოსი, რომელსაც არაერთი უნიკალური გერბი შეუქმნია, მათ შორის ბრინკოვეანუს სამთავრო გვარის ხსენებული გერბის დახვეწაშიც მონაწილეობა მიუღია. ამ გერბს ანთიმოზი ხშირად ბეჭდავდა ხოლმე თავისი წიგნების თავფურცელზე და ეს გერბი რუმინეთის სახელმწიფოს

---

თანამედროვე გერბის პროტოტიპად იქცა. რუმინეთის ამჟამინდელი გერბის ცენტრალურ ფიგურას ასევე ფრთებგამოღილი არწივი წარმოადგენს, რომელსაც ნისკარტში ჯვარი უკავია.

<sup>7</sup> კონსტანტინე ბრინკოვიანუ (+1714)-უნგრო-ვლახეთის მთავარი, ქვეყნის საერო ხელისუფალი ანთიმოზ ივერიელის მიტროპოლიტობის პერიოდში. მთავრის ქვეყანაში არყოფნის დროს უზენაესი ხელისუფლის უფლებამოსილებანი დროებით გადადიოდა უნგრო-ვლახეთის მიტროპოლიტის ანთიმოზ ივერიელის ხელში. წმინდა ანთიმი და კონსტანტინე ცდილობდნენ, განეხორციელებინათ საერო და სასულიერო ხელისუფლებათა სიმფონიის პრინციპი. ოსმალეთის იმპერიისათვის სახელმწიფო ღალატის ბრალდებით კონსტანტინე ბრინკოვიანუ და მისი ოთხი ვაჟიშვილი დააპატიმრეს. სტამბოლში გადაიყვანეს და 1714 წლის 14 აგვისტოს თავი მოჰკვეთეს. დასჯის წინ თურქები ამაოდ აიძულებდნენ რუმინეთის ხელისუფალს ისლამი მიეღო. მისი უკანასკნელი სიტყვები იყო: „უმჯობესია ათასჯერ მოკვდე, ვიდრე უღალატო რწმენას“. რუმინეთის ეკლესიამ მოწამეობრივად აღსრულებული მთავარი და მისი ვაჟები წმინდანებად შერაცხა.

## ქადაგება № 10

<sup>2</sup> ამ ჰომილიტიკური ხასიათის ქადაგებაში, მორალური პლანის გვერდით ნათლად იკვეთება ანთიმოზ ივერიელის პოლიტიკური მრწამსი, კერძოდ, განსაკუთრებული ინტერესი ეკლესიისა და სახელმწიფოს იდეოლოგიურ პრინციპზე, სახელმწიფოს მმართველის თვისებებზე და მის მიერ გატარებული პოლიტიკის პრიორიტეტებზე.

XVIII ს-ის დასაწყისის ევროპულ კონტექსტში, კონკრეტულად რუმინეთის დასავლეთ საღვარზე კათოლიკური იდეოლოგიური ექჰანსიის-უნიატობის გავრცელებისა და კათოლიკობაზე მოსახლეობის დიდი ნაწილის ძალით გადმოყვანის პირობებში, (Preot Prof. Dr. Mircea Pacurariu, Istoria Bisericii Ortodoxe Romane, Editura Episcopiei Dunarii de Jos, Galati, 1996. გვ.250) რასაც უცილობლად პოლიტიკური დამოუკიდებლობის არსებითი შეზღუდვაც მოჰყვებოდა. კათოლიკური იდეოლოგიის მიხედვით საერო-პოლიტიკური და საეკლესიო ხელისუფლების ლეგიტიმური მფლობელი მხოლოდ რომის პაპია. ამის საწინააღმდეგოდ, წმინდა ანთიმოზ ივერიელს წინა პლანზე გადმოაქვს ეკლესიისა და სახელმწიფოს ურთიერთობის მართლმადიდებლური კონცეფცია, რომელსაც საფუძველი ჩაუყარა წმინდა კონსტანტინე დიდმა. ეს მოდელი აღმოსავლეთ ევროპაში უკვე IV საუკუნიდან, ანუ წმინდა მეფე კონსტანტინე დიდის მმართველობიდან იმკვიდრებს. იგი გულისხმობდა თანაბარ, აქტიურ თანამშრომლობას და გამორიცხავდა პოლიტიკურ დაპირისპირებას. ამ კონცეფციის მიხედვით ორივე მხარე

---

თანამშრომლობს ერის სულიერი თუ მატერიალური სიჯანსაღის გამყარების საქმეში და მათ შორის ყალიბდება ჰარმონიული ურთიერთობა( Bejan S., Raporturile dintre Biserică și Stat, în „Biserica Ortodoxă Română”, Anul XL, No. 2 (488), noiembrie, 1921 გვ,191) ერის კეთილდღეობა არ განისაზღვრება მხოლოდ მატერიალური პარამეტრებით, მას ასევე სჭირდება სულიერი საზრდოც. ამიტომ ჯანსაღ საზოგადოებაში ეკლესია და სახელმწიფო არ უპირისპირდებიან ერთიმეორეს, არამედ თანამშრომლობენ. წმინდა ანთიმოზი თავის ქადაგებაში აღნიშნავს, რომ „მეფის გვირგვინი გაყოფილია მღვდელმთავრის მიტრასგან“. მიუხედავად იმისა, რომ მეფეს არ გააჩნია სასულიერო ხარისხი, ის მაინც იღვწის ერის სიკეთისა და კეთილდღეობისთვის როგორც ხორციელ და წარმავალ, ასევე სულიერ და მარადიულ საკითხებშიც. შესაბამისად, ეპისკოპოსებთან ერთად მეფეები მოციქულთაწორის საზღაურს იღებენ. მოციქულები კი ეკლესიის მეფენი და მღვდელნი არიან, რამეთუ ღმერთთან ერთად იღვწიან სოფლის ცხოვნებისათვის. იმავე იდეის გასამტკიცებლად წმინდა ანთიმოზ ივერიელი ქადაგების სხვა ადგილას საგანგებოდ იხსენებს კონსტანტინე დიდის მიერ პირველი მსოფლიო საეკლესიო კრების მოწვევის ფაქტს და ამ კრებაზე მეფის მიერ ნათქვამ სიტყვებს: „თქვენ ეკლესიასა შინა ხართ დადგენილი ეპისკოპოსებად, ხოლო მე კი ეკლესიის გარეთ არსებულ საქმეთათვის დამადგინა ღმერთმა ეპისკოპოსად“ ამ ორ ციტატაში გამოიხატა ეკლესიასა და სახელმწიფოს შორის ურთიერთობის მართლმადიდებლური მიდგომა. მეფის გვირგვინი და მღვდელმთავრის მიტრა, ანუ საერო და საეკლესიო ხელისუფლებები, გაყოფილია. მეფე შეიძლება იწოდებოდეს ეპისკოპოსად, მაგრამ მხოლოდ ეკლესიის გარეთ არსებული ანუ საერო პრობლემებისთვის. ასევე მოციქულიც, ან მისი მემკვიდრე ეპისკოპოსი, არის მეფე, მაგრამ მისი ძალაუფლება მხოლოდ ეკლესიით შემოისაზღვრება, სასულიერო ხარისხი და მაღლი თავის თავში არ მოიცავს საერო პოლიტიკურ ფუნქციებს. მეფე ეხმარება ეკლესიას, მაგრამ არ ერევა მის შიდა საქმეებში. კერძოდ, მეფე შეიძლება იყოს საეკლესიო კრების მოწვევის ინიციატორი, მაგრამ თვითონ არ იღებს მონაწილეობას მისი მსვლელობის პროცესში და ასევე არ ახდენს ზეგავლენას გადაწყვეტილებების მიღებაზე. ჩვეულებრივ, კრება სუფთა რელიგიური ხასიათის საკითხებს განიხილავს, მაგრამ იმით, რომ გადაილახება სარწმუნოებრივი პრობლემები და უთანხმოებები, სახელმწიფოში მცხოვრებ ადამიანებშიც მყარდება ზნეობრივი პრინციპები, მცირდება ყველა სახის დანაშაულობები და დაპირისპირება.

---

ანთიმოზ ივერიელი განსაკუთრებულად ლაპარაკობს წმინდა კონსტანტინე დიდის ღვთაებრივ მოწოდებასა და რჩეულობაზე: „სხვა მეფეებს ადამიანები ირჩევენ მეფეებად და ძვირფასი ქვებით მორთულ ოქროს გვირგვინებს ადგამენ თავზე, ხოლო დიდი კონსტანტინეს შემთხვევაში, მისი კეთილი და სუფთა გულის გამო, თავად ღმერთმა გამოარჩია. “მაგრამ ეს რჩეულობა არის უშუალოდ ღვთისგან ბოძებული განსაკუთრებული ნიჭი და არა ეკლესიის ან, მითუმეტეს, რომის პაპის მიერ მიცემული ლეგიტიმაცია. „როგორც პავლე მოციქულმა, ასევე [კონსტანტინე მეფემაც] უშუალოდ ზეციდან მიიღო თავისი მოწოდება“ აღნიშნავს წმინდა ანთიმოზ ივერიელი.

<sup>2</sup> კონსტანტინე დიდის თანამედროვე ისტორიკოსები – ევსები კესარიელი და ლაქტანცი, მოგვითხრობენ მეფის ქრისტიანობაზე მოქცევის ამბავს: თავის პოლიტიკურ მოწინააღმდეგე სარდალთან მაქსენტისთან გადამწყვეტი ბრძოლის წინა დღეს, 312 წლის 28 ოქტომბერს, როდესაც კონსტანტინე 20.000 ჯარისკაცით უპირისპირდებოდა მაქსენტის 150.000 ჯარისკაცს, შუადღის საათზე კონსტანტინემ ცაზე მზის თავზე დაინახა გაბრწყინებული ჯვარი წარწერით – *in hoc vinces* (ამით სძლებ). ღამე უკვე ძილში კონსტანტინეს გამოეცხადა თავად მაცხოვარი იესო ქრისტე ჯვრით ხელში, რომელმაც უბრძანა, რომ ბრძოლის დროს მის ჯარს აუცილებლად წინ უძღოდეს ჯვრიანი დროშები. მეფემ ზუსტად შეასრულა ხილვაში მისთვის მოცემული ბრძანება, რამაც მისი სამხედრო გამარჯვება და ქრისტიანობაზე მოქცევა განაპირობა.

<sup>3</sup> ამ სიტყვებიდან გამომდინარეობს, რომ მეფის ინსტიტუტის წარმოშობა არ მომდინარეობს რაღაცა ზებუნებრივი ძალიდან ან კათოლიკური ეკლესიიდან, არამედ ხალხისაგან, ჩვეულებრივი ადამიანებისგან, შესაბამისად, რომის პაპს არ ხელეწიფება ჩარევა ქვეყნის მმართველთა არჩევასა და დადგენაში. ეს ძალზე მნიშვნელოვანი პოზიციას, რადგან ამით ანთიმოზ ივერიელი პრაქტიკულად იცავს ვლახეთის სახელმწიფოს დამოუკიდებლობას რომის ეკლესიის პრეტენზიებისაგან მსოფლიო პოლიტიკურ ჰეგემონიაზე. მართალია, იმ პერიოდში ქვეყანა ვასალურ დამოკიდებულებაში იყო ოსმალეთის იმპერიასთან, მაგრამ ქართველ წმინდანს კარგად ესმოდა, რომ უფრო მარტივია იარაღით დაკარგული დამოუკიდებლობის დაბრუნება, ვიდრე იდეოლოგიური ბორკილებისაგან გათავისუფლება.

<sup>4</sup> აქ წმინდა ანთიმოზი განსაკუთრებით გამოყოფს სახელმწიფოს მთავრობის ერთ-ერთი უმნიშვნელოვანეს პრიორიტეტს - სამართლიანობის დაცვას.

<sup>5</sup> ეს ფრიად მნიშვნელოვანი განცხადებაა, რადგან თანამედროვე მსოფლიო პოლიტიკური აზროვნება ან საერთოდ გამორიცხავს, ან

---

ნაკლებ ყურადღებას უთმობს ერის სულიერი მოთხოვნილებების დაკმაყოფილებას. მატერიალურ, კულტურულ და ინტელექტუალურ მოთხოვნილებებთან ერთად რელიგიური ცხოვრება ადამიანის არსებობის ერთ-ერთი უმნიშვნელოვანესი შემადგენელი ნაწილია. შესაბამისად, სახელმწიფომ ხელი უნდა შეუწყოს ეროვნული ეკლესიის საქმიანობას და იზრუნოს ერის სულიერ სიჯანსაღეზე.

## ქადაგება №11

<sup>2</sup> ლუკა. 2,21

<sup>2</sup> შდრ.: დაბ. 17, 10-14 „და ესე არს აღთქუმაჲ, რომელ დაიმარხო შორის ჩემსა და თქუნსა და შორის ნათესავისა შენისა შემდგომად შენსა ვიდრე ნათესავთამდე, წინა-დაიცვითოს თქუნემან ყოველმან წულმან. და წინა-დაიცვითოთ ჯორცი წინა-დაუცვეთელობისა და იყოს სასწაულ აღთქუმისა ჩემდა და თქუნდა. და ყრმამან რვისა დღისამან წინა-დაიცვითოს თქუნემან ყოველმან წულმან ნათესავსა შორის თქუნსა, სახლისწულმან და ვერცხლით ფრდილმან ყოვლისაგან მისა უცხოჲსა, რომელ არს თესლისაგან შენისა, წინა-დაცვეთით წინა-დაიცვითოს სახლისწულმან სახლისა შენისამან და ვერცხლით ფრდილმან. და იყოს აღთქუმაჲ ჩემი ჯორცსა ზედა თქუნსა აღთქუმაჲ საუკუნოდ. და წულმან რომელმან არა წინა-დაიცვითოს ჯორცი წინა-დაუცვეთელობისა მისისა, მოისპოს სული იგი ნათესავისაგან მისისა, რამეთუ აღთქუმაჲ ჩემი განაქარვა.“

<sup>3</sup> ლუკა. 2,21

<sup>4</sup> იოანე. 17,3

<sup>5</sup> გამოცხ. იოანესი. 19.7; ქადაგების ამ ტექსტში წმ. ანთიმოზს მოტანილი აქვს საკუთარი განმარტებები ფრჩხილებში. იგი ასე განმარტავს კრავს და ცოლს „ქორწილი კრავისაი (ანუ ქრისტესი), და ცოლმან მისმან განამზადა თავი თვისი“, (ანუ ეკლესია).

<sup>6</sup> მათე. 20, 8-9

<sup>7</sup> ლუკა. 14, 16

<sup>8</sup> ლუკა. 14, 18

<sup>9</sup> ლუკა. 14, 19

<sup>10</sup> წმ. ანთიმმა ამ ამონარიდში ექსტერპერაციებით გააერთიანა ლუკას სახარების ოთხი მუხლი 16, 18,19, 20

<sup>21</sup> მართლმადიდებელი ეკლესიის დოგმატური და სიმბოლური ღვთისმეტყველება განიხილავს კაცობრიობის ისტორიის სამ ეტაპს: 1. ღმერთის მიერ სამყაროს შექმნისა და ადამიანის მიერ კვირის განმავლობაში შრომის ექვსი დღე – ასოცირდება კაცობრიობის ისტორიიდან ადამიდან იესო ქრისტემდე, ანუ შრომის, ტანჯვისა და ცოდვის მონობაში ცხოვრების პერიოდთან; 2. იესო ქრისტედან დღემდე ჩვენ

---

ვიმყოფებით *მეშვიდე დღეში*, იგივე *მეშვიდე საუკუნეში* – ანუ განსვენების, ცოდვისგან გათავისუფლებისა და სატანის ბატონობის დამხობის პერიოდში; 3. ხოლო მაცხოვრის მეორედ მოსვლის შემდეგ დადგება *მერვე დღე*, იგივე *მერვე საუკუნე* – ანუ მარადიული დღესასწაულის პერიოდი, რომელიც ყველანაირი ასტრონომიული დროს მიღმა იქნება, ამიტომაც მას „კვირის მერვე დღეს“ უწოდებენ, როდესაც, სახარების სიტყვებისამებრ, შეიცვლება ცა და დედამიწა და მკვდრეთით აღდგომილი მართალი ადამიანები მარადიული ნეტარი ცხოვრებით გაიხარებენ.

## ქადაგება №12

<sup>2</sup> ლუკა 8, 52

<sup>2</sup> რომაელთა 6, 10

<sup>3</sup> იოანე 11,25

<sup>4</sup> I კორინთელთა 13,12

<sup>5</sup> ეკლესიასტე 7, 1

## ქადაგება № 13

<sup>2</sup> ანთიმი ამ მოკლე ქადაგების სათქმელსაც აფუძნებს წმინდა წერილს, ქადაგების ამგვარი არქიტექტონიკა საერთოდ დამახასიათებელია მისთვის. ამაში იგი იოანე ოქროპირის, ბასილი დიდის და სხვა დიდი მქადაგებლების ტრადიციების გამგრძელებელია.

<sup>2</sup> 2 მეფეთა 12, 22-23

<sup>3</sup> მნიშვნელოვანია, რომ ანთიმს აქ მოჰყავს რუმინულ ენაზე არარსებული თარგმანი დიონისე არიოპაგელისა. შდრ.: *საეკლესიო იერარქია. თავი 7*; პეტრე იბერიელი (ფსევდო-დიონისე არეოპაგელი), შრომები, ღირ. ეფრემ მცირის თარგმანი; გამოსცა, გამოკვლევა და ლექსიკონი დაურთო სამსონ ენუქაშვილმა, თბ., 1961.

## ქადაგება №14

<sup>2</sup> იხ. მათე 3:17

<sup>2</sup>ეს. 1:16

<sup>3</sup> ფსალმუნი 33:5

<sup>4</sup> იოანე 1: 21

5 რჯული 18:15, საქ. 3:22

<sup>6</sup> მათე 3: 11-12

---

<sup>7</sup> აქ სახარებისეული ტექსტის ავტორის თავისუფალი ინტერპრეტაცია.  
8სახარებისეული ტექსტის ავტორის თავისუფალი ინტერპრეტაცია.  
9იოანე 1: 29. ციტატის ნაწილი არის სახარებისეული ტექსტის ავტორის თავისუფალი ინტერპრეტაცია.<sup>2</sup>  
10 აქ სახარებისეული ტექსტის ავტორის თავისუფალი ინტერპრეტაცია.  
<sup>11</sup> სახარებისეული სცენის ავტორის მიერ თავისუფალი ინტერპრეტაცია.  
<sup>12</sup>აქაც ანთიმო მიმართავს სახარებისეული სცენის თავისუფალ ინტერპრეტაციას.  
13მათე 3: 17 ციტატის ნაწილი არის სახარებისეული ტექსტის ავტორის მიერ თავისუფალი ინტერპრეტაცია.  
14ეს. 53: 9, I პეტრე 2: 22 -  
<sup>15</sup> ფს. 73:13  
<sup>16</sup> 4 მეფეთა 6:6  
<sup>17</sup> მთ. 10:16.  
<sup>18</sup> აქ ანთიმო საკუთარი სიტყვებით გადმოსცემს ტექსტს.  
19 ფილ. 3:20  
20 მთ. 4:3

## ქადაგება №15

<sup>2</sup> იესო ქრისტეს ფერისცვალებას წმ. ანთიმოზი უძღვნის სხვა ქადაგებასაც (იხ. “ ქადაგება უფლის ფერიცვალებაზე, აგვისტოს თვის 6“) მისგან განსხვავებით ამ ქადაგებაში ანთიმოზი დეტალურად ჩერდება ადამიანთა ქრისტეში შეხვედრის სასწაულზე, დათმენაზე, როგორც პერსონული რწმენის საფუძველზე, ხოლო ბიბლიიდან მოტანილი მაგალითებიდან აშკარად იკვეთება ექსისტენციონალიზმთან ანთიმოზის ხედვის კავშირი.

<sup>2</sup> მათე 17: 1-2  
2 მალაქია 3:20  
3ზირაქი 2:1  
4 დაბ. 22:9  
5 ლუკა 9: 30-31  
6 ლუკა 9: 35  
7 მათე 17: 3  
8 I კორ. 15: 51, 53  
9 მათე 17: 3  
10 მათე 17: 5  
11სიბრძ 3:5-6  
12 მათე 17: 5  
13იოანე 14: 3  
14 ინ. 16:33  
15 თავისუფალი გადმოცემა აღნიშნული ადგილისა  
16 მთ. 7:1  
17 მთ. 7:12



- 
- 18 ინ. 13:34
  - 19 ლკ. 9:26
  - 20 იოანე 13:35
  - 21 დაბ. 9:1
  - 22 მკ. 12:17
  - 23 გამ. 22:27
  - 24 ფსალმუნი 140: 3
  25. მათე 17: 5

## ქადაგება № 16

1. იოანე 3: 5
2. I იოანე 3: 8
3. შექმნათა 8: 21+
4. ლუკა 15: 24
5. ისაია 1: 16, 18
6. ფსალმუნი 7: 12-13
7. ფსალმუნი 9: 23
8. ეს ციტატა ისაიას 64-ე თავში არ იძებნება და გადმოცემულია თავისუფალი თარგმნით.

## ქადაგება №17

1. მათე 4, 19
2. თავისუფალი გადმოტანა ტექსტის ავტორის მიერ
3. იოან. 20,23
4. ლუკა 12,48
5. შესაქმე 3,10
6. თავისუფალი გადმოტანა ტექსტის ავტორის მიერ
7. მათეს სახარების 12.36 აღნიშნული ფრაზა არ იკითხება
8. მარკ. 9, 41
9. ეკლესიასტე 12, 13-14
10. იგავნი 9-10.

## ქადაგება № 18

1. შდრ.: და ჰრქუა მათ: წარვედით დაბასა მაგას, რომელ არს წინაშე თქუენსა; და შერად-ხვდოდით მას შინა, ჰპოოთ კიცვ დაბმული, რომელსა კაცი არღა დაჯდომილ არს; აღჰქსენით იგი და მომგუარეთ. და უკუეთუ ვინმე გრქუას რად თქუენ, არქუთ, ვითარმედ: უფალსა უკმს ეგე, და მეყსეულად მოავლინოს იგი აქა. მარკოზ. 11,2-3
2. შდრ.: და აღწდა ქერობინთა ზედა და აფრინდა, და აღფრინდა იგი ფრთეთა ზედა ქართასა. ფსლ. 17,11

---

3.ზაქ. 9;9, მათე. 21,5

4.ეს. 61;1-3

5.ლკ. 10. 23-24

6.1იონ. 1,1

7. ლკ. 23;42.

## ქადაგება № 19

1.წმინდა ანთიმოზი მარიამ ღვთისმშობლის მიძინებას უძღვნის კიდევ სხვა ქადაგებას. იხ. მესამე ქადაგება. ამ მოცემულ ქადაგებაში აქცენტი გადატანილია ქრისტიანული ეთიკის იმ ერთერთი მთავარი ცნების არსობრივ გახსნაზე, როგორცაა თავმდაბლობა. ავტორი მას მაღლმოსილ ნიჭს უწოდებს.

2. ლკ. 1:28

3. იგ. 28:10

4. იგ. 10:6

5.ლკ. 1:28

6.ფს. 134:6.

## ქადაგება № 20

1.შეადრ.VIII ქადაგება“წმინდა ნიკოლოზის ხსენების დღესთან დაკავშირებით, დეკემბერის თვის 6“

2. შეადრ.: „მე ვარ მწყემსი კეთილი: მწყემსმან კეთილმან სული თვისი-დადვის ცხოვართათვის“. იოანე. 10,11.

3.ანთიმოზს აქ მოჰყავს გამოსვლათა წიგნის არა 22-ე, არამედ 32-ე თავის 11-13 და 32 მუხლები.

4.ავტორი საკუთარი სიტყვებით გადმოსცემს ფსალმუნის ფრაზას.

5.იოანე 10,11. აქ და ქვემოთ კიდევ ორ ადგილას ავტორი საკუთარი სიტყვებით გადმოსცემს სახარების მოცემულ მუხლს.

6.ანთიმი საკუთარი სიტყვებით აღწერს მათეს სახარების მე-7 თავის მე-15 მუხლს. შდრ.: ეკრძალენით ცრუ-წინასწარმეტყუელთაგან, რომელნი მოვიდოდნენ თქუენდა სამოსელითა ცხოვართაითა, ხოლო შინაგან იყვნენ მგელ მტაცებელ“.

7.იხ. მათე 23, 12-33

---

8. შდრ.: „ჯერ არს ეპისკოპოსისაი, რაითა უბრალო იყოს, ერთის ცოლის ქმარ, ფრთხილ, წმინდა, შემკულ, სტუმართ მოყუარე, სწავლულ, არ მეღუინე, არა ანგაპრ, არა საძაგლის შემძინებელ, არამედ მყუდრო, ულაღველ, ვერცხლის უყრულ. თვისისა სახლისა კეთილად განმგებელ, შვილნიმცა უსხენ დამორჩილ;ებულნი ყოვლითა ღირსებითა“. I ტიმ. 2, 2-4  
9. ფსალმ. 22, 4.

## ქადაგება № 21

1. მათე, 23, 39. ასევე „ოსანა ძესა დავითისასა, კურთხეულ არს მომავალი სახელითა უფლისადათა! ოსანა, რომელი ხარ მაღალთა შინა!“ მათე 21, 9.

2. „...ხვალისაგან ერი მრავალი, რომელ-იგი მოსრულ იყვნეს დღესასწაულსა მას, რამეთუ ესმა, ვითარმედ იესუ მოვალს იერუსალემდ, მოიღეს რტოები და ნაკისკუდთაგან და განვიდეს მიგებებად მისა, ღაღადებდეს და იტყოდეს: ოსანა! კურთხეულ არს მომავალი, სახელითა უფლისაითა, მეუფე ისრაელისაი!“ - ასე აღწერს იოანე მახარებელი მაცხოვრის იერუსალიმში დიდებით შესვლის ამბავს. იოანე, 12 12-13.

3. შდრ: წმინდა ანდრია კრიტელის „სიტყვა ბზობის კვირიაკეს თქმული“-  
: „დღითი-დღე წარვსთქვამდეთ სიტყვათა წმიდათა, ამმაღლებელ ნეტართა ასულისათა: კურთხეულ არს მომავალი სახელითა უფლისათა, მეუფე ისრაელისა! (იოანე 12, 13). საიდან და საით ვალს? – ჩვენსკენ მამიდან, საყდრისკენ ლაზარესა ზედა აღსრულებული სასწაულით. როდის ვალს და ვისთვის? – ჟამსა თვისსა, ჩვენისა ცხოვრებისათვის: ერთგზის აღსასრულსა ჟამთასა (ებრაელთა 9, 26). მან ნებსით ამოირჩია სიკვდილი ადამიანებისთვის, რათა ეხსნა ადამიანი. მაშ, მივბამოთ ქრისტეს სიმდაბლეს (თავმდაბლობას), ხელი ვჰკიდოთ სიღატაკეს, რათა გავმდიდრდეთ; ვიხილოთ გემო ჯვრისა (უფლისა), რათა დავიმკვიდროთ სიტკბოება სიცოცხლისა“. ამ ორი ამონარიდის შედარება აშკარას ხდის, რომ ანთიმოზ ივერიელისათვის ანდრია კრიტელის ნაშრომები სიღრმისეულად ახლო იყო.

## ქადაგება № 22

---

1. ქადაგება ეხება ბრალის ფენომენოლოგიას. ავტორი სიღრმისეულად აღწერს, რომ მისი გამოვლინების განსხვავებული ხასიათი განსაზღვრავს მიზღვევის განსხვავებულ ხასიათს. ერთი ღვთის ერთი მცნების დარღვევით არ შეშინდა და დაარღვია მეორეც და მესამეც, თან არა ფარულად როგორც პირველმა, არამედ ურცხვად და უტიფრად შუა ქალაქში ხალხის დაბრკოლებით და თავისი მეზობლისათვის ზიანის ხოლო „მესამე, ლაზარე, რომელიც დაბერდა ცოდვაში და სრულიად მიეჩვია ამა სოფლის ამოებასა და ბოროტ სურვილებს, მისთვის არ არის იოლი მობრუნება, არამედ რჩება სინანულის გარეშე და კვდება ცოდვაში.“ ლაზარეს არც კი უცდია და „რაც მთავარია, არც კი მოინანია-მთელი თავისებურება ამაშია.

ქადაგებაში ანთიმი მორწმუნეს მოუწოდებს მუდამ ეძიოს ხსნა და ცოდვებისაგან გათავისუფლება, სინანულის მაღლი მომკას. მკვდრეთით აღდგენის ამ სამ შემთხვევაში ადამიანებს აჩვენა ის ღვთაებრივი ძალისხმევა, რაც აუცილებელი ხდება ცოდვილის სულის გამოხსნისათვის, რათა ადამიანი გააფრთხილოს მოსალოდნელი სამსჯავროს მძიმე ხასიათის შესახებ. ბრალის ხასიათი და ბრალეულობის დონე გავლენას ახდენს სულის ხსნის საქმეზე. ლაზარეს მაგალითზე უჩვენა, რომ ყველაზე მძიმე ცოდვილის სულის ხსნაც შესაძლებელია ღმერთისათვის, რაც არის იმედი ცოდვილთათვის. რამდენი ძალისხმევა დასჭირდა. ღმერთის მიერ სულის ხსნას, რაც არ არის უბრალო საქმე. მაგრამ ამავე დროს უჩვენა, რომ ამ ხსნისას არ არის სასიკვდილო ავადმყოფობა, ამბობს იესო ლაზარეზე. ანთიმი მიანიშნებს ბრალისა და სინანულის აუცილებელ კავშირზე ქრისტიანის ცხოვრებაში.

2. წმ. ანთიმოზი ლაზარეს სახით წარმოგვიდგენს ადამიანს, ყოველი ცოდვით დამძიმებულს, რომელიც ყარს ცოდვებისაგან.

მაცხოვარმა ეს კანონი განგვიწესა: ”ნეტარ იყვნენ გლახაკნი სულითა” (მათე. 5,3 როგორც იოანე ოქროპირი აღნიშნავს, ჩვენი დამორჩილება და განკრძალვა ისე არაფერს შეუძლია, როგორც სიმდაბლეს, ანუ როდესაც თავმდაბლობას ვიმარხავთ, მშვიდად ვართ და საკუთარ თავზე ოცნებით არასოდეს ვიზრახვით.

უდიდესი სიხარულის მატარებელია ლაზარეს აღდგინება, რაც არ მომხდარა სხვა მიცვალებულთა აღდგინებაში. ეს არის ნუგეშის ფენომენის შემოსვლა ადამიანში. რაც ადამიანისათვის შეუძლებელია, უფლისათვის შესაძლებელია. ეს სიხარული სუფევს იმ დიდებულ დღეს იერუსალიმში. აქ ხდება საოცარი ძალმოსილების გამოვლინება ღვთაებრივი მოძღვრისა.

3. ეს სიუჟეტი აღწერილია ლუკას სახარების 7.14 და მათეს სახარების 28.20

4. იოანე. 11,35.

---

## ქადაგება № 23

1. ავტორი პირველად არ ჩერდება ამ თემაზე. მოცემულ ქადაგებაში იგი განსაკუთრებულად ჩერდება იმ თემაზე, რომ ფერისცვალების სასწაული არის ადამიანთა გარდაცვალების და მეორედ მოსვლისას მკვდრეთით აღდგომის იმედის საფუძვლი და არა სიკვდილისა და გაქრობისა.

2. მათე 17.5. წმინდა ანთიმოზის ეს არცთუ დიდი ქადაგება უნდა ჩაითვალოს თეოლოგიური მჭევრმეტყველების კლასიკურ ნიმუშად. აქ გახსნილია თაბორის მთის საიდუმლოს ზენათელი დიდება. პირველად აქ გვხვდება დამოწმება, რომ იესო არის ძე და ადამიანების ცოდვისაგან დახსნის ერთადერთი გზა: „მისი ისმინეთ.“ რას ნიშნავს ”მისი ისმინეთ?“- ეს ქადაგება მთლიანად ეძღვნება ამ თემის გახსნას ანთიმის მიერ შექმნილი სქემით.

3. ანთიმი ამ პასაჟში ხაზს უსვავს, რომ ფერისცვალება არის არა მხოლოდ ქრისტეს ღვთიური ბუნების კიდევ ერთი მოწმობა, არამედ ასევე ღმერთის გამოვლინების ახალი ფორმების ჩვენება, რომელიც გამოვლინდა ღვთაებრივი ნისლის და ადამიანისათვის დამაბრმავებელი სინათლის სახით.

<sup>2</sup>ფერისცვალების სასწაულისას მამა ღმერთი ადამიანს მოუწოდებს „ესე არს ძე ჩემი საყვარელი, მისი ისმინეთ“. აქ არის ქრისტეს ამქვეყნიური ცხოვრების შეჯამება. ეს იყო დადასტურება წმინდა სამების მთლიანობისა. ვინც მე მისმენს, მამას უსმენს.

4. პირველად ღმერთმა ქრისტეს შვილობა იოანე ნათლისმცემელთან დაადასტურა, ეს მოხდა ქრისტეს წყლით ნათლისღების დროს. „მე ვიხილე ციდან მტრედვიით გარდმომავალი სული და დაივანა მასზე საფუძველი/“(იოანე 1,32) მათე 4,16 „აჰა ხმა ციდან მეტყველი: ეს არის ჩემი საყვარელი ძე, რომელიც მოვიწონე მე.“(მარკოსი 1.11), (ლუკა 3,22), (იოანე 5, 37), პეტრე 1.17), (კოლ.1.13)

რატომ გახდა საჭირო კიდევ ერთხელ დადასტურებულიყო ქრისტეს ღვთაებრივი ბუნება?

ფერისცვალება არის ქრისტეს ღვთიური ბუნების კიდევ ერთი დადასტურება მისი მოწაფეების წინაშე, რომ ისინი განმტკიცდნენ და უიმედობასა და ურწმუნობაში არ ჩავარდნენ ჯვარცმის სასწაულის განცდისას.

5. ავტორი ხსნის ქრისტიანული ღვთისმეტყველების საკვანძო ცნებას- მორჩილებას და მის საპირისპირო-ურჩობას. განხორციელებულია მათი შედარებითი ფენომენოლოგიური ანალიზი: ურჩობა მოიცავს ყველა

---

სოფლის ცოდვას. ურჩობას ამარცხებს ქრისტე მორჩილი სიკვდილით, რაზეც მიუთითებს წმ. თეოფილაქტე. მორჩილების ნიმუშია: აბრაამი, რომელიც ექვის გარეშე ბრძანების შემსრულებელია. არათუ შემსრულებელი, არამედ სიხარულით მიმღებია ყოველივესი. ისააკის მორჩილება სიყვარულით - რაც შიშის დამძლევეია. პეტრეს მორჩილება-გავედით წყალზე - შეუძლებლის დამორჩილებაა. პავლეს მორჩილება: უფალი რასაც მიბრძანებს, რომ გავაკეთო. ყველანი მორჩილებით იღებენ დიდებას.

ჩვენ ადამიანებს მორჩილება არ ძალგვიძს. ჩვენი ცოდვების სასჯელი ჩვენს თავშია. მთელი ქადაგება ეძღვნება იმას, თუ როგორ გავხდეთ მორჩილნი.

6. იოანე.1.36

7. იგულისხმება დიდი ბიზანტიელი ღვთისმეტყველი, სახარების ცნობილი განმმარტებელი ნეტარი თეოფილაქტე ბულგარელი (XI საუკუნის ბოლო XII საუკუნის დასაწყისი). ანთიმი ეთანხმება წმინდა თეოფილაქტეს, რომელიც განმარტავს სახარების ამ ადგილს, ამბობს სოფლის ცოდვა, რომელიც წარხოცა უფალმა არის ურჩობა. წარხოცა იმით, რომ თვითონ გახდა მორჩილი სიკვდილამდე. ფერისცვალებამ უჩვენა ქრისტეს ღვთიური ბუნება და მით უფრო ცხადი ხდება ქრისტეს მორჩილების უსაზღვროება, რომელიც მხოლოდ გეთსიმანის ღამის მუდარაში გაცხადდება: „მაგრამ არა როგორც მე მსურს, არამედ როგორც შენ.“ (მათე 26,39), (იოანე 5.30), (ფილი.2.8), (ებრ. 5,7-8). ეს იყო ღმერთის ჭეშმარიტი რწმენისა, ნდობისა და იმედის მაგალითი.

8. ანთიმოზი მიანიშნებს, რომ მორჩილების მცნება არის საიდუმლო და ღრმა. შეუძლებელი იყო, რომ მაცხოვარს მოციქულთათვის მიეცა სულისთვის სასარგებლო და ცხონებისთვის აუცილებელი სხვა უფრო დიდი მცნება, ვიდრე ეს - მორჩილება! ეს არის ქრისტიანობის და ქრისტიანის არსი. ეს არ არის მონური მორჩილება ბატონისადმი, არამედ მამისადმი მზრუნველისადმი დაჯერების მზადყოფნა. ესაა სწორედ რწმენის იდუმალეება, რაზეც კირკეგორი საუბრობს და აბრაამის რწმენას უწოდებს.

8. შდრ. აღსავსენი ყოვლითა სიცრუითა, სიძვითა, უკეთურებითა, ანგაჰრებითა, ბოროტებითა, სავსე შურითა, კაცის-კლვითა, ჯდომითა, ზაკუვითა, ბოროტის ჩუეულებითა, (რომ. 1.29)

## ქადაგება № 24

1. „უფალო გვაცხოვნე, რამეთუ წარვწყდებით“<sup>2</sup>მათე 8 ეს უნდა იყოს მორწმუნე ქრისტიანის მუდმივი ვედრება ღმერთის მიმართ, რადგან არ უნდა დაავიწყდეს საკუთარი ცოდვილი ბუნება, შექმნილი სამყაროს ცვალებადი და მერყევი ბუნება და რომ ყველაფერი ღმერთის კეთილ ნებაზეა დამოკიდებული.

---

2.” აჰა დიდი ღელვა მოხდა ზღვაში” ეს ნიშნავს რომ სამეფოები, ქალაქები, ხალხი, სახელმწიფოები, მდიდრები, ღარიბები, დიდნი მცირედნი როგორც ძღვაში მოგზაურნი განსაცდელში იმყოფებიან. მღელვარებასა და შიშს ვერაფერი დააცხრობს - გარდა ლოცვის ძალისა.

რა არის ლოცვა? როგორც იოანე დამასკელი ამბობს: ლოცვა არის გონების ზეასვლა ღვთისაკენ, ანდა ღვთისადმი თხოვნა იმისა, რაც შესაფერისია.

გავიხსენოთ ჯვარცმული მაცხოვარი ამბობს: ” მამაო, თუ შესაძლებელია ამშორდეს მე ეს სასმისი, მაგრამ არა როგორც მე მნებავს, არამედ- როგორც შენ (მათე, 26.39). აქედან ნათლია ყველასათვის, რომ მხოლოდ ღვთისგან ვითხოვდეთ შემწეობას განსაცდელთა ჟამს და რომ ჩვენეულ ნებას იმას ვამჯობინებდეთ, რაც საღვთოა.

წმ. იოანე ოქროპირი აღნიშნავს: მუდამ ღმერთისკენ ვისწრაფოთ და ყოველივე მას შევსთხოვოთ. ლოცვას არაფერი შეედრება: იგი შეუძლებელსაც იქმს, ძნელს აიოლებს, უჯეროს ჯეროვანს შეიქმნს. ნეტარი დავითიც ამას აღასრულებდა, ამიტომ ამბობდა: ”შვიდგზის დღესა გაქებდე შენ განკითხვათათვის სიმართლისა შენისათა” (ფს 118,164)

საქართველოს კათოლიკოს პატრიარქი ილია II ამბობს: როგორ ვილოცოთ? უპირველეს ყოვლისა, ადამიანმა უნდა ილოცოს მთელი გულითა და თუ შეუძლია ცრემლითაც კი. მხოლოდ მაშინ ისმენს უფალი ჩვენს თხოვნას.

უფალი ბრძანებს: ” ითხოვდით და მოგეცეს თქვენ, რამეთუ ყოველი რომელი ითხოვს, მიიღოს და რომელი ირეკდეს, განელოს (მათე 7, 7-8)

თუ კი მრავალი საზრუნავით დამძიმებული მეფე დავითი ღმერთს მრავალგზის ევედრებოდა, ჩვენ დღე და ღამე უნდა ვილოცოთ ” და შეიქმნება დიდი სიმშვიდე”.

წმ. ანთიმოზი სვამს კითხვას: რატომ არ აღწევენ ჩვენი ლოცვები ღმერთის სასმენელს? წმ. იოანე ოქროპირი ბრძანებს ”მთელი გულით ვილოცოთ”. ჭეშმარიტად მუდმივი და მოუკლებელი ლოცვა გვმართებს ძვირბილულობაშიც და სიხარულშიც, უბედურებისა და კეთილდღეობის ჟამს.... ”თუ დედამიწაზე შეიკრიბა ორი ადამიანი ერთად მლოცველი, მიეცემათ მათ მამისაგან ჩემისა ზეცათასა” (მათე,16)

ლოცვის ძალით ვისწავლით მთავარ მორჩილებას - რითაც დავძლევთ შიშს და ვიქნებით მომთმენი და მამაცი.

3.ადამიანმა სულიერი მზაობით უნდა მიიღოს ყოველი ცხოვრებისეული განსაცდელი და ცხოვრებისეულ ბოხოქარ ზღვაში მუდამ ღმერთის იმედი უნდა ქონდეს და ამბობდეს: „უფალო გვაცხოვნე, რამეთუ წარვწყდებით“

---

4. ადამიანს არ უნდა უკვირდეს ცხოვრებისეული ზღვის ბოხოქრობა და ანთიმი თვლის, რომ ღვთის სასწაული მდგომარეობს მის კეთილ ნებაში, წარუძღვეს ადამიანს ამ ბოხოქარ ზღვაში. საკვირველია სრულიად სხვა: მე მიკვირს იმისა, რაც მოხდა შემდეგ. მივიდნენ რა მაცხოვართან და შეევედრნენ, იმავე წამს მიიღეს დახმარება, „და შეიქმნა დიდი სიმშვიდე“, (ანთიმოზი)

5. იესო ნავეს 10.40; 12.14 აღწერილია ქანაანელთა სტრატეგიული ქალაქის არადის მეფის სიმამაცე, იგი იყო პირველი, ვინც გაბედულად შეებრძოლა იესო ნავეს ძეს. არადი იუდას უდაბნოში მკვდარი ზღვის დასავლეთით მდებარეობდა.

6. ეს ქალაქი მოხსენიებულია მხოლოდ არაკანონიკურ ბიბლიურ წიგნში- ე.წ. „ივდიტის წიგნში“, სადაც აღწერილია ნაბუქოდონოსორ II-ის არმიის შემოჭრა იუდეაში. ოლომფორნე, ასურელი მხედართმთავარი, განადგურებით ემუქრებოდა ალყაშემორტყმულ ქალაქს. ქალაქი თავგანწირულმა მოქალაქეების ლოცვამ და ივდიტის გმირობამ გადაარჩინა. წიგნის 10 თავის უძველესი ქართულენოვანი თარგმანი ოშკის, ანუ ათონის ბიბლიაშია შემონახული.

7. განსაცდელის ჟამს უნდა გაერთიანდნენ მორწმუნენი და ერთად ილოცონ და შესთხოვონ ღმერთს დახმარება და გადარჩენა. (მარკოზი 4,38) ადამიანის შიში ცხოვრების და ბუნების სტიქიონების გამო გამოწვეულია მათი მცირედი მორწმუნეობით: „მათ უთხრა: რატომ ხართ ასე მხდალნი?, რატომ არა გაქვთ რწმენა?“ მარკოზი 4,40; ლუკა 8,25, იოხ.26,12, ფსალ.88, 10.

8. ადამიანი, თემი, ხალხი გაუსწორდება ყოველ უბედურებას, განსაცდელს, თუკი გაერთიანდებიან ლოცვაში: „ყველაფერი, რასაც ითხოვთ ლოცვაში, ითხოვეთ და მოგეცემათ თქვენ.“ იხ. მარკოზი, 11, 24, მათე 7,7, ლუკა 11,9, იოან. 14,13.

## ქადაგება № 25

1. ღმერთისთვის ყველა თანასწორია. იგი ადამიანს შეაფასებს არა მისი ამქვეყნიური წარმატებებით, არამედ მისი სულიერი ღვაწლით და რწმენის გულწრფელობით. მხოლოდ მდიდრებსა და დიდ ადამიანებს არ ეკუთვნით დიდება და პატივი, არამედ ამ მადლის ღირსნი, ასევე მცირე და თავმდაბალი ადამიანები არიან, მიუხედავად იმისა, რომ დიდნი ბრჭყვიალებენ მდიდრული სამოსით, ხოლო მცირეთ ისიც კი არ გააჩნიათ, რომ სხეული დაიფარონ. (ანთიმოზი), „ყურად იღეთ რომ არ აწყენინოთ ამ მცირეთაგანს“. (მათე 18, 6), (მარკოზი 9.42), (ლუკა 17,1)



---

2. ქრისტეს ღვთაებრივი სიყვარული უსაზღვროა და ყველა ჭეშმარიტი მორწმუნე ვალდებულია პატივი სცეს უმცირესს, დავრდომილს, გაჭირვებულს“ მიუხედავად ამ დიდი განსხვავებებისა, მცირეთ არ ეკუთვნის ნაკლები პატივი და სიყვარული, ვიდრე დიდებულებსა და მდიდრებს, არც სამართლიანია, რომ დიდებულებს ხალხი თაყვანს სცემდეს, ხოლო მცირეთ მასხრად იგდებდნენ. ამიტომაც ყველას ემინოდეს გაჭირვებულების წყენისა;“

3. როგორც წმინდა იოანე დამასკელი ამბობს: ანგელოზი არის არსება გონისმიერი, მარად მოძრავი, თვითუფლებრივი, უსხეულო, ღვთისადმი მომსახურე, მადლით უკვდავების მიმღები ბუნებაში, რომლის არსების სახე და საზღვარი მხოლოდ შემოქმედმა უწყის. ისინი ცაში მკვიდრობენ და ერთი საქმე აქვთ - უგალობონ ღმერთს და ემსახურონ მის საღვთო ნებას.

დიონისე არეოპაგელმა ციური არსებები ცხრა დაასახელა. რასაც ეს მღვდელ-მესრულე სამ-სამ მწყობრად განყოფს. პირველი არის ექვსფრთიანი სერაფიმების, მრავალთვალა ქერუბიმების და უწმინდეს საყდართა მწყობრი, რომლებიც მარადის ღვთის გარშემოა. მეორეა უფლებათა, ძალთა და ხელმწიფებათა მწყობრი. მესამეა მთავრობათა, მთავარანგელოზთა და ანგელოზთა მწყობრი.

დამასკელი აღნიშნავს: არ ვიცით, არსებით თანასწორნი არიან ისინი, თუ ურთიერთისგან განსხვავდებიან. ეს ყოველივე მამა შემოქმედმა და ყოვლის მცოდნე ღმერთმა უწყის.

ქადაგებებში წმინდა ანთიმოზი განიხილავს ზეცაში ანგელოსთა იერარქიულობას და მის ძალას, თუ მათ რა შეუძლიათ. ასევე წმინდანების და მართლების ფუნქციას, ევედრონ ღმერთს. ხოლო ღვთისმშობლის შუამდგომლობით ადამიანთა სულმა მიიღოს ცოდვებისაგან ხსნა.

ცოდვით დამძიმებულ მიწაზე - ცოდვის შენდობის უნარი მხოლოდ მღვდელს ძალუძს.. რა არის ეს ძალა, რითაც ის ამას აკეთებს. წმინდა ანთიმოზი ბრძანებს, - მღვდლები ანგელოზები არ არიან, მაგრამ მათ აქვთ მადლი და სწორედ ეს მადლი აქცევთ მათ ანგელოზებზე დიდად. სიდიდეს და გამოუთქმელ ძალას წარმოადგენს მღვდელი. მღვდლობა არის უფლის წინაშე არა ოდენ საკუთარ თავზე, არამედ ხალხზე ლოცვით წარდგომა. ზეციურ სამეფოს მისაღწევ გზაზე შედგომილ ადამიანთა სულების დამოძღვრა.

როგორც წმინდა წერილში პირდაპირ წერია: მღვდლობის ხარისხში დადგინება არის განსაკუთრებულ, მაღლმოსილ საიდუმლო ნიჭთან ზიარება. ესაა ის მადლი, რასაც წმინდა ანთიმოზმა მიუძღვნა თავისი ქადაგება.

აქვე აღვნიშნავთ: ქრისტიანობის ლოცვა ასე იკითხება - ”საღვთო მადლი, რომელიც ყოვლადვე უძლურებასა ჩვენსა ჰკურნებს და

---

ნაკლულოვნებასა ჩვენსა აღავსებს..... რაითა დაემკვიდროს მისთანა მადლმან ყოვლადწმინდისა სულისა. ამინ” ვინც ამ ცოდვისაგან არ არის თავისუფალი, უნდა მოინანიოს და დაეხმაროს გაჭირვებულს.

4.ამა სოფელში არსებობენ ორი სახის მცირენი და მათ ადამიანები, როგორც წესი, წყენას აყენებენ: პირველნი არიან ღარიბნი, ხოლო მეორენი მღვდელნი.,მღვდლები არინ ყველაზე უპატიო და დამცირებულნი.“(ანთიმოზი) მათი ღვაწლი შეუფასებელი და დაუფასებელია. წმინდა ეფრემ ასური მღვდლობის შესახებ პირველ სიტყვაში ამბობს: „დიდებულ სასწაულს და გამოუთქმელ ძალას წარმოადგენს მღვდელი; ცას სწვდება, ანგელოზებთან ურთიერთობს და ღმერთთან აქვს სიახლოვე“. არც მღვდელმა უნდა დაივიწყოს ეს და გაისიგრძეგანოს თავისი მოვალეობა და დანიშნულება მორწმუნესა და ღმერთის წინაშე. „ღმერთის გარდა არც ზეცაში არავის არა აქვს იმხელა ძალა და უფლება, როგორც აქვთ დედამიწაზე ამ მცირედებს, ანუ მღვდლებს.“ (ანთიმოზი)

5.საქმე მოციქულთა 7.27

6.რომაელთა მიმართ ეპისტოლე 14.4

7. აქ როგორც ჩანს მექანიკური შეცდომაა.

8.რომის იმპერიის გამოყოფის შემდეგ მას ერგო აღმოსავლეთ რომის იმპერია. იგი აღმოსავლეთ რომის იმპერიის პირველი კეისარია 395-408წწ.

9. შესაქმე თავი IX 24-525, ციტატის პირველი ნაწილი ზუსტად მიჰყვება ძველი ალექსანდრიის ტექსტს, მეორე ნაწილი წმიდა ანთიმოზის დანამატი, ინტერპრეტაციაა.

## ქადაგება № 26

1.მათე, 8-24

2.რომაელთა მიმართ. 05.10

3. ეფეს. I 9-10

4. მათე. 9.26

5. მარკოზი 4; 38

6.ილია და ელისე გზაზე მიდიოდნენ და იორდანეზე რომ გადავიდნენ ილიამ თავისი კვერთხით შუა განაპო მდინარე და ასე ხმელეთზე გადავიდნენ. და როდესაც ილია ემშვიდობებოდა ელისეს, მას დაუტოვა თავისი ხალენი, და უთხრა, რომ თუ უკან დაბრუნებისას იმავე მდინარეზეხალენით მოახდენდა სასწაულს, და მდინარე განიყოფოდა ეს იმის ნიშანი იქნებოდა, რომ, მასზე გადმოვიდოდა მისი მადლი. მართლაც ასე მოხდა, მდინარე გაიყო და ელისე უვნებლად გავიდა გაღმა.

---

7. მარკოზი 4.41

8. გალატელთა 6,14

9. გალატელთა 6. 18;39

10. იოანე 6,51

11. აქ ტექსტში ბრჭყალებში ჩასმული ციტატა ეკუთვნის თავად მთხრობელს, ტექსტის ავტორს. ეს მისი ჩართული მონოლოგია.

## ქადაგება № 27

1. ბზობის ბრწყინვალე დღესასწაულს ეხება ანთიმოზ ივერიელის რამდენიმე ქადაგება. კერძოდ, მე-16, მე-18, 21-ე, 22-ე. განსაკუთრებულია ავტორის ინტერესი ამ დღესასწაულის მიმართ. მოცემული 27-ე ქადაგებაში სახარებაში განმარტებულია თუ როგორ უნდა მოვემზადოთ ქრისტეს დასახვედრად.

2. მათე 21, 1,2,3,4,5

3. იოანე.18.36

4. აქ ავტორი საკუთარი სიტყვებით გადმოსცემს Iკორ 15,26 შდრ.; „უკანაისკნელ მტერი იგი განქარდეს-სიკუდილი“

5. შდრ.; „უტევე მაგას, დღედ დაფვლისა ჩემისა დამიმარხა ეგე“ იოან. 11,7.

6. აქაც ანთიმოზი, რომაელთა მიმართ ეპისტოლეს მე-6 თავის 12 მუხლს, საკუთარი სიტყვებით გადმოსცემს.

7. მათე 21,5

8. შდრ.; იხარე დიდად, სიონის ასულო! აჰა, შენი მეფე მოდის შენთან, მშვიდი, ამხედრებული სახედარზე და ჩოჩორზე, ხრდალი ვირის ნაშიერზე (ზაქარია 9, 9; მათე 21, 5).

9. ანთიმოზი ყურადღებას ამახვილებს იმ ფაქტზე, რომ იერუსალიმში დიდებით შესვლით უფალმა მორწმუნეებს სიყვარულის გამომჟღავნების საშუალება მისცა, ხოლო მოძულეებსა და მტრებს - მისი შეცნობისა და სინანულად მოქცევისა.

## ქადაგება № 28

1. ანთიმი ამ თემას უძღვნის სხვა ქადაგებასაც. იხ. X ქადაგება

2. ლკ.14.11

3. იგულისხმება რომის პაპი წმინდა სილვესტრი, IV საუკუნის წმინდანია. მოღვაწეობდა დიდი კონსტანტინე იმპერატორის დროს. კურნებათა სასწაულებითაა ცნობილი.

## ქადაგება № 29

- 
- 1.ებრ 2: 16
  - 2.დაბადება 1: 26.
  - 3.ლუკა 15: 8
  4. ფს. 118: 105
  - 5.ინ 1: 14
  - 6.ისაია 48: 4
  - 7.იოზი 25: 5-6
  - 8.მათე 5: 13
  - 9.მათე 5: 14
  - 10.მათე 5: 16
  - 11.მათე 5: 14
  - 12.მათე 5: 15.

### ქადაგება № 30

- 1.ლკ 2:11
- 2.ლკ 2:7
3. ეს ერთ-ერთი რთულად გასაგები და სათარგმნი ადგილია ქადაგების ტექსტში: რთულია, როგორც ლინგვისტურ-სინტაქსურად, ისე საღვთისმეტყველო ნიუანსების თვალსაზრისითაც. დედანშია მამრობითი სქესის მხოლოდობითი რიცხვის აღმნიშვნელი ნაცვალსახელი „el” როცა წესით უნდა იყოს მდედრობითი სქესის მხოლოდობითი რიცხვის ნაცვალსახელი „ea”. კონტექსტიდან უფრო ბუნებრივი ჩანს. ვფიქრობ, რომ წინადადება შეეხება ყოვლადწმიდა ღვთისმშობელს და ამიტომა უნდა ეწეროს „ea” და არა „el”, შესაძლოა, აქ საქმე გვექონდეს გადამწერთა ან გამომცემელთა მექანიკურ ლაფსუსთან (მთარგმნელის შენიშვნა)
4. ლკ 2:7.

### ქადაგება № 31

- 1.იოზი. 17.
- 2.იოზი. 3.
- 3.ფს 141:7
- 4.ფილიპელთა 1:23.
5. ეს ფრაზა ეხმიანება კირკეგორის ცნობილ დებულებას, რომ თუ ადამიანს არ სწამს, იგი ვერ მოკვდება.

### ქადაგება № 32

1. შესაქმე, 3:24.
2. შესაქმე, 3:21.

---

3. ტექსტში არ არის მოხსენიებული კონკრეტული სახელი, უბრალოდ სიტყვა "სახელს" ხმარობს ავტორი.

4. იხ. კომ. 3.

### **”ანთიმოზ ივერიელის მონასტრის ტიპიკონი”**

1. ანთიმოზ ივერიელი აქ გულისხმობს მონასტრის წინამძღვარს.
2. ადმინისტრაციული მმართველი, ზედამხედველი. დღეს მონასტერში მას უწოდებენ ეკონომოსს, წინამძღვრის მოადგილე, რომელსაც ჩაბარებული აქვს ეკონომიკური საკითხები-სამეურნეო საქმიანობა, მშენებლობა და სხვ.
3. იგულისხმება მონასტრის წინამძღვარი
4. ანთიმოზ ივერიელი მთელ ტექსტში სინონიმურად იყენებს სამ სიტყვას-ეკლესია, სახლი, მონასტერი. ყველგან ერთი - მონასტრის მნიშვნელობით.
5. ებრაელთა მიმართ. 3. 16.
6. ნიშნავს ბატონს. ჟუპანი ნეაკშული იგივეა, რაც ბატონი ნეაკშული.
7. შალის ტანსაცმლის მეწარმე და გამყიდველი
8. პირი, რომელსაც უშუალოდ ტაძრის მართვა-გამგეობა ავალია.
9. ტაძრის მთავარი სტიქაროსანი.
10. ამჟამად რუმინული ვალუტის ყველაზე მცირე ერთეული, წვრილი ფული;
11. წმ. გიორგი მთაწმინდლის მიერ ბერძნულიდან ნათარგმნ „კურთხევანში“ ვპოულობთ ცოცხალთათვის გადასახდელ პანაშვიდის წესს. ამავდროულად, რუმინეთის ზოგიერთ პროვინციაში არსებობს ტრადიცია, როდესაც ასაკოვანი ადამიანები სიცოცხლეშივე თავისთვის წინასწარ უკვეთავენ მღვდლებს მიცვალებულისათვის ყველა აუცილებელი მსახურების შესრულებას (პანაშვიდები, წესის აგება და შეკვეთილი წირვები)ეს ტრადიცია დღემდე შენარჩუნებულია იმ პროვინციებში, სადაც ანთიმი მსახურებდა.
12. კლიროსი (κλήρις) შემადგენელი ადგილი მართლმადიდებელ ეკლესიაში, სადაც განლაგებულნი არიან მგალობელნი და მედავითნენი. თითქმის ყველა ეკლესიაში ორი კლიროსია. ერთი უფრო მცირე, ჩვეულებრივ, კანკელთანაა, მეორე ან მოპირდაპირე მხარეს, ან აივანზეა განლაგებული.
13. *იოანე და მარია (მარიამი)* – წმინდა ანთიმოზ ივერიელის მშობლების სახელები.
14. *მღვდელმონაზონი მაკარი* – მოლდო-ვლახეთის (მოლდოვის) სამთავროს დედაქალაქ იასთან ახლოს არსებულ *ჩეტაცუიას* მონასტრის წინამძღვარი, რომელიც წმინდა ანთიმოზ ივერიელის პირველი ვლახელი სულიერი მოძღვარი იყო, რომელმაც, როგორც ჩანს, დიდი წვლილი შეიტანა ანთიმოზის სულიერ ჩამოყალიბებაში. მღვდელმონაზონ მაკარის გარდაცვალების შემდეგ ანთიმოზი გახდა მისი სულიერი მემკვიდრე და ჩეტაცუიას მონასტრის წინამძღვარი.

- 
15. მღვდელმთავარი თეოდოსი – უნგრო-ვლახეთის (ბუქარესტის) მიტროპოლიტი, რომლის ანდერძითა და რეკომენდაციით, მისი გარდაცვალების შემდეგაც, რიმნიკის ეპისკოპოსი ანთიმოზი არჩეულ იქნა უნგროვლახეთის მიტროპოლიტად.
  16. ძვ. საქართველოში წონის ერთეულია, რომელიც უდრის 1.36 კგ
  17. ანთიმო აქ გულისხმობს ადგილობრივს, რუმინეთში დაბადებულ ეთიკურად ბერძენ ადამიანს.
  18. ძველი ლიტურგიკული ტრადიციით, რომელიც საბერძნეთისა და რუმინეთის ეკლესიებშია შემორჩენილი მღვდელმონაზონის წინამძღვრად არჩევისას ტარდება კურთხევის სპეციალური რიტუალი.
  19. მცირე ზომის დასახლება, რომელშიც 5-10 ბერი მოსაგრე ცხოვრებას ეწევა. სკიტი ძირითად მონასტერს ემორჩილება. სკიტის დაარსების მიზეზი შესაძლებელია ორი იყოს: ბერების ნაწილის გასვლა უფრო შორეულ, განმარტოებულ ადგილზე ასკეტური ცხოვრებისათვის, მეორე- მონასტრისაგან მოშორებით არსებული მეურნეობის მისახედად.

## საეკლესიო სწავლება

1. მათე 25:21
2. მათე 5:16
3. რომ. 6:12
4. ფილიპე 2:10
5. მათე 4:4
6. მათე 6:14
7. იოანე 14:13
8. ეფეს. 4:6
9. იოანე 17:5
10. იოანე 1:10
11. ლუკა 23:46
12. მათე 27:65–66
13. რეალურად არის მე-14 თავი: მარკოზი 14:21
14. მარკოზი 16:19
15. მათე 25:31
16. იოანე 5:29
17. იოანე 15:26
18. სიტყვა ეკლესია ზედმიწევნით „კრებულს“ ნიშნავს (ბერძნული εκκλησια – ვიწვევ, კვრებ)
19. მათე 18:17

- 
20. იოანე 3:5
  21. იოანე 5:25
  22. I კორ. 2:9
  23. მათე 28:19–20
  24. ეპიკლეზისი - ნიშნავს ძღვენის კურთხევას. იგი არის მართალთა ლიტურგიის ნაწილი.
  25. დედანში შეცდომაა გაპარული, ციტატა მოყვანილია მათეს სახარების XVIII თავიდან, მე-18 მუხლი
  26. რუმინეთის მართლმადიდებელი ეკლესიის ტრადიციის მიხედვით ზეთის კურთხევის საიდუმლოში გამოიყენება მზესუმზირის ზეთი ღვინოსთან შეურევნელად.
  27. „აღსარების შესახებ სწავლება“-ის მეორე ნაწილი 1705 წელს რომში დაბეჭდილი "მოკლე სწავლება სინანულის საიდუმლოს შესახებ" ბროშურის პრაქტიკულად იდენტურია. მას აკლია მხოლოდ ლოცვები, რომელთა ავტორი არ არის ანთიმოზი.
  28. სჯულის კანონის მიხედვით მართლმადიდებელ ქრისტიანებს ცხოვრების მანძილზე მაქსიმუმ სამი ქორწინების უფლება ეძლევათ, მეოთხე ქორწინება, რა მიზეზითაც არ უნდა იყოს ის, უკანონოდ და ბათილად ითვლება. სჯულის კანონის მიხედვით საეკლესიო განქორწინების („ჯვრის აყრის“) უფლება აქვს მხოლოდ ეპისკოპოსს.
  29. არსებობს ძველი საეკლესიო წესი/ტრადიცია ზოგან კიდევ მოქმედი, როდესაც დამწყებ, ანუ ჯერ გამოუცდელ, მღვდელს არ აძლევენ აღსარებების მიღების უფლებას. XVII-XVIII საუკუნეებში ჯვარზე დაფიცებით დამშობილება დამახასიათებელი იყო ქურდ-ყაჩაღებისათვის, რის საფუძველზეც იკვრებოდნენ ხოლმე ბანდიტური დაჯგუფებები, ამიტომაც ეკლესია მკაცრ ზომებს იღებდა ასეთი პრაქტიკის წინააღმდეგ.

## კანონთა თავები

1. სამრევლო - ყველაზე მცირე საეკლესიო ადმინისტრაციულ-ტერიტორიული ერთეული, რომელიც კონცენტრირებულია სოფლისა ან ქალაქის მოქმედი ეკლესიის გარშემო. სამონასტრო ტაძრებისაგან განსხვავებით, რომელნიც მხოლოდ მონასტრის წევრებისთვისაა განკუთვნილი, სამრევლო ტაძრების დანიშნულებაა ემსახურონ მრევლს.
2. აქ ჩანს ძველი საეკლესიო და საერო კანონმდებლობის წესი, რომლის მიხედვითაც მზითევში მიღებული ქონება ქალს სიცოცხლის ბოლომდე პირად საკუთრებაში რჩებოდა. მისი ნებართვის გარეშე არავის, არც ქმარს, ჰქონდა მისი განკარგვისა და გასხვისების უფლება. მეუღლის გარდაცვალების ან სხვა რაიმე მიზეზით ოჯახის

---

დანგრევის შემთხვევაში მზითევი ხელშეუხებლად რჩებოდა ქალის საკუთრებაში. ქალის გარდაცვალების შემთხვევაში მისი მზითევი ავტომატურად გადადიოდა თანაბრად მისი ქალიშვილების საკუთრებაში-სამზითვოდ, ხოლო ქალიშვილების არარსებობის შემთხვევაში მზითევი ერგებოდა ვაჟებს.

3. რუმინეთის სამთავროებში-ვლახეთსა და მოლდოვაში მონობის ინსტიტუტი არსებობდა მეცხრამეტე საუკუნის სამოციან წლებამდე. 1867 წელს მოლდოვა და ვლახეთი გაერთიანდა ერთ სახელმწიფოში მთავარ ალექსანდრე იოან კუზას მიერ, მანვე გააუქმა მონობა რუმინეთში. რუმინეთში მონებად ჰყავდათ კონკრეტული ეთნოსის-ბოშების წარმომადგენლები.

4. აქ რუმინელი სოციალურ სტატუსსაც ნიშნავს. მეთექვსმეტე საუკუნიდან მოყოლებული გაუსაძლისი სოციალურ-ეკონომიკური მდგომარეობის გამო წვრილ მესაკუთრეთა გადატაკებული ნაწილი თავის თავს ყიდდა მთავრებზე, მონასტრებსა ან თავადებზე. ამით ისინი კარგავდნენ თავისუფლებას, თავისუფალი გადაადგილების უფლებას, საკუთარ ადგილ-მამულს და რჩებოდნენ ბატონის მფლობელობაში.

## **სწავლება სინანულის საიდუმლოს შესახებ**

1. დედანში ანთიმოზი ქმნის ახალ სინტაგმას იმის მაგივრად რომ იხმაროს სიტყვა frate (ძმა) ის ხმარობს სიტყვას Sora (და), ოღონდ გადაჰყავს ის მამრობით სქესში Sor
2. მათე 3.8
3. დედანში ყველა ეს ციტატა მოცემულია სლავურ ენაზე.
4. იგულისხმება ზოოფილია.
5. აქ მკითხაობას ნიშნავს.
6. აქ ანთიმოზი გულისხმობს ცოდვების გახსენებას, მათ არ დავიწყებას, რათა ჩადენილის გამო სინანული მარად თან სდევდეს ადამიანს.

## **თავდაცვის უსტარები**

1. „ქმნა მართლისა სამართლისა ნება შეიქმს ხმელსა ნედლად“ (რუსთაველი)
2. იგულისხმება რიმნიკუ-ვირჩეას ეპარქიის მმართველობიდან უნგრო-ვლახეთის მიტროპოლიტად გადაყვანა
3. წერილის ეს პასაჟი, ცალსახად აბათილებს ზოგიერთი რუმინელი მკვლევარის ჰიპოთეზას, თითქოს ანთიმოზი იყო ეროვნებით რუმინელი, რადგან ქართველი ან სხვა უცხოელი ვერ შეძლებდა რუმინულ ენაზე შეექმნა ასეთი ძალის ტექსტები, ხოლო ივერიელი მხოლოდ ფსევდონიმი შეიძლება იყოს, რომელიც ამ მოღვაწემ მიიღო წმინდა ივერონის მონასტერში ყოფნისას.



4. ავტორი მიმართავს რუმინეთის იმჟამინდელ მმართველს კონსტანტინე ბრინკოვიანუს. ანთიმოზ ივერიელისა და კონსტანტინე ბრინკოვიანუს ურთიერთობა - როგორც ქვეყნის უზენაესი ხელისუფლისა და უზენაესი მღვდელმთავრისა. ე. წ. სიმფონიის პრინციპს ემყარებოდა, რაც სახელმწიფოსა და ეკლესიის ურთიერთობის ჰარმონიზებას გულისხმობს ორივე ინსტიტუციის ავტონომიის ურთიერთაღიარებით. ეს პრინციპი ბიზანტიის იმპერიის დროს ჩამოყალიბდა, როდესაც მოხდა ეკლესიის ლეგალიზება და სახელმწიფოს მხრივ ჯერ დევნის შეწყვეტა 313 წელს მილანის ედიქტით. შემდეგ კი დომინანტ რელიგიად აღიარება და დაკანონება. ანთიმოზისა და ბრინკოვიანუს ერთობლივი ძალისხმევით შედეგად ვლახეთი იქცა მართლმადიდებლური განათლებისა და წიგნიერების მსოფლიო ცენტრად; რამაც გამოიწვია შური და მტრობა ანთიმოზის მიმართ. გაძლიერდა სასახლის ინტრიგები და კარგად ორგანიზებული ცილისმწამებლური კამპანიები, რომლის მიზანი იყო ანთიმოზის გადაყენება მიტროპოლიტის პოსტიდან. ანთიმოზი დამაჯერებელი არგუმენტაციით უსაბუთებს ქვეყნის საერო ხელისუფალთ ამ პროცესების ნამდვილ არსს, და ცნობიერების იმ საფრთხეებს, რაც შეიძლება მათი ურთიერთობის ჩაშლას და კონფლიქტს მოჰყვეს. კონსტანტინე ბრინკოვიანუმ გულმოდგინედ წაიკითხა ეს ეპისტოლე და დარწმუნდა მისი ავტორის უდანაშაულობაში. ანთიმოზი დარჩა ვლახეთის პირველ მღვდელმთავრად. ანთიმოზის მტრებმა მისი გადაყენება მხოლოდ ბრინკოვიანუს სიკვდილით დასჯის შემდეგ მოახერხეს. თვითონ საეკლესიო წრეებში აღმოჩნდნენ მღვდელმთავრები, რომლებმაც პოლიტიკურ კონიუქტურას გაუწერეს ანგარიში და ანთიმოზი ეკლესიიდან განაყენეს. 1990-იან წლებში, როდესაც დადგინდა ანთიმოზ ივერიელის წმინდანად კანონიზების საკითხი, საჭირო გახდა კონსტანტინეპოლის საპატრიარქოში ეკლესიიდან განყენების აქტის გაუქმება, მაგრამ აღმოჩნდა, რომ ასეთი აქტი საერთოდ არასოდეს არსებულა, ანუ ანთიმოზის განყენება მღვდელმთავრებიდან საეკლესიო სამართლის მიხედვით სრულიად უკანონო იყო.

1. შდრ. "ლოდი, რომელ შეურაცხვეს მაშენებელთა, ესე იქმნა თავ კიდეთა; უფლისა მიერ იყო ესე და არს საკვირველ წინაშე თუალთა ჩუენთა. ამისთვის გეტყვი თქუენ, ვითარმედ: მიგელოს თქუენგან სასუფეველი ღმრთისაი. და მიეცეს ნათესავსა, რომელნი ჰყოფდენ ნაყოფსა მისსა. და რომელი დაეცეს ლოდსა მას ზედა, შეიძუსროს; და რომელსა ზედა დაეცეს, განანქრიოს იგი" მათ. 21; 43-44

2. "de la iviriia"

3. ტექსტში ნახმარია სიტყვა- Stolnic

4. „დიდ ეკლესიას“ კონსტანტინეპოლის საპატრიარქო ტაძარს ეძახდნენ.

დიდი თანამდებობა რუმინეთის სამეფო კარზე.

5. მარცვალთა შეთანხმება ლექსში.

6. ტექსტში მოცემული სიტყვის "Castigare" ლექსიკონური მნიშვნელობაა- მოპოვება

7. I კორ. 4: 15

---

8. ანუ ახალ ბერძნულ ენაზე

9. იგულისხმება ღმერთი, რომლის ხატებად და მსგავსებად არის შექმნილი ადამიანი.

10. იხ. წმ. იოანე დამასკელის ”მართლმადიდებელი სარწმუნოების ზედმიწევნითი გადმოცემა”. თავი 23. წყალთა შესახებ.

## წმინდა ანთიმოზ ივერიელის ცხოვრებისა და შრომების ქრონოლოგია

1. 1650 წელი -წმინდა ანთიმოზ ივერიელის (ერისკაცობაში ანდრია) დაიბადა მესხეთის სოფელ უდუმი-დაბადების წელი და სოფლის სახელი დოკუმენტურად არ არის დადასტურებული. მისი მშობლები იყვნენ იოანე და მარიამ ქურციძეები (გვარი „ქურციძე“ ასევე არ არის დოკუმენტურად დადასტურებული, თუმცა უეჭველია, რომ მისი ოჯახი მიეკუთვნებოდა მაღალ სოციალურ ფენას).

ცნობილია, რომ საქართველოში მან მიიღო გამორჩეული განათლება: ღვთისმეტყველებაში, ფილოსოფიასა და გამოყენებითი ხელოვნების სხვადასხვა დარგში. მას ასევე ქონდა სხვადასხვა უცხო ენის ცოდნა; ყმაწვილი ანდრიას საქართველოდან გატაცებისა და სტამბოლში მონად გაყიდვის ზუსტი თარიღი არ არის ცნობილი. ბოლო კვლევებით მტკიცდება, რომ აქ მას გამოისყიდის იერუსალიმის პატრიარქი დოსითე ნოტარა. მასთან ერთად იგი მიემგზავრება იერუსალიმში, სადაც იგი აღკვეცეს ბერად, მოგვიანებით მას აკურთხებენ მღვდლად და მაცხოვრის საფლავის ტაძრის ეკონომოსად ნიშნავენ.

2. 1689 წელს მღვდელმონაზონი ანთიმოზი უკვე დოკუმენტურად მოხსენებულია, როგორც მოლდო-ვლახეთის სამთავროს დედაქალაქ იასთან ახლოს მდებარე იერუსალიმის საპატრიარქოს მეტოქიონის მონასტერ ჩეტეცუიას წინამძღვარი. მოლდო-ვლახეთში ყოფნისას ანთიმოზი ეუფლება

- 
- მესტამბეობის ხელოვნებას. დოკუმენტურად მტკიცდება, რომ ამ მიზნით მას იერუსალიმიდან გადმოეზავნა 200 გროში.
3. 1690 წელს ანთიმოზ ივერიელი მოლდო-ვლახეთიდან გადმოდის უნგრო-ვლახეთში, სადაც მოღვაწეობას აგრძელებს ბუქარესტის სტამბაში.
  4. 1691 წელის 10 ივნისი - ბუქარესტის სტამბის ხელმძღვანელი მიტროფანე იკურთხება ქალაქ ბუზიუს ეპისკოპოსად და სტამბის მმართველობას აბარებს ანთიმოზ ივერიელს.
  5. 1691 წელის ოქტომბერში - ანთიმოზი ბეჭდავს თავის პირველ წიგნს ახალბერძნულ ენაზე სახელწოდებით „*ბასილი მაკედონელის სწავლებანი თავისი შვილის ლეონის მიმართ*“. ტექსტი ითარგმანა იერუსალიმის მომავალი პატრიარქის ხრისანტ ნოტარას მიერ, რომელთანაც მთელი ცხოვრების მანძილზე ანთიმს ხან კარგი, ხანაც დამაბული და რთული ურთიერთობა ქონდა, განსხვავებით მისი ბიძისგან იერუსალიმის პატრიარქ დოსითე ნოტარასაგან, რომელთანაც ანთიმოზს გულითადი ურთიერთობა ქონდა მთელი ცხოვრების მანძილზე.
  6. 1692 წელი ბუქარესტში ბერძნულად იბეჭდება წიგნი „*წმინდა ღირსი პარასკევასა და ღირსი დეკაპოლიტეკლის ღვთისმსახურება*.“
  7. 1693 წელი - ანთიმოზი ბუქარესტის სტამბაში ბეჭდავს მონუმენტალურ ნაშრომს „*ბერძნულ-რუმინული სახარება*“ (*ოთხთავი*), რომელიც შემკული იყო ანთიმოზ ივერიელის ხელით შექმნილი ორიგინალური ორნამენტებითა და ჩუქურთმებით.
  8. 1694 წელი - ბუქარესტის სტამბაში ანთიმოზი ბეჭდავს თავის ბოლო წიგნს-*რუმინულ ენოვან ფსალმუნს*. იმავე წელს, ზაფხულში ანთიმი ინიშნება სნაგოვის მონასტრის წინამძღვრად, სადაც აარსებს ახალ სტამბას და მესტამბეობის სკოლას, მისი მთავარი დამხმარე აქ მიხაი იშტვანოვიჩია (იშტვანის ძე). ეს პიროვნება 1709 წელს ანთიმოზის მიერ გამოგზავნილი იქნა საქართველოში ქართული სტამბის მოსაწყობად თბილისში.
  9. 1696 წელი - სნაგოვში რუმინულად იბეჭდება „*წმინდა მეფე კონსტანტინეს და დედოფალ ელენეს ღვთისმსახურება*“.
  10. 1697 წელი - ბერძნულ ენაზე იბეჭდება სქელტანიანი წიგნი „*ანტოლოგიონი*“. იმავე წელს იბეჭდება რუმინულენოვანი სახარება. იმავე წელს ბერძნულ ენაზე იბეჭდება ბერძენი თეოლოგის იოანე კარიოფილის დოგმატური შინაარსის ნაშრომი „*სახელმძღვანელო რამდენიმე გაუგებარი საკითხის შესახებ*“. ბერძნულ ენაზე იბეჭდება თეოლოგ გეორგე მაიეტას წმინდა კონსტანტინესათვის მიძღვნილი პანეგირიკი. ასევე იბეჭდება რუსი სწავლულის მელეტი სმოტრიცკის სახელმძღვანელო - „*სლავური ენის გრამატიკა*“.
  11. 1698 წელს ანთიმოზი ბეჭდავს „*ღვთისმშობლის დაუჯდომელს*“.

- 
12. 1699 წელი - სნაგოვის მონასტერში ბერძნულად იბეჭდება დოგმატური შინაარსის წიგნი „*მართლმადიდებლური აღმსარებლობა*“. იმავე წელს ანთიმოზი რუმინულ ენაზე ბეჭდავს ასევე დოგმატური შინაარსის წიგნს „*წიგნი, ანუ ნათელი*“.
  13. 1700 წელი - იბეჭდება ზნეობრივი ღვთისმეტყველების შინაარსის 170 გვერდიანი წიგნი „*მადლის ყვავილი*“, რომელიც პოპულარული ხდება და მომავალში მრავალჯერ გამოიცემა. იმავე წელს ბერძნულ ენაზე იბეჭდება „*ფსალმუნი*“.
  14. 1701 წელი - ანთიმოზი აწყობს პირველ არაბულენოვან სტამბას, რომელზეც ანტიოქელი მართლმადიდებლებისათვის ბეჭდავს ბილინგვურ წიგნს „*ბერძნულ-არაბულ კონდაკი*“. იმავე წელს ბერძნულ ენაზე იბეჭდება თეოლოგ სევასტოს კიმენიტელის პრაქტიკული თეოლოგიის შინაარსის ნაშრომი „*ეორთოლოგიონი*“. ასევე იმავე წელს იბეჭდება დოქტორ იოანე კომნენის ნაშრომი „*ათონის მთის გზამკვლევი*“. მიუხედავად იმისა, რომ 1704 წლის 24 მაისამდე ანთიმოზი მოიხსენება როგორც სნაგოვის მონასტრის წინამძღვარი.
  15. 1701 წლის ზაფხულში იგი იცვლის მუდმივ საცხოვრებელ ადგილს, გადადის ბუქარესტში და თან მიაქვს სტამბა. იმავე წელს უკვე ბუქარესტში ანთიმოზი ბერძნულ ენაზე ბეჭდავს უნგო-ვლახეთის მთავრის კონსტანტინეს ერთერთი შვილის შტეფან ბრინკოვიანუს მიერ დაწერილ ორ „*პანეგირიკს*“. ერთ-ერთი მიძღვნილია წმინდა მოციქულთასწორ კონსტანტინე დიდისადმი, მეორე კი- წმინდა პირველმოწამე სტეფანესადმი. ორივე წიგნი ხელახლა დაბეჭდა 1702 წელს.
  16. 1702 წელი - ანთიმოზი ბუქარესტის სტამბაში ბერძნულ ენაზე ბეჭდავს „*წმინდა ღირსი მატრონა ჰიოპოლიტელის ღვთისმსახურებას*“, ხოლო ივნისის თვეში ბუქარესტშივე იბეჭდება „*ბერძნულ-არაბული ჟამნი*“ (ჰიმნოგრაფიული შინაარსის წიგნი)
  17. 1703 წელი - ამ წელს ბუქარესტში იბეჭდება რუმინულ ენაზე „*ახალი აღთქმა*“, ხოლო ბერძნულ ენაზე სამი ნაშრომი, აქედან პირველია - „*დოგმატური სწავლება*“, მეორე - „*მსახურება ეკლესიათა კურთხევის შესახებ*“ და მესამე - შტეფან ბრინკოვიანუს მიერ დაწერილი „*პანეგირიკი ღვთისმშობლის მიძინებაზე*“. იმავე წელს იბეჭდება „*სლავურ-რუმინული ჟამნი*“.
  18. 1704 წელი - ბერძნულ ენაზე იბეჭდება ორი წიგნი, ასევე უნგო-ვლახეთის მთავრის კონსტანტინეს ორი ვაჟის: რადუ ბრინკოვიანუს „*ქადაგება სიტყვა-ღმერთის ვნებაზე*“ და მისი უფროსი ვაჟის, კონსტანტინეს მიერ დაწერილი წიგნი „*ბერძნული და რომაული პარალელები*“.
  19. 1705 წელის 16 მარტს - ანთიმოზი არჩეული იქნა რიმნიკის ეპისკოპოსად. იმავე წელს ბუქარესტში ბერძნულ ენაზე ბეჭდავს წიგნს „*ლარისას მთავარეპისკოპოსის წმინდა ბესარიონის ღვთისმსახურება*“. იმავე წელს ქალაქ

- 
- რიმნიკში იგი მოაწყო ახალ სტამბას, სადაც იმავე წელს ბერძნულ ენაზე ბეჭდავს პოლემიკური შინაარსის დოგმატურ წიგნს „*სიხარულის ტომი*“. იმავე წელს რუმინულ ენაზე, რიმნიკში, ბეჭდავს „*ანტოლოგიონს*“, ასევე ბეჭდავს რუმინულ ენაზე, თავის პირველ ორიგინალურ ნაშრომს „*მოკლე სწავლება სინანულის საიდუმლოს შესახებ*“, რომლის მიზანი იყო სასულიერო პირების ცოდნისა და განათლების ამაღლება.
20. 1706 წელი - ანთიმოზ ივერიელის ლოცვა-კურთხევით, მისი მოწაფე მიხაი იმტვანოვიჩი, რიმნიკის სტამბაში, ბეჭდავს რუმინულ ენოვან საღვთისმსახურო წიგნებს: 1. „*ღვთისმშობლის მიძინების ღვთისმსახურება*“, 2. „*პარაკლიტონი*“, 3. „*დიდი კურთხევანი*“, რომლის წინასიტყვეობაშიც მიხაი იმტვანოვიჩი გვაწვდის საინტერესო ინფორმაციას ანთიმოზის ცხოვრებასთან დაკავშირებით. იმავე წელს იბეჭდება რადუ ბრინკოვიანუს მიერ ბერძნულ ენაზე დაწერილი ორი პატარა წიგნი: „*ქადაგება მაცხოვრებელი ვნების შესახებ*“ და მეორე „*პანეგირიკი წმინდა ნიკოლოზის შესახებ*“.
21. 1706-07 წლებში რიმნიკის ეპისკოპოსი ანთიმოზი აქტიურად იღვწის ეკლესია-მონასტრების: სტრეჰაია, სურჰატელე, კოზია, ჰოტერანი, ფედელეშოიუ და გოვორა აღდგენა-რესტავრაციისათვის. ამ უკანასკნელად ხსენებულ ორ ტაძარში დღემდე შემორჩენილი მისივე სიცოცხლეშივე, როგორც ადგილობრივი მღვდელმთავრისა და ქტიტორის, შესრულებული ფრესკები.
22. 1707 წელს - რუმინულ ენაზე იბეჭდება თეოლოგ გეორგ მაიოტას წიგნი „*სიტყვა უფალისა ჩვენისა იესო ქრისტეს მაცხოვრებელ ვნებაზე*“
23. 1708 წლის 30 იანვარს - კვდება უნგრო-ვლახეთის მიტროპოლიტი თეოდოსი, რომელიც ანდერძით თავის მემკვიდრედ ასახელებს რიმნიკის ეპისკოპოსს ანთიმოზ ივერიელს. იმავე წელს 28 თებერვალს, მართლმადიდებლობის დღესასწაულის კვირადღეს, ჩატარდა ანთიმოზ ივერიელის ინტრონიზაცია უნგრო-ვლახეთის მიტროპოლიტად.
24. 1709 წლის 1 ივლისს - ანთიმოზი რუმინეთის მთავარ კონსტანტინე ბრინკოვიანუს ჩუქნის რუმინული ხელოვნების შედევრად აღიარებულ საკუთარი ხელით შექმნილ ხელნაწერ ორიგინალურ ნაშრომს „*ძველი და ახალი აღთქმის სახეები*“, წიგნს თან ახლავს მისივე ხელით შესრულებული ბიბლიური პერსონაჟების 500-ზე მეტი მინიატურული პორტრეტი. ეს ნაშრომი დღემდე ინახება კიევის ეროვნული ბიბლიოთეკის ხელთნაწერთა ფონდში. იმავე წელს მიტროპოლიის ერთ-ერთ რეზიდენციაში ქალაქ ტირგოვიშტეში ანთიმოზი აარსებს კიდევ ერთ სტამბას, სადაც იმავე წელს აგვისტოში ბერძნულ ენაზე იბეჭდება „*წიგნი, რომელიც მოიცავს მთელი წლის ციკლის საეკლესიო ღვთისმსახურებებს*“.

- 
25. 1709 წელს - ანთიმოზი ბუქარესტში აწყო ქართულ შრიფტიან სტამბას, რომელზეც ბეჭდავს ქართულენოვან ოდიკებს. იმავე წელს თავის საუკეთესო მოწაფესა და მეგობარს მიხაი იმტვანოვიჩს საქართველოში ატანს დაბეჭდილ ოდიკებსა და სტამბის მოწყობილობებს, იმავე წელს ქართულენოვანი სტამბა იწყებს ფუნქციონირებას თბილისში.
26. 1709-12 წლებში თბილისში მიხაი იმტვანოვიჩი ბეჭდავს 10 წიგნს, საიდანაც 9 წიგნი სახეზეა, ერთის ადგილმდებარეობა კი დღეისთვის უცნობია:
- ა) 1709 წელი - „სახარება“ (*ოთხთავი*) - დაბეჭდილია რუმინეთიდან ჩამოტანილი ნუსხა-ხუცური დიდი ზომის შრიფტით;
  - ბ) 1709 წელი - „დავითნი“ (*ფსალმუნნი*) - დაბეჭდილია ნუსხა-ხუცური დიდი ზომის შრიფტით;
  - გ) 1709 წელი - „სამოციქულო“ - დაბეჭდილია ნუსხა-ხუცური შავ-წითელი დიდი ზომის შრიფტით;
  - დ) 1710 წელი - „კონდაკი“ - ტექნიკურად და მხატვრულად ყველაზე დახვეწილი გამოცემა. დაბეჭდილია სხვადასხვა ზომისა და ფერის შრიფტით, გამოყენებულია ბევრი ორნამენტი, თავფურცლის მეორე მხარეს პირველად იბეჭდება ბაგრატიონების გერბი თავისი აღწერილობით, წიგნი შეკრულია მაღალხარისხიან ტყავის ყდაში;
  - ე) 1710 წელი - „ლოცვანი“ - დაბეჭდილია მხედრული მცირე ზომის მხედრული შრიფტით;
  - ვ) 1710 წელი - „ჟამნი“ - დაბეჭდილია მხედრული შრიფტით. ეს წიგნი აღწერილია 1950 წელს ერთ-ერთი ინვენტარიზაციის დროს, მაგრამ დღეს დაკარგულად ითვლება. დაუდასტურებელი ინფორმაციით ეს წიგნი ერთ-ერთ კერძო კოლექციაში ინახება;
  - ზ) 1710 წელი - „ჟამნი“ - დაბეჭდილია ნუსხა-ხუცური შავ-წითელი შრიფტით;
  - თ) 1711 წელი - „სწავლა თუ ვითარ მართებს მოძღვარსა სწავლება მოწაფისა“ - დაბეჭდილია მხედრული შრიფტით. წიგნის ავტორი არის ვინმე ბერი გერმანე. წინასიტყვაობაში ნათქვამია, რომ წიგნის დაწერის მიზანია ახალგაზრდების ქრისტიანულ მართლმადიდებელ სარწმუნოებაში გამტკიცება, ამის გამო ტექსტი მიზანმიმართულად მარტივი ენითაა დაწერილი, რომ ბავშვებისა და მოზარდებისათვის ადვილი გასაგები და სასწავლი ყოფილიყო.
  - ი) 1711 წელი - „დავითნი“ (*ფსალმუნნი*) - დაბეჭდილია მხედრული შრიფტით;
  - კ) 1709-1722(?) წლები - „ბიბლია“ - დაბეჭდილია მხედრული შრიფტით. ნაშრომი დაუსრულებელია, არ აქვს ყდა. მოიცავს წლების განმავლობაში სხვა დასხვა დროს დაბეჭდილი ძველი და ახალი აღთქმის წიგნების კრებულს. ტექსტი სრული არ არის, კერძოდ, ძველი აღთქმიდან დაბეჭდილია მხოლოდ წინასწარმეტყველთა ყველა წიგნი, ახალი აღთქმიდან კი წარმოდგენილია

- 
- ყველა დაბეჭდილი წიგნი. გარდა *იოანეს გამოცხადებისა*, რომელიც ბოლოში დართულია ხელნაწერის სახით.
27. 1710 წელს ტირგოვიშტეში მესტამზე მიტროფანე გრიგორაშის დახმარებით ანთიმოზი ბერძნულ ენაზე ბეჭდავს სამ წიგნს: „*დოგმატური კანოპლია*“, „*წმინდა ეკატერინეს ღვთისმსახურება*“, „*სინას მთის გზამკვლევი*“. ხოლო მესტამზე გეორგე რადოვიჩის დახმარებით აიწყო და დაიბეჭდა ორი წიგნი რუმინულ ენაზე: „*ფსალმუნნი*“ და ანთიმოზ ივერიელის ორიგინალური ნაშრომი „*საეკლესიო სწავლება*“. ეს უკანასკნელი, რომელიც მიზანად ისახავდა მღვდლების ცოდნა-განათლების ამაღლებას, განსაკუთრებული მნიშვნელობისა იყო იმდროინდელი მღვდელთმსახურთათვის, რის გამოც 1741 წელს ის ხელახლა გამოქვეყნდა.
28. 1711 წელს, როდესაც რუსეთის იმპერიის ჯარი მიუახლოვდა მოლდო-ვლახეთის საზღვარს, ანთიმოზმა ბუქარესტში შეკრიბა პატრიოტულად მოაზროვნე რუმინელი თავად-აზნაურობა. რუსების ჯარის რუმინეთის ტერიტორიაზე შემოსვლის შემთხვევაში, ისინი თურქების წინააღმდეგ დიდი აჯანყებისათვის უნდა ყოფილიყვნენ მზად. მაგრამ რუსეთის ჯარების უკანდახვევის გამო, ანთიმოზ ივერიელის მიერ თურქების წინააღმდეგ მომზადებული აჯანყება ჩაიშალა.
29. 1712 წელს ტირგოვიშტერში რუმინულ ენაზე იბეჭდება საღვთისმსახურო წიგნი „*პარაკლიტონი*“ და „*ყოველდღიური ლოცვანი*“
30. 1713 წელს ანთიმოზი ბუქარესტში იწყებს ყოველთაწმინდანთა სახელობის მონასტრის მშენებლობას და ადგენს ამ „*მონასტრის ტიპიკონს*“, რომელიც განსაკუთრებული თეოლოგიური და კულტურულ-ისტორიული მნიშვნელობისაა და წმინდანის ერთგვარ ანდერძადაა მიჩნეული. იმავე წელს ტირგოვიშტეში იბეჭდება ლიტურგიკური შინაარსის რამდენიმე წიგნი: რუმინულენოვანი „*კონდაკი*“, ტრილინგვური: სლავურ-ბერძნულ-რუმინულ-ენოვანი „*კატავასიერი*“, ასევე, ხელახლა გამოიცა 1706 წელს რიმნიკში დაბეჭდილი „*დიდი კურთხევანი*“; და წიგნი „*ფილოსოფიური იგავები*“ ბერძნულ და რუმინულ ენებზე.
31. 1714 წლის 25 მარტს, შიდაპოლიტიკური ინტრიგების გამო, უნგრო-ვლახეთის მთავარი კონსტანტინე ბრიანკოვიანუ თურქებმა დაატუსაღეს და გადაგზავნეს სტამბოლში, სადაც 15 აგვისტოს თავის ოთხ ვაჟიშვილსა და სიმესთან ერთად მოწამეობრივად აღესრულა. იმავე წელს ანთიმოზი ტირგოვიშტეში ბეჭდავს რუმინულ ენაზე კანონიკური შინაარსის ორიგინალურ ნაშრომს „*კანონთა თავები*“. აქვე ავლნიშნავთ, რომ ეს წიგნი 1775 წელს ხელახლა დაიბეჭდა. ასევე იბეჭდება საღვთისმსახურო შინაარსის ორი წიგნი: სლავურ-რუმინული „*ჟამნი*“ და „*კატავასიერი*“.

---

32. 1715 წელს „*ჟამნი*“ და „*კატავასიერი*“ უკვე მხოლოდ რუმინულ ენაზე დაიბეჭდა. იმავე წელს ბერძნულ ენაზე იბეჭდება იერუსალიმელი პატრიარქის ხრისანტ ნოტარას ნაშრომი „*ქრისტეს წმინდა ეკლესიის კლერიკოსების, იერარქიისა და თანამდებობების შესახებ*“. ამის შემდეგ სტამბა ანთიმოზს გადმოაქვს ტირგოვიშტედან ბუქარესტში, სადაც ბერძნულ ენაზე ბეჭდავს ორ წიგნს: ლექსად დაწერილი პატარა წიგნი „*ქრისტიანულ-პოლიტიკური დარიგებანი მთავარ შტეფან კანტაკუზინოს მიმართ*“; და იერუსალიმის ყოფილი პატრიარქის დოსითე ნოტარას სქელტანიანი ნაშრომი „*იერუსალიმის პატრიარქთა ისტორია*.“

ამავე წლის ნოემბერში მთავარი შტეფან კანტაკუზინო, რომელიც ანთიმოზის მეგობარი და თანამოაზრე იყო, პოლიტიკური ინტრიგების გამო, მამასთან კონსტანტინესთან ერთად, დააკავეს და გაამგზავრეს სტამბოლში. 1716 წლის 7 ივნისს მთავარი შტეფან კანტაკუზინო და მამამისი სიკვდილით დაისაჯა.

33. 1716 წელს **10 თებერვალს** ბუქარესტში ინიშნება პროთურქული ორიენტაციის მქონე ახალი მთავარი ნიკოლაი მავროკორდატი. მიუხედავად იმისა, რომ მალევე, იმავე წლის **15 მარტს**, იგი დიდ თანხას სწირავს ანთიმოზის მიერ ბუქარესტში აშენებულ ყოველთა წმინდანთა სახელობის სამონასტრო კომპლექსს; ახალი მთავარი ჩანს, რომ არ ენდობა ანთიმოზს, მას ეჭვი ეპარება თურქების მიმართ მის კეთილგანწყობაში. იმავე წელს ზაფხულში ყოველთა წმინდანთა სახელობის მონასტერში იწყებს მუშაობას ახალი სტამბა, სადაც აგვისტოში იბეჭდება ალექსანდრე მავროკორდატ ექსაპორიტელის მიერ დაწერილი წიგნი „*წმინდა, ანუ იუდეველთა ისტორია*“. **15 აგვისტოს** უნგრულაზეთის საზღვარს მიუახლოვდა ავსტრო-უნგრეთის ჯარი, რის გამოც ნიკოლაი მავროკორდატი სასწრაფოდ ტოვებს ბუქარესტს და თან მიყავს ანთიმოზ ივერიელი. ისინი მიემართებიან თურქეთის საზღვარისკენ მდებარე ქალაქ ჯიურჯიუმში. გზაში მიტროპოლიტ ანთიმოზსა და მთავარ ნიკოლაი მავროკორდატს შორის შედგება დრამატული საუბარი; ამ საუბრის დროს ანთიმოზი უარს ამბობს თურქეთში გახიზვნაზე და ბრუნდება ბუქარესტში, სადაც პატრიოტულად მოაზროვნე თავად-აზნაურობასთან ერთად სათავეში ჩაუდგება თურქეთის მოწინააღმდეგე ახალ მთავარის პეტრაშკუ ბუზოიანუს არჩევას. ამ ქმედებებით ნათლად გაცხადდება ანთიმოზ ივერიელის ანტითურქული ორიენტაცია. **10 სექტემბერს** ავსტრო-უნგრეთის ჯარის უკან დახევის შემდეგ ნიკოლაი მავროკორდატი თურქულ სამხედრო ძალებთან ერთად ბრუნდება ბუქარესტში, სასტიკად უსწორდება აჯანყებულებს, ხოლო ანთიმოზ ივერიელს აპატიმრებს; საპყრობილეში მას განსაკუთრებულად ამცირებენ, შეურაცხოვენ და აბუჩად იგდებენ. **20 სექტემბერს** ნიკოლაი მავროკორდატი კონსტანტინოპოლის საპატრიარქოდან გამოითხოვს ანთიმოზ



- 
- ივერიელის სასულიერო ხარისხიდან განკვეთისა და სინას მთაზე წმინდა ეკატერინეს სახელობის მონასტერში სამუდამო გადასახლების განაჩენს. რადგანაც სამონასრო წესების მიხედვით, ბერი, ეპიტიმის შემთხვევაში, იგზავნება მის მშობლიურ მონასტერში. საქმე ის გახლავთ, რომ ანთიმოზ ივერიელის ბერად აღიკვეცა იერუსალიმში, ხოლო სინას მთის მონასტერი მაცხოვრის საფლავის მეტოქიონს წარმოადგენდა. ამავე წლის სექტემბრის დასასრული ოქტომბრის დასაწყისი გადასახლების ადგილისკენ მიმავალი ბულგარეთის ტერიტორიაზე საიდუმლო ბრძანების თანახმად, თურქი ჯარისკაცები კლავენ ანთიმოზ ივერიელს და მის ცხედარს აყოლებენ მდინარე ტუნჯიას, რომელიც ჩაედინება მდინარე მარიცაში, რომელიც საბოლოოდ უერთდება ადრიატიკის ზღვას. მისი წამების თარიღი უცნობია, მაგრამ ცნობილია, რომ **22 სექტემბერს** იგი ჯერ კიდევ ცოცხალია.
34. 1741 წელს ბუქარესტში მეორედ იბეჭდება „*მეუფე ანთიმოზის საეკლესიო სწავლება*“.
  35. 1774 წელს ბუქარესტში უკვე მესამედ იბეჭდება ანთიმოზ ივერიელის „*საეკლესიო სწავლება*“.
  36. 1775 წელს ბუქარესტში მესტამზე დიმიტრი პეტროვიჩის მიერ მეორედ იბეჭდება წმინდა ანთიმოზის „*კანონთა თავები*“, თუმცა ამ გამოცემაში ავტორის სახელი ნახსენები არ იყო.
  37. 1865 წელს რუმინეთის ეკლესია აცხადებს თავის ავტოკეფალიას, რის გამოც კონსტანტინოპოლის საპატრიარქო, რომლის იურისდიქციაში მანამდე შედიოდნენ უნგრო–ვლახეთისა და მოლდო–ვლახეთის მიტროპოლიები, პროტესტის ნიშნად გაწყვიტა კანონიკურ–ევექარისტიული კავშირი რუმინეთის ეკლესიასთან.
  38. 1885 წელს კონსტანტინოპოლის მსოფლიო საპატრიარქო ოფიციალურად აღიარებს რუმინეთის ეკლესიის ავტოკეფალიას და აღადგენს მასთან კანონიკურ–ევექარისტიულ კავშირს. რუმინეთის ეკლესიის მიერ ავტოკეფალიის მოპოვება ხელს გაუხსნის რუმინელ საეკლესიო და კულტურის მოღვაწეებს ანთიმოზ ივერიელის რეაბილიტაციის და მისი ნაშრომების პოპულარიზაციის საქმეში.
  39. 1886 წელს იბეჭდება ანთიმოზ ივერიელის „*დიდაქეების*“ პირველი გამოცემა. წინასიტყვაობაში რომანის ეპარქიის ეპისკოპოსი მელქისედეკი პირველად აქვეყნებს ანთიმოზის სრულ ბიოგრაფიას.
  40. 1888 წელს ქვეყნდება ანთიმოზ ივერიელის „*ქადაგებების*“ ახალი გამოცემა.
  41. 1895–1911 წლებში იბეჭდება „*ქადაგებების*“ სხვადასხვა ფრაგმენტები.
  42. 1915 წელს პირველად ქვეყნდება „*დიდაქეების*“ გამართული და დახვეწილი გამოცემა.

- 
43. 1916 წლის 23–25 მაისს რუმინეთის მართლმადიდებელი ეკლესიის წმინდა სინოდი აღნიშნავს ანთიმოზ ივერიელის მოწამეობრივი აღსასრულის 200 წლისთავს. პირველად გაიჟღერა ანთიმოზის წმინდანად შერაცხვის წინადადება, მაგრამ პირველი მსოფლიო ომმა შეაფერხა შესაბამისი პროცედურების დაწყება.
  44. 1956 წელს ანთიმოზ ივერიელის პიროვნების მიმართ ინტერესი საგრძნობლად იზრდება, საეკლესიო საღვთისმეტყველო ლიტერატურაში იბეჭდება ანთიმოზ ივერიელისადმი მიძღვნილი უპრეცედენტო დიდი რაოდენობის სამეცნიერო შრომები. ხელახლა დგემა ანთიმოზის კანონიზირების საკითხი.
  45. 1962 წელს ქვეყნდება „ქადაგებების“ პირველი კრიტიკული გამოცემა.
  46. 1966 წელს რუმინეთის საპატრიარქო და მეცნიერებათა აკადემია აღნიშნავენ ანთიმოზ ივერიელის მოწამეობრივი აღსასრულის 250 წლისთავს. იმავე წელს რუმინეთის წმინდა სინოდის მოთხოვნაზე კონსტანტინოპოლის მსოფლიო საპატრიარქო აუქმებს 250 წლის წინანდელ უნგრო–ვლახეთის მიტროპოლიტ ანთიმოზის განკვეთის აქტს.
  47. 1992 წლის 27 სექტემბერი რუმინეთის ეკლესიის წმინდა სინოდი ანთიმოზ ივერიელს მღვდელმოწამის სახელით შერაცხავს წმინდანად. მისი ხსენების თარიღად რუმინეთში დაწესდა 27 სექტემბერი. საქართველოს მართლმადიდებელი ეკლესია მის ხსენებას აღასრულებს 13/26 ივნისს.

### ანთიმოზ ივერიელი ტექსტების თარგმანისა და კომენტარებისას გამოყენებულ იქნა შემდეგი გამოცემები:

1. Antim Ivireanu, *Opere*, editie critică si studiu introductiv de Gabriel Strempele, Bucuresti, Editura Minerva, 1972;
2. Antim Ivireanu, *Didahii*, Minerva Florin Faifer, Postfata la volumul: Antim Ivireanu, *Didahii*. Bucuresti, Editura Minerva, 1983, the University of Michigan, Anthologierealizata in Redactie de Mihai Dascal;
3. Antim Ivireanu, *Didahii*, Litera Chisinau 2011.
4. ახალი აღთქუმად უფლისა ჩუენისა იესო ქრისტესი, თბ., 1963.
5. ბიბლია, საქართველოს საპატრიარქო, თბ., 1989.
6. ქართული ოთხთავის ორი ძველი რედაქცია სამი შატბერდული ხელნაწერის მიხედვით, აკ.შანიძის რედაქციით, თბ., 1945;

- 
7. ახალი აღთქმა. წმ. გიორგი მთაწმინდელის რედაქციის კრიტიკულად დადგენილი ტექსტის პირველი სრული გამოცემით, (1995);
  8. მცხეთური ხელნაწერი, (1983) ელ. დოჩანაშვილისა და ზ. სარჯველადის რედაქციით; მცხეთური ხელნაწერი, (1986) ელ. დოჩანაშვილის და ზ. სარჯველადის რედაქციით;
  9. წიგნი ძუელისა აღთქმისანი, ნაკვეთი I-ით, წიგნი შესაქმისა და წიგნი გამოსლვათა, (1989) ბ. გიგინეიშვილისა და ც. კიკვიძის რედაქციით;
  10. საქმე მოციქულთა, აღ. აბულადისა და ა. შანიძის რედაქციით, (1950);
  11. კათოლიკე ეპისტოლენი, ქ. ლორთქიფანიძის და ა. შანიძის რედაქციით, (1956);
  12. პავლენი, ქ. ძოწენიძის, კ. დანელიასა და ა. შანიძის რედაქციით, (1961);
  13. გამოცხადება, ივ. იმნაიშვილისა და ა. შანიძის რედაქციით, (1961).
  14. ქართული ოთხთავის ბოლო ორი რედაქცია, ივ. იმნაიშვილის გამოცემა, თბ., 1980;
  15. ხანმეტი ტექსტები, I გამოსცა ლ.ქაჯაიამ, თბ., 1984;
  16. ადიშის ოთხთავი 897 წლისა, ზ.სარჯველადის საერთო რედაქციით, თბ., 2003.
  17. კ. დანელია, პავლეს ეპისტოლეთა ძველი ქართული რედაქციების წარმომავლობის საკითხი: ნარკვევები ქართული სამწერლობო ენის ისტორიიდან, თბ., 1998, გვ.342-382.
  18. კ.დანელია, ევთალეს სტიქომეტრიის ძველი ქართული რედაქციები:იქვე, გვ. 214-308.
  19. ივ. იმნაიშვილი, ადიშის ოთხთავი რედაქციულად, თსუ შრომები, XXVIII თბ., 1946
  20. ივ. იმნაიშვილი, ქსნის ოთხთავის რედაქცია, ლიტერტურული ძიებანი, V, თბ., 1049
  21. ივ. იმნაიშვილი, ტბეთის ოტთავი,ძველი ქართული ენის კათედრის სრომები, 20, 1977
  22. ივ. იმნაიშვილი, უძველესი ქართული ხელნაწერები ავსტრიაში, თბ., 2004
  23. საქმე მოციქულთა, ილ.აბულადის გამოცემა, 1950;
  24. პავლეს ეპისტოლეთა ქართული ვერსიები, ძველი ქართული ენის კათედრის შრომები, 16, თბ., 1974;
  25. კათოლოკე ეპისტოლეთა ქართული ვერსიები, ძველი ქართული ენის კათედრის შრომები, 9, თბ., 1956, ქ. ლორთქიფანიძის გამოცემა, 1956;

- 
26. იოანეს გამოცხადება და მისი თარგმანება, ძველი ქართული ვერსია, ძველი ქართული ენის კათედრის შრომები, 7, თბ., 1961.
  27. წმ. იოანე ოქროპირი, თარგმანება მათეს სახარებისა , თარგამანი წმ. ექვთიმე მთაწმიდელისა, წიგნი I, თბ., 1996 წ. (ლაბორატორია „ორიონის“ თანამშრომლებთან ერთად), 325 გვერდი.
  28. წმ. იოანე ოქროპირი, თარგმანება მათეს სახარებისა, თარგამანი წმ. ექვთიმე მთაწმიდელისა, წიგნი II, თბ., 1996 წ. (ლაბორატორია „ორიონის“ თანამშრომლებთან ერთად), 337 გვერდი.
  29. ე. კოჭლამაზაშვილი, სამოციქულოს განმარტების ქართულ ენაზე თარგმნის ისტორიიდან; „რელიგია“, 1995, #10-11-12,
  30. ე.კოჭლამაზაშვილი, სამოციქულოს თარგმანების შესწავლის სიახლენი ( ეფრემ მცირის ორი უცნობი ანდერძი),გაზ. „ჩემი სკოლა“, 1996, #1
  31. ე. კოჭლამაზაშვილი, ეფრემ მცირის კიდევ ერთი უცნობი ანდერძი: მცირე საეკლესიო კალენდარი 1999 წლისათვის, თბ., 1999, გვ.31-32.
  32. ე. მაჭავარიანი, ვანის ოთხთავის ახალადადმოჩენილი პირი, ხელნაწერთა ინსტიტუტის მოამბე, III, 1961
  33. ე. მაჭავარიანი, შავი მთის მწიგნობრული სკოლის მხატვრული ტარდიციების ასახვა მე-12 საუკუნის გელათის ოთხთავში, მარავალთავი, XIX, 2001
  34. ე. მაჭავარიანი, ალავერდის ოთხთავი, გელათის მეცნიერებათა აკადემიის ჟურნალი „ინტელექტი“: N 8, 2003.
  35. პავლეს ეპისტოლეთა განმარტება გამოკრებული იოანე ოქროპირისა და სხვა წმიდა მამათა თხზულებებიდან თარგმნილი ექვთიმე მთაწმიდელის მიერ, ტექსტი გამოსაცემად მოამზადადა გამოკვლევ დაურთო ე.კოჭლამაზაშვილმა, თბ., 2003
  36. პავლეს ეპისტოლეთა განმარტება გამოკრებული იოანე ოქროპირისა და სხვა წმიდა მამათა თხზულებებიდან თარგმნილი ეფრემმცირის (კარიჭის ძის) მიერ, ტექსტი გამოსაცემად მოამზადა და წინასიტყვაობა დაურთო ე.კოჭლამაზაშვილმა, თბ., 2003

- 
37. მ. რაფავა, ბიბლიის წიგნთა ინდექსები ძველ ქართულ მწერლობაში, ქრისტიანობის 20 საუკუნე საქართველოში, თბ., 2004.
  38. ზ.სარჯველაძე, წყაროსთავის ოთხთავი და ქართული ოთხთავის ეფთვიმესეული რედაქციის საკითხები, ძველი ქართული ენის კათედრის შრომები, 29, თბ., 2002.
  39. ზ. სარჯველაძე, ადიშის ოთხთავის ტექსტისა და ენის საკითხები, ადიშის ოთხთავი 897 წლისა, თბ., 2003
  40. ს. სარჯველაძე, ადიშის ოთხთავის მიმართებისათვის ოთხთავის სხვა რედაქციებთან, ადიშის ოთხთავი 897 წლისა, თბ., 2003
  41. ს. სარჯველაძე, ხანმეტი დედნიდან გადწერილი ოთხთავის ერთი XI საუკუნის ხელნაწერისშესახებ: ენათმეცნიერების აკითხები, III, თბ., 2002
  42. სინური ოთხთავი 978–979 წწ. ე. გიუნშვილის გამოცემა. თბ., 2010
  43. ანზანდილის სახარება – ოთხთავის IX საუკუნის ხელნაწერი, ტექსტი გამოსაცემად მოამზადა მანანა მაჩხანელმა. თბ., 2010
  44. ც. ქურციკიძე, ქართული ვერსიები აპოკრიფებისა და მოციქულთა შესახებ, თბ., 1959
  45. ა. შანიძე, იაკობის პირველსახარების ხანმეტი ნაწყვეტები, თსუ ძვ. ქართ. ენის კათედრის შრომები, 20, თბ., 1977
  46. ე.ჭელიძე, წმინდა წერილის ძველი ქართულად თარგმნა-რედაქტირების ძირითადი ეტაპები: ქრისტიანობის XX საუკუნე საქართველოში, თბ., 2004.
  47. ზ.ჭუმბურიძე, ქართული ხელნაწერების კვლადლოვალ, თბ.,2000.
  48. ა. ხარანაული, ბიბლიის ქართული თარგმანების დედანი და კვლევის მეთოდოლოგიური პრობლემები, ჟურნალი „ინტელექტი“, 2003, N 9
  49. ქართული ოთხთავის სიმფონია–ლექსიკონი, შედგენილი ივ. იმნაიშვილის მიერ, თბ., 1980
  50. სამოციქულოს სიმფონია–ლექსიკონი, ლ. ბარამიძის რედაქციით, თბ., 2009
  51. William D. Mounce, The Analytical Lexicon to the Greek New Testament, Publisher: Zondervan Publishing Company 1993.

---

52. Warren C. Trenchard, Complete Vocabulary Guide to the Greek New Testament, Publisher: Zondervan Publishing Company; Rev edition, 1998.

## ბ ი ბ ლ ი ო გ რ ა ფ ი ა

1. ილია II სრულიად საქართველოს კათოლიკოს – პატრიარქი. ქადაგებანი, ტ. I-II. თბ. 1997.
2. ილია II სრულიად საქართველოს კათოლიკოს – პატრიარქი. ღმერთი. საქართველოს ეკლესიის კალენდარი. საქართველოს საპატრიარქოს გა-ბა, თბ. 1990
3. იოანე ოქროპირი. მათეს სახარების განმარტებები. I-II ტომი თბილისი. 1995-97
4. ფსევდო-დიონისე არეოპაგელი (პეტრე იბერიელი). ს. ენუქაშვილის გამოცემა. თბილისი 1961.
5. წმ. დიონისე არეოპაგელი. ზეციური იერარქია. საღვთისმეტყველო კრებული, თბილისი 1987. თარგმანი ე. ჭელიძისა
6. ნემესიოს ემესელი, ბუნებისათვის კაცისა (იოანე პეტრიწის თარგმანი). გამოსცა ს. გორგაძემ. თბილისი 1914
7. იოანე პეტრიწი. შრომები. ტ. I. თბილისი 1940. ტ. II, თბილისი .1937
8. იოანე პეტრიწის «განმარტება», თანამედროვე ქართულ ენაზე თარგმანი, გამოკვლევა და შენიშვნები დამანა მელიქიშვილისა, თბილისი 1999
9. წმ. იოანე დამასკელი. მართლმადიდებლური სარწმუნოების ზედმიწევნითი გადმოცემა., თბილისი 2000
10. ბასილი დიდი, ექუსთა დღეთაჲ, ტექსტი გამოსცა და გამოკვლევა და ლექსიკონი დაურთო მ. კახაძემ. თბილისი 1947
11. დ. მელიქიშვილი, ძველი ქართული ფილოსოფიურ-თეოლოგიური ტერმინოლოგიის ისტორიიდან. თბილისი 1999
12. ევსევი კესარიელი. საეკლესიო ისტორია. თბილისი, 2007
13. ექვთიმე ათონელი, მცირე სჯულისკანონი, გამოსაცემად მოამზადა ე. გიუნაშვილი, გამ. „მეცნიერება“, თბილისი, 1973
14. კლიმენტი ალექსანდრიელი “სტომატა”. წიგნი V, თავი X, “გზა სამეუფეო”, 1992 №2. რედ. ე. ჭელიძე.
15. ნეტ. ავგუსტინე, ქადაგებები; <https://temurkikava.wordpress.com/2013/03/09>
16. ნეტ. ავგუსტინე, შეგონებანი; <https://saba.com.ge/books/details/>
17. შუა საუკუნეების ფილოსოფიის ისტორიის პრობლემები. I. თბილისი 1981.
18. არეოპაგიტული კრებული. თბილისი 1983.

- 
19. პლატონის დიალოგები „ფედონი“, „ფედროსი“, „სოკრატეს აპოლოგია“, „ნადიმი“, „სახელმწიფო“, „პარმენიდე“, „ტიმაიოსი“. თარგმანი ბ. ბრეგაძისა; თბ 1989:
  20. ლ. ალექსიძე, ნეოპლატონური ფილოსოფია: პლოტინი და იამბლიქოსი. ტექსტები, თარგმანი, განმარტებები. თბილისი, ლოგოსი 2009.
  21. ლ. ალექსიძე, იოანე პეტრიწი და ანტიკური ფილოსოფია, თბილისი 2008
  22. შ. ნუცუბიძე. ქართული ფილოსოფიის ისტორია. ტ. I, თბილისი 1956, ტ. II, თბილისი 1958.
  23. ქართული ფილოსოფიური აზრის ისტორია (რედ.მ. მახარაძე). ტ. I-IV. თბილისი 2012
  24. მ. ჭელიძე. ელინიზმის ფილოსოფია ადრინდელი ქრისტიანობის ეპოქაში. თბილისი 1998.
  25. მ. ჭელიძე, რ. გორდეზიანი. ძველი აღმოსავლეთის ფილოსოფია. თბ. 2001.
  26. ა. შტეკლი, შუა საუკუნეების ფილოსოფიის ისტორია, თბილისი 1994.
  27. ერაზმ როტერდამელი, მშვიდობის ჩივილი, ლათინურიდან თარგმნა, წინასიტყვაობა და შენიშვნები დაურთო გ. კუტალიამ. თბილისი 1990.
  28. რენე დეკარტი, მეტაფიზიკური განაზრებანი, თბ., 1955.
  29. რ.გორდეზიანი ბერძნული ცივილიზაცია. თბ. 1988.
  30. მ. ელიაძე. მითის ასპექტები. ილია უნ-ის გამ-ბა 2010.
  31. მ. ელიაძე. მითოსი -პარადიგმული მოდელი. ჟ."კლდეკარი"1996.
  32. კ.გ. იუნგი. ფსიქოლოგია და რელიგია. თბ. "დიოგენე" 201.3
  33. ბ. მალინოვსკი. მაგია, მეცნიერება, რელიგია. შესავალი თანამედროვე აზროვნებაში. თბ. 2007.
  34. ბ. პასკალი. აზრები. მთარგ. ბ. ბრეგაძე, თბ. 1983.
  35. ი. კანტი. რელიგია მხოლოდ გონების საზღვრებში. თბ. 1979
  36. ი.კანტი.ზნეობის მეტაფიზიკის დაფუძნება. გამ-ბა"Carpe diem" თბ. 2013. თარგ. ლ. რამიშვილმა.
  37. ი.კანტი/ მ. ფუკო. რა არის განმანათლებლობა?. ილიას უნ-ტის გამ-ბა, 2012, თარგმანი გ. ზედანიასი
  38. ნ. გეიზლერი. ქრისტიანული ეთიკა. თბ., 2003.
  39. რ. გუარდინი. რელიგია და გამოცხადება. თბ; 2008. მთარგ. ვ. რცხილაძე
  40. ძველი აღმოსავლეთის ხალხთა ისტორია. გ. მელიქიშვილის რედაქციით. თბ. 1988.
  41. მ. კვესელავა, ას ერგასის დღე, ტ.II თბ. 1970
  42. მიხეილ თამარაშვილი - ისტორია კათოლიკობისა საქართველოში. ტფ; 1902.
  43. გ.ვ.ფ. ჰეგელი, გონის ფილოსოფია. თბილისი, მეცნიერება, 1984 წ.
  44. კ.გამსახურდია, ტ. VIII, გამოცემა „საბჭოთა საქართველო“, თბილისი,1985.
  45. მ.ფუკო, სიტყვები და საგნები, თბ; 2004

- 
46. არქიმანდრიტი პოლიკარპე ჩიტულესკუ - წმ. ანთიმოზ ივერიელის მიერ დაბეჭდილი რუმინული სამღვდელო წიგნები, კრ. „ფილოსოფიურ-თეოლოგიური მიმომხილველი“ N4, თსუ გამ-ბა. თბ; 2 014.
  47. ნ. ნათაძე. თომა აქვინელის ფილოსოფია. თბ. 1973.
  48. ნ. ბელქანია, სინდისი და პასუხისმგებლობა. თბ; 2011. გამ-ბა ”აწმყო.”
  49. დეკანოზი თაიმურაზ უიარაღო. იესო ქრისტეს სახელი მსოფლიო ლიტერატურაში. (სახარებისეული ინტერპრეტაციები) თბ. ; 2012
  50. დეკანოზი თაიმურაზ უიარაღო. რელიგიების ისტორია. თბ. ;2010
  51. ვ. ნადირაძე. მსოფლიოს რელიგიები. თბ;. 2008
  52. ზ. კვიციანიძე, საუბრები ბიბლიაზე. თბ; 1969.
  53. მ. ჰაიდეგერი. ნიცშეს სიტყვა ”ღმერთი მოკვდა”, წერილი ჰუმანიზმის შესახებ. თბ 2012. გ-ბა ”მერიდიანი”.მთარგ. ვ. რამიშვილი
  54. ვ. რამიშვილი. ადამიანი და ხვედრი. თბ. 2002
  55. ვ. რამიშვილი. ჰაიდეგერი და ქრისტეს პარადიგმა. ჟ.”რელიგია” #1-3. 2007
  56. თ. ბუაჩიძე ჰეგელის რელიგიის ფილოსოფია; კრებული: რელიგიის ფილოსოფია თბ.1993
  57. ლ.ფოიერბახი, ქრისტიანობის არსება თბ;.1963
  58. კასირერი ე. რა არის ადამიანი?! თარგმანი ლ. რამიშვილის თბ.1995
  59. დიურკჰეიმი ე. რელიგიის ელემენტარული ფორმები, თბ.2003
  60. ლ. შტრაუსი. იერუსალიმი და ათენი. მთარგ. გ. ხუროშვილი. თბ. 2013
  61. მ. ჰორკჰაიმერი, თ. ადორნო. განმანათლებლობის დიალექტიკა. თბ. 2012. მთარგ.დ. დუმბაძე
  62. მოძღვარი ეკჰარტი. გერმანული ქადაგებანი. ფილოსოფიური განაზრებანი. თბ. 2001, I. მთარგ. მ. ბერიაშვილი
  63. ბ. მოიზიში. ნიკოლაუს კუზელი: De coniecturis. ფილოსოფიური განაზრებანი. თბ. 2001, I. მთარგ. გ. ზედანია
  64. როლან ბარტი. მითოლოგიები. თბ. 2011. გამ-ბა აგორა. მთარგ. ნ. მთივლიშვილი
  65. ალექსანდრე მენი, მსოფლიოს სულიერი კულტურა. თბ. 2012,
  66. ქართლის ცხოვრება, ტომი I, ტექსტი დადგენილი ყველა ძირითადი ხელნაწერის მიხედვით ს. ყაუხჩიშვილის მიერ, გამომცემლობა „სახელგამი“, თბილისი
  67. ქართული სამართლის ძეგლები, ტომი II, საერო საკანონდებლო ძეგლები (X-XIX სს.), ტექსტები გამოსცა, შენიშვნები და საძიებლები დაურთო პროფ. ი. დოლიძემ, გამომცემლობა „მეცნიერება“, თბილისი, 1965.
  68. ზურაბ გაიპარაშვილი, ანთიმოზ ივერიელის გერბი. გამომცემლობა "საარი", თბილისი, 2005.
  69. საქართველოს კონსტიტუცია, სახელმწიფოს უზენაესი კანონი, გამოქვეყნებული ჟურნალში „ადვოკატი-მეოხი“, თბილისი, 2001.



- 
70. მართლმადიდებელი ეკლესიის კანონები ეპისკოპოს ნიკოდიმის (მილაში) განმარტებით, გამომცემლობა „ალილო“, თბილისი, 2007.
  71. დიდი სჯულის კანონი, თბ; 2004.
  72. მთავარეპისკოპოსი ანანია ჯაფარიძე, საქართველოს სამოციქულო ეკლესიის ისტორია, ტომი III, გამომცემლობა “მერანი”, თბილისი, 1999.
  73. ოთარ გვინჩაძე, ანთიმ ივერიელი: მესტამზე და პოლიტიკური მოღვაწე; გამ-ბა , „მეცნიერება“, თბილისი; 1973.
  74. ივანე ჯავახიშვილი, ქართული სამართლის ისტორია, წიგნი I, ტფილისის უნივერსიტეტის გამოცემა, ტფილისი, 1928.
  75. შანიძე ქ. ქართული სტამბის ისტორიისათვის // ლიტერატურული მემკვიდრეობა. თბილისი, 1935.
  76. შარაშიძე ქ. პირველი სტამბა საქართველოში (1709-1722). თბილისი, 1955.
  77. კურდღელაშვილი შ. ქართული სტამბის ისტორიიდან. თბილისი, 1959.
  78. საქართველო და ევროპული სამყარო, ფილოსოფიურ-კულტურული დიალოგი, ტ.1 თბ. 2009.
  79. თ. ადარნო და მ. ჰორკვაიმერი, განმანათლებლობის დიალექტიკა, თბილისი, 2012.
  80. Antim Ivireanu, *Opere*, ediție critică și studiu introductiv de Gabriel Ștrempel, Bucuresti, Editura Minerva, 1972
  81. Antim Ivireanu, *Didahii*, Litera Chisinau 1998
  82. Antim Ivireanul, *Opere*, Editura "Minerva", Bucuresti, 1997
  83. Antim Ivireanu ,*Didahii*, Minerva Florin FAIFER, Postfatd la volumul: Antim Ivireanul. *Didahii*. Bucuresti, Editura Minerva, 1983, Anthologie realizita in redactie de Mihai Dascal
  84. Arhim. Sofian Boghiu, *Sfântul Antim Ivireanul și Mănăstirea Tuturor Sfinților*, Editura Bizantină, București, 2005, 172 pagini, format album (Reproduce pentru prima dată integral și în polichromie manuscrisul Mitropolitului Antim *Chipurile Vechiului și Noului Testament*, aflat la Kiev)
  85. Emile Picot, *Notice biographique et bibliographique sur l'imprimeur Anthime d'Ivir, metropolitaine de Valachie*, în *Nouveaux Melanges Orientaux ...*, Paris, 1886, paginile 513-560;
  86. Ștefan Dinulescu, *Viața și activitatea mitropolitului Țării Românești Antim Ivireanul*, Cernăuți, 1986, 100 de pagini (extras din "Candela");
  87. Nicolae Dobrescu, *Viața și faptele lui Antim Ivireanul, mitropolitul Ungrovlahiei*, București, 1910, 119 pagini;
  88. Gabriel Popescu, *Mitropolitul Ungrovlahiei Antim Ivireanul, cărmuitor bisericesc și propovăduitor al Evangheliei*, în ST, an. XX, 1969, nr. 1 - 2, p. 5 - 97 (și extras);
  89. Adina Chirilă, *Limba scrierilor lui Antim Ivireanul. Partea I. Fonetica, Morfologia*, Iași, EUAIC, 2013, 240 p.

- 
90. Damian P. Bogdan, *Viața lui Antim Ivireanul*, în BOR, anul LXXIV, 1956, nr. 8 - 9; alte studii în același număr al revistei;
  91. BĂDESCU, Ilie, *Sincronism european și cultură critică românească*, Cluj-Napoca, Ed.Dacia, 2003.
  92. VIANU, Tudor, *Filozofia culturii*, București, Ed. Eminescu, 1982, BRAGUE, Remi, *Europe, la voie romaine*, Criterion, 2001.
  93. NOICA, Constantin, *Modelul cultural european*, București, Humanitas, 1993.
  94. Mircea, *Introducere la Bogdan Petriceicu Hașdeu, Scrieri literare, morale și politice*, Ed.critică de Mircea Eliade, București, 1937,
  95. Georgeta MARGHESCU, "Anthem Iverianul and European Identity Building of Romanian Culture" in "Anthem Iverianul-Georgian-Romanian in" Georgia and European World-Philosophical-Cultural Dialogue" Tb. 2008. pp.97-102.
  96. Preot Nicolae Șerbănescu, *Antim Ivireanul tipograf*, paginile 690-760;
  97. Victor Brătulescu, *Antim Ivireanul miniaturist și sculptor*, paginile 766-774;
  98. Preot Profesor Alexandru I. Ciurea, *Antim Ivireanul predicator și orator*, paginile 775-817;
  99. Preot Profesor Ioan Rămureanu, *Antim Ivireanul luptător pentru Ortodoxie*, paginile 831-853;
  100. Profesor Teodor M. Popescu, *Antim Ivireanul, apostol și mucenic al dreptei credințe*, paginile 853-863;
  101. Ioan Nanu, *Un monument istoric și de artă religioasă, ctitoria lui Antim*, în BOR, anul LXXXIX, 1961, nr. 3 - 4, paginile 223 -318;
  102. Preot Profesor D. Belu, *Predicile lui Antim Ivireanul*, în MA, anul VIII, 1963, nr. 1-3, paginile 188-212;
  103. Aurelian Sacerdoțeanu, *Antim Ivireanul arhivist, bibliotecar și topograf*, în Glasul Bisericii, anul XXII, 1963, nr. 9- 10, paginile 862-990 și anul XXIII, 1964, nr. 3-4, paginile 223-244;
  104. Mario Ruffini, *II metropolita Valacco Antim Ivireanul*, în Oikumenikon, 1966, volumul III, paginile 357-398;
  105. Gabriel Ștrempel, *Un cronograf ilustrat atribuit mitropolitului Antim Ivireanul*, în Românoslavica, anul XIII, 1966, paginile 309-353;
  106. Dan Simonescu, *Antim Ivireanul scriitorul*, în Analele Academiei R.S.R., 1966, paginile 663-675;
  107. Stelian Izvoranu, *Antim Ivireanul sfătuitor și îndrumător pentru preoți și duhovnici*, în BOR, anul LXXXIV, 1966, nr. 9 - 10, paginile 971-981 (alte studii tot acolo);
  108. Preot Nicolae Șerbănescu, *Mitropolitul Antim Ivireanul*, în MO, anul XVIII, 1966, numărul 910, paginile 771-911 (alte studii tot acolo);
  109. Preot Profesor Teodor Bodogae, *Personalitatea mitropolitului Antim Ivireanul*, în MB, anul XVI, 1966, numerele 7 - 9, paginile 467-482;

- 
110. Mircea Păcurariu, *Importanța mitropolitului Antim Ivireanul pentru Biserica și cultura românească*, în MB, anul XVI, 1966, numerele 7 - 9, paginile 493-515 (alte studii în același număr);
  111. Preot Profesor Sofron Vlad, *Mitropolitul Antim Ivireanul*, în MA, anul XI, 1967, numerele 1 - 3, paginile 43-81;
  112. Profesor Iorgu Ivan, *Nulitatea actului de caterisire a mitropolitului Antim Ivireanul*, în în MA, anul XI, 1967, numerele 1 - 3, paginile 147-179;
  113. Eugen Negrici, *Antim, logos și personalitate*, București, 1971, 262 pagini (analiza Didahiilor);
  114. *Dicționarul literaturii române de la origini până la 1900*, București, 1979, paginile 42-44;
  115. Mircea Păcurariu, *Istoria Bisericii Ortodoxe Române*, volumul II, București, 1981, paginile 143–161 (ediția a II-a, București, 1994, paginile 141-160)
  116. Bejan S., *Raporturile dintre Biserică și Stat*, în „Biserica Ortodoxă Română”, Anul XL, No. 2 (488), noiembrie, 1921
  117. Preot Prof. Dr. Liviu Stan., *Relațiile dintre Biserică și Stat*, în „Ortodoxia”, Anul IV, No. 3-4, 1952
  118. Gabriel Ștrempel, *Antim Ivireanul*, Editura Academiei Române, București, 1997
  119. Arhidiacon prof. dr. Ioan N. Floca, *Drept Canonic Ortodox, Legislație și Administrație Bisericească*, Vol. I, Editura Institutului Biblic și de Misiune al Bisericii Ortodoxe Române, București, 1990
  120. Gen. Conf. Univ. Dr. Mircea Mureșan, *Strategia de securitate națională în condițiile noului mediu global de securitate*, în volumul „Omagiu Profesorului Nicolae V. Dură la 60 de ani”, Editor și coordonator, Prof. Univ. Dr. Teodosie Petrescu, Editura Arhiepiscopiei Tomisului, 2006, p. 844-846
  121. Conf. Univ. Dr. Niculae Neagu, *Conflictele armate internaționale contemporane și Dreptul Internațional Umanitar*, în volumul „Omagiu Profesorului Nicolae V. Dură la 60 de ani”, Editor și coordonator, Prof. Univ. Dr. Teodosie Petrescu, Editura Arhiepiscopiei Tomisului, 2006, p. 961-965
  122. Lect. Univ. Drd. Mihai Ionita, *Crima organizată transnațională – o amenințare pentru piața mondială*, în volumul „Omagiu Profesorului Nicolae V. Dură la 60 de ani”, Editor și coordonator, Prof. Univ. Dr. Teodosie Petrescu, Editura Arhiepiscopiei Tomisului, 2006, p. 1061-1063.
  123. Șerbănescu N. *Antim Ivireanul tipograf* // Biserica Ortodoxă Română. București, 1956. Vol. 74. № 8-9. P. 690-766; idem. *Înca o carte tipărită de mitropolitul Antim Ivireanul* // Ibid. 1976. Vol. 94. № 3-4. P. 349-355;
  124. Nanu I. *Un monument istoric de artă religioasă: ctitoria mitropolitului Antim Ivireanul* // Biserica Ortodoxă Română. 1961. Vol. 79. № 3-4. P. 223-318;
  125. Albala R. *Antim Ivireanul și vremea lui*. București, 1962;
  126. Ruffini M. *Il mitropolitano Valacco Antim Ivireanul* // Οἰκουμηνικόν. 1966. Vol. 3. P. 357-398;
  127. Negrici E. *Antim, logos și personalitate*. București, 1971;

- 
128. Păcurariu M. Mitropolitul Antim Ivireanul // Istoria Bisericii Ortodoxe Române. București, 1994. Vol. 2. P. 141-160.
129. SUICER, *Thesaurus ecclesiasticus, a patribus graecis ordine alphabetico exhibens quaecumque phrases, ritus, dogmata, haereses et hujusmodi alia spectant* (2 vols., Amsterdam, 1682; again 1728; and Utrecht, 1746).
130. N. Chitescu, I. Tudoran și I. Petreună, *Dogmatică și Simbolică*, Ed. IBMBOR, București,
131. N. V. Dură, Monahii, al treilea element constitutiv al Bisericii, in *Biserica Ortodoxă Română*, CXXI (2003), nr. 7-12, p. 469-483.
132. L. Blaga, *Religie și spirit*, in *Filozofie și religie în evoluția culturii române moderne*, vol. II, Ed. Științifică și Enciclopedică, București, 1984
133. Corneliu Mircea, *Discurs despre ființă*, Ed. Cartea românească, București, 1987.
134. Sg. Ioan Gură de Aur, *Expositio in psalmum*, 147, 3, in P.G., LV, 482.
135. Camil, Alina. “Antim Ivireanul, *Dumnezeieștile și sfintele Liturghii (Divine and Holy Liturgies)* (Târgoviște, 1713). Text edition and philological – linguistic study” București, 2012.
136. N. V. Dură, Origen, *Selected Works, Part Three*, Bucharest, 1982.
137. L. Blaga, *Religie și spirit*, in *Filozofie și religie în evoluția culturii române moderne*, vol. II, Ed. Științifică și Enciclopedică, București, 1984.
138. Corneliu Mircea, *Discurs despre ființă*, Ed. Cartea românească, București, 1987.
139. Sg. Ioan Gură de Aur, *Expositio in psalmum*, 147, 3, in P.G., LV, 482.
140. Mihail Stanciu, *Consideratii despre originea Sfântului Antim Ivireanul*, სამეცნიერო ჟურნალში “*Ortodoxia*”, #3 / 2012 .
141. Mihail Stanciu, *Descoperiri recente referitoare la venirea Sfântului Antim Ivireanul in Tarile Romanesti*, სამეცნიერო ჟურნალში “*Ortodoxia*”, #1 / 2014.
142. О. Ш. Гвинчидзе, *Антим Ивериец*, “Мецნიереба”, Тбилиси, 1989
143. Павлов А.С., *Курс Церковного Права*, „Лань”, Санкт – Петербург, 2002
144. Шишков А. М., *Концепция трёх источников легитимной власти по Владимиру Соловьёву*, в “XV Ежегодная богословская конференция православного Свято-Тихоновского гуманитарного университета”, Том 2, материалы, 2005
145. Ф. Брокгауз, Н. Ефрон, *Энциклопедический словарь*, Т. XXVII.
146. Ф. Джинджихашвили, *Антимоз Ивериели Жизнь и творчество.*, Тб. 1967.
147. Anthimus of Iberia", *Encyclopedia Britannica*, 2007 edition.
148. Nicolae Iorga, About Anthim the Iberian, in B.O.R., year LV 1937,
149. T. Dundua. *Georgia within the European*. Tb. 1999.

- 
150. Hegel: Lectures on the Philosophy of Religion, three volumes, ed. Peter C. Hodgson, trans. R. F. Brown, P. C. Hodgson, and J. M. Stewart, with the assistance of H. S. Harris, Oxford: Oxford University Press, 2007.
  151. Adams, M.M., *Horrendous Evils and the Goodness of God*, Ithaca: Cornell University Press. 1999.
  152. Adams, Robert M. *The Virtue of Faith And Other Essays in Philosophical Theology*.1987
  153. Anderson, P.S., *Re-visioning Gender in Philosophy of Religion: Reason, Love, and Our Epistemic Locatedness*, Burlington: Ashgate. 2012.
  154. Augustine, *The City of God*, translated by H. Bettenson, Harmondsworth: Penguin, 1972.
  155. Bagger, M. *Religious Experience, Justification, and History*, Cambridge: Cambridge University Press. 1999.
  156. Barrett, Justin. *Why Would Anyone Believe in God?*, Lanham, MD: Altamira Press. 2004
  157. Burson, Jeffrey D. *The Rise and Fall of Theological Enlightenment*; University of Notre Dame Press. Notre Dame, Indiana. 2010.
  158. Beaty, M. (ed.),. *Christian Theism and the Problems of Philosophy*, Notre Dame: University of Notre Dame Press. 1990
  159. Brown, D., *Continental Philosophy and Modern Theology*, Oxford: Blackwell. 1987.
  160. Maria Cornelia Barliba, *Antim Iverianul-a model of intercultural Dialoue, Georgia and the European World- Pilosophical-Cultural Dialogue*, Tb. 2009
  161. Caputo John D. *Philosophy and Theology*. Abingdon Press. 2006
  162. Clayton, J., *Religions, Reasons and Gods: Essays in Cross-Cultural Philosophy of Religion*, Cambridge: Cambridge University Press. 2006.
  163. Collins, R., "The Evidence for Fine-Tuning," in *God and Design: The Teleological Argument and Modern Science*, N. Manson (ed.), London: Routledge. 2003.
  164. —, *The Cosmological Argument from Plato to Leibniz*, New York: Barnes and Noble. 1980.
  165. Dorinda, O. *Panorama of the Enlightenment*. Getty Publications, 2006.
  166. Creel, R., *Divine Impassibility*, Cambridge: Cambridge University Press1995.
  167. Geivett, R. and Sweetman, B. (eds.), *Contemporary Perspectives on Religious Epistemology*, Oxford: Oxford University Press. 1992.
  168. Gellman, J., *Mystical Experience of God: A Philosophical Inquiry*, London: Ashgate. 2001.

- 
169. Goreanu Veniamin, The Personality of the Metropolitan Anthim of Hungro-Wallachia, საქართველო და ევროპული სამყარო, ფილოსოფიურ-კულტურული დიალოგი, ტ.1 თბ. 2009 წ.
170. Gutting, G., *Religious Belief and Religious Skepticism*, Notre Dame: Notre Dame University Press. 1982.
171. Gay, Peter. *The Enlightenment: An Interpretation*, W. W. Norton & Company, 1996.
172. Grell, Ole Peter; Porter, Roy. *Toleration in Enlightenment Europe*. Cambridge University Press. 2000.
173. Greensides F, Hyland P. *The Enlightenment*. Cambridge University Press. 2002.
174. Israel, Jonathan. *Democratic Enlightenment: Philosophy, Revolution, and Human Rights, 1750–1790*; Cambridge University Press. 2011.
175. Ingraffia, Brian D. *Postmodern theory and biblical theology: vanquishing God's shadow*. London: Routledge. 1995.
176. Fitzpatrick, Martin. *The Enlightenment World*. 39 essays by scholars. University of Chicago Press, 2004.
177. Everitt, N., *The Non-Existence of God*, London: Routledge. 2004.
178. Eliade, M. *The Sacred and the Profane: The Nature of Religion* (trans. Willard R. Trask), Harper Torchbooks, New York, 1961.
179. Eliade. M. *History of Religious Ideas*, vol. I, From the Stone Age to the Eleusinian Mysteries, translated: W. Trask, Chicago, IL: University of Chicago Press, 1978.
180. Eliade, M.A *History of Religious Ideas*, vol. II, From Gautama Buddha to the Triumph of Christianity, translated: W. Trask, Chicago, IL: University of Chicago Press, 1982.
181. Eliade, M. *The History of Religious Ideas*, vol. III, From Muhammad to the Age of the Reforms, translated: A. Hildebeitel and D. Apostolos-Cappadona, Chicago, IL: University of Chicago Press, 1985.
182. *Encyclopedia of Religion* (editor-in-chief), New York: Macmillan, 1987.
183. Habermas, Jürgen. *The Structural Transformation of the Public Sphere*, 1989.
184. Harkness Georgia. *Christian Ethics* . 1957 , Abingdon Press
185. Hare, J.E., *The Moral Gap*, Oxford: Oxford University Press. 1996.
186. Hazard, Paul. *European thought in the 18th century: From Montesquieu to Lessing* .1965.
187. Hampshire, Stuart. *Thought and Action* (London: Chatto and Windus, 1959
188. Kenny, A., *The God of the Philosophers*, Oxford: Clarendon Press. 1979.
189. McClellan James E, "Learned Societies," in *Encyclopedia of the Enlightenment*, ed. Alan Charles Kors . Oxford: Oxford University Press, 2003.
190. May, William E. *An Introduction to Moral Theology* ; 2nd edition , 2007.

- 
191. McQuilkin, R; Copan, P. "Labor and Management, Work and Leisure". *An Introduction to Biblical Ethics: Walking in the Way of Wisdom* (3rd ed.). 2014.
  192. Morris, T. V. *The Concept of God*, Oxford: Oxford University Press. 1987.
  193. Oppy, G., *Ontological Arguments and Belief in God*, Cambridge: Cambridge University Press. 1995
  194. Peterson Michael, Hasker William, Reichenbach Bruce, Basinger David, *Philosophy of Religion: Selected Readings*. Oxford University Press; 4 edition (November 20, 2009) 656 pages
  195. Plantinga, A., *The Ontological Argument: From St. Anselm to Contemporary Philosophers*, Macmillan, 1968
  196. Putnam, H., *Realism and Reason: Philosophical Papers*, Volume 3, Cambridge: Cambridge University Press. 1983.
  197. Reichenbach, B., *The Cosmological Argument*, Springfield, IL: Thomas Press 1972.
  198. Rumore, Paola. *From Theology to Philosophy: The Immortality of the Soul in Early German Enlightenment*, Turin, 2015.
  199. Reill, Peter Hanns, and Wilson, Ellen Judy. *Encyclopædia of the Enlightenment*. (2nd ed.) 2004.
  200. Placher William. *Essentials of Christian Theology*. Westminster John Knox Press; 2003.
  201. Servais Pinckaers, *The Sources of Christian Ethics* (Washington, D.C.: Catholic University of America Press, 1995
  202. Spary, Emma. "The 'Nature' of Enlightenment" in *The Sciences in Enlightened Europe*, William Clark, Jan Golinski, and Steven Schaffer, eds. Chicago: University of Chicago Press, 1999,
  203. Sarti, Roland. *Italy: A Reference Guide from the Renaissance to the Present*, Infobase Publishing, 2009.
  204. Schmidt, James, ed. *What is Enlightenment?: Eighteenth-Century Answers and Twentieth-Century Questions* . 1996.
  205. Stanford Encyclopedia of Philosophy, "Philosophy of Religion." 3.d ed. 2007
  206. Sessions, L., *The Concept of Faith: A Philosophical Investigation*, Ithaca: Cornell University Press. 1994.
  207. Soskice, J.M., *Metaphor and Religious Language*, Oxford: Oxford University Press. 1984
  208. Swinburne, R., *The Existence of God*, Oxford: Clarendon Press. 1979.
  209. Timothy C. Tennent, *Theology in the Context of Christianity. How The Global Church Is Influencing. The Way We Think About And Discuss Theology*. Zondervan. 2007.
  210. Thiselton, Anthony C. *The Living Paul: An Introduction to the Apostle and his Thought*. London: Society for Promoting Christian Knowledge. 2009.

- 
211. Taliaferro, C. and Meister, C., *The Cambridge Companion to Christian Philosophical Theology*, Cambridge: Cambridge University Press. 2010.
212. *The New Dictionary of Christian Ethics and Pastoral Theology IVP Academic. 1995*
213. Tillich Paul, *Theology of culture*. Oxford University Press. 1959.
214. Timothy C. Tennent, *Theology in the Context of Christianity. How The Global Church Is Influencing. The Way We Think About And Discuss Theology*. Zondervan, 2007.
215. Paul Davies, "The Synthetic Path," in *The Third Culture*, by John Brockman .New York: Simon and Schuster, 1995
216. Pinckaers Servais, *The Sources of Christian Ethics*. Washington, D.C.: Catholic University of America Press, 1995.
217. Paola Rumore, *From Theology to Philosophy: The Immortality of the Soul in Early German Enlightenment*, Turin, 2015.
218. Wainwright, W. (ed.), *God, Philosophy, and Academic Culture*, Atlanta: Scholars Press 1996
219. Walls, J.L. (ed.), *The Oxford Handbook of Eschatology*, Oxford: Oxford University Press. 2007.
220. Weber, Eugen. *Movements, Currents, Trends: Aspects of European Thought in the Nineteenth and Twentieth Centuries*, 1992.
221. Yolton, John W. et al. *The Blackwell Companion to the Enlightenment*. 1992.
222. Emile Picot - Notice biographique et bibliographique sur l'imprimeur Anthime d'Ivir, metropolitaine de Valachie, in: "Nouveaux Melanges Orientaux", Paris, 1886.
223. Mircea Eliade. *Histoire de croyances et des idees religuses*, Editions, Payot, Paris, 1978.
224. Harkness Georgia. *Christian Ethics* . 1957 , Abingdon Press

228. Hare, J.E., *The Moral Gap*, Oxford: Oxford University Press. 1996.



- 
229. Hazard, Paul. *European thought in the 18th century: From Montesquieu to Lessing*. 1965.
230. Hampshire, Stuart. *Thought and Action* (London: Chatto and Windus, 1959)
231. Kenny, A., *The God of the Philosophers*, Oxford: Clarendon Press. 1979.
232. McClellan James E, "Learned Societies," in *Encyclopedia of the Enlightenment*, ed. Alan Charles Kors . Oxford: Oxford University Press, 2003.
233. May, William E. *An Introduction to Moral Theology* ; 2nd edition , 2007.
234. McQuilkin, R; Copan, P. "Labor and Management, Work and Leisure". *An Introduction to Biblical Ethics: Walking in the Way of Wisdom* (3rd ed.). 2014.
235. Morris, T. V. *The Concept of God*, Oxford: Oxford University Press. 1987.
236. Oppy, G., *Ontological Arguments and Belief in God*, Cambridge: Cambridge University Press. 1995
237. Peterson Michael, Hasker William, Reichenbach Bruce, Basinger David, *Philosophy of Religion: Selected Readings*. Oxford University Press; 4 edition (November 20, 2009) 656 pages
238. Plantinga, A., *The Ontological Argument: From St. Anselm to Contemporary Philosophers*, Macmillan, 1968
239. Putnam, H., *Realism and Reason: Philosophical Papers*, Volume 3, Cambridge: Cambridge University Press. 1983.
240. Reichenbach, B., *The Cosmological Argument*, Springfield, IL: Thomas Press 1972.
241. Rumore, Paola. *From Theology to Philosophy: The Immortality of the Soul in Early German Enlightenment*, Turin, 2015.
242. Reill, Peter Hanns, and Wilson, Ellen Judy. *Encyclopædia of the Enlightenment*. (2nd ed.) 2004.
243. Placher William. *Essentials of Christian Theology*. Westminster John Knox Press; 2003.
244. Servais Pinckaers, *The Sources of Christian Ethics* (Washington, D.C.: Catholic University of America Press, 1995
245. Spary, Emma. "The 'Nature' of Enlightenment" in *The Sciences in Enlightened Europe*, William Clark, Jan Golinski, and Steven Schaffer, eds. Chicago: University of Chicago Press, 1999,
246. Sarti, Roland. *Italy: A Reference Guide from the Renaissance to the Present*, Infobase Publishing, 2009.
247. Schmidt, James, ed. *What is Enlightenment?: Eighteenth-Century Answers and Twentieth-Century Questions* . 1996.
248. *Stanford Encyclopedia of Philosophy*, "Philosophy of Religion." 3.d ed. 2007
249. Sessions, L., *The Concept of Faith: A Philosophical Investigation*, Ithaca: Cornell University Press. 1994.
250. Soskice, J.M., *Metaphor and Religious Language*, Oxford: Oxford University Press. 1984

- 
251. Swinburne, R., *The Existence of God*, Oxford: Clarendon Press. 1979.
252. Timothy C. Tennent, *Theology in the Context of Christianity. How The Global Church Is Influencing. The Way We Think About And Discuss Theology*. Zondervan. 2007.
253. Thiselton, Anthony C. *The Living Paul: An Introduction to the Apostle and his Thought*. London: Society for Promoting Christian Knowledge. 2009.
254. Taliaferro, C. and Meister, C., *The Cambridge Companion to Christian Philosophical Theology*, Cambridge: Cambridge University Press. 2010.
255. *The New Dictionary of Christian Ethics and Pastoral Theology IVP Academic. 1995*
256. Tillich Paul, *Theology of culture*. Oxford University Press. 1959.
257. Timothy C. Tennent, *Theology in the Context of Christianity. How The Global Church Is Influencing. The Way We Think About And Discuss Theology*. Zondervan, 2007.
258. Paul Davies, "The Synthetic Path," in *The Third Culture*, by John Brockman. New York: Simon and Schuster, 1995
- 259.** Pinckaers Servais, *The Sources of Christian Ethics*. Washington, D.C.: Catholic University of America Press, 1995.
260. Paola Rumore, *From Theology to Philosophy: The Immortality of the Soul in Early German Enlightenment*, Turin, 2015.
261. Wainwright, W. (ed.), *God, Philosophy, and Academic Culture*, Atlanta: Scholars Press 1996
262. Walls, J.L. (ed.), *The Oxford Handbook of Eschatology*, Oxford: Oxford University Press. 2007.
263. Weber, Eugen. *Movements, Currents, Trends: Aspects of European Thought in the Nineteenth and Twentieth Centuries*, 1992.
264. Yolton, John W. et al. *The Blackwell Companion to the Enlightenment*. 1992.
265. Emile Picot - Notice biographique et bibliographique sur l'imprimeur Anthime d'Ivir, metropolitaine de Valachie, in: "Nouveaux Melanges Orientaux", Paris, 1886.
266. Mircea Eliade. *Histoire de croyances et des idees religuses*, Editions, Payot, Paris, 1978.